

频



清 張廷玉 等撰

中 華 書 局

卷二五五至卷二六七(傳)第二二 册

# 明史卷二百五十五

## 列傳第一百四十三

劉宗周 祝淵 王毓著 黃道周 葉廷秀

於朝。 堊室中門外, 置,遂成疾。 攜之育外家。 劉宗周,字起東,山陰人。 又以貧故,忍而不治。 日哭泣其中。 後以宗周大父老疾,歸事之,析薪汲水,持藥糜。 服闋,選行人,請養大父母。 父坡, 爲諸生。 萬曆二十九年,宗周成進士, 母章氏姙五 遭喪,居七年始赴補。 月而坡亡。 然體孱甚,母嘗憂念之不 母卒於家。 旣生宗周,家酷貧, 宗周奔喪,爲 母以節聞

昌 不可,攻東林可也,黨崑、宣不可。」黨人大譁,宗周乃請告歸 、劉元珍,皆賢人。 時有崑黨、宣黨與東林爲難。 于玉立、丁元薦、較然不欺其志,有國 宗周上言『東林、顧憲成講學處。 士風。 諸臣摘流品 高攀龍、劉永澄、姜士 可也,爭意見

百四十三 劉宗周

列

傳第

賢責以矯情厭世,削其籍。 錄用 光祿丞、尚寶、太僕少卿,移疾歸。 高 諫 正弑君之罪,戮盧受以正交私之罪,戮楊鎬、李如楨、李維翰、鄭之范以正喪師失地之罪,戮 以天下委閹豎乎。」進忠者,魏忠賢也,大怒,停宗周俸半年。 出 臣三人,罰一人,皆出中旨,勢將指鹿爲馬,生殺予奪,制國 清議名賢丁元薦、李朴等,諍臣楊漣、劉重慶等,以作仗節徇義之氣。 、胡嘉楝、康應乾、牛維曜、劉國縉、傅國以正棄城逃潰之罪,急起李三才爲兵部尚書, 天 啓元年起儀制主事。 疏言:「魏進忠導皇上馳射戲劇,奉聖夫人出入自由。一 四年起右通政,至則忠賢逐東林且盡,宗周復固辭。 家大命。 尋以國法未伸,請戮崔文昇以 今東西方用 帝切責之。累遷 兵,奈何 舉逐 忠

|崇禎元年冬,召爲順天府尹。辭,不許。明年九月入都,上疏曰

陛下勵精求治, 育旰靡寧。 然程效太急,不免見小利而速近功, 何以致唐、 虞

之治。

之秋,竭天下之力以奉饑軍 布之,需以歲月,未有不望風東甲者。而陛下方銳意中興, 夫今日所汲汲於近功者,非兵事乎。誠以屯守爲上策,簡卒節餉,修刑政 今日所規規於小利者,非國計平。陛下留心民瘼,惻然痼療。 而軍愈驕,聚天下之軍以博一戰而戰無日,此計之左 刻期出塞。 而以司農告匱, 當此三空四盡 而威信 也。

列傳第一百四十三 劉宗周

時所講 之政絕,上官以催徵爲考課,而黜陟之法亡。 一切不問。 求者皆掊克聚斂之政。 敲扑 日峻,道路吞聲,小民至賣妻鬻子以應。 正供不足,繼以雜派。科罰不足,加以火耗。 欲求國家有府庫之財,不可得已。 有司以掊克爲循良,而撫字 水旱災傷,

業經昭雪,猶從東議,深文巧詆,絕天下遷改之途,益習爲頑鈍無恥,[1] 矯飾外貌以 欺陛下。 人有士君子之行,而無狗彘之心,所謂禁之於未然也。今一切詿誤及指稱賄賂者,卽 息,所以導之者未善也。 名實紊而法令滋。 功利之見動,而廟堂之上日見其煩苛。 士節日隳,官邪日著,陛下亦安能一一察之。 頃者,特嚴贓吏之誅,自宰執以下,坐重典者十餘人,而貪風 賈誼曰:「禮禁未然之先,法施已然之後。」誠導之以禮,將人 事事糾之不勝糾,人人摘之不勝摘 ", 於是 未盡

其人矣,求之太備,或以短而廢長,責之太苛,或因過而成悞。 走集事之人,以摘發爲精明,以告訐爲正直,以便給爲才諝,又安所得賢者而用之。 且陛下所以勞心焦思於上者,以未得賢人君子用之也。而所嘉予而委任者,率奔

之,猜忌之端遂從此起。 且陛下所擘畫,動出諸臣意表,不免有自用之心。 ,而使諸大夫國 夫恃一人之聪明,而使臣 人不得衷其是,則意見有時移。 下不得盡其忠,則耳目有 臣下救過不給,讒諂者因 方且爲內降,爲留中,何以追 時 壅;憑 而 間

喜起之盛乎? 數十年來,以門戶殺天下幾許正人,猶蔓延不已。 陛下欲折君子以平小

人之氣,用小人以成君子之公,前日之覆轍將復見於天下也。

仁義之化,陛下已一旦躋於堯、舜矣。 正此心,使心之所發,悉皆仁義之良,仁以育天下,義以正萬民,自朝廷達於四海,莫非 猜忌,猜忌不已,積爲壅蔽。正人心之危,所潛滋暗長而不自知者。 陛下求治之心,操之太急。醞醸而爲功利;功利不已,轉爲刑名;刑名不已,流爲 誠能建中立極,默

帝以爲迂濶,然歎其忠。

中官傳旨乃退。 乞陛下出御皇極門,延見百僚,明言宗廟山陵在此,固守外無他計。」俯伏待報, 人心稍安。 百官進馬。 未幾,都城被兵,帝不視朝,章奏多留中不報。 宗周曰:「是必有以遷幸動上者。」乃詣午門叩頭諫曰:「國勢强弱,視人心安危。 米價騰躍,請罷九門稅,修賈區以處貧民,爲粥以養老疾,嚴行保甲之法, 傳旨辦布靈八百,中官競獻馬騾,又令 自晨迄暮,

禹、湯罪己,與也勃焉。囊皇上以情面疑羣臣,羣臣盡在疑中,日積月累,結爲陰痞,識者憂 今日當開示誠心,爲濟難之本,御便殿以延見士大夫,以票擬歸閣臣,以庶政歸部、院, 時樞輔諸臣多下獄者,宗周言:「國事至此,諸臣負任使,無所逃罪,陛下亦宜分任咎。

古未有宦官 武 以 獻 健 上 可替否予言官。 不 啻驕 典 兵不 子, 漸使恩威錯置。 **悞國者。」又劾馬世龍、張鳳翼、吳阿衡等罪,忤帝意。** 不效,從而更置之,無坐錮以成其罪。 文武皆不足信, 乃專任 乃者朝廷縛文吏 內 臣 闖 以 外 次第委之。 如 孤 羅,而 自 視

三年以疾在告,進祈天永命之說,言:

願體 詔 疆 獄 失 上天好生之心,首除詔獄,且寬應昌,則祈天永命之一道也。 事 法 有 副 天之大者,莫過於重民命,則刑罰宜當宜平。 都 誅 御史易應昌以平反下吏,法司必以鍛 切註 誤,重者杖死,輕者謫去,朝署中半染赭 鍊爲忠直,蒼鷹乳虎接踵 陛下以重典繩下,逆黨有誅,封 衣。 而 最 傷 國體者,無如 一於天下矣。

則 問 追 下 祈 呼,閭閻困敝,貪吏益大爲民厲。 吏。 天永命之又一道也。 法天之大者,莫過於厚民生,則賦斂宜緩宜輕。 吸膏吮脂之輩,接迹於天下矣。 貴州巡按蘇琰以行李被訐於監司。 願體 上天好生之心,首除新餉,幷嚴飭官方, 今者宿逋見征及來歲預征, 節節 巡方黷貨,何

生之心,毋驅除異己,搆朝士以大獄,結國家朋黨之禍,毋寵利居成功,導人主以富强, 釀天下土崩之勢。 大君者,天之宗子,輔臣者,宗子之家相。陛下置輔,率由特簡。 亦願體一

策

條

畫

以

對

不

能

周 足兵、足餉之 延 儒 溫 體 見 宗周 疏 不 以時 延儒 方禱 雨,而宗周 體仁 稱疾,指爲偃蹇,激帝怒,擬旨詰之,且令 難

蒼頭 毆 爲 京 諸 生,公司宗周 尹 , 政令一新, 挫豪家尤 捶 之,枷武清 力。 門外。 閹 人言事 嘗出 輒 見優 不 應,或相 人籠篋, **詬醉**,宗周治 焚之通 衢。 賙 事 恤 自 單丁 如 武清 戶 侯

至。

居

載,謝

病

歸

都

人為

罷

市

業, 遠人 周言: 帝 壞, 周 顧 固 吏治 撫之有 故有 自 體仁迂其言,命針 解 八 服 陛下 年七 ,不許。 |壊則| 人 道, 而 求治太 **月**, 羽 民生 無人之用, 則還爲民。 舞 內閣: 明年正 III 困 急, 有 缺 輔 苗 盜 人,命吏部推在籍者,以孫愼行、 用 月入都, 有餉 政 格 賊 法 今急宜以收 宗周 由 太嚴, 願 此 而 日繁。」 愼行 陛下以 無餉之用, 他用 布令太煩 :已卒, 拾 **善**、舜之心, 帝叉問 旋授工部左侍郎。 人 有將 心 與 爲本, 進退天下 釬 兵事 不能 入 朝。 行堯、 收拾人心 治 宗周 帝問 兵, 士太 林釺及宗周名上。 言「禦外 舜之政,天下 踰 有兵不 輕。 人才、 月,上痛憤 在先寬 諸臣 能 兵食及流 以治 有 殺 一畏罪 賊。 司 時艱 自 內 飾 詔所 平。 爲 參罰 流 寇猖 非, 疏 本。 寇 剉 司 本 不 重 獗 敦 畢 內 則 朝 肯 狀。 治修, 趨 趨 吏 盡 廷 宗 職 宗

屬 意於邊功,而罪督遂以五年恢復之說進,是爲禍胎。 陛 下 銳 意求治,而 二帝三王治天下之道未暇 講求 施為 己巳之役,謀國 次第猶多未得 無良,朝廷始有 要領者。

列 傅 第 百 四 + Ξ 割 宗 周

辜,使朝宁無吁咈之風。 旌之招,收酷吏之威,布維新之化,方與二三臣工洗心滌慮,以聯泰交,而不意君臣 權而 相遇之難也。 賊,而行間日殺良報功,生靈益塗炭。一旦天牖聖衷,撤總監之任,重守令之選,下弓 刑重斂交困 誅求及瑣屑而政體傷。 者 不給 日 H 輕士大夫之心。 「將日懦,武弁廢法而兵日驕,將懦兵驕而朝廷之威令幷窮於督、撫。 ·衆、詔旨雜治五刑,歲躬斷獄以數千,而好生之德意泯。刀筆治絲綸而 壞 ,而欺罔之習轉甚;事事仰成獨斷,而諂諛之風日長。三尺法不伸於司寇,而犯 而 不可救。 而盜賊日起。 得一文震孟而以單辭報罷,使大臣失和衷之誼;得一陳子壯而以過戆坐 自此耳目參於近侍,腹心寄於干城,治術尚刑名,政體歸叢脞,天下 廠衞司譏察,而告訐之風熾,詔獄及士紳,而堂廉之等夷。人人救 參罰在錢穀而官愈貪,吏愈橫,賦愈逋。 此關於國體人心非淺鮮者。 總理任而臣下之功能薄,監視遣而封疆之責任輕。督、撫無 敲扑繁而民生瘁,嚴 朝廷勒限平 王言褻,

過

事

郡國 ۱Ļ 輕 一改作。 、爲招撫使,赦其無罪而流亡者。 而 陛下必體上天生物之心以敬天,而不徒倚風雷,必念祖宗鑑古之制以率祖,而不 且還內廷掃除之役,正懦帥失律之誅,慎天潢改授之途。 以簡要出政令,以寬大養人才,以忠厚培國 陳師險隘,堅壁清野,聽其窮而 脈。發政施仁,收天下泮渙之人 遣廷臣齎內帑、巡行 自歸。 誅渠之

外,猶可不殺一人,而畢此役,奚待於觀兵哉。

詰問, 疏 入,帝怒甚 謂 大臣論事宜體國 諭 閣 臣擬嚴旨再 度時,不當效 四 毎 小 擬 臣 上,帝輒手其疏覆閱, 歸 過朝 廷為 名高, 月. 起行數周。 獎其清直 焉 已而 意解, 降旨

瑚疏 覲。 宗周 論 時 之, 太 僕 以輸貨、発覲 謂宗周 缺馬價, 道 學有 有詔願捐 爲 餘,才諝 大辱國。 者 不足。 聽。 帝 雖不悅, 體仁及成國 帝以瑚同邑,知之宜 心善其忠,益欲 公朱純臣 以下皆有捐 大用。 眞,遂已不 體仁 用 助。 一思之, 叉議 募 能 Щ 即年朝 陰 人 許

其 一秋,三疏請告去。 至天津,聞 都城被兵,遂留養疾。 十月,事 稍定,乃上 一疏曰

朝 蜚語,次第去之。 政日隳, [三] 邊防 己巳之變,誤國 自 日 此 者袁崇煥 壞。 小 人進而 今日之禍,實己巳以來釀成之也。 人。 君子退,中官用事 小 人競修門戶之怨, 異己者概坐 而 外廷浸疏 文法 日繁,欺 以崇煥黨, 罔 H 日造

不難 計 邊也 責 口 幸 以 而 且 何 同己相容隱乎? 以 無罪者 以 責之戴罪,何 張 服 鳳翼之溺 耿 文义 如 何 杞之死? 以謝韓爌、張 以服 職 臣於是而 中 劉策之死? 樞 今且以二州八縣之生靈, 也 ,而俾之專征,何以服 知小人之禍 鳳 翔 李 諸鎭勤王之師,爭先入衞者幾 邦華諸臣之或戍或去? 人國 無已時也。 王洽之死。以丁魁楚等之失 結 飽 颺之局, 豈昔爲異己驅除, 人,不 則 廷 聞 臣之累累若 以 逗 事於 遛蒙

列傳第一百四十三 劉宗周

矣。 何地? 津、臨、德有遣,又重其體統,等之總督。中官總督,置總督何地? 其用 走承 惡私 邪 也 順 天下卽乏才, 交,而臣下多以告訐進;陛下錄淸節,而臣下多以曲謹容;陛下崇勵精,而臣下奔 。」臣每三覆斯言,為萬世辨奸之要。 心,無往不出於身家 是以封疆嘗試 以爲恭,陛下尚綜覈,而臣下瑣屑吹求以示察。 唐德宗謂羣臣曰:「人言盧杞奸邪,朕殊 何至盡出中官下。 也。 利祿。 陛下不察而 而陛 故曰「大奸似忠,大佞似信」。頻年以來,陛 下每當緩急, 用之, 不覺。」羣臣 則聚天下之小人立於朝,有所不覺 凡若此者,正似信似忠之類,究 必委以大任。 對曰:「此 總督無權,置撫、按 乃杞之所以爲 三協 有遣,通 奸 F

金光 明示 黨比 辰 以 小 且 竟 左 人 小 以 右 入每 之君子。 此 袒 . 比周 逐,若惟恐傷中官心者,尤非所以示天下也。 也。 陛下誠欲進君子退小人,決理亂消長之機,猶復用 小人,以相引 有明治理者起而爭之,陛下 重, 君子 獨岸然自異。故自古有用小 卽不用其言, 何至幷逐其人。 中官參制 人之君子,終 而御史 之,此 無

倫之化? 年 監 司 至 也 今日刑 此數事 一而 以莫須有之鑽刺 政之最舛者,成德,傲吏 ,者,皆爲故輔文震孟引繩批根,卽向驅除異己之故智,而 成,何以 昭 也, 抑競 而 以贓戍, 之典。鄭鄤之獄 何以 肅懲貪之令?申紹芳,十餘 ,或以誣 告 坐,何 廷臣無敢言 以示敦

7. 亦 無 從 知 之 也 嗚 呼, 八年之間, 誰 秉國 成,而 至於是! 臣 不能爲首 揆溫體仁解

疏奏,帝大怒,體仁又上章力詆,遂斥爲民。

矣。

語

曰

誰

生

厲

階,一

至

今

爲

梗」,

體仁之謂

也

者,上 也, 在 詔 要,三日 是 敦 遂以 一,而 趨 +日 四 對君父,下 責 重 命之。 踰 年 聖 成 肖, 九 亭 巡 月 方其首務也。 以需治 再 入 了,東部 辭 見文華 可 不 質天下 化,凡 得 缺左侍郎,廷推 殿。 **乃**趨 士大夫,而 數千言。 巡方得 帝問 朝。 都察院職掌安在, 道 人, 中 不 帝優旨報之。 後百僚 則 進 稱旨。帝臨  $\equiv$ 東治清,民生遂。」 帝 劄 則 而 象之。 朝 日 明年 明 而 對 漢,謂: 聖 日:「 八月未至,擢 大臣 學以端治本,二日 在正 大臣「 一法,小 日 己 劉宗周淸正敢言, 卿 臣 以 左 力行 廉 Œ 都御史。 一百僚。 彩紀 躬聖 以 綱 副 振 亭以 必 朕 力辭 肅 於望。」 乃 存 諸 建治 職 미 中 有 用

關 以 備 冬十月, 反攻,防潞 京 師 以 被 兵。 備透渡,防通、津、臨 請 旌 死 事 盧象昇,而 、德以備南下。 追戮誤國 奸 帝 臣楊 不 能 嗣 盡行 昌, 逮跋扈悍將左良 一, 防

猷

雲京而

薦

袁愷

成

勇,帝

並從之。

其後上猷受李自成顯職

一、卒爲

世

大

列

建道

揆

)、貞

法守、崇國體、

清伏奸、懲官邪、

飭吏治六事以獻,

帝

褒

納

焉

俄

劾

御

喩

朝 聞密旨置二人死。 里 月 脢 日 召見廷 臣於中 宗周愕然謂衆曰三今日當空署爭,必改發刑部始已。」 左 門。 時姜埰、 熊開元 以言 事下 詔 獄, 宗周約 九 及入對,御史 卿共 べ救。

不謹 禍始, 督、撫 帝色解曰:「朕已知之。」敕宗周 然 事 不具論,如 兵,練兵必先選將,選將必先擇賢督、撫,擇賢督、撫必先吏、兵二部得 第與天下更始。」帝 善後安在 國 來陷 楊若橋薦 愛錢,武官不惜 故 功則不足,何益成敗哉。」帝曰:「濟變之日,先才後守。 家 而 大計, 城 於是宗 更絃 、 去留 以濟變言,愈宜先守後才。」帝曰:「大將 破 遇事 ?」宗周日:「 邑,豈無火器而 西洋人湯若望善火器,請召試。 范志完操守不謹,大將偏 易轍,欲以 ,則請先去督 以法 周 敢 出奏曰:「陛 前,軍 死,則 紀爲主。 日 土 天下 : 「目下烽火逼畿甸,且國家敗壞 在陛下開 \_\_\_ 畏威者。 師范 切苟且之政,補目 然? 下 大帥跋扈, 太平。』斯言,今日鍼砭也。 方下韶求賢,姜埰、熊開元二臣遽以言得罪。 志完。 我用之制 起 誠 若徒以議論捷給,舉動 布公,公天下爲好 裨無不 且曰:「十五 援師逗遛, 人,人得之亦 宗周曰:「邊臣 :前罅漏,非長治之道也。」帝變色曰:「前 由賄進,所 別有才局 |年來,陛下處分未當,致有 奈何 惡,合國人爲用舍,進賢才,開言路,次 反姑息, 可制我, 論者 以三軍解體。 已極,當如 。」宗周 恢張,稱 不講戰守屯戍之法,專恃 非徒 但論· 爲 操守可望成功。宗周 不見河間 曰:「前 才望, 何。」宗周曰:「武備 此 日才望,取 紛紛 由此觀之,操守爲主。」 不問 人。 人敗 無益 反爲 今日 宋臣日 壞, 操守; 爵位 之 火器 皆 敗 舉 則 未有操守 郭 火器。

由

貪縱

使

日二

他

有餘,責

文官

必先練

局。

\_?

因

諓

不

可

所

破

乎?

近

列 傳 百 四 + Ξ 劉 宗 周 國朝無言官下詔

廷待 開元 體 調 贓 何 獄 下 問 壞 有 者 不 傷 幸 貪 法 言 宗 有 此 。」帝 示不 贓壞 ,欺君 官 疏 之 周 有 革 邀 自 必有 怒甚,曰 體 法 職,刑 罔 法 欺欺 言言 上,皆一 外 臣 主 君問 恩? 始 可 一使,疑 部 用 議罪。 可 上,亦 帝 法 陛 用 示 司 卽 之,不可置之。 日 下 問乎。二宗 道 度量 宗周。」金 錦衣皆刑官, 亦 閣 臣 可 周 卓越,妄如臣 持 不付 有 不 周 光辰 學 ·發,捧 法 日 ·有守, 司 卽 争之。 何 也。」帝大怒曰:「 錦 有 公 **,原旨**: 宗周。 衣,膏粱子弟, 應 非二 何 得 私? 御 帝 之罪,亦 臣 前 此 戆 比。 且. 光辰, 懇救 直 罪 如 宗周 當 ----臣黃道 幷命 如 乃强,斥爲 二言官, 何 付 此 知 日 法 偏 禮 議 司。 周 黨、豈堪 處。 義, 何 臣 尙 今遽 民 聽 遽 誠 蒙 翼 寺 傷 不 日 下 使 憲 人 國 及 過之典, 詔 職 光辰 役 體 道 獄 使 周 , 有 貶三 終 有 間 二臣 於國 然 卽 如 秩 貪 朝

官。 哀 耶 宗 與 \_? 故 詔 唐 宗 侍 哉 鳴 勃 歸 駿 居 郎 然 日:一 鳴駿 年 唯 以 朱 大 唯 大 而 典, 君 仇 京 乃 父 未 發 明 師 故給 報,不 變出 喪。 日 陷 復 事 宗周 問 非常 趣之。 敢 中章正宸、熊汝霖召募義 師 受職。 期 徒 、公專閩 步 鳴 則 荷戈,詣 目:一 駿 自稱草莽孤臣,疏陳 日:「發· 外,不思枕 甲仗未 杭 喪 州 具。」宗周 必待哀 戈泣血,激 責巡 旅 韶。」宗周 撫黃鳴駿發 將發,而 時政、言 嘆曰:「嗟乎,是烏足與有 勵 同 福 曰:「嘻, 仇 喪討 王 顧 監國 藉 賊 此 於 П o 何 南京 鎭 鳴 時 靜, 駿 也, 誠 起宗周故 作 爲 以 哉 安 遜 鎭靜 所 避計 乃 得

今 日大計、舍討賊復仇、無以表陛下渡江之心、非毅然決策親征、無以作天下忠義

之氣。

北控 臣 子負罪引慝之心。 豫州 目 ,西顧荆、襄,而南去金陵不遠,請以駐親征之師。 據形勝以規進取。 從此漸進,秦、晉、燕、齊必有響應而 江左非偏安之業,請進圖江北。 起者。 大小 鳳陽號中都,東扼徐、淮, ·銓除,暫稱行在,少存

塊土,拱手授賊。 日 重藩屏以資彈壓。 督漕路振飛坐守淮城, 淮、揚數百里,設兩節鉞,不能禦亂,爭先南下,致江北一 久以家屬浮舟遠地, 是倡之逃也。 於是鎭臣

劉澤淸、高傑遂有家屬寄江南之說。軍法臨陣脫逃者斬,臣謂

----

撫二鎭,皆

可

斬也。

濫,中璫隨之, 以左帥之恢復 曰愼爵賞以肅軍情。 而封、高、劉之敗逃亦封、又誰不當封者。 恐天下聞而解體也。 請分別各帥封賞,孰當孰濫,輕則收侯爵,重則奪伯爵。夫 武臣旣濫,文臣隨之。 外臣旣

而 逃者,有奉使命而逃者,法皆不赦。 日核舊官以立臣紀。 燕京既破,有受偽官而叛者,有受偽官而逃者,有在封守 亟宜分別定罪,爲戒將來。

至於爲命南下,徘徊順逆之間,實繁有徒;必且倡爲曲說,以惑人心,尤宜誅絕。

叉言

列

傳

第

白

四

+

Ξ

劉宗

周

當賊 入秦流晉,漸過畿南,遠近洶洶,獨大江南北晏然。而二三督撫不聞遣一騎

已確 事或 以壯 始。 從平反而 九廟 不俟終日,首遣北伐之師。不然,則亟馳一介,間道北進,檄燕中父老,起塞上名王,哭 自 之策,卸兵權 應援先帝遺詔及之,今乃槪用新恩。 可爲。 ,厝梓宮,訪諸王。 聲援,賊遂得長驅犯 ,諸臣奮戈 後已,則舉朝謀國不忠之當誅者又一。 而諸臣計不 於閫外,首圖定策之功,則封疆諸臣之當誅者又一。 而 起,決一戰以贖前您,自當不俟朝食。 更不然,則起閩帥鄭芝龍,以海師下直沽,九邊督鎭合謀 出此,則舉朝謀國不忠之當誅者又一。 闕。 坐視君父之危亡而不救,則封疆諸臣之當誅者一 誅閹 定案,前後詔書鶻突, 臣謂今日問罪,當自中外諸臣不職者 方且仰聲息於南中,爭言 罪廢諸臣, 新朝旣立之後,謂宜 勢必彪虎之類,盡 量從昭 共奮。 固 凶問 圍

韶納其言,宣付史館,中外爲悚動。 宗周連疏請告不得命,遂抗疏劾士英,言: 而馬士英、高傑、劉澤淸恨甚,滋欲殺宗周矣。

則 臣,朝端 之不疑者,非土英乎。於是李沾侈言定策,挑激廷臣矣。 逃臣可以汲引,而閣部諸臣且次第言去矣。 陛下 譁然聚訟,而羣陰且翩翩起矣。 酯 飛 淮甸,天實予之。 乃有扈蹕微勞,入內閣,進中樞,宮銜世廕, 借知兵之名,則逆黨 中朝之黨論方興,何暇圖河北之賊;立 劉孔昭以功賞不均, 可以然灰, 寬反正之路, 發憤冢 晏然當

列傳第一百四十三 劉宗周

有 失 國之本紀已疏,何以言匡攘之略。 則皆高 事,不難譴撫臣道 舊 汛 傑 地,而置若弈棋,洶洶為連雞之勢,至分剖江 一人倡之也。 臣以謝之,安得不長 京營自祖宗以來、皆勳臣爲政、樞貳佐之。 高傑一 其桀驁, 逃將也,而奉若驕子,浸有尾 則 . 北 亦 四鎭以慰之, 恃 士英卵翼 心。 陛下立國 安得不 大之憂。 劉 、黄諸 啓其 伊始, 淮、揚 雄 將,各 而

士英 聯絡諸 有 奄宦 相 總之,兵戈盜賊,皆從小人氣類處召而生,而 掎 鎭 用 事 角。 決決 用兵之策。 而 京營提督,獨 將帥能樹功於方域者。 史可法 斷寢之。 卽不 ·還中樞,亦當自淮 書之史册,爲弘光第一美政。 惟陛下首辨陰陽 小人與奄宦又往往相表裏。 而北,歷河以南 消長之機, 出士英仍督 別開 幕府, 自古未 鳳陽 與

有內臣

盧九德之命,則士英有不得辭其責

者

王優詔答之,而促其速入。

鳴駿 蓳 子 可 也。 往 法 刺 入覲 擁 士 宗周。 立. 其 英大怒,即 私 潞 ,兵抵京口,與防 玉。 人朱統類逐劾宗周疏請移蹕 宗周 其兵已伏丹陽 日具疏辭位,且揚言於朝曰:「劉公自稱草莽孤臣,不書新命,明示不臣天 時在 丹陽,終日危坐, 江 兵相擊鬭。 ,當急備。」 鳳陽:「鳳陽,高牆所在,欲以罪宗處皇上, 未嘗有惰容。 士英以統鐁言爲信也,亦震恐。 而 澤清、傑日夜謀所以 客前 :後至者,不敢加害而 殺宗周者不得, 於是澤清疏劾 乃遣 去。 而 客十 而黃 與 史 宗

示傑。 然後 周 使偏 疏 周 佐 主 陰撓 入 及 人之謀 黄 迫 詰 信 舉朝 諸鎭 (得功 恢 傑曰:「我輩武人,乃預朝事耶 劫乘輿遷之別 議 復 親 大駭,傳諭 一,咸云不知,遂據以入告,澤淸輩 ,姜日廣、吳甡合謀 名上之,言:「宗周勸上親 征 欲 圖 誅 臣 晁錯之自爲居守,司馬懿之閉 等,激 郡。 和 衷集事。 變士 如甡 一宗周 心,召 也。 宗周 日 .? 征, 生靈之禍」。劉良佐亦具疏言宗周 入都,臣等卽渡江赴闕, 廣 不得已,以七月十八 心 謀危君父, 功 雄 疏辨:「臣不 由 膽 是 大, 翊戴 城 氣 沮 拒 欲安置陛下於烽 君。 預聞。」士英寢 非其本懷,故陰 疏 日 未下、 入 面 朝。 許 澤清 .諸 奸,正 初, 火 力持「三案」,爲門戶 不 凶危 復草 結 澤淸疏 奏。 春秋 死黨,翦除諸忠 之地 可法 疏,署傑、良 討 出, 賊 不平,遣 蓋非宗 泛之義。」 遣 人錄

入,不聽,宗周遂告歸,詔許 注 |右侍 士 郎。 英 旣 宗周 嫉宗周,益欲去之,而 曰:「大鍼進退,係江左興亡,老臣 乘傳。 薦阮大鍼 將行 ,疏陳五 知 兵。 有詔,冠帶陛 不敢不一爭之。 見。 不 未幾,中旨特 聽, 則 亦 將 歸 授兵部添 爾。 疏

志者。 昌,言路扼,官常 日 土木崇矣,珍奇集矣,俳優雜 修 聖政 亂矣。 , 毋 以 近娛忽遠猷 所謂 狃 近娛 mi 劇 國家不幸,遭此 忽遠圖 陳矣;內豎充廷, 也 大變,今紛紛制作,似不復有 金吾滿座,戚畹 断闖 矣; 讒夫 中原

日 振 王綱,無以主恩傷臣紀。 自陛下卽位,中外臣工不曰從龍,則曰佐命。 列傳第一百四十三 劉宗周

之有司

以天下徇

之已矣,所謂積外釁而釀內憂也。

之兵,索十二萬不

殺

敵

之餉,

必窮之術耳。

不

稍裁

级抑,惟

加派横

征。

酱

一二蒼鷹乳虎

犯 未 推 Ė 恩近 Ŀ 無等之習。 四 侍,則左 推 恩武 右因 弁 禮樂征伐 則 加 疆 秉權 埸 漸 視 [,再推恩大臣,則閣部 司 不 見戲 出 自 天子,所謂 表 裏 呼 應 一, 動 褻主恩 可以 有 藐 兼 而 視 柄"三推 傷 朝 臣 廷之心 紀也 恩勳 彼 舊,則 此 雄 陳 長 乞 至今 卽

厥所 人 末 造 以黨,所謂 由 可 鑒 日 止 也。 明 以 或 長 一人進用 是,無以 今更為 邪 鋒而 一二元惡 邪鋒 危正 ,動引三朝故 氣 危 也。 正 稱冤,至諸 氣 事 朋黨 排排 之說,小人 抑 君 舊 子 後先 人。 私 死 以 於黨、死 交重,君 加 君 子 父輕 於徇 一艘 或 一,身自 或 家 者 文字 虚 若 樹 黨 之禍 有 而 餘 戮。揆 先帝 坐他

鎭 臣 開 禹 額 有 好善之巡方,借成德 怨毒滿天下。 兵各三萬,不 不 敢 日 日 端 問者,則 古 邦 治 本, 徜 近 以 毋 廠 無以刑 殺 以 衞 如貪吏之誅,不經 外釁釀 之設 敵 以 媚 而 名先教 何爲? 權 自 相 內 相 憂。 屠毒, 叉孰 化。 徒令人主 前 提問, 辨之? 先帝頗尙刑 叉 者淮 日 煩 、揚告變,未幾而 虧至德,傷治體,所謂急刑 遽科罪名;未科 叉職方戎 朝 廷講 名, 和 政之奸弊,道路嘖 ,何爲者! 而殺機先動 罪名,先追 高、黄二鎭治 夫以 於溫體仁。 名 贓罰。 十二萬不殺 有 而 兵 忘敎化也。 煩 相 攻。 假 殺 一雖衞 令 運 敵 匹 有 日

優韶報聞。

十三日,始猶進茗飲,後勺水不下者十三日,與門人問答如平時。 閏六月八日卒,年六十有 江萬里所以死也。」出辭祖墓,舟過西洋港,躍入水中。水淺不得死,舟人扶出之。絕食二 又降矣,老臣不死,尚何待乎。若曰身不在位,不當與城爲存亡,獨不當與土爲存亡乎。 於中興也。南都之變,主上自棄其社稷,尚曰可以死,可以無死,以俟繼起有人也。今吾越 居郭外,有勸以文、謝故事者。 明年五月,南都亡。六月,潞王降,杭州亦失守。 宗周曰:「北都之變,可以死,可以無死,以身在田里,尚有望 宗周方食,推案慟哭,自是遂不食。移

乎,抑動於名心而爲之也。」淵爽然避席曰三先生名滿天下,誠恥不得列門牆爾, 懌,停淵會試,下禮官議。 淟涊便捷之夫進,必且營私納賄,顚倒貞邪。 乞收還成命,復其故官,天下幸甚。」 帝得疏不 剛臣以司風紀,孰與宗周。宗周以迁戆斥,繼之者必淟涩,宗周以偏執斥,繼之者必便捷。 成,忠孝天授。受任以來,蔬食不飽,終宵不寢,圖報 僧罕見其面。十五年冬,會試入都,適宗周廷諍姜埰、熊開元削籍。淵抗疏曰:「宗周戆直性 八。其門人徇義者有祝淵、王毓蓍。 淵,字開美,海寧人。崇禎六年舉於鄉。 淵故不識宗周,旣得命往謁。 自以年少學未充,棲峯巓僧舍,讀書三年,山 國恩。 宗周曰:「子爲此舉,無所 今四方多難,貪墨成風,求一清 願執贄爲 爲 而 爲之

弟子。」

11 詔 京 指 刑 使 涂 爲 仲 部 不 明 吉義 竟前 \_\_\_\_\_移 年,從宗周 刑部 士 獄 可爲 進 尙 山陰。 書諭 土 臺諫。 共 止之。 疏 禮官議上,逮下詔獄,詰主使姓名。 出淵 仲吉者、 上疏請誅奸輔, 漳浦 未 幾, 都 人。 城陷,營死難太常少 以諸 通 政司 生 走萬里上書明黃道 抑不奏。 淵 卿吳麟 曰:「男兒死卽 給事 中陳子龍 徴 周 喪,歸 冤, 死爾,何聽 得 疏 其 罪杖 薦 柩 淵 /譴者 詣 及 待 南  $\lambda$ 

竣 Ī 宗 周 旣 罷 葬 ,還家設祭, 官家居, 淵數往問學。 即投繯 而 卒,年三十五 嘗有過,入曲室長跪流涕自撾。 也。 踰二日,宗周餓 杭州 死 失守, 淵方葬母,越

先生。 日 日 州 不守 遍 子子 毓 一召故交歡飲,伶人奏樂。 宗周 若何。]曰:「有陶淵明 蓍 门, 字 元趾 絶粒 一,會稽 未死,毓蓍上書曰:「願先生早自裁,毋爲王炎 人。 爲諸 故事在。」毓善曰:「不然,吾輩聲色中人, 酒罷,攜燈出門, 生,跌宕不羈。 投柳橋 已, 受業宗周之門,同 下,先宗周 午所 一月死。 弔。」 俄 慮久 門生咸非笑之。 八則難持 鄕 友來視,毓 人 私 訟 也。 E 義 書 杭

周 亦 與焉。 宗 周 始受業於許孚遠。 越 中 自 王 守仁後, 已,入東林書院, 一傳爲 王畿,再傳爲周汝登、陶望齡,三傳 與高攀龍輩講習。 馮從吾首善書院之會, 爲 陶 爽齡, 皆雜於 宗

列

傅

第

百

四

+

Ξ

劉

宗

周

大議,對明旨,必却坐拱立移時。或謝病,徒步家居,布袍粗飯,樂道安貧。聞召就道,嘗不 者。」宗周在官之日少,其事君,不以面從爲敬。入朝,雖處暗室,不敢南嚮。 禪。 死,語門人曰:「學之要,誠而已,主敬其功也。 敬則誠,誠則天。 良知之說,鮮有不流於禪 **奭齡講學白馬山,爲因果說,去守仁益遠。宗周憂之,築證人書院,集同志講肄。** 或訊大獄,會 且

能具冠裳。學者稱念臺先生。子汋,字伯繩。

必膝行前,道周獨否,魏忠賢目攝之。未幾,內艱歸 黃道周,字幼平,漳浦人。 天啓二年進士。 改庶吉士,授編修,爲經筵展書官。

補,遘疾求去。瀕行,上疏曰: 崇禎二年起故官,進右中允。三疏救故相錢龍錫,降調,龍錫得滅死。 五年正月方候

極之元年,正當師之上九,其爻云「大君有命,開國承家,小人勿用」。陛下思賢才不遽 臣自幼學易,以天道為準。 上下載籍二千四百年,考其治亂,百不失一。

陛下御

臣皆無遠猷,動尋苛細。 得,懲小人不易絕,蓋陛下有大君之實,而小人懷干命之心。臣入都以來,所見諸大 治朝宁者以督責爲要談,治邊疆者以姑息爲上策。 序仁義道

後。不救淩圍,而謂淩城必不可築;不理島民,而謂島衆必不可用。 挽,臣竊危之。自二年以來,以察去弊,而弊愈多,以威創頑,而威滋彈。 亂 成遠大之猷,吹毛數睫,可奏三五之治者。 者,必不在拘攣守文之士,而在權力謬巧之人,內廷諸臣敢誑陛下者,必不在錐刀泉布 之微,而在阿 陛下欲剔弊防奸,懲一警百,諸臣用之以借題修隙,斂怨市權。 意不調,而株連四起。 生 則以爲迂昧而不經;奉刀筆簿書,則以爲通達而知務。 於無兵, 餉糜於漏巵, 而謂功銷於無餉。 . 柄神叢之大。惟陛下超然省覽,旁稽載籍,自古迄今,決無數米量薪,可 陛下欲整頓紀綱,斥攘外患,諸臣用之以滋章法令,摧折縉紳, 彼小人見事,智每短於事前,言每多於事 亂視熒聽,浸淫相欺, 一切磨勘,則葛藤終年,一 且外廷諸臣敢誑陛下 馴至極壞,不可復 兵逃於久頓,而 是亦反申、商

帝不懌,摘「葛藤」、「株連」數語,令具陳。 道周上言曰:

以歸周、孔,捐苛細以崇惇大之時矣。

患未 科場,實非爲陛下科場,乃爲仇隙而 歲春月以後,盛談邊疆,實非爲陛下邊疆,乃爲逆璫而 頭,則 邇年諸臣所目營心計,無一實爲朝廷者。 其用人行事,不過推求報復而 大臣 一心以憂外患;小人未退,則大臣一心以憂小人。 翻科場也。 此非所謂「葛藤」、「株連」乎? 翻邊疆也,去歲春月以後, 今獨以遺君父,而大 己。 自古外 盛言 自前

列

一士之用乎!

臣 臣 所謂 自 處於催科比較之末。 舛也。 三十年來,釀成門戶之禍,今又取縉紳稍有器識者,舉網投阱,即緩急安 行事而事失,則曰事不可爲,用人而人失,則曰人不足用。此

聞習者有惠世揚、李邦華,在仕籍者有徐良彦、曾櫻、朱大典、陸夢龍、鄒嘉生,皆卓拳 為小人而又以小人矯之,則小人之焰益張;知其爲君子而更以小人參之,則君子之功 駿偉,使當一面,必有可觀。 不立。天下總此人才,不在廊廟則在林藪。臣所知識者有馬如蛟、毛羽健、任贊化,所 之臣,以箠楚驅人,則就驅者必駑駘之骨。今諸臣之才具心術,陛下其知之矣。 凡絕餌 而去者,必非鰌魚;戀棧而來者,必非駿馬。以利祿豢士,則所豢者必嗜利 知其

語皆刺大學士周延儒、溫體仁。帝益不懌,斥爲民。

身任重寄至七八載罔效、擁權自若者。 岡事,誠可痛憤。 上,小民展轉於下,而諸臣括囊其間,稍有人心,宜不至此。」又上疏曰:「陛下寬仁弘宥,有 而 五日內繫兩尙書,未聞有人申一疏者。 九 年用薦召,復故官。明年閏月,久旱修省,道周上言:「近者中外齋宿,爲百姓請命, 然其視聽一係於上。 上急催科,則下急賄賂;上樂鐭覈,則下樂巉險,上 **積漸以來,國無是非,朝無枉直,中外臣工率苟且** 安望其戡亂除凶,贊平明之治乎。 陛下焦勞於

喜告訐,則下喜誣陷。當此南北交訌,奈何與市井細民,申勃谿之談,修睚眦之隙乎。」時體

仁方招奸人搆東林、復社之獄,故道周及之。

意氣,坎坷磊落,不如錢賺益、鄭鄤。」鄭方被杖母大詬,帝得疏駭異,責以顚倒是非。 疏辯,語復營護鄤。 如華亭布衣陳繼儒、龍溪舉人張燮,至圜土纍係之臣,朴心純行,不如李汝璨、傅朝佑;文章 遠見深計,不如魏呈潤;犯言敢諫,清裁絕俗,不如詹爾選、吳執御;志尙高雅,博學多通,不 如者、謂「品行高峻,卓絕倫表,不如劉宗周,至性奇情,無愧純孝,不如倪元璐,湛深大慮 旋進右諭德,掌司經局,疏辭。 因言己有三罪、四恥、七不如。三罪、四恥,以自責。七不 帝怒,嚴旨切責。

實。其冬,擇東宮講官。 乞休,不許 疏推讓道周。 道周以文章風節高天下,嚴冷方剛,不諧流俗,公卿多畏而忌之,乃藉不如鄭語爲口 至發言:「熨杖母,明旨煌煌,道周自謂不如,安可爲元良輔導。」道周遂移疾 體仁已罷,張至發當國,擯道周不與。其同官項煜、楊廷麟不平,上

輔 追 臣文震孟一生蹇直,未蒙帷蓋恩。 舊講官姚希孟嘗請漕儲全折以爲非。 十一年二月,帝御經筵。 刑部尚書鄭三俊方下吏,講官黃景昉救之,帝未許。 天下士,生如三俊,殁如震孟、希孟,求其影似,未可多 道周聽未審,謂帝將寬三俊念希孟也,因言 而 一、故 帝適

得。」帝以所對失實,責令回奏。 再奏再詰,至三奏乃已。凡道周所建白,未嘗得一兪旨,道

周顧言不已。

周乃草三疏,一劾嗣昌,一劾陳新甲,一劾遼撫方一藻,同日上之。其劾嗣昌,謂 六月,廷推閣臣。 道周已充日講官,遷少詹事,得與名。帝不用,用楊嗣昌等五人。 道

谿, 循以法治之,而冒喪斁倫, 獨謂無禁, 臣竊以爲不可也。 之說,才智亦可睹矣,更起一不祥之人,與之表裏。陛下孝治天下,縉紳家庭小小勃 忠不孝者連苞引蘖,種其不祥以穢天下乎。嗣昌在事二年,張網溢地之談,款市樂天 者可不去, 聞喪者可不去, 則爲子者可不父, 爲臣者可不子。 卽使人才甚乏, 奈何使不 父殯在途,搥心飲血,請就近推補,乃忽有幷推在籍守制之旨。夫守制者可推,則聞喪 繼母,宋世共指爲人梟。今遂有不持兩服,坐司馬堂如楊嗣昌者。宣大督臣盧象昇以 天下無無父之子,亦無不臣之子。衞開方不省其親,管仲至比之豭狗。李定不喪

其論新甲,言其

艱難者,決未有不忠不孝而可進乎功名道德之門者也。 一人。四十餘削籍,徒步荷擔二千里,不解屝屢。 守制不終,走邪徑,託捷足。天下卽甚無才,未宜假借及此。古有忠臣孝子無濟於 今雖踰五十,非有妻子之奉,婢僕之 臣二十躬耕,手足胼胝, 以養

累。 天下卽 無人,臣願解淸華,出管鎖鑰,何必使被 棘負塗者,被不祥以玷王 化哉

其 下 論 吏 部 藻, 行 譴。 則 力 嗣 詆 昌 和 因 議 上言: 之 非。 野杖母 帝 疑 道 了,禽獸 周 以 不 不 如 用 怨望, 今道周 呵 叉不 縉 紳」、「勃谿」語, 如 鄤, 且 其意 徒 欲 欲 爲 庇 鄭 鄤 区 一徒,飾 脱罪,

前言之謬,立心可知。」因自乞罷免,帝優旨慰之。

之人 爲 有 術 爲 力 此 猶 凡 一辭,意 為 乎! 所主,故孟子 適 聖之清,若小 可 無所 始能 彼;今則 不言,至 七 人宗 月 道 詞 爲 不 經綸 周 Ti. 師 臣 知 而 對曰:「 H 乃乃不 一統 父母。 一簡用 爲者 中 召內 天下,發育萬物。 欲正 · 有 廉 後 之君 曲 謂 如劉定之、羅倫 閣 如 臣三疏 人心, 不言, 顧 謹,是廉,非淸 鄭鄤。 及諸 之天理,有 臣,無所逃於天地之間。 念君爲臣 息邪 更 大臣於平臺, 皆 帝 無當言之日。」帝曰 爲 說。 曰:「然,朕正 國家 綱,父爲子綱, 所 不孝不 者,抗疏 也。」時道 爲 古之邪說,別爲一教, 綱常, 而 弟 爲 幷及 者, 爲 者 自 擬問 臣 周 道周 信 根本旣無, 安有枝 謂之人欲。 所 代請, 君臣固 且仁 無所爲。」帝曰:「先時 對不 之。」乃問 o 清固美德,但不 不遺親,義不後君,難以 帝 得遂臣 在 ·合指, 與諸臣語所司事, 父子 今則直附於聖賢經傳中 爾三疏適當 道 志。 帝屢駁, 周曰:「古人 前。 文葉。」 及 況古 可 抵 嗣 道周 傲 何 廷推 都門,聞道周 爲 昌出 物 不言?」對 心 列 **外之**,問道 復 遂 不 無所爲, 國之君 偏重。 非。 進曰:「惟 奏曰:「臣不 用 時 且. 目 臣,可去 [三先 係世 今則 三 催 果無所 人 周曰: 品品 匹 伯 孝 道 各 疏 學 生 弟 時 夷

列

傳

非佞 心 行 鄭。」帝曰:「章子不得於父,豈鄭杖母者比。爾言不如,豈非朋比。」道周曰:「衆惡必察。」帝 忠佞不 陛下今日殺臣 類,竟成一奪情世界,益不可。」帝又詰問久之。帝曰:「少正卯當時亦稱聞人。心逆而險, 嗣昌在邊疆則可,在中樞則不可,在中樞猶可,在政府則不可。止嗣昌一人猶可, 帝曰:「人旣可用,何分內外。」道周曰:「我朝自羅倫論奪情,前後五十餘人,多在邊疆。故 喪,君命不過其門。 曰:「陳新甲何以走邪徑,託捷足。且爾言軟美容悅,叩首折枝者誰耶。」道周不能對,但曰 「人心邪則行徑皆邪。」帝曰:「喪固凶禮,豈遭凶者卽凶人,盡不祥之人。」道周曰:「古三年 「臣敢將忠佞二字剖析言之。夫人在君父前,獨立敢言爲佞,豈在君父前讒 術不正,臣心正無一毫私。」帝怒。 僻 心更大。 面 而 別,邪正淆矣,何以致治。」帝曰:「固也,非朕漫加爾以佞。 堅,言偽而辨,順非而澤,記醜 何。」再叱之退。 且爾 「,陛下負臣。」帝曰:「爾一生學問,止成佞耳。」叱之退, 道周叩首起, 復跪奏: 言不如鄭鄭,何也。」對曰:「匡章見棄通國,孟子不失禮貌,臣言文章不如 自謂凶與不祥,故軍禮鑿凶門而出。 顧嗣昌曰:「甚矣,人心偸薄也。 有間,命出候旨。 道周曰:「臣今日不盡言,臣負陛下, 而博,不免聖人之誅。今人多類此。」道周曰:「少正卯 道周恣肆如此,其能無正乎。」乃召 奪情在疆外則可,朝中則不可。」 但所問在此,所答在彼 諮 面 **諛爲忠耶**? 又呼朋引

文武諸臣,咸聆戒諭

而退。

意,大不便。」帝卽 周 麒 遜。 示 擬 前 及 謀 道 《其徒黨造作語言,虧損聖德。 改兵部,遂阿嗣昌意上疏曰:「臣聞人主之尊,尊無二上;人臣無將,將而 周 日召對始末,背公死黨之徒,鼓煽以惑四方,私記以疑後世,揜聖天子正人心息邪說至 帝怒甚,欲 譴 顧 `,帝憂兵事,謂可屬大事者惟嗣昌,破格用之。 輕。 加以 嗣昌懼道周輕,則論己者將無已時也,亟購人劾道周者。 傳輸廷臣,毋爲道周劫持相朋黨,凡數百言。 貶道周六秩,爲江西按察司 重罪,憚其名高,未敢決。 舉古今未有之好語盡出道周,無不可歸過於君父。不頒 會劉同升、趙士春亦劾嗣昌,將予重譴,而 道周守經,失帝意。 有刑部主事 必誅。今黃道 及奏對,又不 張

封疆貪酷之罪,而有建言蒙戮之名,於道周得矣,非我聖主覆載之量也。 澤深等言:「二人罪至永戍 責,再擬謫戍烟瘴,帝猶以爲失出,除<u>覺</u>斯名,移獄鎭撫司掠治,乃還刑部獄。 文震亨, 亂政,並杖八十,究黨與。 學士魏照乘惡道周甚,則擬旨責學龍濫薦。 久之,江 並繫獄。戶部主事葉廷秀、監生涂仲吉救之,亦繫獄。尚書李覺斯讞輕,嚴旨切 .西巡撫解學龍薦所部官,推獎道周備至。 詞連編修黃文煥、東部主事陳天定、工部司務董養河、中書舍人 止矣,過此惟論死。 帝遂發怒,立削二人籍,逮下刑部獄,責以黨邪 論死非封疆則貪酷,未有以建言者。 故事,但下所司,帝亦不覆閱。而大 陛下所疑者黨耳。 逾年,尚書劉 道周無

照磨,而若麒果得

兵部

列

乎。 黨者, 且陛下豈有積恨道周,萬一聖意轉圜,而臣已論定,悔之何及。」仍以原擬請,乃永戍 見諸に 行事。 道周抗疏,祇託空言,一二知交相從罷斥,烏覩所謂黨,而煩朝廷大法

廣西

。 (盟)

張采 已前 其善學,故人人惜之。」帝默然。 對曰:「其胸中自有書,科道官以其用未竟而惜之。」帝曰:「亦不免偏。」時延儒自以嗣昌旣 而泣:「臣不自意今復得見陛下,臣故有犬馬之疾。」請假,許之。 而 可憫。」帝微笑。演曰:「其事親亦極孝。」姓曰:「道周學無不通,且極淸苦。」帝不答,但微笑 已。 何如人也?」皆對曰:「讀書好學人也。」帝曰:「張溥已死,張采小臣,科道官何亟稱之。」 死矣,而己方再入相,欲參用公議,爲道周地也,卽對曰:「張溥、黃道周皆未免偏,徒以 十五年八月, 道周戍已經年。一日, 帝召五輔臣入文華後殿, 手一編從容問曰: 「張溥 明日傳旨復故官。 道周在途疏謝,稱學龍、廷秀賢。 德璟曰:「道周前日蒙戍,上恩寬大,獨其家貧子幼,其實 既還,帝召見道周,道周見帝

朝 不能用。 起,欲從史可法擁立潞王耶。」乃不得已趨朝。 政 日 居久之,福王 非,大臣 甫竣事,南都亡,見唐王聿鍵於衢州,奉表勸進。 相 監國,用道周吏部左侍郎。 繼 去 國 識者知 其將亡矣。 道周不欲出,馬士英諷之曰:「人望在公,公不 明年三月遣祭告禹陵。 陳進取九策,拜禮部尚書,協 王以道周爲武英殿大學士。 瀕行, 理詹事 陳 進 取策,時 府 道

周學行高,王敬禮之特甚,賜宴。 鄭芝龍爵通侯,位道周上,衆議抑芝龍,文武由是不和。一

生 上 書詆道周迂,不可居相位。 王知出芝龍意,下督學御史撻之。

清兵。 復。 陵寢近,可死矣。」監刑者從之。幕下士中書賴雍、蔡紹謹,兵部主事趙士超等皆死。 當是 以七月啓行,所至遠近響應,得義旅九千餘人,由廣信出衢州。 戰敗,被執至江寧,幽別室中,囚服著書。臨刑,過東華門,坐不起,曰:「此與高皇帝 時,國勢衰,政歸鄭氏,大帥恃恩觀望,不肯一出關募兵。 十二月進至婺源,遇大 道周請自往江西圖 恢

來也。 說,而道周用以推驗治亂。歿後,家人得其小册, 爲石齋先生。 道周學貫古今,所至學者雲集。 精天文曆數皇極諸書。 銅山在孤島中,有石室,道周自幼坐臥其中,故學者稱 所著易象正、三易洞璣及太函經,學者窮年不能通其 自謂終於丙戌, 年六十二, 始信其能知

公張惟賢與民爭田,廷秀斷歸之民。惟賢屬御史袁弘勛駁勘,執如初。惟賢訴諸朝。 葉廷秀,濮州人。天啓五年進士。 歷知南樂、衡水、獲鹿三縣,入爲順天府推官。 英國

用廷秀奏,還田於民。

崇禎中,遷南京戶部主事,遭內外艱。 服闋,入都,未補官,疏陳吏治之弊,言:「催科一

周

冬,遺成福建。 不當任統均。 是連坐法不可不嚴也。」帝納之,授戶部主事。帝以傅永淳爲吏部尚書。廷秀言永淳庸才, 州縣之弊,當自監司郡守始。不澄其源,流安能潔。乃保舉之令行已數年,而稱職者希覯, 事,正供外有雜派,新增外有暗加,額辦外有貼助。小民破產傾家,安得不爲盜賊。 甫四月,永淳果敗。道周逮下獄,廷秀抗疏救之。帝怒,杖百,繫詔獄。明年 夫欲救

光祿少卿。 福王時,兵部侍郎解學龍薦道周,並及廷秀,命以僉都御史用。及還朝,馬士英惡之,抑授 周在途又爲請。帝令所司核議,已而執政復薦。十六年冬,特旨起故官。會都城陷,未赴。 重罪,處之恬然。 廷秀受業劉宗周門,造詣淵邃。 南都覆,唐王召拜左僉都御史,進兵部右侍郎。事敗,爲僧以終。 及道周釋還、給事中左懋第、御史李悅心復相繼論薦、執政亦稱其賢,道 宗周門人以廷秀爲首。 與道周未相識,冒死論救,獲

臣有焉。 迂而遠之,則救時濟變之說惑之也。 贊曰 一劉宗周、黃道周所指陳,深中時弊。 殺身成仁,不違其素,所守豈不卓哉 傳曰「雖危起居,竟信其志,猶將不忘百姓之病也」,二 其論才守,別忠佞,足爲萬世龜 而 聽者

勘記

[一] 益習爲頑鈍無恥 益,原作「蓋」,據明史稿傳一四一劉宗周傳改。

武清侯蒼頭毆諸生 武清侯,原作「武清伯」,據本書卷一〇八外戚恩澤侯表改。

朝政日際 原作「朝廷日際」、據明史稿傳一四一劉宗周傳改。

乃永戍廣西 廣西,本書卷三〇八及明史稿傳一三二周延儒傳作「辰州」, 國權卷九七頁五九

一作「辰州衞」。辰州、辰州衞在湖廣。

# 明史卷二百五十六

## 列傳第一百四十四

崔景榮,字自强,長垣人。萬曆十一年進士。授平陽府推官。 崔景榮 黃克纘 畢自嚴 李長庚 王志道 劉之鳳 擢御史, 刻東廠太監張

鯨 罪。 巡按甘肅、湖廣、河南,最後按四川,積臺資十八年。

播州平,或請以播北畀安氏,景榮不可。 播州亂,景榮監大帥劉綎、吳廣輩軍。 。會總督李化龍憂去,景榮爲請蠲蜀一歲租,卹上東 疑馳金帛至景榮家, 為其父壽, 景榮上疏劾之。

五. 路、罷礦使。 化龍疏敍監軍功,弗及景樂。已,晉太僕少卿。

在任三年、僅一 諸部賞。諸部懼,請與銀定絕。 三年滿,擢右僉都御史,巡撫寧夏。 銀定素驕,歲入掠。 前 而已。 其後延鎭吉能等挾款求補市,卒勿許,歲省金錢十餘萬 銀定既失導,亦叩關求市。 寧夏歲市費不貲,景榮議省之。 景榮親督戰破之,因議革導賊

列傳第一百四十四 崔景榮

爲言官 召還 匹 + 所 論 晉兵部尚 年入 御史方震 爲 兵部 書。 儒請罷景榮,以 右侍郎,總京營戎政。 會遼 瀋 失,熊 廷 孫承宗代之。 爾、王化貞 改吏部。 議 遂引 不協, 以疾辭 疾 歸 命廷臣 去。 議 踰 經 年, 一、撫 起 、去留。 宣府 景樂 大同 數 總

贈 先後劾景榮陰護東林, 斗 員 叉 南 少保。 解 額,汰京堂添注官。 星 不 廣微不 天 · 見。 啓 卽 家 四年十一 得已,爲具揭。 帝幸太學,忠賢欲先一日聽 起景榮, 月特 欲倚為 景樂皆力持不行,浸忤忠賢指。 媚奸邪而邀後福 起爲 尋以景榮書爲徵、曰: 助。 吏部尚 比至, 書。 祭酒講,議裁諸聽講大臣 忠賢飾大宅 當是時,魏忠賢 得旨, 削奪爲民。 景榮教我 以待,景榮不 又移書魏廣微,勸 也。」於是御史倪文煥、門克新 崇禛改元,復原職。 柄, 一賜坐 赴。 羣 小 賜茶禮,又議減 更相倚附, 錦 衣 其申救楊漣、左 帥 田 爾耕 逐尙 四 年卒。 來謁, 考選 書趙 光

左 以平盜功,加至兵部尙書。 布 政 黃克纘,字紹夫,晉江人。 使,就遷右 副都御史、巡撫其地。 四十年詔以故官參贊南京機務,爲御史李若星、魏雲中所劾, 萬曆八年進士 請停礦 0 稅 除壽州知州,入爲刑部員 、論刻稅使陳增、馬堂 外郎。 他惠 政甚著。 累官山 東 還 屢

家候命。 居三年,始履任。四十四年冬,隆德殿災,上疏陳時政,語極痛切。 不

侍 聽、命如 M 八 失倫 則 一姜昇 人 坐 召 獄 盜乾清宮珠寶下吏。 理 前 情自緩。 、鄭穩山 京營戎政,改刑部尚書,預受兩朝顧 況選侍 .篋中物,安知非先朝所賜。」當是時,諸璫罪重,謀脫無自,惟請帝厚待 、劉尙理不持一物,[]劉遜拾地上珠,還之選侍,而與永福、進忠同 於是流言四布,謂帝薄待先朝妃嬪,而克纘首入其言。 克纘擬二人辟,餘俱末減。 命。 李選侍將移宮,其內侍王永福、姚進忠等 帝不從, ,命辟六人,餘遣戍。 帝不悅,責克纘 1数,輕 克纘 偏 選

德,勿虛傳宮幃之忿爭,尤忠之大也。 在 覺。」克纘奏辨,因乞罷。 過。 源溥力駁其持論之謬。末言:「羣豎持貲百萬,借安選侍爲名,妄希脫罪,克纘墮其術而 私 李黨, 先帝時爲二后者爲忠,爲選侍者非忠。 一神宗既保護先帝,授以大位,則爲神考而全其貴妃 必委曲 已, 責備朕躬。」克纘惶恐上言:「禮,父母並尊。 楊漣陳「移宮」始末。帝卽宣諭廷臣,備述選侍凌虐聖母狀。 周全,渾然無跡,斯爲大孝。若謂黨庇李氏,責備聖躬,臣萬死不敢出。」御史焦 略言:「源溥謂在神宗時爲元子者爲忠,爲福藩者 若如源溥言,必先帝不得正其始,聖母不得正其終, 臣亦廣之曰: 事有出於念母之誠,跡或涉於彰父之 富貴其愛子者,尤忠之大也。 聖母旣正名定位,則光昭刑于之令 且曰:「大小臣工,惟 非忠。 臣敢廣之 叉謂

列

傳

第

成並劾克續是非舛認。 以傾言官。克纘奏辨,再乞休,帝不問。 亦代爲言,乃已。 可議斯獄耳。」疏入,帝怒甚,實以輕肆無忌,不諳忠孝。 無何,給事中董承業、孫杰、毛士龍,御史潘雲翼、楊新期,南京御史王允 克纘不服,言囊不舉李三才,故爲諸人所惡。 克纘惶恐引罪,大學士劉一燝等 源溥復劾克續借三才

激。 者,益得藉爲詞。 宣諭百官,明言選侍歐崩聖母。及惟炳疏上,得旨:「選侍向有觸忤。 公、閔公之弑,力詆文周,且白選侍無毆聖母事。 末,力爲方從哲辨。 追念皇考,豈能恝然。」於是外議紛紜,咸言前此上論,悉出王安矯託。 天啓元年冬,加太子太保。尋復以兵部尚書協理戎政。廷臣議「紅丸」,克纘述進藥始 蓋是時王安已死,魏忠賢方竊柄,故前後諭旨牴牾如 給事中薛文周詆其滅倫常,昵私交,昧大義。克纘憤,援春秋不書隱 給事中沈惟炳助文周復劾克纘。 朕一時傳諭, 不無過 此 而諸請安選侍 先是,帝

賢盡逐東林,召克續爲工部尚 典,率推克續爲首功。 起南京吏部尚書。 克纘歷官中外,清强有執。 有劾之者、不就、卒於家。 時東林方盛,克纘移疾。 書。 持議與爭「三案」者異,攻擊紛起。 視事數月,復移疾歸。 詔加太子太傅,乘傳歸。 三殿成,加太子太師。 自是羣 四年十二月,魏忠 小排 東林,創要 崇禎元年

歷 型 自嚴,字景會,淄川人。 部 員外 郎中,遷淮徐道參議。 萬曆二十年進士。 內艱闋,分守冀寧。 除松江 推官。 改河東 年少有才幹, 副 使, 引 疾 徵授刑部主 起 洮 岷

兵備 參政 以按察使徙治榆林西路,進右布政使。 泰昌時,召爲太僕 卿

軍 繕戦艦 報聞。 水軍先習陸戰,軍由是可用。 監軍 、啓元 四方所募兵日逃亡,用自嚴言,攝其親屬補伍。 山東白蓮妖賊起,令斯行率五千人往,功多。 年四月,遼陽覆。 備戎器。 及熊廷弼建三方布置策,天津居其一,增設鎮海諸營。 廷議設天津巡撫,專飭海防, 魏忠賢令錦衣千戶劉僑逮天津廢將,自嚴以無駕帖 改自嚴右僉都御史以往。 兵部主事來斯行有武略, 用戚繼 疏論 光遺 置水

都 人才宜惜 不 后 部 可遽討 御史,出督遼餉,語詳季長庚傳。 左侍郎。 初 ,萬曆四十六年,遼左用兵,議行澄、萊海運。 ,內操宜罷, ,當俟請貢輸誠,東征 時議省天津巡撫,令督餉侍郎衆領其事,卽以委自嚴。 語甚切直。 効力,徐許其封耳。 自嚴在事 及是長庚遷,乃命自嚴代。 數年,綜核 京師數地震,因言內批宜愼,恩澤宜節 明年二月特設戶部侍郎一人, 撙節,公私賴之。 敍前 平賊功,進右都御史兼 又議計朝鮮。 自嚴言 兼右僉

五 列 ·以右 傳 第 都御 百 史掌 四 + 南京都察院。 깯 畢 自 殿 明年正月就改戶部尙書。 忠賢議 灣南 太僕牧馬草

場,助殿工。自嚴持不可,遂引疾歸。

萬、出 外者。 京運撥兒,板木折價。 鹽引,議鼓鑄,括雜稅,覈隱田,稅寺產,核牙行,停修倉厫,止葺公署,南馬協濟,崇文鋪稅, 贏 歲 例 密、昌、永 三百二十七萬八千有奇。 餘。 約二十萬,凡三百二十六萬五千有奇。 入之數, 加抵贖,班軍折銀,吏胥納班,河濱灘蕩,京東水田,殿工冠帶。 崇禎 浮於入,已一百十三萬六千。 乞敕下廷臣,各陳所見。」於是廷臣爭效計畫。 乃京支雜項八十四萬,遼東提塘三十餘萬,薊、遼撫賞十四萬,遼東舊餉改新餉 四 元 田賦百六十九萬二千,鹽課百一十萬三千,關稅十六萬一千,雜稅十萬三千,事 頻新 年召拜 增鹽菜銀二十二萬, 戶部尚 已,復列上十二事,日增關稅,捐公費,鬻生祠,酌市稅,汰冗役,核虛 今薊、密諸鎭節省三十三萬,尙應二百九十四萬八千。 書。 自嚴以度支大絀,請覈逋賦,督屯田,嚴考成,汰宂卒,停薊 况內供召買,宣、大撫賞,及一切不時之需,又有出常額 俱 報 而逋負相沿,所入不滿二百萬,卽盡充邊餉,尙無 可。 二年三月疏言:「諸邊年例, 自嚴擇其可者,先列上十二事,日增 帝悉允行 自遼餉外、為銀 統計京邊 三十

少者,其弊爲混派。 詔 輯 .赋役全書。 自嚴言:「全書之作,自行一條鞭始,距今已四十五年。有一事而此多 有司聽奸吏暗灑瓜分,其弊爲花派。 當大爲申飭。」因條八式以獻。

帝即命頒之天下。

者 照民 無如 給 客餉。 田 事中汪始亨極論盜屯損餉之弊。 起 科。」帝是其議。 諸鎭 (年例合三百二十七萬,而客餉居三之一,宜大裁省。 先是,忠賢亂政,邊餉多缺,自嚴給發如期。 自嚴言:「相沿已久,難於覈實。 其次則有撫賞、召 請無論軍種民種, 又疏言:「最耗財

進太子太保。 其冬,京師被兵,帝憂勞國事,旨中夜數發。 明年夏,以六罪自劾,乞罷,優旨慰留。先以考滿加太子少保。敍遵、永克復功,再 自嚴奏答無滯,不敢安寢,頭目臃腫,事幸

買、修築諸費、皆不可不節。」帝褒納之。

而 五. 一萬有奇,天下益耗矣。已,陳時務十事,意主利民,帝悉採納。又以兵餉日增,屢請淸覈, 兵部及督撫率爲寢閣。復乞汰內地無用之兵,帝卽令嚴飭,然不能盡行也。 兵部尚書梁廷棟請增天下田賦,自嚴不能止。於是舊增五百二十萬之外,更增百六十

不 實,無有,帝怒責自嚴。 **青浦,逋金花銀二千九百。** 不允。 御 史余應桂劾自嚴殿試讀卷,首薦陳于泰,乃輔臣周延儒姻婭。 踰月, 時有詔,縣令將行取者,戶部先覈其錢穀。 給事中吳甘來復抗疏論救,帝乃釋之。八年五月敍四川平賊功,復官,致仕。 自嚴飾詞辨,帝益怒,遂下自嚴獄,遣使逮友元。御史李若讜疏救, 帝以詰戶部,自嚴言友元已輸十之七貯太倉。帝令主庫者核 華亭知縣鄭友元已入爲御史,先任 自嚴引疾乞休,疏四

列

傳

第

百四四

十四四

畢

又三年卒,賜卹如制。

在 勵清操。入爲順天府尹。改右副都御史,巡撫山東。盡心荒政,民賴以蘇。盜蔓武定諸 李長庚,字酉卿,麻城人。萬曆二十三年進士。授戶部主事。歷江西左、右布政使,所

州縣,討擒其渠魁。

宮,陸行至廣寧一百八十里,至遼陽一百六十里,每石費一金。」部議以爲便,遂行之。 至羊頭凹,歷中島、長行島抵北信口,又歷兔兒島至深井,達蓋州,剝運一百二十里,抵娘娘 四十六年,遼東用兵,議行登、萊海運。長庚初言不便,後言:「自登州望鐵山西北口,

茶顏料之類,歲久皆朽敗。若改折一年,無損於上,有益於下。他若陝西羊辣,江、浙織造, 百餘萬,入太倉者,自本色外,折色四百餘萬。 改折, 借稅課, 言:「臣考會計錄, 每歲本色、折色通計千四百六十一萬有奇。 入內府者六 米百八十萬石,豆九十萬石,草二千一百六十萬束,銀三百二十四萬兩。 造淮船、通津路、議牛車、酌海道、截幫運、議錢法、設按臣、開事例、嚴海防九事。 時議歲運 明年二月特設戶部侍郎一人兼右僉都御史,出督遼餉,駐天津,即以長庚爲之。奏行 內府六百萬,自金花籽粒外,皆絲綿布帛蠟 長庚請留金花,行

不貲、安得借留。其以今年天津、通州、江西、四川、廣西上供稅銀、盡充軍費。」 亦當稍停一年,濟軍國急。」帝不悅,言三金花籽粒本祖宗舊制,內供正額及軍官月俸,所費

或有急,亦取給其中。正統元年始自南京改解內庫。嗣後除武官俸外,皆爲御用。是金花 錢糧,不拘金花籽粒,應解內府者悉解貯太倉庫,備各邊應用。是世宗朝金花盡充兵餉,不 銀國初常以濟邊,而正統後方供御用也。會典於太倉庫則云,嘉靖二十二年題准諸處京運 在內帑者盡還太倉可也。 知陛下初年何故斂之於內也。今不考各邊取給應用之例,而反云正供舊額,何相左若是。 局,亦以濟邊。 久,顚末都忘。 以臣計之,毋論今年當借,卽嗣後年年借用可也。 至武官月俸,歲不過十餘萬,乃云所費不貲哉。且原數一百萬,陛下始增二十萬,年深日 於是戶科給事中官應震上言。「考會典,於內庫則云,金花銀,國初解南京供武俸,諸邊 此則祖宗舊制,陛下獨不聞耶。」帝卒不聽。 若夫物料改折,隆慶元年曾行之以解部濟邊,六年又行於南京監 毋論未來者當濟邊,卽見

拜戶部尙書,未任,以憂 時諸事創始,百務坌集。 長庚悉辦治。天啓二年遷南京刑部尚書,就移戶部。 明年召

|泰 疏 陳時弊。宣府監視中官王坤力詆之,侵及首輔周延儒。 元年起工 一部尙書,復以憂去。 久之,代閔洪學爲吏部尚 長庚率同 書。 .列上言:「陛下博覽古 六年正 一月,修撰陳于

賜譴黜,終不 副 今,曾見有內臣參論 . 都御史王志道劾坤語尤切,帝責令回奏。 忍開 內臣輕議朝政之端,流禍 輔臣者否? 自今以後,廷臣拱手屛息,豈盛朝所宜有。 無窮,爲萬世口 奏上,帝益怒。及面對,詰責者久之,竟削 實。」帝不懌。 次日召對 臣等溺職,祈立 平 其籍。 一。時

歷 擢 左通政,論者薄之。 及是,以忤中官罷。

志道,漳浦

人。

天啓時爲給事

中。

議「三案」爲高攀龍所駁,謝病歸。

其後附魏忠賢,

變, 知府,帝怒,責以欺蒙,並追咎冠帶監生授職事,責令回奏。 **外之卒。** 長 庚 不植 黨 援, 與溫體仁不甚合。 推郎中王茂學爲眞定知府, 帝不允。 奏上,斥爲民。 家居十年,國 復推為順德

作魏忠賢。 孫承宗、王象乾、閻鳴泰本末,請定去留, 劉之鳳,字雝鳴,中牟人。萬曆四十四年進士。 傳旨切責,復宣諭廷臣,再瀆奏者罪無赦。 而撤毛文龍海外軍,令居關內。又請亟罷內操。 歷南京御史。 六年,之鳳方視江防,期滿奏報。 天啓三年六月上疏別白

崇禎二年起故官。 帝召周延儒燕見,宵分始出。 之鳳偕同官上疏曰:「臣等待罪陪京, 奪其職

怨 去 延儒 捐 此 軀 爲 原籍 召 或 也, 三百 使使 唑 於 里,其立 或 下 事 眞 無纖 若 身居 廷 毫 臣 益 鄉,不 無 而 可 信 堪 於 而 、聖德有 置 延儒 齒 頰。 丘 功 Щ 得 今乃特蒙 之損 剪 所 忌 件旨 浴注 樹 所 必將 詰 私 責 目 E 爲 已復 舉 馮銓、 朝 列 盡欺,獨 霍 五 維 事 華等 延儒 ·, 曰 舉 報

謀

勇,

一援兵,

練

土

一著,密:

偵

探

、選守

令,

俱

見採

納

從 與 爲 年 火 四 法 前 月 司 此 星之變, 累遷 希旨 奏, 會 者 <u>F</u> 之鳳 尙 醃 大 其 書 刑 坐 之 言 獄 抵 後 一絞。 范景 部 鳳 本 中 之, 每 侍郎 特 犯 上書自 上 給 文劾南 請 無 報 獄 一、遂代 事 髓 修 詞 H 中 白 刑,言:「 可 ō 李 京 敲, 無贓 劕 帝 嘗 清言 給 必 三俊爲 與 事 戚屬 一嚴駁 賄,情 左 中荆 於 自今獄 侍 律 亦 本部 . 郎 未 之 可 可 無 合, 王 矜 棟 鳳 脂 情 一命璿 尙 貪墨 懼 原。 可 大 書 同 甚。 者 吸。 官葛樞 召 亦 之鳳 下部 對 置 諸 祈 月奏斷, 平 不省,竟瘐 司 悉宥趸, 以天 訊 復 臺 '呈稿 論 之鳳 論 下囚徒 救 遲疑 小者 律 全好 予輕比。 例 死 帝怒,鐫樞 不 皆五 4 及 生之仁。」 敢遽發。 月。 獄 情 年. 帝疑 贓 帝 級,調 審錄 重 一從之。 中飭 其受賄 屢疏 人 犯 高 外。 m 謝病 結 然 牆 退。 ,下之吏, 之 案 罪 十三年 在 獨 鳳 帝 時 不 雖 有 數 不

俊 兵 坐議 部 計 崇禎 獄 喬 速繋。 允 升 朝 坐 刑 之鳳 逸 部 囚 易尚 遣 論 絞 書十 戍。 瘐死 韓繼 七人。 獄 思 中。 薛 坐 貞 議 勁 以 獄 淑 除 奄 坐納 黨 名。 抵 賄 死。 胡 下 應台 詔 蘇茂 獄 獨 得 相 改 善 半 繁刑 歲 去。 而 部 馮英被 罷。 瘐 死 王 幼遣 在 李覺斯 晉 戍。 未 任, 劕 数

9

傳

第

獄 獄削籍。 ,落職閒住。 劉澤深卒於位。 胡應台再召不赴。 鄭三俊再爲尚書,改吏部。范景文未任,改工部。 繼其後者張忻,賊陷京師,與子庶吉士端並降。 徐石麒坐議

蒙小人之玷。核人品者,乃專以與東林厚薄爲輕重,豈篤論哉。 治才,而自嚴增賦之議,識者病焉。 求治得乎! 士有落然自異者, 詬誶隨之矣。 攻東林者, 幸其近己也, 而援以爲重。 於是中立者類不免 贊曰:崔景榮、黃克纘皆不爲東林所與,然特不附東林耳。方東林勢盛,羅天下淸流。 劉之鳳議獄不當,罪止謫罷,竟予重比。 畢自嚴、李長庚計臣中辦 刑罰不中,欲

## 校勘記

姜昇鄭穩山劉尙理不 條 五 、國權卷八四頁五一七九都作「劉尙禮」。 一七九作 「鄭德山」。 持 叉, 物 劉尙理, 鄭穩山,明史稿傳一二三黃克纘傳作「鄭隱山」,國権卷八四頁 明史稿傳一二三黃克纘傳、 光宗實錄泰昌元年九月己酉

## 明史卷二百五十七

## 列傳第一百四十五

張鶴鳴 弟鶴騰 董漢儒 汪泗論 趙彦 王治 王在晉 高

第

梁廷棟 熊明遇 張鳳翼 陳新甲 馮元鹺 兄元膼

城 知縣,移南京兵部主事。 張鶴鳴,字元平,潁州人。 累官陝西右參政,分巡臨、鞏, 中萬曆十四年會試,父病, 馳歸。 以才略聞 越六年,始成進士。 除歷

股諸種 爲盜。 土 賊 兵剿洪邊十二馬頭,大破紅苗。追剿柔坪。賊首老蜡雞據峰巓仰天窩,窩有九井,地平行, 乃粤西瑶種,流入黔中。 再 一,皆應龍遺孽,衆萬餘。 遷右僉都御史,巡撫貴州。 又有紅苗、環銅仁、石阡、思州、思南四郡,數幾十萬,而鎭遠、淸平間,大江、小江、九 自貴陽抵滇,人以三萬計,砦以千四百七十計, 臣部卒止萬三千,何以禦賊。」因列上增兵增餉九議。 自楊應龍平後,銷兵太多,苗仲所在爲寇。 分卽爲民,合卽 鶴鳴言:「仲

列

容 **尋發兵擊平定廣、威平、安籠諸賊,威名甚著。** 左侍郎,佐理部事。 一數千人,下通三道,各列三關。老蜡雞僭王 時兵事亟,兵部增設二侍郎,而鶴 號。 遷兵部 鶴鳴 鳴 奪其關,老蜡雞授首,撫降餘 右 侍 與 祁 郎 伯裕、王在晉並 總督陝 西三邊軍務。未上,轉 臥 家 園 衆 不 而 赴。

鳴督 度。 多齟 尙書, 視侍郎 趣 鶴 齬 鳴等,章數十上。 中外皆知經、撫不 師。 至 天啓元 獨喜巡撫王 件旨 事。 一,謫 年,遼陽 尙書 外。 化 破, 和,必悞封 貞。 時熊廷 王象乾出 帝乃剋期令兵部馬上督催, 兵事 化貞 丽 益亟。 、本庸· 經 督薊、遼軍務、鶴鳴遂代其位 疆。 略 才,好 遼東, 而 右侍郎張經 鶴 鳴信 大言。 性剛 化貞 負氣, 鶴鳴主之,所奏請 世 鶴鳴等始履 愈篤, 日 卒致疆 督援 好謾罵, 師 出 0 給事 關 任。 凌轢朝 部 至則 中 無不從,令無受廷殉 中逐 事 章 蕃 士。 大 論 壞。 無侍 請 鶴 平苗 鳴 留 郎。 象乾 與 功,進本 相 言官 失, 出 節 事 鶴

則 乃自 宜.並 無所籌 請 任 二年正月,廷議 一鶴鳴 行 書 邊。 獨毅 H 詔加 下令捕 然主撤廷酮,專任化貞。 太子太保,賜蟒玉及尙方 經 撫 間 諜,厚噉蒙古 去留。 給事 中 炒花、宰賽 惠 議甫 世 劍。 揚 、周朝瑞議 上, 諸 鶴鳴 部 化貞 憚 而 己。 行 已棄廣寧 以鶴鳴 逗遛十七 代廷 遁 H 弼, 鶴鳴內 始 其 抵 他 慚 山 多言經 海 且 關 懼 撫

俸。 御 初 门廣 史江秉謙、何薦 寧 敗 書 聞, 廷臣 可繼劾 集議 並貶官。 兵事 鶴鳴盛氣詈 廷臣益憤。 廷酮 御 史謝文錦, 自 解。 **公本** 事 給事中 中劉 弘 惠世 周朝瑞、

蕭 良 佐、 侯震陽、 熊德陽等交章極論,請用 世宗 戮丁汝夔、神宗逮石星故事 `, 與化 貞 並 按

鶴 鳴 抵 言 廷 丽 僨 疆 事 , 由 故 大 學 士 劉 燝 尚 書周 嘉謨黨庇不 · 令 出 關 所致, 因祗言 者 爲

|燥 鷹 犬。 且 目: 祖宗 故 事 , 大 司 馬不 以封 疆蒙功罪。」 於是朝瑞等復 合疏劾 之。 御 史周宗

文亦列其八罪。帝不問。鶴鳴遷延數月,謝病歸

崇禎 中 兵 部 瞿 尤 尙 六 年 書 年 耜 ·, 流 胡胡 春 ,總督貴州 魏忠賢 賊 永 陷 順 · 類州, 萬 勢大熾、起鶴鳴南京 鵬以 四 執 川、雲南、 鶴鳴由 鶴鳴 倒 忠賢進, 湖廣 懸於樹 廣西 工部 ,罵賊死,年 連章擊之。 尙 軍 務, 書。 賜尙方劍。 尋以安邦彥未滅、鶴鳴先有 八十五 鶴鳴求 去, 功未就 詔 加 ,莊烈帝 太 子太師 嗣 平苗 位 乘 傳歸 功, 給事 改

弟 鶴 騰,字元漢, 舉萬曆二十三年進士。 歷官雲南副使。 行誼醇篤, 譽過其兄。 城陷

被執,罵不絕口而死。

一濫諸事。 董漢 儒開 且 [].日 州人。 逦 來 萬曆 九 閣三殿間 十七年進 惟聞縱 士。 授 河南府推官, 酒、淫刑、黷貨。 入爲 時 戶部 事 主 可 憂, 事。 不止國 疏 陳減織 計 日絀 造、裁 已

列傳第一百四十五 董漢儒

冒

也 朝鮮再 用兵 一以郎 中出 理餉務

|楚宗五十餘人,| 計假王事獲罪,囚十載,漢[儒力言,王,假也, 請釋繫者。 撫 其 地。 尋 遷 帝賜 山 東 俱不報。 福王莊田、責湖廣 ,進副使,歷湖 憂歸。 四千 廣 左右 四 百餘 布 頃。 政使,所在有聲。 漢儒 以無所 得田,請歲輸萬金代租 四十年就拜右副都御 又爲滿朝薦、卞孔 史,巡

時等乞宥。

漢儒 簡精卒二千入衞,詔襃之。 遼軍多逃逸,有出塞投插部者。 誅逃將管大藩、張思任、 自 以虛言誑 少。 請逮治諸降將劉世勛等二十九人家屬,立誅逃將蔡汝賢等, 光宗立、召拜工部右侍郎。旋改兵部、總督宣府、大同、山西軍務。 帝亦 中 朝, 嘉納 登萊巡撫袁可立每代爲奏請。 孟淑孔等, 明年秋,以左侍郎協 漢儒請捕獲立誅,同伍相擒捕者重賞,且給餉以時,則逃者 語甚切。 帝命逮治思任等,而大藩卒置不 漢儒言文龍計畫疎,虛聲未可長恃。 理戎政。 未上,擢兵部尚書。 報 可。 天啓改元,遼陽失, 毛文龍居 時遼 問。 海 地盡亡, 諸鎭 外,屢 叉請 援

機特疏繼之,卒不納。 爭,帝不從。 奄人王體乾、宋晉、 給事中程註、御史汪泗論等合疏諫、給事中朱大典、周之綱、御 漢儒旋以母喪歸。 魏忠賢等十二人有舊勞,命所廕錦衣官皆予世襲。 後忠賢大橫,漢儒服闋, 遂不召。 史宋師襄、胡良 漢儒據祖 追敍甘肅功, 制 力

|安, <u></u> 均釋重囚七人爲軍鋒,擊倭却之。 汪 泗論,字自魯, 休寧人。 祖垍,嘉靖中進士,歷官福建兵備僉事,分守福寧。 捷聞,資金幣。 倭犯同

服其精鑒。 究肅然。 首請杜內批以嚴履霜之漸,又請召還科臣楊漣等以作士氣。 泗論 宗人祿不給,疏以橋稅贖鍰存留接濟。 中萬曆三十八年進士。授漳浦知縣,調 歷太僕寺少卿。 福清,有惠政。 巡按江西、敦重持 清屯田, 繕城堡。 嘗識黃道周於諸生中,人 大體,奸 徴擢

御

年,廣寧復失。 御 史巡撫山東。 趙彥,膚施人。萬曆十一年進士。授行人,屢遷山西左布政使。 彦以 遼陽既失,彥請增兵戍諸島,特設大將登州。 山東南北咽喉,列上八事,詔多允行。 登、萊設鎮、自此始。 光宗嗣位,以右僉都 天啓二

諸號,蔓延畿輔 先是,薊州 山 人王森得妖狐異香,四倡白蓮教,自稱聞香教主。 東、山西、河南、陝西、四川。 森居欒州石佛莊,徒黨輸金錢稱朝貢,飛竹 其徒有大小傳頭及會主

驯

復爲 籌報 滕、嶧、衆至數萬 遂先期反,自號中興福烈帝,稱大成興勝元年,<br />
[5] 戚 中官,行敎自 機事 有司所攝。 至是, , 一 日 好賢見遼東盡失,四方奸民思逞, 如。 數 越五歲、斃於獄。 百 後森徒李國用別立教,用符咒召鬼。 里。三萬曆二十三年,有司捕繫森,論死, 其子好賢及鉅野徐鴻儒、武邑于弘志輩踵 與鴻儒等約是年 用紅巾爲識。 兩教相仇,事 用賄 中秋並起兵。 五月戊申陷鄆城,俄陷鄒、 得釋。乃入京師, 盡露。 會謀洩,鴻儒 其教,徒黨益 四十二年,森 結外

縣。 别 東總兵官 增諸要地守卒。 部 兵潰 犯 時承平久,郡縣無守備 鉅 野,知 一計 遊 擎 賊。 張榜戰死,賊遂圍 縣趙延慶固守不下。 請留京操班軍及廣東援遼軍, 敗乘肇基未至,襲兗州,爲滋 山東 曲 故不置重兵。 阜、郯 或 棟 城。 兵至, 敗之, 陽知縣楊 旋敗去,遂復 以備 彦任都司楊國 征 調 叉敗 炳 所却。 嶧 其犯院州者。 薦起故大同總兵官楊肇 縣 棟、 棟等擊敗賊,復 廖棟,而檄所部練民兵, 遂偕棟等合攻鄒 鄆 基為山 城 其

大敗賊 擣 大 其 败 之横 中 七月,彦 堅, · 蹙而殪之峄山,遂圍鄒。 河。 兩 視 城 時賊 師 可 兗州 圖 精銳 也。 聚鄒、滕 彦 甫出 乃 與肇基 城, 中道,彦欲攻鄒 大小數十戰,城未下,令天津僉事來斯行及國棟等乘間復 遇贼 令遊兵綴賊 萬餘, 彦縋 滕。 鄒 入城。 城 而 副使徐從治 以 肇基急 大 軍擊 迎 曰「攻鄒 贼 一戰,而 精 銳 **介國** 於 黄陰 滕 楝 難 及 、紀王 下,不如 棟 夾擊,

騎 滕 走 縣。 被擒 國 棟 又大破賊沙河,乃築長圍 撫 其 衆 匹 萬七千 餘 人。 彦 以 攻鄒。 乃 紀 績 鴻儒抗守三月, 告廟 獻 俘, 磔鴻儒 食 盡, 於 城黨 त्ते 鴻 盡出降。 儒 躪 Щ 東二十 鴻儒單

年,徒黨不下二百萬,至是始伏誅。

于 弘 志 亦於 是年六月據武邑白家屯,將取景州 應鴻儒。 斯行方赴援 山東,還軍 一計之。

弘 志 突 彦 已 圍 走 加 兵部 爲諸 侍 生葉 郎 延珍珍 論 功 所獲, 一進尚 書兼 凡 舉 右 事 副 -都 日 御 而 史,再 滅 好賢 加太子 (亦捕 大保, 得伏 廕 誅 子 錦衣 世 **資銀** 

加 等。 奏請 振 濟 且. 捐鄒 滕 賦  $\equiv$ 年 鄆 城 《釋、遊 陽、曲 阜 年,鉅 野 半之, 皆 報

年

八

月召代董漢儒

爲

兵

部

尙

."

極

陳

邊將

剋餉

役軍、虚伍

占馬

諸弊,因

條

列

一線核

賢 撫 事 賞 宜 --册 几 增 帝 罪, 故 稱 額。 善 彦 一、立下諸 亦抗疏劾之, 有 傳 我 邊 大清兵欲入喜峰 舉 行。 自是爲忠賢所惡。 參將王楹 口 行 者 邊,爲 貴州 心的刺慎 征苗 畫上八事, 部襲殺,彥請覈實論 兵屢敗, 彦列 帝皆襃納。 八策 以獻, 罪,幷敕 楊 漣 詔 劾 **語頒示** 魏 諸邊 忠

給 事 遣兵 御 彦 史交劾之。 有 助討,彦敍功不及在晉 籌略,曉暢兵 彦三疏乞罷,忠賢 事。 然征 妖賊時,諸將 在晉憾之。 挾 前 憾, 多殺良民冒功,而其子 令 至是爲南京吏部, 乘 次傳歸 削 籍。 數抵彦。 初, 官錦衣, 妖 、賊興、 給 事 頗招搖 中袁 遼東經 玉 都市 略王 佩 遂

軍

中。

列

傳

第

太子太傅。未幾卒。

劾彥冒功濫廕,且言京觀不當築。 韶削其世廕, 並京觀毀之。 尋追敍兵部時邊功, 即家進

**頎偉,危坐堂上,吏民望之若神明。 其廉能爲一方最** 王治、字和仲、臨邑人。萬曆三十二年進士。歷知東光、任丘。服闋、補長垣。 洽儀表

四月,御史李應公希忠賢指劾洽,遂奪職閒住。 年冬,以右僉都御史巡撫浙江。洽本趙南星所引,及魏忠賢逐南星,洽乞罷,不許。五年 擢吏部稽勳主事,歷考功文選郎中。 天啓初,諸賢彙進, 洽有力焉。 遷太常少卿。

諸大臣平臺,詰問良久。洽及諸執政並主象乾策,定款議。 蠹,舉異才, 弭盜賊, 任之。上疏陳軍政十事,曰嚴債帥,修武備,核實兵,衡將材,覈欺蔽,懲脧削,勤訓練,釐積 崇禎元年召拜工部右侍郎,攝部事。 帝並襃納。 宣大總督王象乾與大同巡撫張宗衡爭插漢款戰事,帝召 兵部尚書王在晉罷,帝召見羣臣,奇洽狀貌,即擢 詳見象乾、宗衡傳。

地,及寶坻、香河、豐潤、玉田、三河、順義諸縣閒田百萬頃。元虞集有京東水田之議, 尋上言:「祖宗養兵百萬,不費朝廷一錢,屯田是也。今遼東、永平、天津、登、萊沿 海荒 本朝

乞敕諸 善, 萬曆 今已 卽 墾者荒,未墾者置不問 初,總督張佳胤、巡撫張國彦行之薊鎭,爲豪右所阻。 命行之。 道 監 司, 遵先朝七分防操、三分屯墾之制,實心 嘗 奏 汰 年 深 ,遺天施 武 弁無薦者四十八人, 地生之利,而 日 講 以邊才舉 力行,庶國 生財 之術, 其後, 監司楊嗣 計有裨, 爲養軍資,不大失策乎! 巡撫汪應蛟復行之河間。 昌、梁廷 軍 食無缺。」 棟, 後皆 帝稱

大用

申 討項煜繼之,且曰:「世宗斬一丁汝夔,將士震悚,强敵 解經 大清兵遂深入。 甪 懋代。 傳、郭之琮,總兵官祖大壽、趙 年十月,我大清兵由大安口入,都城戒嚴。 明年四月,治竟瘐死。 帝憂甚,十一月召對廷臣。 尋論罪,復坐大辟。 ~ 率 教 、滿桂、侯世祿、尤世威、曹鳴雷等先後至,不能拒, 侍郎周 洽急徵四方兵入衞。 延 儒言:「本兵備禦疎忽,調度乖張。」檢 **育遁。」帝領之,遂下洽獄,以左侍郎** 督師袁崇煥,

報。 咸獲免,人多爲治惜之。 帝怒其偵探不明,又以廷臣玩惕,擬用重典,故於給不少貸。 洽清修伉 一直,雅負時望,而應變非所長。 驟逢大故,以時艱見絀。 厥後都城復三被兵,樞臣 遵化陷, 再日始得

在晉,字明初, N 僔 第 太倉人。 萬曆二十年進士。 授中書舍人。 自部曹歷監司, 由江西布政

坐張慶臻改敕書事,削籍歸,卒。 書,尋請告歸。 月遷兵部尚書兼右副都御史,經略遼東、薊鎭、天津、登莱,代熊廷弼。八月改南京兵部尚 使擢巡撫山東右副都御史,進督河道。 五年起南京吏部尚書,尋就改兵部。崇禎元年召爲刑部尚書,未幾,遷兵部。 泰昌時,遷添設兵部左侍郎。 天啓二年署部事。

怯劾罷去。」崇禎二年冬,大清兵破灤州,第竄免。 高第,字登之,灤州人。萬曆十七年進士。歷官兵部尚書,經略薊、 遼。 未數月,以恇

魏忠賢建祠,廷棟獨不往,乞終養歸 召改禮部,歷儀制郎中。 梁廷棟,鄢陵人。父克從,太常少卿。 天啓五年遷撫治西寧參議。 廷棟舉萬曆四十七年進士,授南京兵部主事 七年調永平兵備副使。 督撫以下為

自縊 復擢廷棟兵部右侍郎兼故官, ,即擢廷棟右僉都御史代之。 崇禎元年起故官,分巡口北道。 總督薊、遼、保定軍務及四方援軍。 廷棟請賜對,面陳方略,報可。 明年加右參政。十一月,大清兵克遵化,巡撫王元雅 未幾,督師袁崇煥下獄, 廷棟有才知兵,奏對明

爽,帝心異之。

崇道又言廷棟輕於發言,致臨洮、固原 щ° 聽崇道言。 難 無滯 破, 監 司 今偃然 三年正月,兵部尚書申用懋罷 自以 耳,倏而 而 廷臣見其驟用,心嫉之。 廷棟疏 爲 中樞,熱血何銷亡也?謂制 神算。今何以難者易,易者難?且嘗請躬履行問 爲巡撫、總督、本兵,國士之遇宜何 辨,乞一 巖疆 自效,優韶慰留之。 。給事中陳良訓首刺 ,特召廷陳掌部事。 入衞兵變。 敵 不 專 在 戰 帝皆不納。 如報 似矣。 廷棟,同官陶崇道復言:「廷棟 未幾,工部主事李逢申劾廷棟虛名。 時京 0 乃在通 師 而伐 五月,永平四城復,賞廷楝調 雕 ,隨敵追擊,以 謀 州時,言遵、永易復,良、固 解嚴,務書旁午,廷棟剖決 用間,其計安在。」帝不 爲 此報主熱 數月

部尚書畢自嚴 派,民愁苦自若。 萬,餉不過千五 家遣一番巡方,天下加派 番守令,天下加派 爲 加 派者,不 其秋,廷 · 知 其 棟以 河 百三十餘萬,何憂不足。 延棟 使貧風 數百萬。 數。 兵食不足,將加賦,因言三今日閭左雖窮, 意,即 如朝覲、考滿、行取、推陞,少者費五六千金。 百餘萬。 息,卽 言今日之策,無踰加賦,請畝加九釐之外,再增三釐。 巡按查盤 再 而曰民窮於遼餉何也? 加派,民歡忻亦自若。」疏入,帝兪其言,下戶部協議。戶 、訪維 故今日民窮之故,惟在官貪。 、飽遺 、謝薦,多者至 臣考九邊額設兵餉,兵不 然不窮於遼餉 二三萬金,合天下計之, 合海內 使貪風 計之, 也。 不除,即不 於是增賦 國家選 歲 過五 中, 加 + 或

度功,加太子少保,世廕錦衣僉事

列

叉 百 極 六 十 陳 陝 五 萬 西 致 有 寇之由 奇 海 內 請 並 重 咨怨。 一懲將 吏貪汙者以紓 已,陳釐弊五 事: 軍 民 日 之憤 屯 田 多塞 曰 叛 鹽 亂 法 之源。 日錢 法, 帝 皆 日 茶 聚 馬, 納 日 積

賴 坐 通 其 事 狀 事 一,永光 中 他 纠 縦 中 事 奸 人 主 葛 兩 廷 左 左 插 人 應 人 棟 逐由 遷 沈敏 右 遂 漢 斗 居 行 之, 撫 下 劾 中 此 交關 賞 人司 獄 御 樞 得 去。 事 史袁 歲 閒 、延棟 副,復 薊無 兩 餘 住 御史水 人者 弘 ٠, 去,以熊 所 劉 勛 薦 上 陳兵 納 可 疏 其才 吏部 佳 訓 參將胡宗明 發 胤 明遇 事 一,特擢 者,弘 兩 尚書王永光 納 多中機宜, 人交通 賄 代 營私 勛 職 方主 郡 金, 狀,并 人 私 帝甚 廷棟 也 請 事 人 赐 列 , 仍主 倚 也 兩 疏辯 兵 其賄鬻將 疏 任 部 撫 力攻廷棟, 廷棟謀弁去永光, 求 賞 然頗 去, 廷棟 ) 頗 領 帝猶 挾數行私,不 爲 數 亦 事 奸 劾 慰留 發其所 `, 事 利。 弘勛 俱 廷 及 以 有 與 有 楝 爲 司官 己代 錦 迹。 安 庇 衣 朝 國 之。 張 之, 論 手 棟 廷 道 書, 所 棟危 者 後 得 濬 重 住胤 且言 初 釋 通 以 給 兵 賄

棟 後 清 鳳 亦 必 翼 兵 卒。 懼 曲 罹 八 年 罪 問 重 已 譴, ·冬, 召 道 自 踰 法 請 日 天 服 司定罪 督 拜 壽 大黄 兵部 師 Щ ,廷棟坐大辟,以旣死不究云。 克昌 藥求死。 兩 右 侍 人 恇 鄓 平, 逼京 怯 兼 八月 不 右都 十 師 御 九 近畿 史,代楊 川 日 後 ,大清兵出 地 地 多 嗣昌總督宣、大、山 乃廷棟 殘破,言官交章論 塞。 所轄 至九月朔, 也 命戴 西 劾 罪 軍 鳳 務。明 入 翼卒。 兩 援。 人 益懼 年七月,我 兵部 踰 旬 度解嚴 尙 日 書張 廷

熊明遇,字良孺,進賢人。 萬曆二十九年進士。 知長興縣。 四十三年擢兵科給事中,

旋掌科事。上疏極陳時弊了言:

哭之時也。 暈,爲恒風,爲枯旱。 內女妖,遼東兵端吐火,卽春秋二百四十年間,未有稠於今日者。且山東大祲,人相 食,黃河水稽天,兼以太白經天,輔星湛沒,熒惑襲月,金水愆行,或日光無芒, 今春以來,天鼓兩震於晉地,流星晝隕於淸豐,地震二十八,天火九,石首雨菽,河 敢以八憂、五漸、三無之說進。 天譴愈深,而陛下所行皆誣天拂經之事,此誠禽息碎首、賈生痛 日月同

成 覬賞,可憂三。 備,棟梁常撓,可憂六。 奸藪。武庫之器,漸見銷亡。商旅之途,漸至梗塞。 今內庫太實,外庫太虛,可憂一。 餉臣乏餉,邊臣開邊,可憂二。 八憂未已,五漸繼之。 黃河泛濫,運河膠淤,可憂四。 羣譁盈衢,訛言載道,可憂七。吳民喜亂,冠履倒置,可憂八。 太阿之柄,漸入中涓。魁壘之人,漸如隕籜。 齊苦荒天,楚苦索地,可憂五。鼎鉉不 套部圖王,插部 制科之法,漸

列傳第一百四十五 熊明遇

之守令皆途窮,揚、粤之監司多規避,是遠方無東治。 五漸未已,三無繼之。 匹夫可熒惑天子,小梭可濫邀絲綸,是朝廷無紀綱。 讒搆之口甚於戈戟,傾危之禍慘 滇、黔

帝不省。亓詩教等以明遇與東林通,出爲福建僉事,遷寧夏參議。

於蘇、張,是士大夫無人心。 天下事可不寒心哉

異表,與奸人謀不軌,明遇捕獲之,置其黨十餘 獄,追贓千二百金,謫戍貴州平溪衞 御史游士任,五年三月給事中薛國觀逐劾其黨庇徇私,忠賢卽矯旨革職。 練蒼頭軍,以資守禦。 天啓元年以尚寶少卿進太僕少卿,尋擢南京右愈都御史、提督操江。 永樂中,齊王榑以罪廢,其子孫居南京,號齊庶人。 人於法。 魏忠賢黨謀盡逐東林,以明遇嘗救 未幾, 有睿爁 建營伏虎山, 坐汪文言 者,自負 選

謂渠魁乞降亦宜撫,脅從負固亦宜剿。今鶴以撫賊無功就逮, 功,亦一 被脅之人絕其生路。 兵部尙書,疏陳四司宿弊,悉見採納。 五年正月,山東叛將李九成等陷登州,明遇過信巡撫余大成言, 莊烈帝卽位,釋還。 體敍錄。 而諸將善撫馭如吳弘器等,仍與陞擢,庶賊黨日孤。」帝亦納之。 宜急敕新督臣洪承疇, 崇禎元年起兵部右侍郎。 楊鶴被逮,明遇言一秦中流寇,明旨許撫剿 諭賊黨殺賊自效。 明年進左,遷南京刑部尚書。 倘諸臣因鶴故欲盡戮無辜, 卽神 力主撫議, 久愈猖獗, 魁、劉金輩, 並行。 四年召拜 果立奇 臣

遇 蒸城被圍幾陷,乃調關外軍討定之。 呂黃鐘, 與中官王 川 爲 久之, 用薦起南京兵部尚書, 改工部,引疾歸。 御 坤等遣使議 . 史趙繼鼎連劾之。明遇再疏乞罷,帝責以疎庸僨事, 和,饋金帛牢體,師乃旋。 於是給事中孫三杰力詆 語詳徐從治傳。 事聞、帝惡聚專擅 國變後卒。 當是時,我大清兵入宣府,巡撫沈棨 明遇、棨交關悞國, 命解任候勘。 ,召對明遇等於平臺。 同官陳贊化、 尋以故官致 则

承宗 弗上。 之。 年可就之工,六載瘡痍,非一時可起之疾。 天啓初 欲還朝,以遼事委之己,甚懼,卽疏請專守關門。其座主葉向高、 自王化貞棄廣寧後,關外八城盡空,樞輔孫承宗銳意修復,而版築未興。鳳翼聞命,疑 張 鳳翼、代州人。萬曆四十一年進士。授戶部主事。歷廣寧兵備副使、憂歸。 旣抵關,以八月出閱前屯、寧遠諸城,上疏極頌承宗經 起右參政,飭遵化兵備。三年五月,遼東巡撫閻鳴泰罷,擢鳳翼右僉都御史代 今日議剿不能,言戰不得,計惟固守。 理功。且曰:「八城畚插、非一 鄉人韓爌柄政,抑使 當以山海

時趙率教駐前屯,墾田、練卒有成效。 列 傳 第 百 四 + Ŧi. 張 風 翼 及袁崇煥、滿桂守寧遠,關外規模略定。 忽有傳 爲

根基,寧遠爲門戶,廣寧爲哨探。」其意專主守關,與承宗異議

遭內艱,遂解去。承宗復上疏爲世龍等辨,因詆鳳翼才鄙而怯,識闇而狡,工於趨利,巧於 避患。廷議以旣去不復問。 遼左,猶不失全盛,如大寧、河套,棄之何害。今舉世不欲復遼,彼一人獨欲復耶。」密令所 知居言路者詆馬世龍貧淫及三大將建閩之非,以揻承宗。承宗不悅,舉其言入告。適鳳翼 不定。」遂於四年正月東行。鳳翼語人曰:「樞輔欲以寧前荒塞居我,是殺我也。國家卽棄 中左所被兵者,永平吏民洶洶思竄。鳳翼心動,亟遣妻子西歸。承宗曰:「我不出關,人心

代之。 六年秋,起故官,巡撫保定。明年冬,薊遼總督劉詔罷,進鳳翼右都御史兼兵部右侍郎

未幾,謝病去。諸建祠者俱入逆案,鳳翼以邊臣故獲宥。 崇禎元年二月,御史甯光先劾鳳翼前撫保定,建魏忠賢生祠。 鳳翼引罪乞罷,不許。

事,從之。 尚書, 世 陰 錦 衣 **负**事。 三年起故官,代劉策總督薊、遼、保定軍務。旣復遵、永四城,敍功,進太子少保、兵部 已復謝病去。久之,召爲兵部尚書。 鳳翼以西協單弱,條奏增良將、宿重兵、備火器、預軍儲、遠哨探數

兵寡,上言三國初額軍,宣府十五萬一千,今止六萬七千。大同十三萬五千,今止七萬五 明 年二月召對平臺,與吏部尚書李長庚同奉 ·「爲 [國任事,潔己率屬] 之諭。 尋以宣、大

帝 干。 並 一從之。 乞兩 鎭各增募萬人,分營訓練。 給 事 中周 純修、御 史葛徵奇等以兵事 且月餉止給五錢, H 棘, 劾 安能致赳桓之士,乞一人食二餉。」 鳳翼 溺 職 0 鳳翼連疏乞休,皆不

遣 再請。 中 境。 竟 廣 閒 **令戴罪視事** 無功。 軍 顧 戍 住 務 或 七 帝怒守臣 監 寶幼 帝以 年以恢復登州功,加太子太保。日刊,我大清西征插漢,師旋,入山西、大同、宣府 八年正 剿中原羣盗。言官以承疇勢難兼顧,請別遣一人爲總督。 視 及賊將南犯,請以江 中官劉允中、劉文忠、日王坤亦充淨軍。 爲 鳳翼舉用非人,帝亦不問。 輕,責 月,賊果燬鳳陽皇陵。 失機,下兵部 鳳翼對狀。 論 罪。 北巡撫楊一鵬鎭鳳陽, 於是總督、巡撫及三鎭總兵 部議 言官交章劾鳳翼。 奇瑜 巡撫戴君恩、胡沾恩、焦源清革職贖杖 旣罷,即命三邊總督洪承疇兼督河南、山西、湖 防護皇陵。 時討賊總督陳奇瑜以招撫債 鳳翼亦自危, 睦自强、公 溫體 鳳翼不能決, 仁不聽, 引罪乞罷。 曹文詔、 ,總督張宗衡 鳳翼亦不能 張 旣 帝不許, (事,給. 全昌 加 承疇 事 俱

總 北, 理 不食稻米,賊馬不飼江 一,與洪承疇分討南北賊,而賊已蔓延不可制矣。 初 賊之犯江北也,給事中桐城孫晉以鄉里爲憂。 南草。」聞者笑之。 事益急,始令朱大典鎭鳳陽。 給事中劉昌劾鳳翼推總兵陳壯猷, 鳳翼曰:「公南人,何憂賊? 尋推盧象昇爲 賊起西 納

其重賄。鳳翼力辯,昌貶秩調外。

當 昇。 副 東 前 樵 萬,更迭出 萬二千, 里 ĦI 有 茅、後勁、中權聯絡相貫,然後可制賊而 、 饑飽、 勞逸之勢, 相懸如 內 人 飭 倘贼 分布 漕渠,彼 後爨,動 ,勢分,又孤 已 公白 而 又募燃兵七千, 諶 옗 鳳 犯、勢衆而 出 翼言 、楚數千里,力薄,又久戍生疾,故尤世 觚 無舟楫,豈能飛越。我兵從西北窮追,猶易爲力。 帝稱善,命速行之。 關,則承疇合剿於豫; 呼庚。 恒 無援,故艾萬年、曹文詔俱敗。 剿 賊 力合:我零星四 贼馬多行疾,一二日而十舍可至;我步多行緩,三日而 之役、原議集兵七萬二千,隨賊所向,以殄滅爲期。 合九萬有奇, 兵力厚矣。 此,賊何日平。 鳳翼 應,勢寡 盡入關, 、自請督師討賊、帝優詔 不爲賊制。 乞嚴敕督、理二臣、選將統軍,軍各一二萬人,俾 而 則象昇合剿於秦。 力分。 今既益以祖寬、李重鎭、倪寵、 請 威、徐來朝 以 今 助大勢東行,北有黃河,南有長江, 賊所至因 賊在關內 完 元 允。 俱 此防 潰。 糧於我,人皆 臣 者屬承疇,在關 更 河扼險,目前要策,所 以二萬 有慮者, 重 督臣 人散 l宿飽. 賊 繭難馳。 號三四十 牟文綬兵 承疇以三 外者屬 布三秦千 1;我 所 象 衆 至

兵 行 防河,必至無所適從。 軍 機要不當中制。 九 年二 月,給事中陳昌文上言:「將在軍,君命有所不受。今旣假督、理二臣以便宜,則 若今日議不許斬級,明日又議必斬級, 願樞臣自今凡可掣督、撫之肘者,俱寬之文法,俾得展布可也。 今日議徵兵援鳳,明日又議撤 兵

叉 法,守敵所不攻,攻敵所不守,奇正錯出,滅賊何難。今不惟不能滅,乃今日破軍殺將,明日 陷邑殘州,止罪守令而不及巡撫,豈法之平。願樞臣自今凡可責諸撫之成者,勿寬文法,

俾

加磨

礪

可也。」帝納其言。

Щ 之,剋期五 撫移師近界,聽援剿,而督、理二臣以大軍入山蹙之,且嚴遏米商通販,賊可盡殄。 霊 ,賊竟不能滅 寶與之合。 江 北之賊,自滁州、歸德兩敗後,盡趨永寧、盧氏、內鄉、淅川大山中,關中賊亦由閿鄉、 月蕩平,老師費財,督撫以下罪無赦。鳳翼雖建此策,象昇所部多騎軍,不善入 鳳翼請敕河南、鄖陽、陝西三巡撫各督將吏扼防,毋使軼出,四川、湖廣 帝深 (兩巡 然

劾疏五六上,鳳翼憂甚。 怯 中官盧維寧監督通、津、臨、德軍務,公 坐視不救。 不敢戰, 至七月,我大清兵自天壽山後入昌平,都城戒嚴。 於是寶坻、順義、文安、永淸、雄、安肅、定興諸縣及安州、定州相繼失守。 鳳翼懼,自請督師。 賜尙方劍,盡督諸鎭勤王兵。以左侍郎王業浩署部事 而宣大總督梁廷棟亦統兵入援。三人相掎角,皆退 給事中王家彦以陵寢震驚,劾鳳翼 命

不 已之變,尚書王洽 至八月末,都城解嚴,鳳翼卽以九月朔卒。 下獄死,復坐大辟。 鳳翼知不免,日服大黄藥,病已 已而議罪奪其官。 十一年七月論前剿寇 **殆 猶治** 軍書

功,有詔敍復。

也, 意圖逭責,乃竟以畏 在位十 七 年間,易中樞十四人, 法 死 皆不久獲罪。 鳳翼善溫體仁,獨居位五載。 其督師

遷寧前 言 悉倚賴 ,乃報可。 陳 焉。 兵 新甲,長壽人。 備 僉事 及城破 新甲言:「臣蒙使過之恩, 0 一、坐削 寧前 萬曆時舉於鄉, 關 籍。 外要地,新甲以才能著。 巡撫方 藻惜 由監視疏下,此心未白,清議隨之,不敢受。」 爲定州知州。 其才, 請留之, 几 崇禎元年入爲刑部員外郎,進郎中。 年,大凌新 未報。 城被圍, 監視 中官馬雲程亦以爲 援師雲集,征 不許。 繕

楊 跡 所不到,具得士馬損 嗣 昌 七 爲 年九月擢右愈都御史,代焦源清巡撫宣府。 總督,與新甲共事,以是知其才。 一耗、城堡傾頹、弓矢甲仗朽 九年五 月,內 敝狀。 新甲以戎備久弛,親歷塞垣,經前 製歸 屢疏請 於朝, 加 整飭, 邊防賴之。 人足

尋

進副使,仍蒞寧遠。

兼 右愈都御史,奪情任之。 十一年六月,宣大總督盧象昇丁外艱,嗣昌方任 會大清兵深入內地,詔新甲受代,卽督所部兵協禦。 中樞,薦新甲堪代。 詔擢兵部右侍郎 未幾,象昇

訓 戰歿,孫傳庭代統其軍。 劾其前後逗撓。 練、飭馬政、練火器、禁侵漁諸事,報可。 新甲歷陳功狀,且言呈瑞挾讐,帝不問。 新甲與相倚仗,終不敢戰。 麾下卒夜譁,新甲請罪,亦不問。 明年春,畿輔解嚴。 旣赴鎭, 列 上編 隊伍 順天巡按劉呈瑞 給事中戴明說 、嚴哨探、明

嘗劾之,帝以輕議重臣,停其俸

兵事 總兵,徐州 諸大臣避中樞,故新甲得爲之。 四失,帝即命 十三年正月召代傅宗龍爲兵部尚書。 亦宜設 飭行 重鎭,通 兩京咽喉,南護鳳陵,中防漕運,帝並採用之。 陛見畢,陳保邦 自弘治初賈俊後,乙榜無至尚書者。 十策, 多廷臣所嘗言。 惟言天 復陳 樞政 壽山後 兵事方亟, 四要及 宜設

以微罪 復 亦 司 失守者,長吏論死。 不能 能 所鐫秩 兼 十四年三月,賊陷雒陽、襄陽,福、襄二王被難,鐫新甲三秩視事。 行 繋 顧 也。 獄 鄉城,即 ,新甲於召對時稱其才,退復上章力薦, 楊嗣昌卒於軍 與優敍。 宛平知 縣陳景建言村鎭焚掠三所者,長東當戍邊。新甲主其議,言:「 若四郊被寇,與失機並論。」帝卽從之。  $\dot{\mathbf{H}}$ ,新甲舉丁啓睿往代,議者尤其失人。 兩人獲用,亦新甲力 然是時 然傅宗龍、 舊制、府、州、縣城 也。 中原皆盜, 尋論秋防功 孫傳庭並 其法 有 郭

時 錦 州 被 圍 久, 聲援斷 絕。 有卒逸出 ,傳祖大壽語,請以車營逼 ),毋輕 戰。 總督洪承 不 月, 遁 弱 集 爲 趣 立 憂 還, 諸 解 可 兵 松 意 議 數 將 新 密 Щ 言官請 主 進兵。 萬 Ħ 奏 持 而 援 不 錦 Ŀ 遣 重 乏, 能 州 聞 罪 以 職 諸 救。 相 亦 之。 待。 方 將 繼 新 未 郎 以 十五 甲復 失, 敢 帝 張 八 新 決 岩 以 甲 月次松山 岩麒 胎 戦 年二月 爲 麒 力庇,復 書趣 然 面 復 帝 商 自 召新 御 承 而 於 寧遠 令出 為我 疇。 新 承 史甘惟燦 甲 甲 嚋 通還 關監 大清 承疇 堅執 問策, 0 若 激新 軍。 兵所 前 劾新甲寡謀悞國 新 麒 言官劾若與者, 議 甲 未 破 甲 錦 請 返 言 岩麒 州 與 大潰, 韋 新 閣 又奉密敕, 未 素 甲 臣 解, 狂 請 及侍 士卒死亡數萬 躁, 分 承嚋 悉及新甲。 請 四道 郎 見諸軍稍 速 遂不 吳甡 又被圍 令舉 )夾攻。 敢主前 計 賢自代,不 之,因 人。 於松山 新甲屢乞罷, 有 承 斬 若麒 嚋 議 獲 陳十 以 納 帝 謂 兵 自 若 미 深 海 麒 重 分 力 以 道 円

帝 汪 故 輒 喬 慰 路 年 新 甲 攻 出 之 雅 關 討 不 有 才,曉 能 賊 入。 ,先後陷歿,賊勢 邊事 當是時 • 然 不能持廉, 闖 賊 愈張。 蹂躪 河 所 言官 南 用 多債 刻新 開 封 帥。 甲 屢被圍 者 深結 「,章 至 他 中 數 郡 貴 縣 〈爲接, 失亡 新 與 相 甲 請 司禮 踵 罪 總督 章 王 一德 亦十餘上, 化 傅宗龍 尤

陞 |陸後 初 新 見疆 甲以南北 事 大壞, 交困 述宗龍之言於帝 一,遣使 與大清議 0 和 帝召新甲詰責, 私言於傅宗龍。 新 甲叩頭謝罪。 宗龍 出 都 日 , 以 陞 進曰:「倘肯 語 大學士 謝

列傳第一百四十五 馮元駿

陳演 徧 益 論 報 十 議 和 怒。 ")新 行 之。 , 和 皆戒 諧 ", 和 亦 金 甚於薄城耶。」逐棄新甲於 甲視之置几 內 帝慍 君 於帝前 至七月,給事中馬嘉植復劾之,遂下獄。 亦可恃。」帝 以 幸 外。 勿洩。 勿 甚,留 多言 給事 力救,且 疏 上。 外廷 中廖國遴、 不 默然,尋諭 言官 日三國 下。 其家僮悞 獑 知之, 駴 E, 愕, 法,敵兵不薄城,不殺大司 楊枝起等營救於刑部侍郎徐 新甲密圖之,而 降嚴旨, त्ते 以為塘報也, 故屢疏 **交章**劾陞, 争, 切責新甲,令自 然不 陸遂斥 付之 外廷不 新甲從獄 得 沙傳。 左驗 去。 知也。 ·馬。」帝曰:「他且勿論 帝旣 陳。 中 於是言路譁然, 石麒, 上書乞宥,不許。 日 以 新甲不引罪,反自 已,言官謁陞。 , 所造 和議委新甲 拒不 職方郎 聽。 給 , 大學士周 馬 手 陞 事 新甲 戮 中方士亮首 紹 詔 言:「上意主 詡 辱 愉 往 其功,帝 知不强, 我 以 返 延儒、 親藩 密語 者 數

如。」迅慚而退。 洩 機 事, 新 甲爲楊嗣昌引用,其才 且彰主過,故殺之不疑。 新甲初自陽和入都門,黃霧四塞,識者以爲不祥,及是果應。 딞 心術相似。 厥後給事中沈迅力詆其失,帝曰:「令爾作新甲, 軍書旁午,裁答無滯。 帝初甚倚之,晚特惡其 恐

馮元 字爾弢, 慈谿人。 父若愚,南京太僕少卿。 天啓元年,元飈與兄元颺同舉於

鄉。明年,元飇成進士,歷知澄海、揭陽。

當 直 王 奪言 應 摩。 崇禎 熊 路。 無 無 大臣 何 四 皆 年徵授戶科給 上疏力 體 不 納 完宜 罷 詆 應熊謀改吏部,元臟復 周 復薦 延 事 儒,被切責。 中。 詞 臣姚希孟 帝遣 中官 尋論 孤忠獨立,不當奪講官 出鎮,元飇力爭。 摭劾其貪穢 Щ 東 總督劉宇 数事。 烈縱 時元颺亦疏論 被旨譙責 科臣 寇主 一無罪。 趙東曦正 逐乞假 中官,兄弟俱有 叉言 一詞讜 歸 禮部侍 郎

今日, 之名 擬 臣 上 居實避名,受功辭 而 猶 年春還朝。 更代天言,有國初 委之聖裁,下 河謝 天下責哉?」 時 委之六部,持片語,叢 罪。 鳳 陽皇 顧問之榮而兼隆位號。 平時養威 陵燬,廷臣交論 自 重,遇 百欺。 天 溫 下 體仁、王 夫 有 地親 中外之責,孰大於 事 ず, 輒 勢峻,言 應熊 日 一。昭 朋 比悞國。 聽志行,柄用專且 代 本 、票擬。 無相 元飇上言:「 名,吾儕 有 漢、 重 唐宰相 一者莫 政 止 供 本大 票 如

卿 動 東 ,改南京太僕卿,就遷通 宮講官, 人主,惟 遷 禮 科 苶 左 :右給事 能 詞 得執政歡。」至發恚, 德黃道 中,再遷刑科左給 周爲首輔 政使。 張至發所扼,且疏詆之。 兩疏詆元鹺, 事中。 數言部囚多輕罪,請帝寬宥,並採納之。 帝皆置不問。 元飈言:「道周至淸無徒, 由戶科都給事中擢太常少 忠足以 詔簡

五年六月召拜兵部右侍郎,轉左。 元飇多智數,尙權譎,與兄元颺並好結納,一時象

熊開 善。 然稱「二馮」。 次 第示元飇 日,帝 元 延 儒 欲 召諸 盡 欲 發延 以 然故 大臣 元颰 振 儒 饑 遊 與馮銓 爲辨其良梏。 罪,元 爲 西苑 銓功,復 飇 通 賜 譜 沮 宴明德 止 其 誼 之, 帝 冠 帶 日 初 殿 開元 在言 , 憚 大司 因 以是 衆議,元 「論 路 馬 試 兵事 獲 缺 重譴。 周 0 人, 腿 延 良 令引 儒 無踰 久, 兵部 Ó 吳 出 及爲 卿者。」 姓 御馬 尙 入 侍郎 書陳 閣 佳 元飈以 助之, || 者||百: ,延儒 新 甲 · 除匹, 棄市 多病 旣 方 再 III ,元飈 相 辭 及 甡 元元 ブケ 內 背 製 署 延 用 瞇 火箭。 部 儒 張 因 事 議 國 與

廣 益 地 堅,乃允 盡陷 十六年五 |關 其 去。 寧 月,國維 叉 H 告警。 10 獄 逐 至 八 以元飇爲尙書。 月,以 病 劇乞休。 帝倚之甚至,元飈顧不能 帝慰留 之,賜 瓜 果食物 有 所爲。 遣 醫 診 河南 湖

維

也。 家 李邦 俟 懦 請 部 華、 戰 卹 元 元 議 腿謂 腿 而 史可 卒 給 頗 勝 能 斬 如 事 將 法 所 中吳适言:「元颰 土 料 自代。 臣 請。 一習懦 事 一謝之。」 0 孫傳庭治兵關中,元 帝不用,用 未 叉 經 貽書傳庭,戒 行 陣, 身膺特簡 兵科 宜 致 都給 賊 了,莫展 伊 而 事 輕鬭 不宜 中 不 一籌,予以祭葬, 自、自、 張縉彦,都 可輕 致 於賊。 高 戦。 兩 將 城 乃於 廷臣 不可 逐不 帝前 多言不 是使悞國之臣生死皆得志 任, 守。 爭之日 傳 戦則 福 庭 王 果敗。 時, 「請先下 賊益張,兵久易 元 將 飇 卒, 臣 其 薦

遭李希流代,未至而京城陷,元颺乃由海道脫歸。 文聲,兩人並獲譴,元颺謫山東鹽運司判官。十一年,濟南被兵,攝濟寧兵備事。十四年遷 溥、張采倡復社,亂天下。 巡按倪元珙以屬元颺,元颺盛稱溥等,元珙據以入告。體仁庇 世 責以沽名,彝憲亦慍,元颺請告歸。 錦衣衞。 天津兵備副使。十月擢右愈都御史,代李繼貞巡撫天津,兼督遼餉。 仁當國,唐世濟爲都御史,皆鳥程人,其鄉人盜太湖,以兩家爲奧主。元颺捕得其渠魁,則 元颺抗疏謂:「內臣當別立公署,不當踞二部堂,二部司屬亦不得至彝憲門,犯交結禁。」帝 濟族子也,置之法。 元 颺,字爾賡,舉崇<u>禛</u>元年進士,授都水主事。 時元鹺已掌中樞。 遷福建提學副使,巡撫張國維奏留之。 帝顧其兄弟厚, 嘗賜宮參療元颺疾。 尋起禮部主事,進員外郞中,遷蘇松兵備參議。 是秋九月卒。 帝遣中官張彝憲總理戶、工二部 太倉人陸文聲計其鄉官張 而元颺以衰老乞休。 明年敍軍功,廕一子 溫

王化貞,陳新甲之舉丁啓睿,皆闇於知人。 明季疆場多故,則 重本兵之權,而居是位者乃多庸闇關宂之輩。 至松山之役,其悞國可勝言哉! 梁廷棟謂民窮 若張鶴鳴之任

#### 校勘記

- 而 鶴 鳴信化貞愈篤 原脫「信」字,據明史稿傳一二三張鶴鳴傳補。
- 薊州 人王 森 得妖 狐異香 薊州 人, 罪惟錄傳三一及明史紀事本末卷七〇都作「深州人」。 {國 {權

卷 八 Ŧi. 頁五二〇五稱徐鴻儒「與深州王好賢、景州于弘志通密約」。 王好賢是王森兒子。

- =H 數百 里 日 原作「旦」,據明史稿傳一二三趙彥傳改。
- $\overline{ }$ 四 稱 大成興勝元年 大成興勝,罪惟錄傳三一徐鴻儒傳、 明史紀事本末卷七〇都作「大乘興勝」。
- $\overline{ }$ 加 太子 大保 原作 「加太子少保」。 明史稿傳 三五 一張鳳翼傳作 「加太子太保」。 按上文崇禎

三年張鳳翼已進太子少保,據明史稿改。

- CK〕睦自強 明史稿傳一三五張鳳翼傳作「眭自強」。
- -<del>-</del>--劉文忠 發卷四崇顧四年九月乙未條,國權卷九一頁五五七二改。 原作「劉文中」,據本書卷二五八魏呈潤傳附李曰輔傳、 又卷三〇五張彝憲傳, 懷宗實
- }傳 命中官盧維 明史稿傳 寧監督通津臨德軍務 一三五張鳳翼傳、 國権卷九五頁五七五五改。 盧維 寧, 原作「羅維寧」,據本書卷二五四張瑋傳附金光辰

列傳第一百四十五 校勘記

# 明史卷二百五十八

## 列傳第一百四十六

許譽卯<br />
華允誠<br />
魏呈潤<br />
胡良機<br />
李曰輔

77健 黃宗昌 韓一良 吳執御 吳彦芳

王績燦

趙東曦

毛

黃紹杰 李世祺 傅朝佑 莊釐獻 李汝璨

章正宸

姜埰 弟垓 熊開元 方士亮 詹爾選 湯開遠

### 成勇 陳龍正

許譽卿,字公實,華亭人。 萬曆四十四年進士。 授金華推官。

州 同 知楊姜, 天啓三年徵拜吏科給事中。 侵撫按職。 中旨謂姜賄譽卿出疏,停譽卿俸半年。 疏言錦衣世職,不當濫畀保姆奄尹。織造中官李實誣劾蘇 楊連劾魏忠賢, 譽卿 亦抗

列

傳

第

百

四

+

六

許

譽

卿

六六四五

德哉 **邇復用立枷法,士民槁項斃者不知凡幾。** 賢大怒。又言:「內閣政本重地,而票擬大權拱手授之內廷。廠衞一奉打問之旨,五毒備施。 疏 不爲早除, 極論忠賢大逆不道 祖制,宦官不典兵。今禁旅日繁,內操未罷,聚虎狼於蕭牆之內,逞金革於禁闥之中, 必胎後患。」於是忠賢怒益甚。 一一一視漢之朋結趙嬈,唐之勢傾中外,宋之典兵矯詔謀間兩宮何異」。忠 又行數十年不行之廷杖,流毒縉紳,豈所以昭君 會趙南星、高攀龍被逐,譽卿偕同列論救,遂鐫

起廢 附瑞 給 卽 事 日 事 中陳堯言疏 引 中 莊 輒把持使不得進,引其同 薛 烈帝即位,誅崔 去 東林、尤陰鷙。 國 觀以己亦璫孽也,遂訐譽卿及同官沈惟炳 刻永光 **踏孽,不當正** 、魏,將大計 詔定逆案,頌璫者卽黨逆。 類 一銓席。 天下吏。 譽卿時已起兵科給事中,具疏 然帝方眷永光, 奄黨房壯麗 永光嘗碩璫,治逆案,陰護持之。南京給 東林主盟,結黨亂政。譽卿上 、安伸、楊維 責堯言。 爭。 譽卿 垣 吏部 一之徒冀收餘 叉抗疏 尙 書 爭, 王 疏自白 永 於是都 屢 光 素

入 玩寇速禍罪,言一賊在秦、晉時,口早設總督,遏其渡河, 而 鳳陽 年起故官,歷工科都給事 已陷 皇陵毁焉。 譽卿 中。 痛 憤 明年正月,流賊陷潁州,譽卿 ,直發本 兵張 鳳翼固 位 禍止西北一隅耳, 一失事 ·, 及 請急調五 大學 土溫 7 乃侍郎彭汝楠 體仁、王 人守 鳳陽 應熊

南震 以不必移鎮爲詞,則輔臣欲諱玩寇速禍,其可得哉!帝以苛求責之。 邊之陳奇瑜。 避不肯行。 有兵力,賊卽 鄰 ,始有潍撫操江移鎭之疏,識者已恨其晚。及奉旨,則曰 及賊入楚、豫,人言交攻,然後不得已而議設之。 不敢輕 鞭長不及, 釀成今日之禍, 非樞臣之固位失事乎。 犯。 鳳陽何地,使巡撫早移,豈有今日。 侍郎汪慶百又避不行,乃推 今樞臣以曾請移鎭藉口,撫臣 不必移鎮。 流寇發難已久,樞臣 臣觀各 地 方 因 稍 東 極

帝仍不 按吳振纓且相繼就逮矣。 絕私奉 而是時言官吳履中等復交章劾體仁、應熊交相贊美,「其擬旨慰留,曰忠悃,曰藍畫,曰 問。 公,日弘濟時艱。 譽卿曰:「皇上臨馭有年,法無假貸,獨於悞國輔臣 不知時事至此,忠蓋安在,而奉公濟艱者何 輔臣顧從容入直,退食委蛇,謂可超然事外乎。」帝終不 不一問。今者巡撫楊 事 也三譽卿再疏 聽。 一鵬、巡

逐疏 卿及震孟意,之普又搆之陞。 撫,主給事中宋之普家,陞等列之舉首,爲給事中張第元所發。 都御史唐世濟。 希體仁意,出之南京。大學士文震孟慍,語侵陞,陞亦慍。適山東布政使勞永嘉賄營登萊巡 攻譽卿 譽卿 在天啓時,謝陞方爲文選郎。及是,陞長東部,譽卿猶滯 謂 其營求北缺,不欲南遷,爲把持朝政地,幷及囑紹芳事。 譽卿以世濟恃體仁,惡尤甚,當先去之。 先是,福建布 政使申紹芳亦欲得登萊巡撫、譽卿曾言之陸。陞 御史張纘曾乃獨 帝以詰壓,言路因欲攻壓及 垣中。以資深當擢京卿,陞 體仁從中主之,譽 刻陞, 陞疑出 譽

列

傳

第

卿遂削籍 立,起光祿 ,紹芳逮問遣戍。 卿,不赴。 國變,薙髮爲僧,久之卒。 十 五 年,御史劉逵及給事中楊枝起相繼論薦, 竟不果 用。 福王

進士。 攀龍入都,授都水司主事。 華允誠,字汝立,無錫 從同 且高攀龍講學首善書院,先後旋里,遂受業爲弟子,傳其主靜之學。 人。 攀龍去官,允誠亦告歸 曾祖舜欽 瑞州 知府。 祖啓直,四川參政。 允誠舉天啓二年 四 年春、從

微行 陳三大可惜,四大可憂。 崇禎 察知之,賜白金,敍功,加俸 改元,起營繕主事 略言: 丁進員 《外郎。 年,改職方員外郎。 二年冬,京師戒嚴,分守德勝門,四十餘日不懈。帝 五年六月以溫體仁、閔洪學亂政,疏

和 恒之世 當事借皇上剛嚴,而佐以舞文擊斷之術,倚皇上綜核,而騁其訟逋握算之能。遂使 .競尙刑名,淸明之躬寖成叢脞。 以聖主圖治之盛心,爲諸臣鬭智之捷徑。

可

件,長東考課惟問錢糧。 帥屬大僚,驚魂於回奏認罪,封駁重臣,奔命於接本守科。 以多士靖共之精神、爲案牘鈎較之能事。 遂使直指風裁 徒徵 可惜二。

歲時,爲卽聾從昧之舉動。 分門之念。 廟堂不以人心爲憂,政府不以人才爲重。 意見互 一觭,議 論 滋 可 借 擾。 = 遂使剿撫等於築舍, 四海漸成土崩瓦解之形,諸臣 用含有若舉碁。 以興邦啓聖之 但有角戶

大成,與孫元化並逮。 人主所以總 一天下者,法令也。 甚至一言一事之偶誤,執訊隨之。 喪師惧國之王化貞,與楊鎬異辟。 遂使刑罰不中,鈇鉞無威。 一 潔已愛民之余

可憂也。

國 家 (所恃以爲元氣者,公論也。直言敢諫之士一鳴輒斥,指佞薦賢之章目爲奸黨,

不 惟不用其言,幷錮其人,又加之罪。 **遂使暗默求容**,是非共蔽。 二可憂也。

上 |以近臣可倚,而不知倖饕已開,以操縱惟吾,而不知屈辱士大夫已甚。 國 家 所賴以防維者,廉恥也。 近者中使一遣,妄自尊大,羣僚趨走,惟恐後時。 遂使阿諛成

風,羞惡盡喪。三可憂也。

阿閣 侵焉。 然保舉,而白簡反爲罪案,排正類,則講官借題逼逐,而薦剡遂作爰書。欺莫大於此矣, 臣 國 家所藉 .之意,造門請命,夜以爲常。 今次輔體仁與冢臣洪學,同邑朋比,惟異己之驅除。閣臣兼操吏部之權,吏部 以進賢退不肖者,銓衡也。我朝罷丞相,以用人之權歸之吏部,閣臣不得 黜陟大柄,祇供報復之私。 甚至庇同鄉,則逆黨公 惟

列

僔

第

**擅莫專於此矣,黨莫固於此矣。遂使威福下移,舉措倒置。四可憂也。** 

乎。」帝亦悟兩人同里有私,乃奪允誠俸半年,而洪學亦旋罷去。 家貲而首拔。 掃地。陛下排衆議而用之,以其悻直寡諧,豈知包藏禍心,陰肆其毒。又有如洪學者,爲之 摘疏中「握定機關」語,再令陳狀。「允誠復上言:「二人朋比,舉朝共知。溫育仁不識一丁,以 羽翼,逼植私人, 戕盡善類,無一人敢犯其鋒者,臣復受何人指使。」帝以體仁純忠亮節,而 疏入,帝詰其別有指使。允誠乃列上洪學徇私數事,且曰:「體仁生平,終臂塗顏,廉隅 鄧英以論沈演而謫,羅喻義以『左右非人』一語而逐。此非事之章明較著者

造請,亦不報謝。國變後,屛居墓田,不肯薙髮,與從孫尚濂駢斬於南京。 其冬,以省親歸,孝養母。母年八十三而終。後爲福王驗封員外郎,十餘日卽引疾歸。 允誠踐履篤實,不慕榮達。延儒再召,遺人以京卿啗之,允誠拒不應。 入南都,士英先

魏呈潤,字中嚴,龍溪人。崇禎元年進士。由庶吉士改兵科給事 中。

人,分營訓練。 三年冬,疏陳兵屯之策:「請敕順天、保定兩巡撫簡所部壯士,大邑五百人,小邑二三百 而天津翟鳳翀、通州范景文、昌平侯恂並建節鉞,宜令練兵之外兼營屯田。」

又陳閩海剿撫機宜六事。並議行。

間 升 稽 萬 再編 助。 織 顧 造,宜 核乎 七千,合薊門援卒,非溢 ,悉糜俸料,臣懼其難繼也。 里 及帝卽 熹宗時,司業朱之俊議建魏忠賢祠國學旁,下敎有「功不在禹下」語,置籍,責諸生捐 明 奉急公之褒。上蒙而 甲。 年 且暫停。 邊報告急,非臣子言功之日,而小捷頻聞,躐 夏,久旱求言。 位,委過諸生陸萬齡、曹代何以自解,首輔韓爌以同鄉庇之,漏逆案。及是,之俊 是猶剜肉醫瘡,瘡未 銓法壞於事 疏言 原數。加 下削,不可不禁飭。」又條陳數策,請大修北方水政。帝皆納其言。 例,正途日壅,不可不疏通。 江 廖而 驛站 淮旱災,五湖之間,海岸爲谷,舊穀不登,新絲未熟,上供 派 所裁,纔六十萬,未足充軍餉十一,而 五百九十萬外,新增又百四十餘萬,猶憂不足, 肉先潰。 關 外舊兵十八萬,額餉七 加峻秩,門客厮養詭名戎籍, 撫按諸臣捐貲助餉,大抵索之民 百餘萬。 郵傳 益疲,勢必 今兵 不 可 階 不 上十 而 爲

已遷侍講。 呈潤發其奸,請與萬齡棄西市,之俊由是廢。

撫,有巡方,又有監視。 道考覈之法 宣 我國 一府監 家 在,而乃以付坤。 視 設御史巡九邊,秩卑而任鉅。 中官王坤以册 一官出,增一官擾。 籍委頓,劾巡按御史胡良機。 且邊事 日壞, 病在十羊九牧。 中貴之威,又復十倍。 良機在先朝以糾逆璫削籍, 帝奪良機官,即令坤按核。 旣有 將帥, 御史偶獲戾, 今果有罪,則 又有監司 且莫自必 旣 呈潤 有 有 督 回

列

僔

第

其命、誰復以國事抗者。異日九邊聲息、監視善惡、奚從而聞之。乞召還良機、毋使仰鼻息 於中貴。」帝以呈潤黨比,貶三級,出之外。

减 顧元年起故官,按宣、大二鎭。 年滿當代,以其敏練,再巡一年。 至是,遂爲坤劾罷 汪直、劉瑾。忠賢憾之,以年例遷廣東參議。良機方按貴州,不候代而去,遂斥爲民。崇 良機者,南昌人也,字省之。萬曆四十四年進士。天啓間爲御史,嘗糾魏忠賢之惡不

坤,亦獲譴云。 時 又有御史李曰輔者,亦以論中官獲譴,廷臣交章論救,不聽。 而御史趙東曦又疏劾

也。 糧,唐文征提督京營戎政,王坤監餉宣府,劉文忠監餉大同,劉允中監餉山西。 李奇茂監茶馬陝西。[5]日輔上疏諫曰:「邇者一日遣內臣四,尋又遣用五,非兵機則 監軍關、寧,<br />
(三) 張國元監軍東協,王之心監軍中協,鄧希詔監軍西協。 燮元計兵事,偕諸將攻復重慶。 廷臣方交章,而登島、陝西又有兩閹之遣。 日輔,字元卿,亦南昌人也,與胡良機同里閈。萬曆中舉於鄉,爲成都推官。 崇禎四年擢南京御史。時中官四出,張彝憲總理戶、工**錢** 假專擅之權,駭中外之聽,啓水火之隙,開 又命吳直監餉登島, 又命王應朝 與巡撫朱 要 地

昔 依附之門,灰任事之心,藉委卸之口。 何 以撤 今何以遣? 天下多故,擇將爲 臣愚實爲寒心。 先。 陛 下不築黃金臺招頗、牧,乃汲汲 陛下踐阼初, 盡撤內臣,中外稱聖。 内臣 一是遣,

曾何補理亂之數哉」帝怒,謫曰輔廣東布政司照磨。

使還京。」帝言:「宣鎭擅和、實坤奏發,何謂欺隱。」調東曦外任、謫福建布政司 之,非不易之典。 倚庇,欺蔽 事 屯 力。陛下 塞下, 東曦,字 赫然震怒,逮巡撫沈棨,罷本兵熊明遇。 以充軍用,不報。 日甚。 馭初,上海人。 今卽盡撤之,猶謂不早。 坤不得辭扶同罪,反侈邊烽已熄爲己功,且請代。 適宣塞有 萬曆四十七年進士。 私和事,王坤時監宣餉,且請代。 坤顧請代,圖彌縫於去後。 乃監視王坤 崇禎五年由知縣入爲刑科給事 方會飲城 夫內臣之遣,陛下一 願陛 東曦 樓,商搉和 下正 都 坤罪,撤 事 中,請 議 宣塞 邊臣 用 失 興

正、禮部郎中,奉使還里。 異時呈潤起官,以光祿署丞終。 福王時,召東曦爲給事中,曰輔爲御史,而二人者皆已死矣。 良機起光祿 典簿,終南京吏部主事。 東曦稍遷行人司

楊維 垣 毛 八 羽健,字芝田,公安人。 大罪及阮大鍼反覆變幻狀,二人遂被斥。 天啓二年進士。 崇禎元年由知縣徵授御史。好言事,首劾

遞 朱燮元、閔 必 [相假,一紙洗補數四。差役之威如虎,小民之命如絲。」帝卽飭所司嚴加釐革,積困爲蘇。 一日程 陸 一廣 ,而畢節止百餘里平衍,從此進兵,何患不克。」因畫上足兵措餉方略,幷薦舊總督 奇險,七晝夜抵大方,一夫當關,千人自廢,王三善、蔡復一所以屢敗 .夢得等。帝卽議行,後果平賊。 已,陳驛遞之害:「兵部勘合有發出,無繳 安邦彦久無功。 羽健言:「賊巢在大方、黔其前門、蜀 遵、永其後戶。由黔進兵、 也。遵義距大 入。士紳

言路 年後之天下乎,孰危孰安。今日語太平則不足,語剔弊則有餘,諸臣亦何負國家哉 者爲相黨而 目攻己者爲結黨欺君,帝怒而爲之罷會推矣。 可用,勢不得不用諸奸擯斥之人。如以今之連袂登進者爲相黨而來,抑將以昔之鱗次削奪 二字破前此公論之不予,且箝後來言路之多口。 張,輒疑舉朝皆黨,則株連蔓引,不且一網盡哉。」帝責羽健疑揣,而以前條陳驛遞原之。 新進標直之徒,尤競抨擊以爲名高。 當是之時,閹黨旣敗,東林大盛。而朝端王永光陰陽閃爍,溫體仁猾賊,周延儒回佞。 去乎! 陛下不識在朝諸臣與奸黨諸臣之孰正孰邪,不觀天啓七年前與崇禎元 體仁之計錢謙益也,以科場舊事,延儒助之惡,且 御史黃宗昌疏糾體仁熱中枚卜,欲以「結黨」 羽健亦憤朋黨之說,曰:「彼附逆諸奸旣不 二一夫

病。 羽健劾陞、永光朋比,宜並罪。 太常 少卿謝陞求巡撫於永光,永光長 永光召對文華殿,力詆羽健,請究主使之者。 東部,陞當推薊鎮,畏而 引病以避,後推 大學士韓 太僕 · 則不

朝疑 漢臣有言『所言公,公言之,所言私,王者不受私』。」疏入,切責。 因 **爌曰**:「究言官,非體也。」帝不從,已而宥之。 專去之。 駭。 羽健曰:「召見不以盈廷而以獨侍,清問不以朝參而以燕閒。更漏已沉,閣門猶啓。 及袁崇煥下獄,主事陸澄源以羽健嘗疏譽崇煥,劾之,落職歸,卒。 一日,帝御文華殿,獨召延儒語良久,事秘,學 羽健既積件權要,其黨思

容、矯偽不可貸。」遂列上黃克纘、范濟世、霍維華、邵輔忠、呂純如等六十一人,乞罷免。帝 以列名多,不聽。尋劾罷逆黨尚書張我續、侍郎呂圖南、通政使岳駿聲、給事中潘士聞、御 秩,皆魏氏官也。」得旨:「汰敍功冒濫者。」宗昌爭曰:「臣所糾乃矯旨,非冒濫也。 史王珙。 賓天在八月二十三日。三殿敍功止先一日,正當帝疾大漸之時,豈能安閒出詔。 黄宗昌,字長倩,卽墨人。天啓二年進士。崇禎初,爲御史,請斥矯旨爲官,言:「先帝 又劾周延儒貪穢數事,帝怒,停俸半年。 旣而劾體仁,不納 凡加 冒濫 一番進 猶 H

時體仁、延儒皆已入閣,而永光意忌,以爲不先劾承薦也。 等不以實聞,獄不決者久之。 二年冬,巡按湖廣。 岷王裡洪爲校尉侍聖及善化王長子企鋀等所弑。四多政襲承薦 宗昌至,羣奸始伏辜。 帝責問前諸臣失出罪,宗昌糾承薦等。 鐫宗昌四級,宗昌遂歸

十五年,即墨被兵,宗昌率鄉人拒守,城全。仲子基中流矢死,其妻周氏及三妾郭氏、

列

# 劉氏殉之,謂之「一門五烈」。

御史可輕授耶」叱一良前後矛盾,褫其官。 對 者。」帝大喜,召見廷臣,卽令一良宣讀。讀已,以疏遍視閣臣曰「一良忠鯁,可僉都御史。」 金非從天降,非從地出」,則掩卷而歎。問一良「五百金誰之餽也。」一良卒無所指。固問, 永光請令指實。 得乎。臣兩月來,辭却書帕五百金,臣寡交猶然,餘可推矣。伏乞陛下大爲懲創,逮治其尤 行賄之首,給事爲納賄之尤。今言者俱咎守令不廉,然守令亦安得廉。俸薪幾何,上司督 取,過客有書儀,考滿、朝覲之費,無慮數千金。此金非從天降,非從地出,而欲守令之廉, 樂沮之。澄城人韓一良者,元年授戶科給事中,言:「陛下平臺召對,有『文官不愛錢』語, 二舊事爲言,語頗侵永光。帝乃再召見一良、永光及廷臣,手前疏循環頌,音琅然,而曰「此 而今何處非用錢之地?何官非愛錢之人?向以錢進,安得不以錢償。以官言之,則縣官爲 如前。 莊烈帝初在位,銳意圖治,數召見羣臣論事。然語不合,輒訶譴。而王永光長吏部,尤 帝欲一良指實,將有所懲創, 一良唯唯,如不欲告訐人者,則令密奏。五日不奏,而舉周應秋、閻鳴泰一 一良卒以風聞謝,大不懌。 謂大學士劉鴻訓曰:都

則

吳執御,字朗公,黃巖人。天啓二年進士。除濟南推官。 德州建魏忠賢祠,不赴。

派,示四方停줲之期,曉然知息肩有日,不至召亂。 崇禎三年徵授刑科給事中。明年請除掣簽法,使人地相配,議格不行。 請罷捐助搜括,毋爲貪墨藏奸藪。 請蠲畿 輔 帝以 加

沽名市德責之。

邊關 劉宗周、鄭鄤,忤旨譙讓。又言:「往者邊警,袁崇煥、王元雅擁金錢數百萬,士馬數十萬, 人。請畿輔東北及秦、晉沿邊州縣,選授精敏甲科,賜璽書,畀本地租賦,撫練軍民自禦寇。 帝時未審執御所論畿輔、秦、晉也,而曰:「歲賦留本地,則國用何資。」不聽。 狼狽失守。而史應聘、王象雲、張星、左應選以一邑抗强敵。故曰籌邊不在增兵餉,而在擇 法懲貪,而永光誨貪,官邪何日正,寵賂何日淸。」帝以永光淸慎,不納其言。請召黃克纘、 文武吏繕修戰守外,責以理財,如先臣王翺、葉盛輩所爲。客兵可撤,餉省可數百萬。」 劾吏部尚書王永光比匪:「用王元雅而封疆悞,聽張道濬賄舉尹同皐而祖制紊。國家立

延儒 陰氣;心膂大臣,不皆君子。」帝以所稱「陽剛君子」無主名,令指實。 遣元功招之,不赴,至是竟劾延儒。 又劾首輔周延儒攬權,其姻親陳于泰及幕客李元功等交關爲奸利。初,執御行 又陳內外陰陽之說:「九邊、中原、廟堂之上, 執御乃以前所薦 取 入 劉宗 無非

列傳第

救,卒坐三人贖徒三年。 時御史王績燦方以薦李邦華、劉宗周等下獄,云而執御、彦芳復繼之,舉朝震駭。言官爲申 良當用,通政使章光岳邪媚當斥。」帝怒其朋比,執政復從中搆之,遂削二人籍,下法司訊。 御史吳彥芳言:「執御所舉固眞君子,他若侍郎李瑾、李邦華、畢懋康、至兒思輝、程紹皆忠 周三人,及姜曰廣、文震孟、陳仁錫、黃道周、倪元璐、曹于汴、惠世揚、羅喩義、易應昌對。會

彥芳,字延祖,歙縣人。爲御史。 大凌被圍,疏論孫承宗。 又駁逆案呂純如辨冤之謬。

登州用兵,請設監島中官。至是譴歸。

張鳳翔、李邦華、劉宗周、惠世揚,遂獲罪,卒。福王時,復官。 績燦,字偉奏,安福人。與給事中鄧英陳奸吏私派之弊,又進賜環、起廢、容諫三說。薦

治行高等擢崇禛四年御史,並有聲。其発官也,又皆以薦才不中,與吳執御同論譴云。 彦芳、績燦兩人者,皆以天啓五年舉進士。<br />
彦芳授莆田知縣,績燦授興化知縣,又皆以

章正宸,字羽侯,會稽人。 從學同里劉宗周,有學行。 崇禎四年進士。由庶吉士改禮科

給事中。勸帝法周、孔,黜管、商,崇仁義,賤富强。

正 宸 上言: 禮 部 侍 應 郎 熊 王 强 應 熊者 愎 自 張,何緣 溫 體 仁 特簡 私 À 也,廷推 事 因 多擾,變以刻成 閣 臣 一,望 輕不得與。 门線核 傷察,宜 體仁引為 一存運 助,爲 營 奈 入 何使 閣

很 傲之人, 與 〈贊平 明之治哉。」 帝大怒,下 獄 拷 訊 竟 削 籍 歸

話 禮 延 與 正 皆 閣 搘 爭之,事 欲 風 臣 拄。 九 年冬, 起 刺 願 延儒 江 歲 閣 陵知 H 邃 臣 召爲 一朝會 寢。 積 延儒 縣史調元, 戶科給 誠 一,帝隆 以格 其不肯阿徇 欲 用宣府巡 君 師 事 中,遷 傅 Œ 心 禮 宸 毋緣 進 如此。未幾,會推 止之。 無江 吏 科 延 中官,毋修 都 儒 禹緒爲宣大 延儒 等而 給 事 以罪輔 揖 中 ·。 周 之曰「朕 恩怨,毋以寵 閣 總督,正宸 臣,教李日宣,謫戍均州 延 馮銓 一儒再相 力得再召,欲假 以天下聽先生 持不可。東部 利居 ,帝尊禮之特重。正宸出 成 (功, 毋 正 守涿 以鄮 希 宸 延 功復 語 儒 滁 日 在 指 私 日宣傳。 銓 陛 親 冠帶, 「其門, 用之。 暱。」 下隆

六師 尺 殺 心 則尺,據險處 齊 偽 ,駐蹕 力,互 官,爲 福 王 立,召復 准 爲聲援。 朝廷效死 上,聲靈 一要,以 正宸故官。 力。 兩 規 震 京血 中 動 忠義 了,人切同仇, 原。 脈 通,而 所激。 正宸 天下大矣,渠無人應運而出哉。」 痛 後塞井陘,絕孟 四方響應。 舉朝 勇氣將自倍。 無討 贼 宜亟憿江 心,上疏 津,據武 簡 車 徒 北 日 選將 關以 :「比者河北、山左各結營寨,擒 四鎮,分渡河、淮 攻隴 帥 , 繕城塹, 進寸則寸, 右。 陛下縞 ,聯絡諸路,一 素, 親 進 率

列

傳

阮 大鍼、正宸並疏諫、不納。改大理丞,正宸請假歸。 魏 國 公徐弘基薦逆案張捷,部議並起用鄒之麟、張孫振、劉光斗,安遠侯柳祚昌等薦起 魯王監國、署舊官。 事敗,棄家爲僧。

黄紹杰,萬安人。天啓五年進士。授中書舍人。

遼 刑 總督曹文衡與監視 內豎,計邊臣辱國,大不便。 崇禎 科左給 元 事中。 年考選給 事中。 中官鄧希韶相計。紹杰言:「文衡烈士,受內臣指摘,何顏立三軍上。希 需次,劾罷奄黨南京御史李時馨、徐復陽。補授兵科。五年,薊 宜亟更文衡而罷希韶。」帝不聽。久之,文衡以閒住去。紹杰

遷

怒 求 諱,毋撄其兇鋒也』。凡此召變之尤。 事當行 無人不愁怨。 而不 龍。 解也。 ,則曰『體仁聞恐不樂也』。覆一疏,建一議,又曰『慮體仁有他屬』。不然,則『體仁忌 今者久旱,陛下修明政治,納讜言,可謂應天以實矣,而雨澤不降,何哉。天有所甚 年五月因旱求言。紹杰疏論大學士溫體仁曰:「漢世災異,策殆三公,宰執亦引罪以 秉政旣久,窺瞷益工,中外趨承益巧。一人當用,則曰『體仁意未遽爾也』。一 次輔溫體仁者,秉政數載,上干天和,無歲不旱嘆,無日不風霾,無處不盜賊 願陛下罷體仁以回天意。體仁罷而甘霖不降,殺臣以

正欺君之罪。」

府檢校。 計。 寬磨 帝怒,調爲上林苑署丞,遷行人司副。八年,賊犯皇陵,紹杰再劾體仁悞國召寇,再謫應天 私 督,庇兵部侍郎彭汝楠,致失機宜;用貪穢胡鍾麟爲職方郎,而黜李繼貞; 黨爲言。 言官之口 猶荷優容。 人唐世濟爲南京總憲,錮正人瞿式耜等,庇姻婭沈棨爲宣撫,私款辱國;庇主考丁進,從 體仁 勘。 帝 方眷體仁,貶紹杰一秩。 屢遷南京吏部郎中,卒。 ,挑善類之禍;上惟票擬一語,可以激聖明之怒,蓋僨悞之愆。」體仁猶辨,且以朋 用門幹王治,東南之利皆其轉輸。體仁私邸兩被盜,失黃金寶玉無算,匿不敢言。 紹杰遂言「體仁受銅商王誠金、體仁長子受巡撫棨及兩淮巡鹽高欽順等金、皆萬 且曰:「臣所仰祝聖明,洞燭體仁奸欺者,其說則有兩端。 一字涉體仁,必遭貶黜。誰不自愛 體仁辨,且訐其別有指授。 ,為人指授耶。」因列其罪狀:東南· 紹杰言:「廷臣言事,指及乘與, 下惟朋黨 囑尙書閔洪學起 一語,可以箝 不肯設立 總

狀。 帝怒,謫福建按察司檢校。 先是,七年正月,給事中李世祺論溫體仁及大學士吳宗達,幷劾兵部尚書張鳳翼溺職 世祺,字壽生,靑浦人。天啓二年進士,授行人。

崇禎三年擢刑科給事中,陳大計之當定者二,曰兵食之計,民生之計;大弊之當釐者

明

三,曰六曹之弊在吏胥,邊吏之弊在欺隱,貪墨之弊在奢靡。夏旱,禱雨未應,乃進修政之 而 軍民各分事 說三,日 顯操之。 一恤幾甸,議催科,預儲備。 魏忠賢盜弄神器,則賴聖天子躬翦除之,而奈何復躬自蹈之。」不聽。 權,防專擅。 內閣入奉天顏,出司兵食,內廷意旨旣得而陰伺之,外廷事權又得 帝並納之。 中官出鎮,世祺上言:「祖宗立法,錢穀兵馬,

臣,釋疑忌之根,開功名之路,庶天變可回,時艱可濟。」帝以借端瀆奏,切責之。 效可概見。伏願撤回各使,以明陰不干陽之分。然後採公論以進退大臣,酌事情以衡量小 低眉則氣折,强項則釁開。各邊監視之遣,已將期月,初雖間有摘發,至竟同歸模棱,效不 鞭策不前;六曹窘簿書,救過不贍。簪筆執簡之臣,接跡囹圄;考槃薖軸之士,抗聲鴻舉。一 統 人議,疑及衆人;一事訾,疑及衆事。黃衣之使,頡頏卿貳之堂,貂蟬之座,雄踞節鉞之上。 軍衡才無術,緩急無可恃之人。中樞決策,掩耳盜鈴,主計持籌,醫瘡剜肉。州縣迫功令, 五. 年八月,淫雨損山陵,昌平地動。 世祺上言:「日者輔理調燮無聞、精神爲固寵之用,

祺」。帝詰世祺,則言聞之贊化。帝詰責者再三,世祺執如初,乃已。至是論體仁絕世之奸, 大貪之尤,遂貶官。久之,起行人司副,屢遷太僕寺卿。遣祭魯王,事竣旋里。國變,杜門不 給事中陳贊化劾周延儒,謂「延儒嘗語人曰:今上,義皇上人也。此成何語。臣聞之世

出,人之卒。

傳朝佑,字右君,臨川人。 有孝行。 萬曆中舉鄉試第一,師事鄒元標。 天啓二年成進

士,授中書舍人。

清 。 密兵機,則欲其箝人口,故挫直臣以忧衆。 明旨,播諸朝右,曰『吾意固然也』。皇上因旱求言,則恐其揚己過,故削言官以立威;皇上愼 勃首輔周延儒:「以機械變詐之心,運刑名督責之術。見佞則加之膝,結袁弘勛、張 دآاه ,遇賢則墜之淵,擯錢象坤、劉宗周於草莽。 崇禎 大臣之道固如是乎。」件旨切責。 三年考選給事中。 永平初復,列上善後七事。 往時糾其罪惡者盡遭斥逐,而親知鄉曲 傾陷正士,加之極刑,日『上意不測 帝採納之,補授兵科。 明年八月疏 道濬 也」。 遍 列 攘 爲 要 腹

使 有司 中官司 修城 慶遷工科左給事中,陳當務十二事:一納諫,二恤民,三擇相,四勿以內批用輔臣,五勿 積栗,十二講聖諭 彈劾,六勿令法外加濫刑,七止緹騎,八停內操,九抑武臣驕玩,十廣起廢,十 六條。 出封益藩,事竣還里。 敕

九 年即家進刑科都給事中。 還朝愆期,爲給事中陳啓新所劾,貶秩調外。 未行,疏論

溫體仁六大罪。略言:

明

此謂 體仁 靈之 僚,幾數百人,駢首囹圄,天良盡喪。 彼則借 人 且 會莫之懲,則 糾 陷。 爲 得 彈,株連不已。 地,體仁曾無未 陛 下 體仁冒賞冒廕,中外解體因之。 相 以快恩仇,窺陛 罪於聖賢。 与目 當 邊警時,特簡體仁入閣。 月交蝕,星辰 日尋恩怨,圖 同生天地,誰無本心,體仁自有肺腸,偏欲殘害忠良。祇 且七年又議裁減茂才,國家三百年取士之經,一旦壞 兩綢繆,兩 下治尚精 報睚 失行,風霾迭見,四方告災,歲比不登,地震河決,城陷井枯, 眦。 地失守,陵寢震驚。 明,彼 此謂得罪於天地。 此謂 體仁乃不以道事君,而務刑 則託 此謂得罪於封疆。 得罪於心性。 以張 威福。 此 謂 强 此謂得罪於天子。鳳陽 得罪於祖宗。 敵內逼,大盜四起,高麗旦暮 體仁子見屏於 名。窺陛 變理 於體仁之手。 復 下意在振作, 令文 社諸生,募 職 在三公。 、昌平鍾 、武臣

變爲 不足畏,毋以人言爲不足恤,毋以羣小之逢迎爲必可任,毋以一己之精明爲必可 大赦天下,除苛政,庶倒懸可解,太平可致。 夫 人主之辨姦在明,而 人主之去姦在斷。 伏願陛下大施明斷,速去體仁。 毋以天

帝怒,除名,下吏按治。踰月,體仁亦罷。

國 專益棘,獲罪者益衆,獄幾滿。 中官杜勳雅重朝佑、令其上疏請罪,而己從中主之、可復故官、朝佑不應。十一年冬, 朝佑乃從獄中上書,請寬恤,語過激。 會有邊警,未報也。

明年春、責以顚倒賢奸、恣意訕侮、廷杖六十、創重而卒。

當 時臺省競言事,言不中多獲譴。章正宸、莊釐獻、李汝璨之徒好直諫,朝佑嘗疏稱之。

釐獻,字任公,晉江人。崇禎六年由庶吉士改兵科給事中,上太平十二策,極論東廠之

害。忤旨,貶浙江布政司照磨。

未已,何怪其然。」帝怒,削籍歸。 用政事之弊。又言:「八九年來,干和召災,始於端揆,積於四海。水旱盜賊頻見疊出,勢將 汝璨、朝佑旣死,福王時,復官。 汝璨,字用章,南昌人。崇禎時爲刑科給事中。十年閏月因旱求言,陳回天四要,論財 國變,衰經北面哀號,作祈死文祈死,竟死。 整獻事福王,復官,久之卒。

姜埰,字如農,萊陽人。崇禎四年進士。授密雲知縣,調儀眞,遷禮部主事。 十五年擢

禮科給事中。

及服官,恣行奸慝。 山陽武舉陳啓新者,崇禎九年詣闕上書,言:「天下三大病。士子作文,高談孝悌仁義, 此科目之病也。 國初典史授都御史,貢士授布政,秀才授尚書,嘉靖時

列

明

賄狀。 罪。 以 詔行勘。 中,歷兵科左給事中。 拜大將以節制有司便宜行事。」捧疏跪正陽門三日,中官取以進。帝大喜,立擢吏科給事 請停科目以絀虚文,舉孝廉以崇實行,罷行取考選以除積橫之習,蠲災傷田賦以蘇民困,專 時,先以給事、御史自待,監司、郡守承奉不暇,剥下虐民,恣其所爲。此行取考選之病也。 猶三途並用,今惟一途。舉貢不得至顯官,一舉進士,橫行放誕。此資格之病也。 專、御史,教官得爲之,其後途稍隘,而舉人、推官、知縣猶與其列,今惟以進士選。 愈都御史李先春議聚 奎罰輕,並奪其職。 久之,御史倫之楷劾其請託受財,還鄉驕横,始 **| 啓新竟逃去,不知所之。國變後,爲僧以卒。** 帝悉不究。然啓新在事所條奏,率無關大計。御史王聚奎劾其溺職,帝怒,謫聚奎。 未上而啓新遭母憂,採因劾其不忠不孝,大奸大詐。遂削啓新籍,下撫按追贓擬 劉宗周、詹爾選等先後論之。 **歙人楊光先計其出身賤役,** 及徇私納 舊制,給 彼受任

時帝以寇氛未息,民罹鋒鏑,建齋南城。」埰上疏諫,不報。已,陳蕩寇二策,日明農業,

收勇敢。

帝善共言。

論 路尤至。塚疑帝已人其説,乃上言三陸下視言官重,故責之嚴。 初,温體仁及薛國觀排異己及建言者。周延儒再相,盘反所爲,廣引清流,言路亦蜂起 忌者乃造二十四氣之說,以指朝士二十四人,直達御前。 如聖諭云。代人規卸、爲人 帝適下詔戒諭百官,賣言

出 不利己,而 缺』者,臣敢謂無其事。 思以中之,激至尊之怒,箝言官之口,人皆暗默 然陛下何所見而云。倘如二十四氣蜚語,此必大奸巨憝,恐言者 ,誰與陛下言 天下 事 者

戴 爲 起、廖國遊,以屬 埰敢 深省 天錫 二十四氣之說,類匿名文書,見卽當毀,何故累騰奏牘。 先是, 計問 發也。 愆 [詔旨, 藐玩特甚。] 立下詔獄考訊。 給事中方士亮論密雲巡撫王繼謨不勝任,保定參政錢 所頒 **埰探之未審**,謂帝實指其事,倉卒拜疏。 戒諭,詞旨哀痛,讀者感傷。 延儒,及廷推,遂得愈旨。 適帝 垛顧 掌鎮撫梁淸宏以獄詞上,帝曰:「埰情罪特重。 有「爲 · 反覆詰難,若深疑於帝者,帝遂大怒,曰: 人出缺」諭,蓋舉廷臣 而帝於是時方憂勞天下,默告上帝, 其速按實以聞 天錫因夤 緣 . 積習告戒之,非 給 事 中楊枝

會鎭 性懼 麒等擬埰戍,開元贖徒。 不宜 元 中 廖國 至午門,並杖一百。 /撫再 一誣謗; ,以語同官。 時 遴,國 遊以語 行 上埰獄,言掠訊者再, 人熊開元亦以建言下錦衣衛。 即有之,不宜洩。」請並誅養性、開元 同官曰:「不見田爾耕、許顯純事乎。」養性乃不敢奉命,私以語同 同官曹良直。 垛已死,垛弟垓口溺灌之,乃復蘇,仍繫刑部獄 帝責以徇情骫法,令對狀。 供無異詞。養性亦封還密旨。 良直 即疏劾養性「歸過於君,而自以爲功。 帝怒兩人甚,密旨下衞帥駱養性,令潛斃之獄。 。養性大懼,帝亦不欲殺諫臣,疏竟留中。 乃奪石麒及郎中劉沂 乃命移刑官定罪,尚書徐石 明年秋,大疫,命諸 春官,而逮埰、開 陛下 鄉給 無此旨,

列

197

囚 田 外收保。 垛、 開元出 ,卽謁謝賓客。 帝以語刑部尚書張忻、忻懼,復禁之獄。 十七年二

月始釋埰,戍宣州衞。將赴戍所而都城陷。

奉先帝命戍宣州 福 王 立,遇赦,起故官。 ,死必葬我敬亭之麓。」二子如其言 丁父艱,不赴。 或 變後,流寓蘇州以卒。且死,語其二子曰:「吾

殺垓甚。 門死者二十餘人。 人,見署中題名碑,崔呈秀、阮大鋮 垓,字<u>如</u>須,崇禎十三年進士。 | 垓乃變姓 名,逃之寧波。 攻請代兄繫獄,釋埰歸葬,不許。 與魏 國亡乃解。 授行人。 大中並 採下獄,垓盡力營護。後聞鄉邑破,父殉難,一 列,立拜疏請去二人名。 即日奔喪,奉母南走蘇州。 及大鉞得 初,该爲行 志,滋 欲

熊開 元,字魚山,嘉魚人。天啓五年進士。除崇明知縣,調繁吳江。

化貞 家貲鉅萬,每會朝審,輒買燕市少年,雜立道旁,投熊廷弼瓦礫,嗟歎化貞不休,以此熒惑上 **人緊** 崇禎 四 不決,奸人張應時等疏頌其功,請以身代死,俾戴罪立功。 年徵授吏科給事中。 帝遣中官王應朝等監視關 、寧軍馬,開元抗疏爭,不納。王 開元疏駁之,言:「化貞

今應時復敢爲此請,宜立肆化貞市朝。」化貞卒正 法。

西按察司照磨,遷光祿寺監事。 如 瑞豹者悉以聞。 時 有令,有司徵賦不及額者不得考選。 於是開元及御史鄭友元等三人並貶二秩調外,開元不赴官。久之,起山 給事中周瑞豹考選而後完賦,帝怒貶謫之,命

者,報名會極門,即日召對。 延儒述己困頓狀。 十三年遷行人司副。左降官率驟遷,開元以淹久頗觖望。會光祿丞缺,開元詣首輔周 延儒適以他事輒命駕出,開元大慍。會帝以畿輔被兵求言,官民陳事

已敗壞不可復救矣。」帝與詰問人之,疑開元有所爲,曰:「爾意有人欲用乎。」開元辨無有, 任 臣至數十人,不過陛下曰賢,左右曰賢而已,未必諸大夫國人皆曰賢也。 惟兵食寇賊。 遂言:「陛下求治十五年,天下日以亂,必有其故。」帝曰:「其故安在。」開元言:「今 所謀 言:「易稱『君不密則失臣,臣不密則失身』,請輔臣暫退。」延儒等引退者再,帝不許。 開 之易如 元不敢言,但奏軍事而出。越十餘日,復請見。 開元欲論延儒,次日卽請見。帝召入文昭閣,開元請密論軍事。 此。 庸人在高位,相繼爲奸,人禍 不揣其本,而末是圖,雖終日夜不寢食,求天下治無益也。 天殃, 迄無衰止。 帝御德政殿,秉燭坐。 **迨言官發其罪狀,誅之斥之,** 帝屏左右,獨輔臣在, 陛下臨御以 天子心膂股肱 開元從輔臣入,奏 水,輔 而

列

傳

良,賢 不 E. 平,私慨歎 不 H. 人人君 時 頻 目 面 子攻 奏, 延儒 而 之。 已。」帝責 而 輔 延儒 今輔 臣 在 謝 開元 臣 左 • 奉行德意,釋纍囚,獨逋賦,起廢 帝曰 右, 有 誰 私。 :「天下不治皆股 敢爲異同之論 開元辨,延儒等亦 以速 過, 禍 於卿等何與『開元言:「 前 爲 且昔 籍, 解。 賢 日 輔 人君子皆其 臣, 繁刑 厚斂, 所引 陛下 用。偶 令 屛 棄忠 大 小

贀 月後 推後,言官轉 撫 有。 情 一。率自 也。」帝命之退。 面 刨 開元 賄賂 開 以 元 監 爲不 失 復請 復言:「敵兵入口四十餘 司。 相 地 賢,必欲去之而後快。 **福召廷臣**, 喪師 採 明 訪,而 日 延儒 ,皆得 廷 推,今日傳單,其 其 等請令補贖 間 :無罪, 人 以輔 伎 倆 誰 臣 日 亦 復爲陛 賢否。「輔 、未聞 自 ,從之**。** 邊方 露 人 於數 姓 逮治 下捐軀 與 名 內 臣 月間,故人得 不列。 地 i L 督、撫。」帝曰:「督、撫 事 不 報國者。」 同,使人 明,諸臣流品 至 期 而 ,東部出 延儒等奏情 何以 指之, 展 亦別。陛下 諸袖 布。 非初 初推 面 開元 諸 以爲賢 不 ·若不 臣 盡 人 唯 無,賄 以 察, 唯 繼以爲 四 爲 而 賂 將 賢, 方 已。旣 吏 則 督、 不 數 狃 無

述奏辭 兵部侍 至 一,亦 當 以 ,不更及延儒他事。 郎 是 開 馮 時,開元欲發延 元言 元飇責 爲驟。 開元,「首輔 禮 部郎 儒罪,以其 帝方信延儒,大淸兵又未退,焦勞甚。 中吳昌 多引 賢者。 在 時者,開元 側不 首輔 敢言。 知 退,賢者且盡逐。」開元 吳江 而延儒慮其補贖,謀沮 時所拔士 也,復致 得奏,大怒,令錦衣 意 書言之。 動 之。 大理 大理 開 丞 卿 吳履中 元 孫晉、 衛逮 沙 止

治。 必使股 朔 ",嚴刑 衛帥駱養性,開元鄉人也,雅怨延儒,次日即以獄上。帝益怒,曰:[2]「開元讒譖輔弱, 孤立於上,乃便彼行私,必有主使者。 詰供主謀。 開元堅不承,而盡發延儒之隱,養性具以聞。 養性不加刑 ,溺職甚,其再嚴訊以聞。」 十二 帝乃廷杖開元,緊獄

太常卿、左愈都御史,隨征惠閣大學士。乞假歸。汀州破,棄家爲僧,隱蘇州之靈巖以終。 六月,延儒罷,言官多救開元者,不報。刑部擬贖徒,不許。明年正月遣戍杭州 配 李陳玉亦言之。帝以開元已下東,不問,而責令鳳毛陳奏。鳳毛死,其子訴冤,謂國遴、枝起 枝起、廖國遴爲天錫夤緣。因言開元面奏,實二人主之,欲令丘瑜秉政,陳演爲首輔。 殺之。 未幾,京師陷。福王召起東科給事中。丁母艱,不赴。唐王立,起工科左給事中。連擢 始,方士亮劾罷密雲巡撫王繼謨,參政餞天錫得巡撫。御史孫鳳毛發其事,劾給 兩人及天錫並削職下獄。士亮又言恐代繼謨者未能勝繼謨,繼謨得留任。十六年 福事中楊 御史

叉曰 讀、國遴等交章論之,斥壓大不道,無人臣禮。 ...「款事諸君不必言,皇上祈籤奉先殿,意已決。」諸人退,謂陞誹謗君父,洩禁中語。 仁 士亮, 歙縣人。 崇禎四年進士。 歷嘉興、福州推官、擢兵科給事中。 士亮及他言官繼之,疏數十上。帝大怒,削陞 今上太用聪明,致天下盡壞。」 與同官朱徽、倪仁

瀛、林 採納 馬爌, 復 官。 已而 蘭友、成勇、傅元初,而恤已死者吳執御、魏呈潤、傅朝佑、吳彥芳、王績燦、葛樞 事 或 周 多施行。 變後卒。 延 士亮連劾諸督撫張福臻、徐世廕、朱大典、葉廷貴,及兵部 儒 出督 又請召舊諫臣姚思孝、何楷 師,請士亮贊畫軍務。 延儒獲譴,士亮亦削職下獄,外之釋歸。 、李化龍、張作楫、張焜芳、李模、詹爾選、李右 侍郎 呂大器、甘肅總 福 一,帝頗 王時, 兵

令, 推官湯開遠,報聞 爾選言:「縣令多 詹爾選,字思吉,撫安人。 而 難擇,莫若精擇郡守。 崇禎四年進士。 郡守賢、縣令無不賢。」因請起用侍郎陳子壯 授太常博士。 八年擢御史。 時韶廷臣舉守

學士錢士升以爭武生李璡搜括富戶,忤旨,引罪乞休去。 授官,非所以重名器。 明 年疏劾陳啓新:「宜召九卿科道, 覿面敷陳, 罄其底蘊。 吏部尚書謝陞、大學士溫體仁不加駁正,尸素可愧。」 爾選上 果有他長,然後授官。 一疏 日 一帝怒。 未幾,大 遽爾

言肯去,臣實榮之,獨不能不爲朝廷惜此一 輔 臣引咎求黜,遽奉回籍之諭。 夫人臣所以不肯言者,其源在不肯去耳。 舉也。 雖以非法導主上,其端一 開,大亂將 輔臣肯

人臣 至。 所不敢出 無故疑其君,非忠也,乃謂吾君萬舉萬當者,第容悅之借名,必非忠。人臣沽名,義 輔臣憂心如焚,忽奉改擬之命,遂爾執奏。皇上方嘉許不暇,顧以爲疑君要譽耶? 也,乃人主不以名譽鼓天下,使其臣尸位保寵,寡廉鮮恥,亦必非國家利。

或疑 刑書,幾禁加等之紛亂。 疑朝宗之大義,不敵數萬路用之金錢。駁問之事煩,上意在懲奸碩也,而或疑明啓之 混 !跡於道途,父兄莫必其子弟,則或疑緩於敷文。 過於右武。 况今天下疑皇上者不少矣。將驕卒惰,尚方不靈,億萬民命,徒供武夫貪冒,則 穿札與操觚並課,非是者弗錄。 人見賣牛買馬,絀德齊力,徒使强寇 **発**觀之說行,上意在甦民困也,而或

君恩未酬,飾引身之濡滯。 言官敢諫之風。寧獻可替否,毋藉口 法 或對 大體之徒,似忠似直,如狂如癡,售則挺身招搖,敗則潛形逋竄,駭心志而爚耳目,毀成 敢言者矣。大臣不敢言,而小臣愈難望其言矣。所日與皇上言者,惟苛細刻薄,不識 而釀隱憂,天下事尙忍言哉!祈皇上以遠大宅心,以簡靜率憲,責大臣弼違之義,作 泉欷歔。輔臣不過偶因一事,代天下發憤耳,而竟鬱鬱以去,恐後之大臣無復有 其君子憂驅策之無當,其小人懼陷累之多門。明知一切苟且之政,或拊心愧恨, 臣愚不勝惓惓。 聖明獨斷,掩聖主之謙沖。 寧進禮退義,毋藉口

列

明

尙有言 帝日 能 理。 卽 上 大臣 用 大開 |捐助亦是。」帝曰:「本令願捐者聽,何嘗 「刑官擬罪不合,朕不當駁乎。」 ,何言不 疏 一切荷且之政,何者爲 乎?]對曰:「搜括抽 言路,輔 入 何 不言 建言 靈 震怒,召見武 誰 一?」對曰:「誠 ؋ؖ 臣 當言者。」帝 對 乃以言去國 日二大臣 扣亦是。」帝曰:「此供軍國 英殿,詰之曰:「輔臣之去,前旨甚 如聖諭。 《荷且》]對曰:「加 雌在格 日 恐後來大 1::「朕 但臣 如 對曰:「刑 心,然非言亦無由 此 臣 見督 焦勞,天下尚疑股乎? 强 以言爲戒, 八人? 派派。」帝| 理有 官不 百二 參疏,未蒙皇上大處 之用,非輸之內帑。 職,但當易其 非皇上求言意。」帝 格。 加派,因 大臣止言 明,汝安得爲 卽 賊 人,不當侵其 尚 未平, 贼平, 方 其大者, 分, 劍 汝更何言?」對曰: 此言? 日二 何嘗 與未 決 建言 事 不 何難停。汝 賜 對 無不言之 賜,彼不 乃諫官 日. 一日. 何 帝曰: 皇

以語 信。 图 思。」帝愈怒,罪 命錦衣提下。 自 涉 時 誇 後言者屢薦,皆不聽。 帝聲色俱厲,左右皆震懾,而爾選詞 翻,并罪視草御史張三 爾選 且不測。 叩頭曰:「臣死不足惜,皇上幸聽臣,事尚 諸大臣力救,乃命繫於直廬。 十五年,給事中沈迅、左懋第相繼薦。 謨, 令吏部 氣不撓。 同 談。 請 鐫 帝又詰發憤諸語,及帖黃簡略,斥爲欺 五級 明日下都察院議罪,議止停俸。帝 以雜 可爲。 職用 有詔召還,未及赴而都 卽不聽,亦可留為 復不許, 乃削籍 他

城陷。

福王 立、首起故官。 未上,羣小用事,憚爾選鯁直,令補外僚,遂不出。 國變後、又十二

年而終。

湯開遠,字伯開,主事顯祖子也。 早負器識,經濟自許。 崇禎五年由舉人爲河南府推

官。帝惡廷臣玩惕,持法過嚴。開遠疏諫曰:

民 以 墨吏宜 是戴罪者多,而不開以立功之路,以詳慎責諸臣,於是引罪者衆,而不諒其致誤之由。 重典矣。 窮 心,待諸臣以禮,諭中外法司以平允。 則易爲亂。 陛 一逮,然望稍寬出入,無絀能臣。 下 臨御 見廷臣薦舉不當,疑爲黨徇;惡廷臣執奏不移,疑爲藐抗。 以來,明罰敕法。 陛下寬一分在臣子,卽寬一分在民生,此可不 自小臣至大臣,蒙重譴下禁獄者相繼,幾於刑亂國用 至三時多害,五方交警,諸臣忧參罰,惟急催科, 至錦衣禁獄,非寇賊奸宄,不宜輕 · 再計 決者。 以策勵望諸臣,於 尤望推諸臣 入。

帝怒,摘其疏中「桁楊慘毒,遍施勞臣」語,責令指實。乃上奏曰

過,而後事轉因前事以 時事孔 棘,諸臣有 灰心,聲罪不足服罪,而故者更藉誤者以實口。綜核太過則要領 過可議,亦有勞可準,有罪可程,亦有情可原。 究之議過不足懲

列

傅

第

失措 所為縲辱擯 天下治平,不可得也。 懲 創 太深則本實多缺。 棄不少愛之人,又野所爲推重愾歎不可少之人。上與下異心,朝與野異議, 往往 上以爲宜詳宜新之事,而 下以為 宜略 宜仍之事。 朝

欲

可捐 而 以 問之。 人贓擬。 事 蘇 州 平則錙銖必較,向使昌黎不守,同於遵、冰,不知費朝廷幾許金錢,安所得涓滴 臣 城池 所惜者此其 左 失守者旣不少貸,捍禦著績者又不獲原,諸臣安所適從哉。 應選任昌黎縣令,率土著保孤城。 事平之日,擢任監司。乃用 事急 小過,卒 則 鉅 萬

更欲 反嚴 鞫 以 給 他 事 而 罪 長繫之,非所以召 中馬思理、御史高倬,值草場火發,狂奔盡氣,無救燎原,此不過爲法受過耳, 論 則 甚矣。 今歲盛夏雪雹,地震京圻,草場不爇自焚。 天和,稱善事也。 臣所惜者此其一 0 陛下 不寬刑修省,

難 反 汗哉 宣大巡按胡 臣 所 惜者此其一 良機、陛下 知 0 其語練,兩任巖疆,尋因過悞褫革,輿論惜之,豈成命終

夫兵譁 事 則 吳澧,宵旦河干,經營漕事。 爲兵易將,將譁則爲武抑文,勇於譁而怯於鬭,安用此驕兵驕將爲也! 運弁稽違,量行責戒,乃褫革之,又欲究治

臣所惜者此又其

末復爲都御史陳于廷、易應昌申辨。帝怒,切責之。

撫 失事多逮繫,而大將率姑息。 河 南 流 敗大熾,開遠監左良玉軍,躬擐甲胄,屢致克捷。 開遠以爲偏,八年十月上疏曰: 帝以天下用兵,意頗重武,督、

簡 望敗 感而 如練國事,捍禦兩河、身自爲將如玄默,拮据兵事、沮賊長驅如吳甡,或麗爰書,或登白 諸撫臣,有不褫奪不囚繫者乎。諸帥臣及偏裨,有一禮貌不崇、陞廕不遂者乎。即觀 即嚴旨屢頒,褎如充耳。 了,其他未可悉數。 而武臣桀驁恣睢,無日不上條陳,爭體統。一旦有警,輒逡巡退縮。 奮也。 、衄罪狀顯著者,有不寬假優容者乎。夫懲創撫臣,欲其惕而戒也;優遇武臣,欲其 此 年寇賊縱橫,撫、鎭爲要。 然而封疆日破壞、寇賊日蔓延者,分別之法少也。撫臣中淸操如沈棨,幹濟 如王樸、尤世勛、王世恩輩,其罪可勝誅哉! 乃陛下於撫臣則懲創之,於鎭臣則優遇之。試觀近日

命矣。 別去留,毋以一眚棄賢才。 亦罪,不任之罪猶輕,而任之罪更重也。 敗將當不問矣。文臣未必無才能,乃有寧甘斥黜必不肯任不敢任者,以任亦罪,不任 秦撫甘學闆有法紀全疎一疏,請正縱賊諸弁以法,明旨顧切責之。然則自今以後, 至靺韐之夫,不使怯且欺者倖乎其間,則賞罰以平,文武用 誠欲使諸臣踴躍任事,在寬文法,原情實,分

列

海

明

帝以撫臣不任者,無所指實,責令再陳。乃上言曰:

說。 勸 壞 胡 去, 極 延晏 懲 猶 敝 從 無當,欲勘定大亂,未之前聞。從來 朝 得 之後,竭力撑持,何以 來 廷 Щ́ 與 「賞罰無章,於是諸臣之不 無抑言路以伸劣弁者,至今而 (吳胜並論,播之天下,不大爲 西之仙 克蓮 、宋統殷、許鼎 當 日 處分較前 ·肯任 臣, 無詘 王 口 不敢任者罪,而肯任敢任者亦罪,且其罪反重 何 實哉 肇坤不得 更重? 以當 督臣 日處 若撫臣之不 以 保 伸庸 分視後皆輕? 其 秩。 帥者,至 肯任 王樸恇 今而 不敢 練 怯 楊 或 任者,如 暴 嗣 事 著, 了、玄默 昌不得 聽 陜 承大 敵 西之 關 飽 其

體 寇、縱寇、養寇、助寇者 並 可 者 不 勝 議 ·敢任者,直謂之無罪 紀。 而 , 終 非 一 且 近 并逮 試問 日 爲 一體矣。 兩按臣,計 前 辨寇而 後諸帥臣,有一誅且逮者乎? 誅督 ,皆置弗問。 典 可乎? i 臣者 與失事 一,逮督臣撫臣者二,褫撫臣者亦二。甚至巡方與撫臣 是陛下於文武二途,委任 牽合,而幷褫 卽或處分,不過降級戴罪而已。 卽 南 樞臣。 降 而偏裨,有一誅且逮者乎? 若監司、守令之獲 同,責成不同。 然則諸將 明旨 重譴者,不 之不肯 所 甚至避

敢 任之按臣矣。 不 特 此 也。 道臣祝萬齡拮据兵食,寢餌俱廢,至疽發於背,而遽行削籍,將來無肯 按臣曾週當 |舊撫艱去,力障寇鋒,初非失事,乃竟從逮配,將來無肯任

官矣。 鼎 任敢任之監司矣。 全 延 城之績 傾貲募士,夙夜登陴,及論物故,鼎延請恤, 吏部 ,而褫奪驟加,將來無肯任 惟 雜職多弊,臣鄉吳羽文竭力釐剔,致刀筆賈豎鬨然而 史洪謨作令宜陽,戰守素備,賊渡澠池,不敢薄城,及知六安,復有 |敢任之州縣矣。 **弁其子官奪之**, 永寧,舊蜀 將來無肯任敢任之鄉 起,羽文略不 撫張論與子給 為撓, #

力

以

起廢

一事,長繫深求,將來無肯任敢任之部曹矣。

甚 其 罪 之功 有肯 豊 知 非 韶旨一下,銓部即 :執奏曰「此不當罪」者乎? 大公之賞罰 ,乞貸於朝廷者乎。是非諸臣不肯分別也,知陛下一意重創,言之必不聽,或反以 臣 讀 也。 明旨 所 以行間失事,無日不議處議罪,而於蕩寇安民毫無少補。則今日所少者, ,謂諸事皆經確核,以議處有銓部,議罪有法司,稽核糾舉有按臣也。 哉 議降議革,有肯執奏曰「此不當處」者乎。一 至查核失事,按臣不過據事上聞,有原功中之罪、罪中 下法司,即 擬配擬戍,

合奏乞留,巡按金光辰亦備列其功狀以告。 帝 得奏大怒,命削籍,撫按解京訊治。 河南人聞之,若失慈母。 帝爲 動容,命釋還戴罪辦賊。 左良玉偕將士七十餘

人

廬二郡軍。 年正 其年冬,太子將出閤。 月討平舞陽大盜楊四。 奏言:「陛下言敎不如身敎。 論功當進秩,總理王家禛復薦之。乃擢按察僉事,監安、 請謹幽獨,恤民窮,優大臣,

明

容直諫,寬拙吏,薄貨財,疏滯獄,俾太子得習見習聞,爲他日出治臨民之本。」帝深納之。

三年與總兵官黃得功等大破革裏眼諸賊,賊遂乞降。 是時,賊大擾江北,開遠數有功。巡撫史可法薦其治行卓異,進秩副使,監軍如故。十 朝議將用爲河南巡撫,竟以勞瘁卒

官,軍民咸爲泣下。贈太僕少卿。

德,擊走之。 至,知府以下郊迎,勇不往,且捕笞其從人。丁內外艱。歷開封、歸德二府推官。流賊攻歸 成勇、字仁有、安樂人。天啓五年進士。授饒州推官。謁鄒元標於吉水,師事之。中使

勇得南京吏部主事以去。明年二月,帝御經筵,問講官保舉考選得失,諭德黃景昉訟勇及朱 天麟屈。 崇禎十年行取入京。時變考選例,優者得爲翰林。公論首勇,而吏部尚書田唯嘉抑之, 帝親策諸臣,天麟得翰林,而勇以先赴南京不與。 尋用御史涂必泓言,授南京

邊警屢驚,羣寇滿野。 楊嗣 昌奪情入閣,言者咸獲譴。 清議不畏,名教不畏,萬世公議不畏,臣竊爲靑史慮。」疏入,帝大怒, 勇憤,其年九月上疏言:「嗣昌秉樞兩年, 籌莫 御史。

納,不 詞請 削籍提訊,詰主使姓名。 擢 知有 用。 黨。」帝怒, 帝以勇宥罪方新,不當復職,命以 竟戍寧波 勇獄 中上書言:「臣十二年外更,數十日南臺, 衞 中外薦者十餘疏、 他官用。 不召。 甫聞 命 ,而京師 後以御史張瑋言,公 無權 可招, 無賄 執政合 ьŢ

福 王時, 起御史,不赴。 披緇爲僧、越十五年而終。

授 中 書舍 陳龍 人。 正,字惕龍,嘉善人。 時政尚綜覈,中外爭爲深文以避罪,東廠緝 父于王,福建按察使。 龍正遊高攀龍門。 事尤冤濫 崇禎七年成進士,

蓋獄 罪犯,無甚窮凶奇謀者。及來京師,此等乃無虛月。 略曰:「回天在 情至隱,人命至 
 +

 年五 |好生,好生無過減死。 月,熒惑守心,下詔修省,有「哀懇上帝」語。 重,故不貴專信,而 皐陶贊舜曰 取 兼疑,不務必得,而 『罪疑惟 且罪案 輕。 龍正讀之泣,上養和、好生二 一成,立就誅磔,亦宜有 甘或失。 是聖人於折獄不 臣居 家所 能 見 聞 無 所懲戒,

一四方

失也。

疏。

督、撫者。

御史葉紹顋

舉龍

正

東

廠

事

也。越數日,果渝提督中官王之心不得輕

視

人命云。

其冬,京師戒嚴,詔廷臣

舉堪任

陰指

何

犯者若此纍纍?

臣願陛下懷帝舜之疑,寧使聖主有過仁之舉,臣下獲不經之愆。」蓋

久之,刑部主事趙奕昌請訪求天下眞賢才。帝令奕昌自舉

亦以龍正對。帝皆不用。

師 大風,天黃日眚,浹旬不解。 龍 正居冷曹,好言事。 十二年十月,彗星見。 龍正皆應詔條奏,大指在聽言省刑。 是歲冬至,大雷電雨雹。十三年二月,京

宜 己。 本, 多 持籌之臣曰設處,曰搜括,曰加派,皆損下之事,聚斂之別名也。 千里外之轉運,則民間加派自可盡除。」然是時中原多殘破,有田不得耕,龍正執常理而 一,則京倉之積,邊軍之餉,皆可隨宜取給。 專意墾荒,申明累朝永不起科之制,招集南人巨賈,盡墾荒田,使畿輔、河南、山東菽 但財非折色之謂。 翌日復進用人探本疏,帝皆優容焉 五年夏,帝復下詔求言,云「拯困甦殘,不知何道」。龍正上言:「拯困甦殘,以生財爲 以折色爲財,則取於人而 或平糴,或拜爵,或中鹽,〔云〕國家命脈不專 易盡。 必知本色爲財、則生於地 民日病,國奚由足?臣謂 而不窮。今 栗日 倚

正爲吏部,御史黃澍以爲學詆之。 給事中黃雲師劾其學非而博、言僞而辯、又以進墾荒議爲陵競。 十七年正月左遷南京國子監丞。 甫抵家而京師陷。 帝不問。 時議欲用龍

|福王立於|南京,用爲祠祭員外郎,不就。 南京不守,龍正已得疾,遂卒。

直臣之風 子易,言大臣難,信 贊曰:崇禎時,愈壬 然傅朝佑 哉。 死 杖 湯開遠以**疎遠外僚,侃侃論事**, 相繼枋政,天下多故,事之可言者衆矣。 下 ,姜埰、熊開元得重譴,而詹爾 憤惋溢於辭表。 選抗 雷霆之威,顧 許譽卿諸 就其所 人,抨擊時 獲放発。 列 國 字,有 言 亦 天

## 校勘記

重可慨矣夫!

- 言 賊在 秦晉時 原脱「言」字,據明史稿傳一 四三許譽卿傳補。
- |懐宗 叉 命 寶 王 }錄 應 朝監 卷四崇顧四 軍 關 率 年 十月辛丑條 王 應 「朝」原: 作 ,國権卷九一 王 應 期 ر – 頁五五七三改。 據本書卷二三莊烈帝紀、 卷三〇五張彝憲傳
- 年十一 月丁亥條、國權卷九一頁五五七五改。 下同。 據本書卷二三莊烈帝紀、 懷宗實錄卷四崇禛四

=  $\Box$ 

李奇茂監茶馬陝

西

李奇茂,

原作

「李茂奇」。

- 29 爲 校 尉 侍聖至所弑 侍聖"明史稿傳 四二毛羽健傳作「彭侍聖」,本傳脫「彭」字。
- II. }傳 畢 懋康 ,會以兵部右侍郎罷歸,據改。 原作 「畢茂康」。 明史稿傳 四二 吳執御傳作 「畢懋康 ۱., 按本書卷二四二有畢懋康
- -<del>></del>√ 列 時御史王績燦方以薦 傳 第 百 四 + 六 李 邦華 校 勘 劉宗 記 周等下獄 王績燦,本書卷二三三姜應麟傳附姜思睿傳作 六六八三

「王績粲」。

帝益怒曰 原脫「曰」字,據明史稿傳一四二熊開元傳補。

後以御史張瑋言 御史,本書卷二五四張瑋傳作「副都御史」。

或中鹽 原作「或中監」、據明史稿傳一一三陳龍正傳改。

<u>ト</u> ル リ

## 明史卷二百五十九

## 列傳第一百四十七

楊鎬 李維翰 周永春 袁應泰 薛國用 熊廷丽 王化貞

袁崇煥 毛文龍 趙光抃 范志完

遷山 東參議,分守遼海道。 楊鎬,商丘人。 萬曆八年進士。 嘗偕<sup></sup> 大帥董一元雪夜度墨山、襲蒙古妙花帳,大獲。 歷知南昌、蠡二縣。 入爲御史, 坐事調· 大 理評 進副: 事。 使。 墾 再

荒田百三十餘頃,歲積粟萬八千餘石。進參政。

官 山 6年,擢右僉都御史,經略朝鮮軍務。 是朝鮮 、贖 二十五年春,偕副將李如梅 罪, 多怨。 及鄉吏奴丁免役,大氐皆苟且之事。 出塞,失部將十人,士卒百六十餘人。 鎬 未至, 先奏陳十事, 又以朝鮮君臣隱藏儲蓄不餉軍,劾奏其罪。 請令朝鮮官民輸栗 會朝鮮再用 得 增铁、授 兵,命発

列

官兵 懼 Ш 軍 重 四 屯 垂 而 一拔矣 ,狼狽先奔,諸軍繼之。 ·, 李 蔚 敬 中 面 主要失。 、攻圍十日 車 就 或 Щ 當 如 |論 之, 兵亦 是 擒 棚 梅 鄕導 時 十二月, 城 將左,李芳春、 地 以 漸集。 泥 如 倭 外以自固 不能下。 梅 淖, 將 功 未至,不欲寅 絕。 鎬會總督邢 行 九月朔 且時際窮冬,風雪裂膚,士無固 長、清正等已入據南 o 而 賊 鎬官 朝鮮 解 鎬 賊前襲擊,死者無算。 知官兵懈,詭乞降以緩之。 生 遼東時, 兵燹之餘,千 始抵王京。 將 玠 の出 右, 提督麻 其上, 遠鳴金收軍。 合攻蔚山。 與如梅深 原、全州,引兵犯全羅、慶尚, 會副 貴 里蕭條,賊掠無所得 議 將 進兵方 相得。 先 解 副將吳惟忠、遊擊茅國器斷後,賊乃還,輜 志。 낈 生等屢挫 略 叨 少兵嘗 及是游擊陳寅連破 年正 贼 敗乃閉 , 分四萬 日 夜 败。 賊, 月二日,行長救兵驟至。 城不 一發酸,用藥煮彈,遇者 ·, 故 朝鮮 人為 賊出 但 苗, 三協, 積栗全羅,為 軍亦 逼王京 . 戦 堅守以待援。 數有 大敗, 賊二栅,第三栅 副將高 銳甚。 功, 悉奔 人 留 倭 策 1 輒死, 官兵 賴沈 據 將 乃退 計 島 中

萬。 貨 庇 之,擬旨褒美,旨久不下。 奔趨慶州 是役也,謀之經年,傾海內全力,合朝鮮通國之衆,委棄於一旦, 鎬大怒,屏不 懼賊 奏,止 乘襲, 稱 盡撤兵還王京,與總督玠詭 百餘人。 贊畫主事丁應泰聞鎬敗, 詣鎬咨後計。 鎬遭父喪,詔奪情 以捷聞。 視事 0 御史汪先岸嘗劾其他罪,閣 諸營上軍籍, 士卒死亡殆二 鎬示以張位、沈一貫手 舉朝 嗟恨。 鎬旣奔,挈 臣

劾位 書 世德代之。 方,并 所 挺 貫 (扶同 未下旨,揚揚詡 已,東 作 奸。 征 事竣,給事 帝震怒,欲 功伐。 中楊 行 應泰憤,抗疏盡列敗狀,言鰝當罪者二十八,可羞者十,並 法。 應文敍鎬 首輔 功,詔 趙志皐營收 許復 用 乃罷 鎬, **介**聽勘, 以天津巡撫萬

薦 李 如 三十八 梅, 請復 年 起撫遼東。 用 爲大將, 襲炒花於鎭安, 爲給事 中 ·麻僖、 破之, 御史楊州鶴 御史田生金刻其開釁。 所 刻。 鎬 疏 (辨乞休,帝不問,鎬竟 時遼左多事,鎬 力

引

去

集 旣 部 詔 承 廕往 至, 尙 賜鎬尙 書黃嘉善、兵科給事中趙興邦等皆以 匹 議 申 渡, 十六年四月,我大淸兵起, 進 明 方 與副 師。 紀律,徵 劍, 總兵 得 時蚩尤旗 新總兵以下官。 四方兵, 頗廷相 長竟天, 等俱 圖大舉。 戰 彗見東方,星隕地震, 識者以 破無順, 歿 乃斬 ,遠近大震。 至七月,大清兵由 清 師 河逃將陳大道、高炫徇 守將王命印死之。 久餉匮,發紅旗,日 廷議[編熟語遼事] 起兵部右侍郎往經略 鴉鶴關克清河,副將鄉路賢戰死。 遼東巡撫李維翰越總兵官張 趣鎬 爲敗徵。 軍 中。 進兵。 大學 其冬, 四方援兵大 方從哲、兵

出 師 趨清河攻南,東南 明 年 ·正月, 日出 塞。 鎬 乃會總督汪 則 兵分四道:總兵官馬林出開原攻北,杜松出 以劉 疑出寬奠,由涼馬佃搗後,而以朝鮮兵助之。 可受、巡撫周 永春、巡按陳王庭等定議,以二月十有一日誓 撫順攻西;李如柏從鴉鶻關 號大兵四十七萬,

列

明

聞,京師大震。 全。 詔 擊之而 關 期三月二日 **遂大敗,遁去。** 獄,論死。 ,伏發,軍 文武將東前後死者三百一十餘人,軍士四萬五千八百餘人,亡失馬駝甲仗無算。 不動。 一盡覆。 會二道關 崇禎二年伏法。 已,乃張松旗幟,被其衣甲給凝。 **鎬聞,急檄止如** 御史楊鶴疏劾之,不報。 林統開原 並進。 兵從三岔 天大雪,兵不前,師期洩。 柏、綎兩軍,如柏遂不 口出、聞松敗、結營自固。 無何,開原、鐵嶺又相繼失。言官交章刻鎬,逮下 旣入營,營中大亂, 進。 松欲立首功,先期渡渾河,進至二道 挺已深 入三百里,至深河,大淸兵 大清兵乘高奮擊,林不支, 艇力戰死。 惟 如 柏 敗書 軍 獲

擢 臣 天啓初,言官追論開原失陷罪,造戍。 稅使高淮脧削十餘年,軍民益困。而先後撫臣皆庸才,玩愒苟歲月。天子又置萬幾不理,邊 |右僉都御史,代維翰爲巡撫。 值喪敗之後,佐經略調度軍食,拮据勞瘁。 呼籲,漠然不聞,致遼事大壞。 周 李維翰,惟州人。萬曆四十四年以右副都御史巡撫遼東。遼三面受敵,無歲不用兵。自 永春、金鄉人。官禮科都給事中。 及張承廕覆沒、維翰猶獲善歸。 齊黨方熾,永春與亓詩教爲之魁。 至天啓初,始下吏論 越二年,罷歸。 尋由 太常少卿 死。

漳水 袁 應泰,字大來,鳳翎人。 調 繁河內,穿太行 Щ ,引沁水,成二十五堰,溉 萬曆二十三年進士。 田 授臨漳知縣。 數萬頃,鄰邑皆享 築長堤四十餘里, 其 利。 河決朱旺, 捍禦

役夫 /多死 者。 應泰設蓆為廬,飲食作 :止有度,民歡然趨事,治行 冠 兩 河

振 設 粥 廠 戶 遷 工 部 哺流民 一部主 劾 其擅移官廩,時已遷副使,遂移 事 ,繕城濬濠,修先聖廟,饑者盡得食。 ,歷兵部武選郎 中。 汰遣假冒世職 疾歸 更搜額外稅及漕折馬價數萬金,先後發 數百人。 遷淮徐兵備參議。 Щ 東大饑,

關 外 久之, 所需芻麥、火藥之屬呼吸立應。 起河南右參政,以按察使治兵永平。遼事方棘,應泰練兵繕甲,修亭障,飭樓櫓, 經略熊廷 **死**解焉。

泰昌 元年九月擢右僉都御史、代周永春巡撫遼東。踰 月,擢兵部右侍郎兼前職,代廷

相終始,更願文武諸臣無懷二心,與臣相終始。 丽 爲 經略,而 以薛國用爲巡撫。 應泰受事,即刑白馬祀神,誓以身委遼。 有託故謝事者,罪無赦。」熹宗優詔褒答,賜 疏言:「臣願與遼

乃戮貪將何光先,汰大將李光榮以下十餘人,遂謀進取撫順。

議用兵十八萬,大

將十人,上奏陳方略。

尙

方劍。

應泰歷官精敏强毅,用兵非所長,規畫頗疎。 廷酮在邊,持法嚴,部伍整肅。 應泰以寬

方自 掠 益 燆 之兵 2 ,居民苦之。 詡 多所 也。 得 計 更易。 ,將藉以抗 乃下 議者言收降 令招 而 是 降。 大清 時 蒙古 於是歸 兵。 過 諸 多 會三岔 部 , 者 或陰 大饑,多 日 衆, 爲 見之戰 敵 文 處之遼、 用 塞乞食。 降人為 或敵 溶 雑 二域, 前 應泰言:「我不 間 鋒 諜 其 陣死 優 中 其 爲 者二十餘人, 月 内 廩, 急 應, 救 與 う則 禍 民 且 雜 彼 應泰 回 居, 必 測 歸 逐用 潛行 敵, 遮 以 泰 淫 是

釋

羣

議

門入,城 遁, 知 乃入 兵, 其 兵 泰 戰 夕 臨 乃撤 事 逐渡 敗還。 不濟,太息謂詮曰:「公無守城責,宜急去,吾死於此。」遂佩劍印自縊 城 城 明 應 奉集 年, 與巡 濠,大 中 離 泰 應泰 大 沮 明 宿 天啓 威 変接 亂,民家多啓扉張 日 營中,不入城。 呼 身督總兵官侯 御 叉明 寧諸軍,并 降 改元,三月十有二日,我大清 而 史張銓等分陴 進。 人果內應,城 日,攻城急,應泰督諸軍 鏖戰良久, 力守遼陽,引 世 明 炬 祿、李秉 固 日 逐 以待,婦女亦盛飾 一守。諸 大清 騎 破,二將戰死。 來 者益 兵 誠、梁仲 水 監 掘 注濠, 司高 列盾 衆 城 兵來攻瀋陽。 西閘 ,諸將兵 善、姜粥 出 沿 大 總兵· 濠 牛維曜、 戰,又敗。 以洩濠水, 迎 列 門,或言降人導之也。 火 官 俱敗,望城 、朱萬 器,兵環 陳策、童 胡嘉 總兵官質世 良出 薄暮,譙 分兵塞 棟及督 神揆 奔 四 城五 ~,殺 面 城 樓火, 等赴 守。 師郎 羽 里 東 賢、 死。 死 迎 水 十有 援, 尤世功 戰, 大清兵從 者 FI 口 應泰 傅 無算。 婦弟姚居 亦 軍 九日,大清 擊敗 戦 國 居城 敗 並 死 出 多死 諸 小 踰 應 城 樓, 秀 將 西 泰 城 應 力

僕唐世明憑屍大慟,縱火焚樓死。事聞,贈兵部尚書,予祭葬,官其一子。

日夜憂戰守備。會大清兵不至,得安其位。無何請告,竟卒於官。 死,廷議將起廷酮。 國用,洛南人。 歷官山東右參政,分守遼海道,以右僉都御史代應泰巡撫遼東。 道遠未至,乃進國用兵部右侍郎,代應泰爲經略。 歷官醇謹,久於遼,

熊廷 一碗,字飛百,江夏人。萬曆二十五年舉鄉試第一。明年成進士,授保定推官,擢

御史。

| 所言防邊以守爲上,繕垣建堡,有十五利,奏行之。 歲大旱,廷胸行部金州,禱城隍神,約七 以三分屯種,可得粟百三十萬石。帝優詔褒美,命推行於諸邊。 任按臣何爾健、康丕揚黨庇。疏竟不下。時有詔興屯,廷朔言遼多曠土,歲於額軍八萬中 內地。已,論功受賞,給事中宋一韓論之。下廷弼覆勘,具得棄地驅民狀,劾兩人罪,及先 日雨,不雨毁其廟。 三十六年巡按遼東。巡撫趙楫與總兵官李成梁棄寬奠新疆八百里,徙編民六萬家於 及至廣寧,踰三日,大書白牌,封劍,使使往斬之。 邊將好搗巢,輒生釁端。延 未至,風雷大作,雨

列

如 注 遼人 以 爲 神。 在 遼數 年,杜餽遺,核軍實,按劾將吏,不事姑 息, 風 紀 大 振

督 學南畿, 嚴明 有聲。 以杖死諸 生事, 與巡按 御史荆菱喬相訐奏。 養喬投劾去,廷酮

亦

聽

勘

歸

首尾 西之 足爲 迭 月守備 總 丽 報 册 東 擢 兼程: 中格 一、遼鎭 允 兵官李 兵部 勢以 相 腹背患,今已破 ,使敵疲於奔命,然後相機進剿。 四 且 十 以 進,遇逃者,諭令歸。 應,小警自爲堵禦,大敵互爲應援。 大固。 右 一賜尙 腹 沮 侍 如楨,以李懷信代。 交攻,然則遼、瀋 七年,楊鎬旣喪師,廷議以廷弼熟邊事,起大理寺丞兼河南道御史,宣慰遼東。 心,開原又河東 . 臣氣,毋旁撓以 郎 方劍 兼右 乃上方略、請集兵十八萬,分布靉陽、清河、撫順、柴河、三岔兒、鎭江諸要口, 重其權。 開原,北關 根本。 何可守也?乞速遣將 甫出 掣臣肘,毋獨遺臣以艱危,以致悞臣,悞遼,兼悞國 斬逃將劉遇節、王捷、王文鼎,以祭死節士。 督軍士造戰車,治火器,濬濠繕城,爲守禦計。 不 關,鐵嶺復失,瀋陽及諸城堡軍民一時盡竄,遼陽 欲保遼東則開原必不可棄。 ·敢不 服,造 疏入,帝從之。 未出京, 更挑精悍者為遊徼,乘間掠零騎,擾耕牧,更番 一介使,朝鮮不 士,備芻糧, 開原失,廷弼 修器械,毋窘臣 敢不從。 敵 未破開原時,北 上言:「遼左、京師 旣無腹 誅貪將陳倫 用,毋 令嚴法行,數 也。」疏入,悉 背憂,必合東

洶

洶。

延

",劾罷

關

朝

鮮猶

緩臣期,

肩背,

河

旋

哭 廷 酮 加 返。 廷弼 日 一冰 之初抵遼也,令僉事韓原善往撫瀋陽,憚不肯行。 廷 雪滿 酮 乃躬 地, 自 敵不料 1巡歷, 我來。」鼓吹入。 自虎皮驛 抵瀋陽,復乘雪夜赴撫順。 時兵燹後,數百里無人跡,廷弼祭諸死事者而 繼命僉事閻鳴泰,至虎皮驛慟 總兵賀世賢 以以近 敵沮之,

廷 酮 身長 七尺, 有 膽 知兵,善左 右 射。 自按遼卽持守邊議,至是主守禦益 堅。 然性剛

負氣,好謾罵,不爲人下,物情以故不甚附。

哭之。

逐耀

兵奉集,

相度

形勢而

還

所至招流移,繕守具,分置士馬,由

是人心

復

固

緣復 林、攻道學爲事。 半。 起, 當 事 益 事 中 將 相比,而傾廷弼 廷議 薦己。疏屢上,不得命。 廷弼 吏科,閱視遼東士馬,與廷弼議多不合。 ,丁憂歸。 世賢等亦 明 年 用遼人,遂以兵部主事贊畫軍務。 五. 聞於朝,國縉亦怨。 月,我大清兵略地花嶺。 有斬獲功。而給事中姚宗文騰謗於朝,廷弼遂不安其位。 還朝,欲補官。 國縉輩以故意 及宗文歸, 廷弼為御史時, 宗文計窮,致書廷酮,令代詩。 而吏部題請諸疏率數年不下,宗文患之。 疏陳遼土日蹙,詆廷弼廢羣策而雄獨智, 望廷弼、廷弼不 六月略王大人屯。八月略蒲河。 國縉主募遼人爲兵,所募萬七千餘人,逃亡 與國縉、宗文同在言路,意氣相得,並以排凍 遼東 能 如 人劉國縉先爲御史,坐大計謫官。 前,益相 廷酮不從, 失。 宗文故出國縉門下,兩人 將士失亡七百餘人, 宗文由是怨。 假招徠西部名, 宗文者,故戶科給 且. 曰: 「軍馬不訓 後夤 遼 屬 過

列

史顧 練 將 他首: 領 不 劾 部 廷 丽 出 人 關 ì 踰 不 年, 親 附 漫 刑 無定畫 威 有 時窮, 清 洄 失守, 工作 無 匿 時 不 止 上 聞 復 ",荷戈之士徒供挑 鼓 其 同 類 攻 擊, 欲 溶 必 去之。 尚 方之 劍 御

逞

志

作威

安堵 劾 欺 罪 力 漣 師 覆 等 其 求 君 學 龍 者 破 沒 當 三元、應嘉、修德等復連章 求 是時 臣 斥。 蝬 朝 此 遼 不 帖席 始 於 給 陽 謂 , 可, 光宗 驅 今 事 不 此 嬴卒數千, 乃改命兵科給 日 中 罷 廷 崩 ,亦豈易言。 非不 魏 酮 ,遼必不保。 ,熹宗初立, 益憤 應嘉 操練,不部署者所能 一,再 復 踉 劾之。 蹌 疏 事 令箭 極論,延 出 中朱童 自 詔 朝端 關 明、云「遼已轉危 下 催 朝 廷議 方 至杏山 議 而 蒙往。 驯 多 允廷 張 卽 事, 帥 致 請三人 廷 殞 酮 丽 而封疆 也。 而 廷 命 去, 酮 鐵 憤 馬馬 往 嶺 以袁 若 爲安,臣 復 抗 議 勘。 謂 上 F 又 疏 失。 一疏 催 應泰 起。 擁 極 而 日 帝從之。 兵 且之 辨, 代。 \_\_\_\_ 十 廷 御 史馮 臣蒙 路 萬, 臣 生 且. 喪 一咸謂 廷弼 致 求 不 三元 恩 御 師 死。 罷。 能 , 臣 乃 口 遼 史吳應奇、 斬 劾廷 必亡, Ŀ 籍 何 而 將 疏 聽 逐繳還 御 敢 擒 丽 勘 求 復 史張修德復 而今 王, 勘 無謀者 行 給 蹈 了言:「遼 尙 矣。 滅 且 事 前 方 臣 中 軌 地 劍, 楊 Ż 但

臺省

責

臣

以

破

壞之遼遺他人,臣

一不得

**不一一** 

陳之於上。

今朝堂議論

全不

知

兵。

冬春之際,

愀

然者

又復鬨然責戰矣。

自有遼難以來,用武將,用文吏,何非臺省所建白,

敵

以

冰

雪稍

緩

関

然言師

老財

匱

,馬上促戰。

及軍

敗,始愀

然不敢復言。

此

臣

收

拾

甫

定,而

何嘗

有

一效。

疆 酮 備 [4] 埸 乞骸 邨 陳 談 廷 事 河 以 ,當聽疆場更自爲之,何用拾帖括語,徒亂人意,一不從,**輒怫然怒哉** 功狀, 末言、「臣入遼時, 士民 歸,將置君恩何 獨是廷弼受知最深,蒲河之役,敵攻瀋陽,策馬趨救,何其壯也;及見官兵駑弱,遽 地。 廷弼功在存遼,微勞雖有可紀,罪在負君,大義實無所逃。 垂泣 而道,謂數十萬生靈皆廷酮 人 !」及 電蒙 還奏, )所留 ,其罪何 此

則

罪浮於

「功者矣。」 帝以廷弼力保危城,仍議起用。

遼陽 遼 者, 貶三元、修德、應嘉、 麞三秩, 除宗文名。 御史劉廷宣救之, 亦被斥。 家,而擢王化貞爲巡撫 ,當不至此。」御史江乘謙追言廷弼保守危遼功,兼以排擠勞臣爲鞏罪。 破,河西軍民盡奔,自塔山至閶陽二百餘里,烟火斷絕,京師大震。 天啓元年,瀋陽破,應泰死,廷臣復思廷弼。給事中郭鞏力詆之,并及閣臣劉一燝。 一燝日 帝乃治前劾廷弱 乃復詔起廷殉於 「使廷弼在 及

廷議 都 長 乘機窺塞下。 將 化貞 化貞 史、巡撫廣 起廷啊,御史方震孺 亦言遼事將壞,惟發帑金百萬, 諸城人。 寧。 化貞撫之,皆不敢動。 萬曆四十一年進士。 廣寧城 在 請加化貞秩, 山隈、登山可俯瞰城內、恃三岔河爲阻,而三岔之黃泥窪又水 朱童蒙勘事還, 便宜 **亟款西人**, 由戶部主事歷右參議,分守廣寧。 從 事 , 則敵顧忌不敢深入。 **令與薛** 極言化貞得西人心, 國 用同 守 河 迺。 會遼、瀋相繼亡, 蒙古炒花諸部 勿輕 乃進化貞 調 **隳撫** 右僉

列

傅

館

百

之 朝 其 陽 逡 信 鮓 才 初 同 其 n] 仇 者 足 失 涉 有 o 倚 才 遠近 亦 帝亦 廣 悉 不 所 寧 以 震 下 奏 從之。 止 驚 河 請 孱 萬 西 輒 謂 卒 事 報 于 河 化貞 付之。 可 西 , 化 0 必 請 貞 時 不 招 金 鼓 而 能 舞諸 化貞 集散亡, 復諸衛 保。 父以澄 人,優 化貞提弱 復得 軍民 以 萬 萊、天津 爵 及 東山 卒, 餘 禄 俾 人。 宇 礦徒,多 兵可 自 孤 激厲 「奮於 城 不 士民, 氣 設,諸 功 結 不 岩 名 懾, 聯 :; 詔 自 鎭 固 絡 諭 入 時 四 望赫 朝 以 衞 部, 鮮,褒 待 兵 官 然 人 可 軍 止 1 以 稍 中 忠義 定。 當 其 朝 逃 事 亦 え 遼 勉 謂 念

權 遼 調 上 營選鋒五 --餉 陽 兵二 月 年 郎 以形勢格 廷 爲 中 미 至六 遂 于 登萊 傅 淮 復。 酮將 千 月, 廷 或 餘 萬 丽 監 於 護廷酮行。 無 之,綴 啓行,帝 廷 ,以兵 兵部 罪 是 軍 丽 登 僉事 ,請復官任 入朝, 一、萊議 敵全 尙 馬 ), 故 書, 特賜麒 く芻 力 首請 設巡 臨 兼 天 糗 事 洮 右 麟 器 推 撫 津、登、萊各置 発言官 副 服 官洪 如天 械 議 都 一,彩 之屬 用 御 津, · 貶 謫, 敷 遼 . 史, 責 幣四、宴之郊外、命文武大臣陪餞、異數也。 敎 人 以陶 成戶 駐 故 爲 帝 職 贊 Щ 舟 朗先為 不 、、兵、 方主 師 海 畫 म 主事 關 乘虚 事 之,而 工三部。 經 乃建三方布置策: , 劉 入 軍前 略 國 南 遼東 縉 Щ 衞 贊 海 爲登萊招練 白 , 動 畫 軍 特 監軍 務。 設 搖 用 經 其 收 道臣高 廷弼 略, 人心, 廣 拾 副使、夔州 遼人 寧用馬 餰 因 出 敵 請 制 心,並報允。 尙 三方 必 胡 步列 方 內 嘉 叉以京 同 劍 顧 棟, 知 壘 佟 請 事 而 河 督

是,四 騎 不謂 貞 以 處 將 兵 河,先爲自弱 以計 俟。 止宜 潛 ,更番出入,<br />
示敵不測。 一人,守備二人,畫地分守。 渡 然 先是,袁應泰死,薛國用代爲經路,病不任事。 .方援遼之師,化貞悉改爲「平遼」,遼人多不悅。 廷酮言:「遼人未叛,乞改爲 『平東』 一直攻 不行,慍甚,盡委軍事於廷酮。 돒 稍置成兵,為傳烽哨探之用。 , 疏言:「河窄難恃, 遼陽 一營,力必不 之計也。」疏上,優旨褒答。 去廣寧三百六十里, 堡小 不宜 支。 難容,今日但宜固守廣寧。 西平、鎭武、柳河、盤山諸 屯聚一處,爲敵 一營潰、則諸營俱 非敵: 而大兵悉聚廣寧,相度城外形勢,掎角立營,深壘高 廷弼乃請申諭化貞,不得藉口節制, 騎一日能到。 會御史方震孺亦言防河六不足恃,議乃寢。 所乘。 潰 化貞乃部署諸將,沿河設六營,營置參 ,西平諸戍亦不能守。 自河抵廣寧, 有聲息, 要害, 若駐兵河上,兵分則 各置戍設防。 我必預 止宜多置 知。 河上 斷不 坐失 議 |烽堠; 力弱。 止宜 旣 事機。先 宜 Ŀ, 置遊 分兵防 西平諸 而化 廷 敵 徼 輕 弼 棚

師 兩 軍合勢。 ,分犒朝鮮及遼人,而臣給與空名劄付百道,俾承制拜除。 ,連營江上,助我聲勢。 八月朔,廷弼言:「三方建置,須聯絡朝鮮。 而我使臣卽權駐義州,控制聯絡,俾與登、萊聲息相通,於事 又發詔書憫恤遼人之避難彼國者,招集團練,別爲一 請亟發敕使往勞彼國君臣,俾盡發八道之 其東山礦徒能結聚千人者,即 有濟。 更宜發銀六萬 軍, 與朝鮮

或『征東』,以慰其心。」自是化貞與廷弼有隙,而經、撫不和之議起矣。

列

僔

署 生 都 長 海 司 濱 Ŧ. 習 百 朝 A 鮮 者 事 9 署 可 守備 ヹ 命 使。 將 帝 呼 <u>i</u> <u>i</u> 一從之, 應 而 且命 一二萬 如行 勁兵可 人奉 使故 1/ 致 事 也 賜 因 디디 薦 服 監 以 軍 竉 副 其 使 |梁之垣 行。 之

垣

乃

列

L

P

事

權

、定職掌八

事

帝

亦

報

H

兵守 陽 化 H |萊 衞 廷 險 節 功 貞 屯 丽 以 不 天津 擊 # 刨 海 制 之垣 而 民 進 還 駐 其 以 州 發 河 是 惰 屯 廣 不 方 命 水 東失 過二 寧 悪下 月 民 與 可 師 加劃 據 所 渡 캺 陷 一萬 干 · ,經、撫、各鎭 鐵 河 司 遼 也。 將 談 Щ 總督王 河 士 應文龍 兵餉 廷 死 上 兵部 日 弱 守, 止 夜 不 而 遼卒三千。 傷 象乾移 望官軍至, 得已 尙 化貞 化貞 互觀 敵三四千人, 書張鶴 出 鎭 望, 所 督 關 遣 Щ 廣 次右 鳴 兵 海。 都 若 卽 寧兵四 以爲 不果進。 潛 執 司 會化 毛文 屯, 敵 敵將 師 然,奏言 萬 車 夜 而 之 貞 龍 襲, 進 以 頃之, 馬也 益 降。 據 復 已 勢 奏 急。 時 馳 襲取鎭江 加 海 在 奏: 不 Ŀ, 而 化貞 州 必 急宜 可 西 合蒙· 克。 取 失。 部 敵 備 易守 奏捷。 赴 虎 因 陳 古 枚。」 敵 墩 官 御 東 難, 南 軍 史徐 冤 軍 西 乘機 防 沙龙 於是 收 不 情 舉 者聞 卵伯 復 宜 形 朝 淮 兵部 鎭 輕舉 咸願 ٠, 大喜, 取 而 江 復 言: 北 " 愈促 趣之, 逐 助 而 歸 亟 化 驅 兵 敵 廷 進師 命 貞 掠 請 我 棄 丽 卒 匹 據 敵 遼 居 登

牾 化 妄意降敵者李永芳爲內應, 貞 爲 人 騃 而 愎,素不 ·習兵, 信西部言, 輕 視 大敵, 謂虎墩兔助兵四十萬,遂欲以不戰取 好謾語。 文武將 吏進 |諫悉| 不 文 與 全勝 廷 丽 尤抵

鶴 不 切 丽 堪用,廷弼請罪其帥杜文煥,鶴鳴議寬之。廷弼請用卜年,鶴鳴上駁議。 士馬、甲仗、糗糧、營壘俱置不問,務爲大言罔中朝。尚書鶴鳴深信之,所請無不允,以故 鳴故稽其餉。兩人遂相怨,事事齟齬。而廷弼亦褊淺剛愎,有觸必發,盛氣相加,朝士多 不得行其志。 廣寧有兵十四萬,而延弼關上無一卒,徒擁經略虛號而已。 廷弼奏遣之垣, 延綏入衛兵

厭

惡之。

雖 言:「撫臣恃西部,欲以不戰爲戰計。 必使兵馬、器械、舟車、芻菱無一不備,而後剋期齊舉,進足戰,退亦足以守。 餘里。敵分兵來應,亦須我自撐拒。 亦多不服。廷弼又顯詆鶴鳴,謂「臣旣任經略,四方援軍宜聽臣調遣,乃鶴鳴徑自發戍,不 國聯絡之算,目爲奇功,乃奇禍耳。」貽書京師,力詆化貞。朝士方以鎭江爲奇捷,聞其言, 樞 <del>令</del>臣知。 恨遼人,屠戮四衞軍民殆盡,灰東山之心,寒朝鮮之膽,奪河西之氣,亂三方並進之謀,誤屬 一幅臣主謀於中,撫臣決策於外,卜一舉成功,而臣猶有萬一不必然之慮也。」旣而西部竟 臣 與撫臣共爲之。」鶴鳴益恨。至九月,化貞猶言虎墩兔兵四十萬且至,請速濟師。 毛文龍鎭江之捷,化貞自謂發蹤奇功。廷弼言:「三方兵力未集,文龍發之太早,致敵 七月中,臣咨部問調軍之數,經今兩月,置不答。臣有經略名,無其實,遼左事惟 西部與我,進不同進。彼入北道,我入南道,相距二百 臣未敢輕視敵人,謂可不戰勝也。臣初議三方布置, 今臨事中亂, 廷酮

列

不至,化貞兵亦不敢進。

景濂 哪 不當 筵忽問 知左右 遠駐 極譽化貞 廷 河 ·「<br />
ト年係叛族,<br />
何擢 既與化貞隙,中朝右化貞者多詆廷酮。 譖之,抗疏辨,語頗憤激 Ш 海 因言登 刺廷酮,武之垣逍遙故鄉 萊水師, 無所 ? 國 用。 縉數經論 廷弼怒,抗疏力詆三人。 ,不稱任使。 列,何起用。嘉棟立 給事中楊道寅謂出、嘉棟不 御史蘇琰則言廷弼 帝皆無所 功贖罪, 宜駐 宜 問。 何在天津。」廷 用。 一廣寧, M 御史徐 帝 於 講

捷音。 切反之,絕口不言守,謂我 是時,廷弼 識者知其必償事 主守,謂遼 ,以疆埸事重,無敢言其 人不可用,西部不 渡河,河東人必內應。 可 恃, 短 者 且 永芳不可信,廣寧多間諜 騰書中朝,言仲秋之月, 可 可高 虞。 枕 化貞 加 聽

貞駐何 俯 樞 平、間陽 議 以重兵內護廣寧,外扼鎭武、閻陽。 同 臣第知經略 於 至十月,冰合, 臣 地? 、鎭寧諸 ,臣始得爲陛下任 鶴鳴責經 一出,足鎭人 城堡, 廣寧人謂大清兵必渡河,紛然 、撫協 而以大軍守 東方事也。」其言甚切至,鶴鳴益不 心同 《心,不· 力, 廣 知徒手之經略 IIII 寧。 乃令劉渠以二萬人守鎭武,祁秉忠以萬人守閭陽。 樞臣 鶴鳴 與經臣 亦 以 思竄。 獨 出, 廣 不 寧 當協 其動搖 可慮, 化貞乃與震儒計, 心同 · 悅。 請敕廷剛 人心 力乎? 廷弼 更甚。 乃復 爲今日 出 且臣 關。 分兵守鎮武、西 出 關,至右屯, 計 廷酮 駐 廣寧,化 惟 上言 樞 叉

一貫以三千人守西平。[三復申令曰:「敵來,越鎭武一步者,文武將吏誅無赦。 敵至廣

辨。 得兎加派,臣願足矣。卽有不稱,亦必殺傷相當,敵不復振,保不爲河西憂。」因請便宜行事。 臣之虛名亦以輕出而 守,敵何損,我何 疾趨出關,而撫臣歸矣。西平之會,相與協心議守,掎角設營,而進兵之書又以晦 臣 撫臣以十一月二日赴鎭武,臣卽以次日赴杜家屯,比至中途,而軍馬又遣還矣。初五日,撫 而 一又欲以輕兵襲牛莊,奪馬圈守之,爲明年進兵門戶。時馬圈無一敵兵,即得牛莊,我不能 五矣。八、九月間屢進屢止,猶未有疏請也。若十月二十五日之役,則拜疏輒行者也。臣 且曰:「願請兵六萬,一舉蕩平。臣不敢貪天功,但厚賚從征將士,遼民賜復十年,海內 部署甫定,化貞又信諜者言,遽發兵襲海州,旋亦引退。廷酮乃上言:「撫臣之進,及今 益 ? ! 損。願陛下明諭撫臣,慎重舉止,毋爲敵人所笑。」 | 化貞見疏不悅,馳奏 會將更力持不可,撫臣亦怏怏回矣。兵屢進屢退,敵已窺盡伎倆,而 日至矣。

棟、卜年爲罪,而言廷弼 夏之令言蒙古不可信,款賞無益,給事中趙時用言永芳必不可 令毋受廷酮 葉向 節 高復當國 制。 而給事 , 化貞座主也, 頗右之。 不宜 中李精白欲授化貞尙方劍,得便宜操縱。 駐關內。 廷嗣憤,上言三臣以東西南北所欲殺之人,而適遙事 廷臣惟太僕少卿何喬遠言宜專守廣寧,御史 信,與廷剛合。 孫杰劾一燝以用出 餘多右化貞,

列

機難 望矣。」帝以兩臣爭言,遣兵部堂官及給事中各一人往諭,抗違不遵者治罪。 言遣官不便,乃下廷臣集議 相 困。一 處之會。 又言:「經、撫不和,恃有言官。言官交攻,恃有樞部。 諸臣能爲封疆容則容之,不能爲門戶容則去之,何必內借閣部,外借 樞部佐鬭 ,恃有閣臣。 命旣下,廷臣 撫道 臣 今無 以

命,遼人爲兵者必潰,西部必解體,宜賜化貞尙方劍,專委以廣寧,而撤 年正 乃集廷臣大議。 以刺化貞,化貞益不悅。 非 廣寧所得私。 月,員外郎徐大化希指劾廷弼大言罩世,嫉能妬功,不去必壞遼事。 當是時,中外舉知經、撫不和, 初,廷弼之出關也,化貞慮奪已兵權,佯以兵事委廷弼。 議撤 撫臣不 廷酮者數人,餘多請分任責成。 宜卸責於臣。」會震孺奏經、撫不和,中有化貞心慵意懶語, 及化貞請一舉蕩平,廷酮乃言:「宜如撫臣約,亟罷臣 必悞疆事,章日 上。而鶴鳴篤信化貞,遂欲去廷弼。 鶴鳴獨言化貞 廷弼上言:「臣奉命控 一去,毛文龍必不用 延弼 疏幷下 他 用。 一以鼓 部,鶴鳴 議 扼山海, 士氣。」 廷酮據

不從,責吏、兵二部再 無何,西平圍急。 奏。 化貞信中軍孫得功計、盡發廣寧兵、畀得功 會大清兵逼西平,遂罷議,仍兼任二臣,責以 及 祖 功罪 大壽 往會秉忠進戰。 體

鎭武 廷弼 亦馳 、閭陽兵遂大潰,渠、秉忠戰沒沙嶺,大壽走覺華島。 檄渠撤營赴援。 二十二日遇大淸兵平陽橋。 鋒始交,得功及參將鮑承 西平守將一貫待援不至,與參將 先等先奔,

忠置 作 等 謂 奏上 清 出 關 退還 朝 也。 功, 日 黑雲鶴 逐 與 · 嘉棟 棟 兵追逐化貞等二 可耳。一 訛 六萬 希 廷 大 獄 掖 參將 脫罪耳。」 芝 月 言 列 指 恨 詞 丽 畤 亦 先後入, 傳 趣之。 敵 衆 出 子 逮化貞,罷 乃以己 ,誓速斬 江 大 戰 廷 已薄城 第 出 朝 凊 上 歿 弼、化貞 舉 馬 入 棟 兵 帝怒, 禁 會馮 **蕩**平 百 所將 う二僕 排 頓 獨 廷 廷酮 四 獄 沙嶺 丽 百里,不 闥 邦佐 廷酮 城中 一,竟何 + 銓 , 並 ズ, 遂 己 五. 人徒 陰謀 七 以 亦 論 離 千人授化 不 自經 及楊 聽 化貞 慽 大 五 死。 進。 右 得 勘 步 屯屯, 如 年 旦 亂 旗 廷酮 死 **漣等下** ?化貞惭,議 食,乃還。 從,遂棄廣 測 亢 怒 奔 廷 後當 化貞 0 匹 次閭 走, 月 吅 5115 || 貞 得 與顧 月,刑 忠賢 棄市 之。 行 爲殿,盡 素任 功 獄 參 陽 刑 率 ,誣以受廷弼 政 秉 愈欲 傳首 朝棟 延弼 寧) 部 報至,京師 得 廣 謙等侍 參議 高 尙 守寧遠及 功 寧叛 踉 焚積聚。 速殺 邦 大 書王紀、左 爲 九邊。 令汪文言賄 蹌走。 佐禁之, 邢 呼 腹 將迎 講 愼 廷 日 心 筵, 大 言 丽, 賄 前 , 大清 已,御史 震。 二 十 與廷 而 勸 事 出 屯。 不能 其黨門克新 都 急 急矣, 得 甚其罪。 क् 兵入廣寧, 鶴鳴恐,自請 內 御 六日偕 丽 功 救 刊 廷弼 史 岸 廷 遇 潛 **〜梁夢** 遼東傳 廣 鄒 請公 大凌 兀 降 寧, 日 化貞 萬 已, 初 於 元標、大 環 嘻, 「速走。」 爲 郭 金 命護 大清 河。 謂 部 化 方 邏 愈 所緩 廷 於 興治、石三畏 貞 視 者 闔 事 潰民 化貞 已晚,惟護 帝 丽 巡巴 理 師 欲 署 韓 一化貞 獲 侵 旣 日 寺 生 初 理 市 哭, 入關 盜 卿周 而 兩 縛 軍 命 (莫知 ٨ 軍資 此 背之。 延酮 日 蔣應 化 書,

應秋

矣

潰

民入

化

貞

所

沮

逐

,

貞

以

爲

所為

不

知

微

筦

廷

酮

所

卓

邁

陽,

魏

萬。 江 夏 知 御史 縣 劉 E 徽 爾 謂 玉 責 廷 廷 丽 丽 家 資 子 貂 百 裘珍玩, 萬, 宜 籍以佐軍。 不 獲 將 撻之。 忠賢 即矯旨嚴追, 其長子兆珪 自剄死,兆 罄貲不 足, 建母 姻族 稱冤。 家俱 破。 爾

崇 禎 元 年 韶発追 贓。 其秋,工 部主 事徐 爾 一訟廷弼 冤, 日

玉

去

其

兩

婢衣

,撻之四十。

遠近

莫不

·嗟憤

屢疏 理 師 堅壁哉 四十 足矜 必不足信」。 門限, 同 . 潰, 廷弼 爭原派 里耳 也 廷 丽 自 不 能 廷 廣 以 應收潰兵扼 趣 兵馬 令五 殉罪 寧兵 化 失陷 扼關門 無 貞 千人不散,至大凌河付與化貞,事政相類,寧得與化貞 一事不 安在? 不 封 十三萬, 忽同三四 與。 疆 .'何待? ,至傳首 河陽橋,無再往 徒擁 力爭 化貞 糧 百萬遼民 數百 史稱慕容垂一軍三萬 ,無一言 仗 虛器,抱空名,廷弼罪安在。唐郭 **I陳屍** 西部 萬, ? 籍產 一時 盡屬 ,廷弼云「必不足仗」。·化貞信李永芳 不奇中,廷弼罪安在? 河陽坐待思明縛去之理。 盡潰, 化貞。 追 贓。 廷弼 延剛 而 獨 臣 五千人,不同潰足矣, 考當年,第覺其罪無足據,而勞有 止援遼兵五千人,駐 全,亦無再駐淝水與晉人決戰之 且 子儀、李光弼與 屢疏 今計 爭各鎭節 廣寧西, 同 H 內附 右屯,距 尙望 道 乎 制不行, ,延啊云 九節 其此 止 • 關 廣寧 然 上 度

進 築奉集、瀋陽,俄進屯虎皮驛,俄迎扼敵兵於橫河上, 所 謂 勞有 足矜者 當三路同 時陷 沒,開、鐵、北關相繼奔潰,廷弼 於遼陽城下鑿河列棚埋礮, 經理 不 及一年,俄 屹

則 死 然樹金湯。 所 則 由 有 故 必 矣。 殺其軀 令得竟所 其才旣 之道耳。 籠蓋一時,其氣又陵厲 施,何至舉楡口 當廷弼被勘被逮之時, 關外拱手授人!而今俱抹搬不論,乃其所由必 世,揭辯紛紛,致攖衆怒, 天日輒爲無光, 足明 其冤。 共起殺機,是 乞賜 昭

不從。明年五月,大學士韓爌等言:

雪

,爲勞臣勸

延酮 陽旣失,先帝思廷弼言,再起之田間,復任 無戦 祖用楊鶴言,召起廷剛代鎬。 爲應。 延卿 駐 國典皇仁,並行不悖,理合如此。 寧。 |屢言玩師 功,攻使去,使袁應泰代,四閱月而遼亡。 以 廷 + 酮 御 遺骸至今不得歸葬,從來國法所未有。今其子疏請歸葬,臣等擬票許之。 年而驗若左券,其可言者一。 史按遼東,早以遼患爲慮,請核地界,飭營伍,聯絡南、北關。 廣寧潰,右屯乃與俱潰,其可言者三。 必敗,奸細當防,莫有 一年餘,修飭守具,邊患稍寧。 若廷弼罪狀始末,亦 :聽者。 戊午己未,楊鎬三路喪師,撫順、淸河 經略。 徘徊 使廷弼在,未必至此,其可言者二。 躑躅,以五千人駐右屯,化貞兵十三萬 化貞主戰,廷弼主守,羣議皆是化貞。 有可言。 會皇祖賓天,廷 皇祖朝,戊申己酉 大聲疾呼, 陷沒。 議以廷 間, 卵 皇 蓋 遼

列 傳 第 百 匹 + 七 熊 廷 酮

假

令廷弼於此時死守

|右屯, 捐軀殉封疆, 豈非節烈奇男子。不然, 支撑寧、前、錦、

六七〇五

刎。 條,偕 此。 陳皇上之前 陷 我 義 阱; 固 間 斯 傳首邊庭,頭足異處,亦足爲臨難鮮忠者之戒矣。 嘗言之,言而 同事 扶 則 旣而 傷救 延剛 諸臣, 刊書惑衆,借題曲殺。 敗,收拾殘黎,猶 死未 一體伏法, 不聽, 心服,海內忠臣義士亦多憤惋竊歎者。 罪當· 廷酮 未減。 可圖 九原目 桑楡之效。 身死尚懸坐贓十七萬, 此 則 瞑。 私 心 乃先以賄 短 乃倉皇風鶴,偕 見, 殺 身以 然使誅 贓拷坐楊漣、魏大中等,作清流 辱及妻孥,長子兆珪 特以「封疆」二字,噤不敢 此 廷弼 ,殺身而 化貞並馬入關。 者, 無辭 按封疆 公論,亦以 迫 失陷 其 意 極 訟 自 之 以

焦層 及 曲 此者, 泯。 則 生,抗違則死、乃終不改其强直自遂之性,致獨膺顯戮,慷慨赴市,耿 敝舌、爭言大計。 臣 今縱不敢深言,而傳首已踰三年,收葬原 以茲事雖屬封疆,而實陰緊朝中邪正本末。 魏忠賢盜竊威福, 士大夫靡然從風。 無禁例,聖明必當垂仁。 皇上天縱英哲,或不 廷弼不取一金錢,不通一 廷弼 以長繫待決之人,屈 臣 耿 以臣等爲大 所 剛 腸 以 饋問, 娓 猶 娓 未

韶許其子持首歸葬。五年,化貞始伏誅。

謬

也

袁崇煥,字元素, 東莞 人。回萬曆四十七年進士。 授邵武知 縣。 爲 人慷慨負膽略,好

談 兵。 遇老校 退卒。 1 東海塞 L 事,曉其 阨塞情 形,以邊才 自 許

深 赴前 外 朝 廷 受款, 軍 倚 議 具言 ·,發帑 重之,題爲 屯安置遼人之失業者。 扼 天 啓 Ш 經略王在晉令崇煥移駐中前所,監參將 累 海 上 金二十萬,俾招募。 年正 關 形 寧前兵備 勢。 崇煥卽 月朝覲在都,御史侯恂請破格用之,遂擢 曰:「予我軍馬錢穀,我一人足守 單騎出 崇煥卽夜行荆棘 閱 時關 然崇煥薄在晉無遠略 關 內 外地悉為哈剌慎 外。 部中失袁主事 虎 豹 周 守廉、遊 中,以四鼓 諸部所據 此。」廷臣 不不 ٠, 盡遵其令。 兵部職方主事。 撃左 訝之, 入 益 ,崇煥乃駐守關 (城)將士莫不壯 輔 稱其才,遂 家 軍 人亦 一,經 及在 理 莫知所 晉議築 前 無何,廣寧師 超 屯 内。 擢 其 衞 往 愈事 膽。 重 事。 未 城 已, 幾, 八 尋 在 潰, 晉 令 還 里 諸 關

宗 壯 、置度外。」 以 爲然, 三出 十三山 勢, 告在晉。 難民十餘萬,久困 承宗謀 別遣驍將救之。 於總督王象乾。 在 晉 竟不 不能 寧遠去山二百 ·能救, 出。 象乾以關 衆遂沒,脫歸者僅六千人而已。 大學士 里,便則進據錦州,否則 上軍方喪氣,議發插部護關者三千人往。 一孫承宗行邊,崇煥請:「將五 退守寧遠,奈何 及承宗駁重城議,集 千人駐寧遠,以 委十 萬 承

鋪

一景煥

以以爲

非策。

爭不

得,奏記首輔葉向高。

列

傳

第

百

四

+

七

袁

崇

煥

吏謀所守。 承宗怒曰:「監軍可專殺耶。」崇煥頓首謝,其果於用法類 承宗鎭關門,益倚崇煥。崇煥內拊軍民,外飭邊備,勞績大著。 閻 鳴泰主覺華,崇煥主寧遠,在晉及張應吾、邢愼言持不可,承宗竟主崇煥 此。 崇煥嘗核虚伍,立斬

步軍萬二千,東巡廣寧,謁北鎭祠,歷十三山,抵右屯,遂由水道泛三岔河而還。尋以五防 流移駢集,遠近望爲樂土。遭父憂,奪情視事。四年九月偕大將馬世龍、王世欽率水陸馬 為關外重鎮。 桂,良將,而崇煥勤職,誓與城存亡;又善撫,將士樂爲盡力。 由是商旅輻輳, 敍勞,進兵備副使,再進右參政。 文二尺, 雉高六尺, 址廣三丈, 上二丈四尺。<br/>
大壽與參將高見、賀謙分督之。 令祖 大壽築寧遠城,大壽度中朝不能遠守,築僅十一,且疎薄不中程。 崇煥乃定規制:高三 三年九月,承宗決守寧遠。愈事萬有孚、劉詔力阻,不聽,命滿桂偕崇煥往。初,承宗 明年迄工,遂

於關 民庶復播遷,已得之封疆再淪沒,關內外堪幾次退守耶」」崇煥亦力爭不可,言:「兵法有進 疆復二百里。十月,承宗罷,高第來代,謂關外必不可守,令盡撤錦、右諸城守具,移其將士 煥計,遣將分據錦州、松山、杏山、右屯及大、小凌河,繕城郭居之。自是寧遠且爲內地,開 内。 崇煥之東巡也,請即復錦州、<br />
右屯諸城,承宗以爲時未可,乃止。 督屯通判金啓倧上書崇煥曰「歸、右、大凌三城皆前鋒要地。倘收兵退,旣安之 至五年夏,承宗與崇

餘萬。 |第無以難,乃撤錦州、右屯、大、小凌河及松山、杏山、塔山守具,盡驅屯兵入關,委棄米栗十 視 必 無退。三城已復,安可輕撤。歸、古動搖,則寧、前震驚,關門亦失保障。今但擇良將守之, 無他慮。」第意堅,且欲幷撤寧、前二城。崇煥曰:「我寧前道也,官此,當死此,我必不去。」 事如故。 而死亡載途,哭聲震野,民怨而軍益不振。景煥遂乞終制,不許。十二月進按察使,

傷城外軍。 斬,人心始定。 詰奸,通判啓倧具守卒食,辟道上行人。 檄前屯守將趙率教、山海守將楊麒,將士逃至者悉 義,爲之下拜,將士咸請效死。乃盡焚城外民居,攜守具入城,清野以待。令同知程 |桂,副將左輔、朱梅, E 參將大壽,守備何可剛等集將士誓死守。 我大清知經略易與,六年正月舉大軍西渡遼河。二十三日抵寧遠。 明日,再攻,復被却,圍遂解,而啓倧亦以然礮死。 明日,大軍進攻,戴楯穴城,矢石不能退。崇煥令閩卒羅立,發西洋巨礮, **崇煥更刺血爲書,激以忠** 崇煥聞,即偕大將 維模

工,理軍民詞訟,大得衆心。死,贈光祿少卿,世廕錦衣試百戶。 啓倧起小東,官經歷,主賞功事,勤敏有志介。承宗重之,用爲通判,核兵馬錢糧,督城

上, 不救。 初,中朝聞警,兵部尚書王永光大集廷臣議戰守,無善策。 中外謂寧遠必不 守。 及崇煥以書聞,舉朝大喜,立擢崇煥右僉都御史,璽書獎 經略第、總兵麒並 擁兵關

勵,柱等進秩有差。

能 救 至是 也。 大清初解圍,分兵數萬略覺華島,殺參將金冠等及軍民數萬。 坐失援,第、麒並褫官去,而以王之臣代第,趙率教代麒 高第鎭關門,大反承宗政務,折辱諸將,諸將 咸解體。 遇麒岩偏裨,麒至,見侮其 崇煥方完城, 力竭不

右侍郎,賚銀幣,世廕錦衣千戶 撫, 以崇煥爲之。 我 大清舉兵,所向無不摧破,諸將罔敢議戰守。 魏忠賢遣其黨劉應坤、紀用等出鎮。 議戰守,自崇煥始。 崇煥抗疏諫,不納。 三月復設遼東巡 **敍**功,加兵部

則 敵 以 協 壁凊野以爲體,乘間擊瑕 關 功不成。 ,<br />
敵必讐,<br />
奮迅立功,<br />
衆必忌。 一內外分賣二臣,用遼人守遼土,且守且戰,且築且屯。 中朝慮償事,命之臣 崇煥旣解圍,志漸驕,與桂不協,請移之他鎭,乃召桂還。崇煥以之臣奏留桂,又與不 謗書盈篋,毀言 專督關內,以關外屬崇煥畫關守。 以爲用。 日至,從古已然,惟聖明與廷臣始終之。」帝優旨褒答。 任勞則必召怨,蒙罪始可 戰雖不足, 守則有餘; 有功。 守旣有餘,戰無不足。 屯種所入,可漸減海運。 崇煥虞廷臣忌己,上言:「陛下 怨不深則勞不著, 顧勇猛 大要堅 圖

賢 與應坤等並因是廢錦衣,崇煥進所廢爲指揮僉事。 其冬,景煥偕應坤、用、率教巡歷錦州、大、小凌河, 崇煥遂言:「遼左之壞,雖人心不固, 議大興屯田,漸復第所棄 舊

亦緣失有形之險,無以固人心。兵不利野戰,祇有憑堅城用大礮一策。今山海四城旣新,

當 |更修松山諸城,班軍四萬人,缺一不可。」帝報從之。

援。 設,以關內外盡屬崇煥,與鎮守中官應坤、用並便宜從事。崇煥銳意恢復,乃乘大軍之出, 之勢,而朝鮮已爲大淸所服,諸將乃還。 遣將繕錦州、中左、大凌三城,而再使使持書議和。 之,崇煥欲議和,以書附使者還報。我大清兵將討朝鮮,欲因此阻其兵,得一意南下。七年 正月再遣使答之,遂大興兵渡鴨綠江南討。朝議以崇煥、之臣不相能,召之臣還,罷經略不 崇煥以水師援文龍,又遣左輔、趙率教、朱梅等九將將精卒九千先後逼三岔河,爲牽制 先是,八月中,我太祖高皇帝晏駕,崇煥遣使弔,且以覘虛實。 會朝鮮及毛文龍同告急,朝命崇煥發兵 我太宗文皇帝造使報

里外, 州、中左、大凌三城,修築必不可已。 疆,持愈力。而朝鮮及文龍被兵,言官因謂和議所致。 棄垂成功也。 二百里,北負山,南阻海,廣四十里爾。 崇煥初 金湯益固矣。」帝優旨 議和,中朝不知。及奏報,優旨許之,後以爲非計,頻旨戒諭。 故乘敵有事江東,姑以和之說緩之。 1報聞 業移商民,廣開屯種。 今屯兵六萬,商民數十萬,地隘人稠,安所得食? 敵知,則三城已完,戰守又在關門四百 四月,崇煥上言:「關外四 倘城不完而 敵至,勢必撤還,是 崇煥欲藉是修故 城 雖延袤

六七一一

列

遠。 率教 清已於二十八日分兵<u>趨</u>寧遠。 城; 以 礮 不得已,亦請 廷已命山 和 至 溽暑 ,欲緩 距擊。 疏乞讓廕,忠賢亦不 輔 又發昌平、天津、保定兵馳赴上關,檄山西、河南、山東守臣整兵聽調。 功為 將 及敍功,文武增秩賜廕者數百人,忠賢孫亦封伯,日司而崇煥止增一秩。 時 未 示 浣繞 率 多。 師 入大凌,五月十一日大清兵直 海 能克,士卒多損傷,六月五 而桂、世祿、大壽大戰城外,士多死, 敎 以待救。云使三返不決,圍益 滿 出大軍後決戰。別遣 駐 建祠,終不爲所喜。 忠賢因使其黨論崇煥不救錦州爲暮氣,崇煥遂乞休。 錦 桂移前屯,三屯孫祖壽移山海,宣府黑雲龍移一片石,薊遼總督閻鳴泰移關 州 護版 許 築。 朝命尤世祿來代,又以輔爲前鋒總兵官, **崇煥與中官應坤、副使畢自肅** 水師東出,相牽制。 七月遂允其歸,而 日亦引還,因毁大、小凌河二城。時稱寧、錦大捷,桂、 抵錦州,四 急。 崇煥以寧遠兵不可動,選精 桂身被數矢。大軍亦旋引去,益兵攻錦州 面 合圍 以王之臣代爲督師兼遼東巡撫,駐 且請發薊鎭、宣、大兵,東護 率教偕中官用嬰城守,而 督將士登陴守,列營濠內,用 中外方爭頌忠賢,崇煥 駐大凌河。 騎四千, 世祿等將行,大 尚書霍維華不 關 門。 世禄 遣 使議 禄 朝 未

右都御史,視兵部添注左侍郎事。 未幾,熹宗崩。 莊烈帝即位,忠賢伏誅,削諸冒功者。 崇禎元年四月命以兵部尚書兼右副都御史,督師 薊 廷臣 爭請召崇煥,其年十一月

竣。 選將,須中外事事 退少憩,給事中許譽卿叩以五年之略 英明,安可漫對。 復。」帝曰:「復遼,朕不吝封侯賞。 途、兼督登 勞甚至,咨以方略。 陛下旣委臣,臣安敢辭難。 萊、天津軍務,所司敦促上道。 ,相應,方克有濟。」帝爲飭四部臣,如 異日按期責效,奈何。」景煥憮然自失。 對曰:「方略已具疏中。臣受陛下特眷, 願假以便宜, 計五 但五年內,戶部轉軍餉,工部給器械,東部用人,兵部調兵 卿努力解天下倒懸,卿子孫亦受其福。」崇煥頓首謝。 崇煥言:「聖心焦勞,聊以是相慰耳。」譽卿曰:「上 七月,崇煥入都,先奏陳兵事。 其言。 頃之,帝出,卽奏言:「東事本不 帝召見平臺,慰 年,全遼可

在實不 酒饌 有主 而 昔年以遼人守遼土,以遼土養遼人,守爲正著,戰爲奇著,和爲旁著之說。 쁦 勿貳 言一行之微 無 而 一持。」大學士劉鴻訓等請收還之臣、桂尙方劍,以賜崇煥,假之便宜。 人。 崇煥又言:「以臣之力,制全遼有餘,調衆口不足。 一 ·在虛。 出。 信 即不以權力掣臣肘,亦能以意見亂臣謀。」帝起立傾聽,諭之曰:「卿無疑慮,朕自 而 崇燠以前此熊廷酮、孫承宗皆爲人排搆,不得竟其志,上言:「恢復之計,不外臣 勿疑? 此臣 瑕。 事任 與諸邊臣所能爲。至用人之人,與爲人用之人,皆至尊司其鑰 蓋馭邊臣 旣 重,爲怨實多。 與廷臣 異,軍中可驚 諸有利於封疆者,皆不利於此身者也。 可疑者殊多,但當論成敗之大局,不 出 國 門,便成萬里。 帝悉從之,賜崇煥 法在漸 忌能 況圖敵之 妬 不在驟, 何 功,夫 必 以任 摘

列傳

第

急,敵亦從而間之,是以爲邊臣甚難。陛下愛臣知臣,臣何必過疑懼,但中有所危,不敢不 告。」帝優詔答之,賜蟒玉、銀幣,硫辭蠎玉不受。

軍吳國琦,責參將彭簪古,黜都司左良玉等四人。發正朝、思順前鋒立功,世榮、涵淳以貪 以八月初抵關,聞變馳與廣密謀,宥首惡楊正朝、張思順,云令捕十五人戮之市,斬知謀中 賞及朋椿二萬金以散,不厭,貸商民足五萬,乃解。 朱梅、通判張世榮、推官蘇涵淳於譙樓上。 虐致變,亦斥之。 是月,川、湖兵戍寧遠者,以缺餉四月大譟,餘十三營起應之,縛繫巡撫畢自肅、總兵官 獨都司程大樂一營不從變,特爲獎勵。一方乃靖。 自肅傷重,兵備副使郭廣初至,躬翼自肅, 自肅疏引罪,走中左所,自經死。 崇煥 括撫

家向受撫賞,後爲插漢所迫,且歲饑,有叛志。 <u></u>
薊鎭率教於關門,關內外止設二大將。因極稱三人之才,謂「臣自期五年,專藉此三人,當 月 旣死,崇煥請停巡撫。 與臣相終始。 任,崇煥請合寧、錦爲一鎮,大壽仍駐錦州,加中軍副將何可剛都督僉事,代梅駐寧遠,而移 《敘春秋兩防功,加太子太保,賜蟒衣、銀幣,廕錦衣千戶。 關外大將四五人,事多掣肘。後定設二人,以梅鎭寧遠,大壽仍駐錦州。 屆期不效,臣手戮三人,而身歸死於司敗」。 及登萊巡撫孫國楨免,崇煥又請罷不設。 崇煥召至於邊, 帝可之,崇煥遂留鎭寧遠。 親撫慰, 帝亦報可。 皆聽命。 哈刺愼三十六 至是梅將解 二年閏四 自肅

列傳第一百四十七 袁崇煥

龍籠絡其民爲兵,分布哨船,聯接登州,以爲 卽 島 海 者方主化貞,遂授文龍總兵,累加至左都督,掛將軍印,賜尙方劍,設軍鎭皮島如內 抵大清界,其東北海則朝鮮也。 亦謂之東江,在登、萊大海中,綿亙八十里,不生草木,遠南岸,近北岸, 道 遁回,乘虛襲殺大清鎭江守將,報巡撫王化貞,而不及經略熊廷弼,兩人隙始開。 崇煥始受事,即欲誅毛文龍。 島上兵本河東民,自天啓元年河東失,民多逃島中。 文龍者,仁和人。 掎角計。 以都司援朝鮮,逗留遼東。 中朝是之,島事由此 起。 北岸海面 遼東失,自 地。 八十里 用事 皮 文

其助文龍為兵端 兵克 襲撤 年六 兵從 義州 八月遣 養州 爾 四 河,攻城南,爲大淸守將所 年五月,文龍遣將沿鳴綠江 兵襲耀州之官屯寨,敗歸。 城西渡江,入島中屯田。 分兵夜濤文龍於鐵山。 却。 文龍敗,遁歸島中。 越長白山,侵大清 大清守將覺,潛師 六年五月遣兵襲鞍山驛,喪其卒千餘。 七年正 月,大淸兵征朝鮮,幷規剿文龍。 襲擊,斬五百餘級,島中糧悉被焚。 國東偏,爲守將擊敗,衆盡 時大清惡文龍躡後,故致討朝鮮,以 越數日又遣兵 殲。 三月,大清 八月遺

招 商 潘 賈, 販易禁物, 名濟 顧 土 文龍 聞 | 劾文龍糜餉殺降,尚寶卿董茂忠請撤文龍,治兵關、寧。 所居東江 ,形勢雖 朝 鮮, 實關 足牽制,其 出 塞, 人本 無 事 無大略, 則鬻參 贩 往輒 布爲業, 敗衄, 有 丽 事 歲 兵部議不可,而崇煥心 亦 糜 罕得 餉 無算, 其用。 且. 惟 工科給 務 廣

禮,文龍又不讓,崇煥謀益決。

弗善也,嘗疏請遣部臣理餉。 文龍惡文臣監制,抗疏駁之,崇煥不悅。及文龍來謁,接以賓

寄,受予一拜。」交拜畢,登山。 曰:「爾等積勞海外,月米止一斛,言之痛心,亦受予一拜,爲國家盡力。」衆皆頓首謝 令參將謝尚政等伏甲士幄外。文龍至,其部卒不得入。 崇煥曰:「予詰朝行,公當海外重 東事畢,朝鮮衰弱,可襲而有也。」崇煥益不悅。以六月五日邀文龍觀將士射,先設幄山上, 崇煥議更營制,設監司,文龍怫然。崇煥以歸鄉動之,文龍曰:「向有此意,但惟我知東事, 至是,遂以閱兵爲名,泛海抵雙島,文龍來會。崇煥與相燕飲,每至夜分,文龍不覺也。 崇焕問從官姓名,多毛姓。文龍曰:「此皆予孫。」崇煥笑,因

給 數千人悉冒已姓,副將以下濫給札付千,走卒、與夫盡金緋,六當斬。 自爲盜賊,七當斬。 將則必誅。 |煥曰:「爾有十二斬罪,知之乎?祖制,大將在外,必命文臣監。爾專制一方,軍馬錢糧不 受核,一當斬。人臣之罪莫大欺君,爾奏報盡欺罔,殺降人難民冒功,二當斬。人臣無將, 兵,月止散米三斗有半,侵盜軍糧,四當斬。 崇煥因詰文龍遠令數事,文龍抗辯。崇煥厲色叱之,命去冠帶繁縛,文龍猶倔强。 爾奏有牧馬登州取南京如反掌語,大逆不道,三當斬。 强取民間子女,不知紀極,部下效尤,人不安室,八當斬。 擅開馬市於皮島,私通外番,五當斬。 每歲餉銀數十萬,不以 自寧遠還,剽掠商船, 驅難民遠竊

惶怖 當斬 能 酬 當 人參,不從則餓死,島上白骨如莽,九當斬。 勞 斬 成 功 唯 何悖逆如是「乃頓首請旨曰:「臣今誅文龍 ,皇上亦以誅文龍者誅臣。」遂取尙方劍斬之帳前。 唯 數畢,文龍 鐵山之敗,喪軍 中有稱文龍數年勞苦者,崇煥叱之曰:「文龍一布衣爾,官極品,滿門封廕,足 喪魂魄不能言,但叩 無算,掩敗 爲 功,十一 頭乞発。 當斬。 輦金京師,拜魏忠賢爲父, 塑冕旒像於島中, 十 崇煥召諭 以肅 開 軍。 鎮八年,不能復寸土,觀望養敵,十二 其部將曰:「文龍罪狀當斬否。」皆 諸將. 乃出諭 中有岩文龍者 其將士曰:「誅止文龍,餘 、悉誅。 臣不

夫,不 褒答。 盛 擅 以 牲 代掌。 一課,謹席橐待罪。」時崇禎二年五月也。C102帝驟聞,意殊駭,念旣死,且方倚崇煥,乃優旨 文龍子承祚、「己副將陳繼盛、參將徐敷奏、遊擊劉興祚主之。收文龍敕印、尚方劍,令繼 將領千。 醴 拜奠曰:「咋斬爾,朝廷大法;今祭爾,僚友私情。」爲下淚。 法至此,以海外易爲亂也。 俄傳諭暴文龍罪,以安崇煥心;其爪牙伏京師者,令所司捕。 是時,文龍麾下健校悍卒數萬,憚崇煥威,無一敢動者,於是命棺斂文龍。明日,具 **犒軍士,檄撫諸島,盡除文龍虐政。** 今不 宜更置帥,即以繼盛攝之,於計便。」帝報可。 其衆合老稚四萬七千,妄稱十萬,且民多,兵不能二萬,妄 還鎭,以其狀上聞,末言:「文龍大將,非臣得 乃分其卒二萬八千爲四協, 崇煥上言:「文龍一匹

四十二萬,米十三萬六千。」帝頗以兵滅餉增爲疑,以崇煥故,特 其後致有 崇煥 叛 雖誅文龍 去者。 崇煥言:「東江一鎭,牽制所必資。 一慮其部 下爲變, 增夠銀至十八萬。 今定兩協,馬軍十營,步軍 然島弁失主帥 如 人其請 ر ٽاه 漸攜 五. 益不 一歲餉 ·可用, 銀

剛等入衛。 其至,甚喜,溫旨褒勉, 萬三千有奇,馬八萬一千有奇,歲費度支四百八十餘萬,減舊一百二十餘萬。 崇煥在遼,與率教、大壽、可剛定兵制 文龍旣死,甫踰三月,我大淸兵數十萬分道入龍井關、大安口。 以十一月十日抵薊州,所歷撫寧、永平、遷安、豐潤、玉田諸城,皆留兵守。 發帑金犒 將士, 令盡統諸道援軍。 ,漸及登 萊、天津,及定東江 俄聞 率教戰歿,遵化、三屯營皆 **崇煥聞,即督大壽、** 兵制,合四鎭兵十五 帝嘉. 災炎之。 帝 聞 印

不許。 時 所入 隘 口乃薊 遼 總 理 劉策所轄,而崇煥甫聞變即 于 里赴救,自謂 有 功無 罪。 然都 人

門外。

帝立

召見,深加慰勞,咨以戰守策,賜御饌及貂裘。

出

與

大軍

鏖戰,互有殺

傷

破,巡

?撫王元雅、總兵朱國彦

自盡,大清兵越薊州而西。

崇煥懼,

急引

兵入

護京

師,

營廣渠

崇煥以士馬疲敝, 請入休城中

頗聞 驟 告於帝,帝信之不疑。 遭 兵,怨謗紛 之,不能 無惑。 起,謂崇煥縱敵 會我大清設間,謂崇煥密有成約,令所 十二月朔再召對, 擁 兵。 朝士 遂縛下詔獄。 因前 通 和 議,誣 大壽在旁,戰栗失措, 獲宦官知之,陰縱使 其 引 敵 豞 和 將 爲 城 出卽 去。 下 Ż 盟 擁兵叛 其 人 銔 帝

大壽嘗有罪,孫承宗欲殺之,愛其才,密令崇煥救解。 大壽以故德景煥、懼幷誅、遂叛。

帝取崇煥獄中手書,往召大壽,乃歸命。

籍其家。景煥無子,家亦無餘貲,天下冤之。 并誅龍錫。 讐,見<u>崇</u>煥下吏,遂以擅主和議、專戮大帥二事爲兩人罪。 捷首疏力攻,遵、弘勳繼之,必欲 書止之。龍錫故主定逆案,魏忠賢遺黨王永光、高捷、袁弘勳、史些輩謀興大獄,爲逆黨報 方崇煥在朝,嘗與大學士錢龍錫語,微及欲殺毛文龍狀。及崇煥欲成和議, 法司坐崇煥謀叛,龍錫亦論死。三年八月遂磔崇煥於市。兄弟妻子流三千里, 龍錫嘗移

月。 初,崇煥妄殺文龍,至是帝誤殺崇煥。 崇煥旣縛,大壽潰而去。武經略滿桂以趣戰急, 自崇煥死,邊事益無人,明亡徵決矣。 與大清兵戰,竟死, 去縛崇煥時甫牛

程父事魏忠賢,驟得太僕少 之,卽日出贊化爲南寧知府。 趙 光抃,字彥清,九江德化人。父贊化,工部郎中。 卿。 南 光抃語之曰:「富貴一時,名節 寧惡地,贊化侘傺而死, 光抃奔喪歸 光抃舉天啓五年進士。 千古,君不可不審。」欽程惡 鄉 人曹欽

崇禎初,服闋,除工部都 水主事,歷兵部職方郎中。 十年秋,遣閱薊、遼戎務,盡得邊塞

列傳

形 令分守中官孫茂霖覈實。 人,駐密雲,遂擢 戰守機 宜 列 光抃 十二事 右僉都御史任之。 茂霖爲希韶解,光抃反 以獻 明年冬, 大清兵入密雲,總督吳阿衡敗歿,廷議增設巡 至卽發監視中官鄧希韶奸謀。 得罪,遣戍廣東 帝召希詔還, 撫 而

救,退回高陽,坐視淪覆。 皆失守。 嘗薦廣恩,廣恩抗不 志完,而稱光抃。 等八鎭兵邀於螺山 津諸鎭軍務。 至,召見德政殿。 十五 年, 光抃不敢救,尾而南。 兵事益棘,廷臣薦 丽 大清已克薊州, 帝曰:「志完、光抃逗遛河間,獨罪志完,渠服其心乎。」遂并逮光抃。 奏對稱旨,拜兵部右侍郎 ,皆敗走。 赴召,帝以是盆 明年復論光抃及范志完。 帝聞,大怒。 光抃復官。 已,聞塞上警,又驅 分兵四出, 惡光抃,卒與志完同 既解嚴,與志完並獲譴。 兼右 愈都御史, 命光抃兼督諸路援軍。 光抃家素饒,聞 而 四月,大清兵北旋,光抃、唐通 北。 日斬 廷臣交章劾光抃,謂 總督薊州、永平、山海、通州 命,持數萬金入都爲 洒市 諸援軍觀望, 帝召見雷縯祚 列 城被 河間 軍資。 演演 一、白廣 攻不 迤南 恩 旣

是,毛文龍據 以糜餉 亦左焉。 光抃才氣豪 為憂。 光抃雖文士,有膽決。 東江,海 及世魁 邁, mi 死, 疆賴之。 於大慮亦疎。 島中 ·無帥, 文龍 嘗遇敵,諸將欲奔,光抃坐地不起,久之,乃引歸 死,陳繼盛、黃龍、沈世 光抃继與嗣昌撤之。 在職方,深爲尚書楊嗣 魁代其部,往往爲亂 昌所倚,曰:「吾不及光抃。」先 年積息一 朝 而 除,而 中 朝 於 其起戍 邊計 叉素

中 同 ·也,將士不相習,猝遇大敵,先膽落,故所當輒敗。 誅,人咸以爲冤。 福王時,太僕萬元吉奏復其官。 然受事破軍之餘,身先被創,顧與志完

都 十四年冬,超擢右僉都御史,巡撫山西。其座主周延儒當國,遂拜志完兵部右侍郎兼右僉 輕,請得特疏奏軍事。 御史,總督薊州、永平、山海、通州、天津諸鎭軍務,代楊繩武。 范志完,虞城人。 當事者惡之,謫湖廣布政司檢校。 崇禎四年進士。授永平推官,專理插漢撫賞,意不欲行。 擢寧國推官,歷官分巡關內僉事 上疏言權 0

完代之,而令繩武總督遼東寧遠諸軍,出關救松、錦,加銜 書 地 繩武 成圖。帝偉之,遂超擢右愈都御史,巡撫順天。 者,雲南彌勒人也。由庶吉士改授御史。十一年冬,用楊嗣昌薦召見,吐言如流, 洪承疇困松山,遂擢繩武總督,尋以志 【督師

遠城南,護轉輸,募土著實之。又議修覺華島城,爲掎角勢,帝甚倚之。 師,總督薊、遼、昌、通等處軍務,節制登、津撫鎭。 武,而以張福臻督薊鎭,駐關內。 入援,三協有警則會同薊、昌二督幷力策應。時關內外並建二督,而關外加督師銜,地望尤 明年正月,繩武卒官,贈兵部尚書,廕錦衣世襲百戶。遂進志完左侍郎,督師出關如繩 自王樸諸軍敗,兵力益單,松、錦相繼失,志完乃築五 遼事急則移駐中後、前屯,關內急則星馳 六月易銜欽命督 一城|寧

列傳

第

保定六巡撫,寧遠、山海、中協、西協、昌平、通州、天津、保定八總兵。 又於昌平、 保定設二督,於是千里之內有四督臣。 又有寧遠、永平、順天 星羅碁置,無地不防, 、密雲、天津、

而 事 ·權反 不 ٥

帝 戰,所在州縣覆沒,惟尾而 設薊督。 疎防,廷臣亦言志完貪懦。 還 温く 猶責志完後效,志完終不敢戰 +五. 令志完兼 踰月,始以趙光抃任之。 年,給 事 制 中方士亮劾福臻昏庸,因言移督師關內,則薊督 關 內, 呵噪,兵所到剽虜。 移駐關 帝以敵 門。 兵未退,責令戴罪立功。 而大清兵已入自牆子嶺,克薊州 志完辭,不許。 至德州,僉事 求去,不許。 雷縯祚刻之,自是論 然志完無謀略,惟怯甚,不敢一 可裁,福臻 而南下矣。 上疏言不能 可能。 兵部劾志完 兼 列者益衆 薊 於是召 請

Ø5

延儒 定,議罪,召縯祚廷質,問志完逗遛淫掠狀, 督師 明 年,大清兵攻下 亦無功,遂命下志完獄,以十一 海州、贛楡、沭陽、豐縣,已而 月斬志完。二 志完辨。 北旋。 問 御 史吳履中,對 志完、光抃卒觀望,皆不 如縯祚言。 時座主 進。 事

Ш 巡 東巡撫王永吉反獲遷擢。 撫 馬成名、潘永 先是,十二年封疆之案,伏罪者三十有六人。四三至是,失事 圖 ,總兵薛敏忠,副將柏 帝之用刑至是窮矣。 永鎮,其他悉置不問。 ,甚於前,誅止志完、光抃及 而保定巡撫楊進得善去,

數年。 義不反顧,豈不毅然節烈丈夫哉!廣寧之失,罪由化貞,乃以門戶曲殺廷弼 在節哉! 贊曰:三路喪師,收降取敗,鎬與應泰同辜。 崇煥智雖疎,差有膽略,莊烈帝又以讒間誅之。 惜乎廷酮以蓋世之材,編性取忌。 功名顯於遼,亦隳於遼。 然君子重繩鎬而寬論應泰,豈不以士所重 國步將移,刑章顚覆,豈非天哉! 假使廷驹效死邊城, , 化貞稽誅者且

## 校勘記

- 御史徐景濂極譽化貞 徐景濂,明史稿傳一一八熊廷烱傅作「楊景濂」。
- 御史蘇琰則言廷殉宜駐 廣寧 蘇琰,明史稿傳一一八熊廷弼傳作「蘇述」。
- = IE 又令羅一貫以三千人守西平 |月丁巳條、||國權卷八五頁五二○○都作「羅一貴」。 羅一貫, 明史稿傳一一八熊延弼傳、 熹宗實錄卷一三天啓二年
- 29 進士題名碑錄萬曆已未科都作「藤縣」,疑作「藤縣」是。 袁崇煥字元素東莞人 東莞 懷宗實錄卷三崇禎三年八月癸亥條、國權卷九一頁五五四四、明
- EI. 列 副 將 侢 左 第 一輔朱 百 梅 四 + 朱梅, 七 原作「朱海」。 梭 勘 記 烹宗實錄天啓六年二月丙子條、 國権卷八七頁五三二〇 六七二三

都作「朱梅」。 按本卷下文「朱梅」之名屢見,與此誤作「朱海」者實是一人,據改。

六し 欲緩師 以待救 緩、原「援」、與上下文義不相應、據明史稿傳一三一袁崇煥傳改。

-1-忠賢孫 亦封伯 忠賢孫,係指魏忠賢從孫鵬翼,原誤作「忠賢子」。 據本書卷二二熹宗紀、又卷

三〇五魏忠賢傳改。

. バ Ш 宥首惡楊正朝張思順 順 元年七月甲申條、國權卷八九頁五四五一改。 楊正朝,原作「張正朝」,據明史稿傳一三一袁崇煥傳、懷宗實錄卷一崇

文龍子承祚 承祚,懷宗實錄卷二<u>崇</u>禛二年六月戊午條、國権卷九○頁五四八七都作「承祿」。

(10)時崇禎二年五月也 五月,本書卷二三莊烈帝紀、懷宗實錄卷二崇順二年六月戊午條、國権卷

五〇頁五四八七作「六月」。

以十一月斬志完 年十一月丁未條、國権卷九九頁六〇〇三改。 十一月,原作「十二月」,據本書卷二四莊烈帝紀、 懷宗實錄卷一六崇禎十六

伏罪者三十有六人。三十有六人,本書卷二四莊烈帝紀作「三十三人」,懷宗實錄卷一二<u>崇</u>禛 十二年八月庚寅條、國権卷九七頁五八四六作「三十二人」。

## 明史卷二百六十

## 列傳第一百四十八

楊鶴 從弟鶚 陳奇瑜 玄默 能文燦 洪雲蒸 練國事

丁啓睿 從父魁楚 鄭崇儉 方孔炤 楊一 鵬 邵捷春

## 余應桂 高斗樞 張任學

楊鶴、字修齡、武陵人。萬曆三十二年進士。 授雒南知縣,調長安。

公主三奏不達,興讓掛冠長安門去,故鶴言及之。 閣不聞,上書不達,壅蔽極矣。」 時壽寧主壻冉興讓爲掌家宮人梁盈女、內官彭進朝等殿辱, 四十年擢御史,上疏請東宮講學。 且言:「頃者,愛女被躪於宮奴,館甥受撻於朝市,叩

尋出督 列 傅 第 兩 淮鹽法,[] 百 四 十 八 巡按貴州。 楊 鸧 貴州接壤烏撒,去川南敍州千里,節制難。 土官安雲

核。 檄宣慰安位盡著之籍,幷首領目把主名、承襲源委,悉列上有司。 爲 龍 亂 川、雲、貴咽 死 事竣,不候命徑歸。 ,如其言。 ,其族人與霑益安效良爭印,搆兵三十年,<br />
(三)後竟爲效良所據,其父紹慶又據霑益州 [候地。 貴州土官以百數,水西安氏最大,而土地、戶口、貢賦之屬,無籍 鶴請割烏撒隸貴州, **外之,還朝** 地近節制便,可弭後患,朝議 自是簿牒始明,奸弊易 不決。 可稽。 未幾, 效良 鶴乃

太僕 除鶴名 至尊優柔不斷,又至尊自誤。」當事 喪師 少卿,擢右僉都御史,巡撫南、贛。 楊鎬四路 辱國,誤在經略,不諳機宜,馬上催戰,誤在輔臣,調度不 師敗、鶴薦熊廷弼、張鶴鳴、李長庚、薛國用、袁應泰、言三遼事之失,不料彼 惡其直,將假他事逐之,乃引疾去。 未任,丁內艱,而廣寧又敗。 ·聞 魏忠賢以鶴黨護廷殉 束手 丁外艱。 無策, 誤在 天啓初,起 樞部

傷。 役,加派頻仍,公私交罄,小民之元氣傷。 自搢 崇禎元年召拜左僉都御史,進左副都御史。 紳 構黨,彼此相 傾,逆奄乘之,誅 自遼左 題善類, 士大夫之元氣傷。 一、黔、蜀 鶴上言:「圖治之要,在培元氣。 喪師 失律,暴骨成 譬 如重病 丘,封疆 初 自大兵大 起,百 之元 氣 脈

先是、遼左用兵、逃軍憚不敢歸伍、相聚剽虜。 至是,關中頻歲祲,有司不恤下。白水王 未調,

風邪易入,道在培養。」

時

以爲

名言

二者,鳩衆,墨其面,闖入澄城,殺知縣張耀采。<br />
(三) 由是府谷王嘉胤、漢南王大梁、階州 周大 聞

旺 羣 賊蠭起 一三邊饑軍應之,流 氛之始 也。 當是時,承平久, 卒被兵, 人無固 大 東惡

贼 此 饑氓,徐自定耳。」

延安、慶陽 嚋 二月,延安知府張輦、都司艾穆蹙賊延川,降其魁王子順、 原、臨洮五 自 禦之。 已前 持, 八河曲 明 撫恤 年 誅滅 年 俘斬三百餘 ·正月, ,總督武之望死。 間。 ,鶴匿不奏,而給降城王虎、四小紅狼、一丈青、掠地虎、混江龍等免 鎭總兵官悉以勤王行。 將卒 而 贼淫掠如故,有司 繼 而 王左掛等攻宜川, 起者 已。」遂拜鶴兵部右侍郎,代之望總督陝西三邊軍務。 人, 圍解, 賊走淸澗。 益 衆。 久之,廷臣莫肯往者,**羣推**鶴。 鶴素 不敢問。 爲知縣成材所却,轉攻韓城。 延綏兵中道逃歸, 有清望,然不知兵。其冬,京師戒嚴,延綏、寧夏、甘肅 鶴連 寇患成於此矣。 疏請諸將還鎮, 甘肅兵亦譁,懼誅 張述聖、姬三兒。 帝召見鶴、問方略。 不果, 軍中 無帥, 起故將杜文煥任之。 ,並合於賊, 至則 鶴 別 大梁、大旺、王 賊 命參政洪承 對曰:「淸愼 死牒,安置 王嘉胤掠 、賊盆 固

汝學攻綏德州 ,跋神一元攻陷新安、寧塞、柳樹澗等堡。 七月,嘉胤陷黃甫、清水、木瓜,遂陷 謀 内應。 事覺,巡按李 府谷, 應期與承疇計誅左掛等綏德,五十七人皆死。 寧塞,文煥所居,宗人多死。 文煥擊走之,賊流入山西。 已撫王左掛以

列

器護焉。 魁果至。 之,則立 先後降。 魁 求撫、送還合水知縣蔣應昌。 我宗人,可與賊逼處此土乎」。遂以其族行 明 赦其罪, 鶴設御座於城樓,賊跪拜呼萬歲。 數以十罪,則稽首謝。 文煥聞之, 嘆曰:「寧塞之役, 賊畏我而逃。 ·正月,賊棄寧塞,陷保安。 羣盜自是視總督如兒戲矣。鶴又以一魁最强,致其壻帳 卽宣詔 別賊拓先齡、金翅鵬、過天星、田近菴、獨 一元死,弟一魁圍慶陽,陷合水。 赦之,畀以官,處其衆四千餘人於寧塞,使守備吳弘 鶴宣聖諭 今者賊偽降,楊公信之,借名城 , 令設誓,或歸伍, 鶴聞,移駐寧州 頭虎、上天龍等亦 或歸農。 中,同臥起,而 賊 佯 應

部, 之賊,寧自天降。」疏下巡按御史吳甡覈奏,甡奏鶴主撫誤 於耀州。 田近菴以六百人守馬 五月,鶴移 其黨猜懼,挾一魁以叛。 駐耀州。 欄山應之。 賊攻破金鎖關, 御史謝三賓言:「鶴謂慶陽撫局旣畢,賊散遣 而降渠一魁之黨茹成名者,尤桀驁,鶴令一 殺都司 王廉。 七月,別賊李老柴、 國。 帝怒,逮鶴 下獄,戍袁 獨行 俱 盡 魁誘殺之 狼 州 攻陷 中部 中

夏破 恤 居 此 賊 鶴 職 七年秋,子嗣昌擢宣 功,追加太子少傅。 初 帝優韶答之, 以尤世 祿寧夏大捷功,進兵部尚書、 而不赦鶴罪。 大 十三年又以甘肅敍功,任一子官。 山西總督,疏辭。 八年冬, 太子 鶴卒於戍 言:「臣父鶴以總督蒙譴已三年,臣 少保, 所, 世廢錦衣千戶。 嗣昌 請恤 帝復鶴官, 十年敍賀 (虎臣 Щ 何 心復 不

從弟鶚,崇禎四年進士。 官御史,有才名,擢順天巡撫。 京師陷, 南歸, 福王以爲兵部

右侍郎,總督川、湖軍務。

中。 楊漣劾魏忠賢,奇瑜亦抗疏力詆。 陳奇瑜,字玉鉉,保德州人。萬曆四十四年進士。 六年春,由戶科左給事中出爲陝西副使,遷右參政, 除洛陽知縣。 天啓二年擢禮科給事

分守南陽。

斬截 級。 天飛,參政張伯鯨斬滿鵝,擒黃參耀、隔溝飛,守備閻士衡斬張聰、樊登科、樊計榮、一 開山鷂 疏,極言廊、延達鎭城千餘里饑荒盜賊狀, 詔兎延安、慶陽 山 崇禎 時大盜神一魁、 、黑煞神、人中虎、五閻王、馬上飛,都司賀思賢斬王登槐,巡檢羅聖楚斬馬 虎、柳盜 改元,加按察使職,尋歷陝西左右布政使。 跖、金翅鵬等。 不沾泥等已殲,而餘黨猶衆。 尋遣遊擊常懷德斬薛仁貴,參政戴君恩斬一條龍、 歲大凶,民多從賊。 五年擢右僉都御史,代張福臻巡撫延 田 租。 奇瑜乃遣副將盧文善討 明年五月, 紅狼、滿 金剛 奇瑜上 塊鐵、

青背

狼

、穿山甲、老將軍、二將軍

、滿天星、上山虎,

把總白士祥斬埽地虎,

守備郭金城斬扒

略盡。 未頓一兵,未絕一弦,擒斬頭目百七十七人,及其黨千有奇。 木揭竿者,今且荷鋤負耒矣。」帝嘉之,令錄有功將士以聞 逼上天、小紅旗,他將斬草上飛、一隻虎、一翅飛、雲裏手、四天王、薛紅旗、獨尾狼,諸渠魁 虎、括天飛、守備郭太斬跳山虎、新來將、就地滾、小黃鶯、房日兔,遊擊羅世勛斬賈總管、 奇瑜乃上疏曰: 「流寇作難,始於歲饑,而成於元兇之煽誘,致兩郡三路皆盜藪。今 頭目旣除,餘黨自散。向之斬

奇瑜威名著關陝。於是羣盜盡萃於山西,流突河北、畿南。 巢,斬首千六百有奇,二賊俱馘。分兵擊斬金翅鵬、一座城,獲首五百五十。延水羣盜 廣,窺四川 勁,直抵延川。 延綏尋賊多解,獨鑽天哨、開山斧據永寧關。永寧在鎭城東,前阻山,下臨黃河, 奇瑜謂是不可以力取,乃陰簡銳士,陽言總制檄發兵,令賀人龍將之而西,身爲後 俄策馬東,曰:「視吾馬首所向。」潛師疾走入山。<br/>
賊不虞大兵至,驚潰。焚其 冬冰堅,從澠池渡,躪河南、湖 數年

夔州。 奇 易,乃擢奇瑜兵部右侍郎兼右愈都御史,總督陝西、山西、河南、湖廣 瑜檄諸將會兵陝州。 叨 年, 廷議諸鎭撫事權不一, 宜設大臣統之, 阻險、復走還陸,分為三:一犯均州,往河南,一犯鄖陽,往淅川,一犯金漆坪,渡河 先是,老回回、過天星、滿天星 多推薦洪承疇。 、闖場天、混世 以承疇方督三邊, 、四川軍務、專辦 王五大營自楚入蜀,陷 流賊。

列傳第一百四十八 陳奇瑜

奔逸。

八十餘級,總兵鄧玘功爲多。已,設伏蚋谿,連戰,斬三百餘級。至獅 督將士由竹谿至平利之烏林關 房、竹,遏其 犯 商南。 奇瑜乃馳至均州 西。 河南玄默駐盧氏,遏其東 ,檄四巡撫會討。 ,十餘戰,斬賊千七百餘級。 北 陝西 湖廣 練 唐 國事駐商南,過其西 **暉駐南漳,遏其東南。** 越七日, 子山, 大破之乜家溝, 北。 斬七百二十餘 奇瑜 鄖陽盧象昇 乃偕象昇 斬 駐

遺參將賀人龍等追八晝夜至紫陽,賊死者萬餘 中 漸 有寧字。」帝嘉勞之。乃督副將劉遷等搜竹谿、平利賊,追至五 · 奇瑜上言:「楚中屢捷,一時大盜幾盡,其竄伏深 人。 山者,臣督鄉兵爲 狼 河,公 嚮道, 擒其魁十二人。 無穴不搜,楚

級。

別將楊化麟、楊世恩、周任鳳、三楊正芳等分道擊殺賊,擒其魁闖王、翻

Щ

虎

將賀 是時,奇瑜 自 分爲二:一向漢中,取問 數萬,自四 督 副 先是,賊入蜀,復自蜀 人龍、劉遷、 將 楊化 ]][ 以 湖廣 入西鄉者二三萬。 麟、 夏鎬 柳國鎮等駐洋縣, 賊盡, 鼓行而西, 謂賊 扼略陽 道犯城固、洋縣;一由 入秦,由陽平關奔鞏昌,承疇禦之秦州。 、 沔縣, 犯城固、洋縣者,又東下石泉、漢陰,會漢、興,窺商、雒 防賊東遁。 防賊西遁; 不足平也。 鳳縣奔寶雞、汧陽。 又檄練國事、盧象昇、玄默各守要害, 遣副將楊正芳、余世 乃遣遊擊唐通 於是賊在平利 防漢中,以護 賊逐越兩當,襲破 任 扼褒城,防 藩 、洵陽 城 封;遣參 北遁; 鳳 截賊 問 當 者

殲。 絕,無所得食,困甚。又大雨二旬,弓矢盡脱,馬乏獨,死者過半。當是時,官軍蹙之,可盡 餘人,攻掠諸州縣,關中大震。 傳送,諸將無邀撓撫事。諸賊未大創,降非實也。旣出棧道,遂不受約束,盡殺安撫官五十 遽許之,先後籍三萬六千餘人,悉勞遣歸農。每百人以安撫官一護之,檄所過州縣具糗糧 巉立,中 亙四十里,易入難出。 賊誤入其中,山上居民下石擊,或投以炬火,山口纍石塞,路 自成等見勢絀,用其黨顧君恩謀,以重寶賄奇瑜左右及諸將帥,偽請降。奇瑜無大計, 見官軍四集,大懼,悉遁入興安之車廂峽,諸渠魁李自成、張獻忠等咸在焉。 峽四山

委罪巡撫練國事,國事亦被逮。給事中顧國寶劾奇瑜誤封疆,詔解任候勘。 瑜又請敕<mark>陝西、鄖陽、湖廣、河南、山西五巡撫各守要害,有失則治諸臣罪,冀以分己過。</mark>又 鳳翔鄉官孫鵬等撓撫局,撫按官亦異心。帝怒,切責撫按,逮嘉彦、鵬及士民五十餘人。奇 劾奇瑜解隴州圍報首功不實,詔除名,錦衣官逮訊。 上,殺其先登者三十六人,餘譟而去。 奇瑜悔失計,乃委罪他人以自解。贼初叛,猝至鳳翔,誘開城。 其犯實雞,亦爲知縣李嘉彥所挫。奇瑜遂刻嘉彥及 九年六月謫戍邊。 守城知其詐,給以縋城 御史傅永淳復

鍵自立於閩,召奇瑜爲東閣大學士。 初 奇瑜官南陽,唐王殺其世子,欲幷廢世子子聿鍵。 道遠、未聞命、卒於家。 賴奇瑜力,聿鍵得爲世孫。

玄默,字中象,靜海人。萬曆四十七年進士。除懷慶推官,擢吏科給事中。 魏忠賢焰

方熾,以鄉里欲招致之,默謝不可。言路承忠賢意,劾罷歸。

之,得釋,歸八年卒。 贼多趨秦、楚境。已,分爲三,自潁州犯<u>鳳陽皇陵,中州</u>所在告急。八年夏,獸被逮去。 守要害,得稍寧者數月。當是時,賊勢張,良玉等承督師檄,守備尙固。 城數十,賊避勿敢攻。 左良玉、湯九州、李卑、鄧旺兵待境上,復率九州乘雪夜薄吳城賊營,大破之。嵩、雒以北名 崇禎初,復官,歷遷太常卿。六年春,以僉都御史巡撫河南。 奇瑜旣失李自成於車箱峽,默自汝州移駐盧氏,檄良玉、九州各陳兵 流賊由均州犯河內,默率 默率諸將斬獲多,

出 封琉球還,擢山東左參政,山西按察使,山東右布 熊文燦、貴州永寧衛人。萬曆三十五年進士。授黃州推官,「乙遷禮部 政使。 憂歸,自是徙家蘄 主事,歷郞 水

李忠旣降,楊六、楊七及鄭芝龍繼起。 崇禎 元年起福建左布政使。三月就拜右僉都御史,巡撫其地。 總兵官兪咨皐招六、七降,芝龍猖獗如故。 海上故多劇 盜 然芝龍常 袁進、

列

叉起。 敗都司洪先春,釋不追;獲一遊擊,不殺;咨皐戰敗,縱之走。當事知其可撫,遣使諭降之。 投海死。 文燦至,善遇芝龍,使爲己用。其黨李魁奇再降,再叛去,芝龍擊擒之。 斌初亦就撫,後復叛,寇福州。 閩中屢平巨寇,皆芝龍力,文燦亦敍功增秩焉。 文燦誘斌往泉州,令芝龍擊敗之。 海警漸息,而鍾斌 旣而蹙之大洋,斌

焚溺 巢。 撫 於田尾遠洋。 罪,奏諸臣 福建有紅夷之患,海盜劉香乘之,連犯閩、廣沿海邑,帝以責文燦。 鍾淩秀旣降復叛,[刊為芝龍所擒,其黨潰入長汀,轉掠江西屬邑,文燦檄芝龍屢敗賊。 賊佯許之。參政洪雲蒸,長沙人,初官廣西參政,嘗搜凌秀餘黨,斬三十餘級, 死,承祖等脫還。 五年二月擢文燦兵部右侍郎兼右僉都御史,總督兩廣軍務,兼巡撫廣東。先是,海寇 文燦乃令雲蒸與副使康承祖,參將夏之本、「こ」張一傑入賊舟宣諭,俱 信贼自陷。 香脅雲蒸止兵,雲蒸大呼曰:「我矢死報國,急擊勿失。」 賊黨千餘人詣浙江歸款,海盜 給事中朱國棟劾之, 韶貶秩, 戴罪自效。 盡平。 八年,芝龍合 逐遇害。 文燦不能討, 被 執。 廣東 香勢蹙,自 八兵擊香 文燦懼 盡毁 乃議 其 招 而

喜,語及中原寇亂。 不識文燦為 文燦官閩、廣久,積貲無算,厚以珍寶結 遣中使假廣西采辦名, 文燦方中酒,擊案罵曰:「諸臣悞國耳。 往覘 之。 中外權要,謀久鎭嶺南。 旣至,文燦盛有所贈 若文燦往,距令鼠輩至是哉 遺, 會帝疑劉香未死,且 留飲 -日 中使

詹事 中 文 不 且. 燦 意 使起立曰:「吾非往 日 一解窮 ·, 叉 悔 此 與楊嗣 失言,隨言 ,應日「諾 有 內 援 昌善。 可引 有 」。中使還朝。果言之帝 廣 五. 也。」嗣昌喜,遂薦之。 嗣昌握 西采辦 難 四 不 兵柄 也,街 可。 了,承帝眷, 中 上命覘公。 使 曰 初,文燦徙蘄水, 以帝急平 吾 見上自請之,若上 公信 有當世才,非 ·賊,冀得一人自 與邑人姚 一無所 公不 明恭 答,即 助。 足辨 爲 明恭 此 公 姻妮 賊。」 不得 因 薦 文燦出 明恭官 辭 文燦 矣。」

甚振。 矣。」 帝 燦 節 僧 而 人 四 ", 乃 制 去 定 目 以 川 者乎? 一公自 自 文燦却立 ,抵安慶。 軍 + 以邊將馮舉、 會其下 護 務。 年 一,弓 四 目 文燦拜 度所將兵足制 月 刀甲胄 與 良 拜 帝 粤軍不 人,日:「撫之何 未 文燦兵部尚書兼 所遣 知 命,卽請左良玉所將六千人爲己 苗有才兵五千人隸焉。 甚整。 何 中官劉 和 如 也。 贼死命乎?」曰:「不能。」曰:「諸將 大詬 次廬· 元斌、 曰:「二者旣不能當賊,上特以名使公,厚責望, Щ 如心僧 右副都御史,代王家禛總理南畿、河南、山西、陝西、湖廣 文燦 盧 謁 九德監 所 不 曰:「吾料公必撫。 善僧空隱。 得已,遣還南兵, 有才敗於眞陽。 勇衞營軍者 軍,而大募粵人及烏蠻精火器者 僧迎謂 亦至。 然流寇非海寇比,公其愼之。」文 然良玉軍 有 而京營將黃得功 曰:「公誤矣。」文燦屛人問故, FI] 屬大事、當 良玉 實不爲 宿將桀驁, 面面 用。 連 破賊兵,威 、不煩指揮 不受文吏 嗣昌言於 不 一二千 效,

等,而 被擒 據 布 益 旣已任 穀 通 懼 城 都 当 其下 稱文燦 之, 文 燦 時 會得功 饑困 又請盡遷民 則曲 顧 功焉 嗣 決 多散 昌 爲文燦 計招 又大破賊舞陽,馬 建 去。 降。 四 與栗閉 解。 正六隅」之策,增兵餉大半,期 獻忠窮蹙,亦因 初抵安慶,卽遣 因其請, 城 外中,, 士秀、杜應金 贼無所掠, 畀 以 畿 輔 陳洪範 人招 張獻 **山** 當自退。 以降。 夜半降,信陽城 西兵各三千。 忠 滅賊,賊 劉 於是嗣 帝 或 怒 能 昌議 二二人 頗懼 下。 譙讓 明 功罪,組洪承疇、曹變蛟 年 文燦。 獻忠 聽 , 及文燦至,京軍 命。 國 能 爲 果降 嗣 功 左 昌 益 良 · · · 而 玉 亦 刊 所 招 S) 獻 · 屢捷, 創,幾 非之, 降 忠 激 襲

文燦 九 軍,以通 軍搖矣。 次襄陽,賊 營走均州 下 無實。」文燦恐。 今,殺賊者償死。 而 判孔 莫若厚集 京軍 分踞鄖 李萬 貞 解塗 會監 襄 慶率三營走光、固 其 平圍,斬 副 力 諸 孫 將 傳庭 險。 而 韻 賊 合 在 不肯從 獲三千有奇。 出 諸將請 擊之。」衆 田 關 軍、戰於 擊賊,文燦不救,而 门 則 齎· 戰,文燦議 曰:「善。」 雙溝,大破之,斬首二千餘級 金帛酒牢犒之,名曰「求賊」。 時文燦在裕州 分兵。 乃以 嗣昌 盧九 ,馬進忠、羅汝才十 已入政府掌 德 張 日 大 「兵分 經 監 中 大 則 帝 將 羅 樞 力弱 詗 矣。 汝 左 得 三家賊聚南陽 才、 良 狀,日 九月,· 玉、 惠登 失利, [三文燦 陳洪 文燦 相 桽 範

十 一月,京師戒嚴,召洪承疇、孫傳庭入衞。 汝才等以爲討己也,懼而叩太和山提督

金遂叛於許州。初,士秀等降,良玉以其衆處許之郊外。許,大州也,良玉諸將寄孥與賄 剿,他皆主撫。請赦汝才等罪,授之官。」可之。時京軍、良玉軍皆以入衞行,馬士秀、杜應 常德安、日過楊友賢、王光恩五營於均州。上言「臣於李萬慶、賀一龍、馬光玉及順天王主 官,求撫於文燦,許之。處汝才及一丈青、小秦王、一條龍四營於鄖縣,處登相及王國寧

焉。良玉久征不歸,士秀、應金在文燦軍中,僞請急,假良玉軍號入城。夜半,兵從府第出, 燒城南樓,劫庫,殺官吏,挈其貲投萬慶。萬慶者,賊魁射塌天也。

左及馬光玉三部尚稽天誅,[10]可歲月平也。」帝優詔報之。 前死,其黨順義王爲其下所殺。文燦遂上言:「臣兵威震慴,降者接踵。十三家之賊,惟革、 十二年三月,良玉還,破降馬進忠,使劉國能擊降萬慶,士秀、應金亦再降。 順天王已

命嗣昌來代。 於穀城、劫汝才於房縣,於是九營俱反。初,均州五營懼見討,自疑,相與歃血拒 才降,不肯釋甲。及進忠、萬慶等並降,文燦以爲得策,謂天下且無賊也。 請地,請關防矣,獻忠列軍狀曰請備遣。旣而三檄其兵不應,朝野知獻忠必叛也。 何亦叛去。 初,張獻忠之降也,擁兵萬人踞穀城,索十萬人餉。文燦及中外要人曰與之。 帝聞變,大驚,削文燦官,戴罪視事。 嗣昌已至軍 ,即遣使逮文燦下獄,坐大辟,所親姚明恭柄國而不能救也。十 七月,良玉擊獻忠羅狹山,敗績。 五月,獻忠遂反 獻忠,無 帝大怒, 爲請官, 其後,汝

三年十月,文燦竟棄市。

練 國 事 字字 君像,永城 人。 萬曆 四十四年進士。 授沛縣 知 縣,調 山陽

衣、傷 兵萬 天 國 以壯 啓二 豐。 山海 年徵授 國 事 聲援。 在 御 諫 史。 垣,匡 又請 廣 捕誅殺 枚 寧失守 多。 大同 給事 國 事 妖人。 中趙興邦,忠賢私人也,以國 請 薊 州、宣府、大同 叉疏論 魏忠賢使羣閹 . 及 Щ 東 辱尚 事 Щ 為 西 趙 書 河南 南星黨, 鍾 羽 撫臣 正, 劾之, 索冬 各 練

削

籍

韓城 相 臣 正 等 繼 月 崇禎 叛, 分剿賊 又破 沛 田 元年復官,擢太僕少卿,進右僉都御 元 別 近卷、 澄城 部於宜君 陷保安。 宜 李老柴陷 ]]] 維 耀 國 事遣賀 州 ]]] 中 、降其 部 白水、郃陽、斬首千九 虎臣援延安,而身率副將張 魁李應鰲。 國事偕承恩攻圍 史,巡撫陝西。 諸將 五 百 張全昌、趙大胤、王承恩、 万, 有 奇。 克之。 全昌連 關中頻歲饑,盜賊盜起。 總督楊鶴旣受羣 丽 破點燈子 所部亦頻 於中部、 杜文煥、 失事,楊鶴被 ・賊降, 已,復 部陽 賀虎 四 年

五 年,紅 軍友、李都司等將犯平涼。 國事自涇趨固原,檄大帥楊嘉謨殺賊塘馬,斷其偵 徵

或

事

亦戴罪自

贖

探。 贼 乃走慶陽西壕,嘉謨、曹文詔邀擊,大敗之。 自三月至五月,大小數十戰,賊迄破滅

爽 事 免 戴 罪

洪承

疇尤善

調

當 是 時, 關中五鎭,大帥曹文韶、楊嘉謨、王承恩、楊麟、曰到賀虎臣各督邊軍協討,總督 度。 賊魁多殲 ,餘盡走山西, 靖

關中稍

受撫 若仍 藉 陽 熾。 內 地 實 駐商州、協剿商南、盧氏賊。 八大王又一 地 ),食飲何自出,安得無剽掠。且一大帥將三千人,而一賊魁反擁萬餘衆,安能受紀律。 數。 、醴泉。 口 回籍 以 旣 兵力所能支,宜其連陷名城而不可救也。 六年冬,賊旣 因誤殺使人致然,則未誤殺之先,何爲破麟游、永壽。 願 及 加 回原籍,禁兵勿剿,三秦之禍安所終極哉!疏入,事已不可爲,遂逮下獄。 ,延安州縣縣 見奇瑜 奇瑜受賊降,檄諸軍勿擊。 奇瑜委罪 部八千三百餘人,臣不覺仰天長嘆。 疏,八大王部萬三千餘 從澠池渡,入盧氏。 國事以自解, 增四萬餘人,安集何所。 漢南賊遂由寧羌至 國事上言:漢南賊盡 賊出險,遂大掠鳳翔 明年,賊逐由河南、湖廣入漢南。 人,蠍子 若咎臣不堵剿,則先有止兵檄矣。 兩當 塊部萬五百餘人,張妙手部九千一 夫一月內,撫强寇四萬餘,盡從棧道入內 合諸 掠鳳縣 征剿兵不滿二萬,而降賊踰 入棧道,奇瑜燉止兵。 、麟游、寶雞、扶風 今事已至此,惟急調 ,出棧道,陷寶雞 總督陳奇瑜檄國 、汧陽 臣 大軍致討。 、乾州 若云賊已 未知所撫 關中 四萬,豈 百餘 九年正 賊 涇 刨 復 事:

列

月遣戍廣西。久之,敍前功,赦還,復冠帶。

福 王時,召爲戶部左侍郎,尋改兵部。十二月加尚書,仍涖侍郎事。 明年二月致仕,未

幾卒

年,寧夏兵變,啓睿捕斬殺巡撫王楫者首惡六人,軍中大定。再遷右布政使,分守關南,從 丁啓睿,永城人。萬曆四十七年進士。崇禎初,歷山東右參政,坐事謫陝西副使。九

巡撫孫傳庭討賊。

儉總督陝西三邊軍務討賊。 安、臨潼、咸陽賊起如蝟毛。 湖廣、河南、四川、山西及江南、北諸軍,仍兼總督陝西三邊軍務,賜劍、敕、印如嗣昌。 十一年冬,就拜右僉都御史,代傳庭巡撫陝西。歲頻旱,民益爲盜,長武、環、白水、長 十三年用督師楊嗣昌薦,擢兵部右侍郎兼右僉都御史,代鄭崇 明年,嗣昌死,加啓睿兵部尚書,改稱督師,代嗣昌盡督陝西、

督師 承詔言大寇在河南,荆、襄幸息警,無煩大軍 任重專制,卽莫知爲計。啓睿已受命出潼關,將由承天赴嗣昌軍於荆州。 啓睿自謫河西副使,數遷皆在陝西,然實庸才。爲督、撫,奉督師期會,謹愼無功過;及 盡匿漢津船。 啓睿至,五日不得渡,折而 湖廣巡按汪 向

解圍 至,啓睿督兵赴之,避賊入城,部下大淫掠。 乘 置總督矣」,乞帝更敕 開 弱 時 鄧 勝陷南陽 封 孙 李自成 去。 乃謀 日告急, 州 人閉 於諸 已陷洛陽 門詬 殺唐王,開、汝二郡望 則 將 日 曰:「上命我 ",過內 『我方有 . 童 書,乃更敕書宗龍辨 開 鄉 封, ,長夷閉 事 剿像 有衆七· 於獻忠, 贼, 之糴 風 十萬。 此亦豫 下。 不赴矣。」 o 自成。 軍行荒 十二月, 總兵陳永福射自成, 啓睿憚 贼 也。」遂檄左 九月, 聞傅宗龍將 山間 不 自成 敢援。 う割馬 宗龍 再圍 良玉 、贏,燎 敗歿於項城, 聞 入關 開 張 破 封。 中 災 督 獻 之於 其左目。 忠在 秦 野草,士啗 河南 師, 麻 光山 城, 啓睿不 巡撫高 啓睿曰「三邊已 明 斬首千二百。 年 不 固 能 名 得 正月 始 衡 救 間 飛 賊 儌 賊 是

劍俱 至,開 軍,偕保定總督楊文岳,以七月會於朱仙鎭, 乘之,幾陷 賊鋒 文岳 啓睿之在許州 銳 封 未 重 事 聯騎 益急。 聞 可擊也。」啓睿曰:「圍已急,必擊之。」諸將皆懼。 匹 奔汝寧。 詔 月,自成合羣賊復攻 帝數詔切責啓睿。 褫 也,畏賊逼,始赴 職 候 賊渡 代。 河逐之,追奔四百里。 九 月, 分開封。 開封。 賊決馬家口 啓睿 不得已,乃大集良玉、虎大威、 六月,帝釋侯恂 離城三十里,而 與賊壘相望。 河灌開封, 喪馬鸁 城 於獄,命督援 賊衆百萬 七千,將 開封遂陷 良玉 卽 破。 歸營,即先走,諸 士 其抵 數萬 啓睿欲戰 **剿諸** 乃徵 楊德政、 開封, ,啓睿敕 下吏, 軍 救 啓門入, 開 方國安之 營俱 良 清、印 封。 玉 走 賊 未

列

傳

第

百

四

+

歸。自嗣昌死二年而啓睿敗,啓睿敗又二年而明亡矣。

部 尙 書,加太子太保,官其 福 王 時, 啓睿夤緣馬士英充 一子。 爲事官,督河南 事敗,脫身旋里,久之卒。 勸 農、剿寇諸務。 尋以擒斬歸德偽官,拜

瞿式 南 奉 事 加 薊 有 主 敗 兵部 湖 遼 、興式 隙, 耜 走梧州, 從父魁楚,崇禛四年春, 、保定 廣, 尙 錄其家數百人殺之。 魁楚檄 書。 兼 耜 巡 軍 擁立 復 撫 唐 務。 棄之, 思 王 承天、德安、襄陽。 桂王 自立 恩參將陳 九 年七月、畿輔 走岑溪。 於肇慶, 於福 河,命 邦 以右僉都御史巡撫保定。 進東閣· 魁楚乞一子,成棟笑曰:「汝身且莫保,尚求活 傳等襲走之,獲於 輜 重多, 以故官協理戎 被兵,魁楚坐下吏,久之放還 未赴, 大學士,兼 舶 會兩廣 艫 相屬, 桂林。 總督 政。 理戎政。 爲大將李成 靖江 沈猶 七年擢兵部右侍郎,代傅宗 封 魁 龍 大清兵下廣州 王亨嘉反 楚平粤伯,仍 入 爲 棟追獲, 侍郎 福 桂 王 魁楚 林, 時, 漸 魁楚 留 下 起故官, 迫 鎭 竟代其任 梧 :人耶? 邃 肇 兩 州 廣 總督 執 龍 並 成 閩 巡 魁 總 棟 垄 中 撫 葬 督 河

之。

初,遷陝西右參政。屢遷右僉都御史,巡撫寧夏。 鄭 景儉, ,字大章,鄉寧人。<br />
〔三] 萬曆四十四年進士。 數敗套寇,登銀幣,世 授河南府推官,歷濟南 唇錦 衣副 兵備 千月。 副使。

龍、李國奇等軍發西安。 遠安,陝撫丁啓睿、蜀撫邵捷春各嚴兵於其境,而崇儉主提兵合擊。 總兵左光先、曹變蛟、馬科隨承疇入衞,柴時華中道還甘肅,徵之不應。 才等九營皆反,興安告警。 十二年正月擢兵部右侍郎,代洪承疇總督陝 國奇至略陽,卒大譟,剽瑞王租。口己國奇已擢陝西總兵官,坐停新 總理熊文燦請敕楚撫方孔炤防荆門、當陽,鄖撫王鰲永防江陵 匹三邊軍務。 五月,張獻忠反穀城,羅汝 時固原、 崇儉乃檄副 臨洮、 寧夏三 將賀人

命,崇儉亦貶一

秩。

崇儉身在行,而嗣昌遠處襄陽。 敗賊於瑪瑙山,獲首功千三百三十有三,降賊將二十有五人,獲馬鸁、甲仗無算。 龍 賊還走興山、太平,處楚、蜀交。 是時,楊嗣昌已出師,入文燦軍而代之矣。 議令崇儉兼督蜀軍,而嗣昌亦檄秦軍入蜀。崇儉乃以十三年二月率人龍、國奇會良玉大 獻忠旣叛,大敗左良玉軍於房縣之羅狹山,謀入陝。崇儉率人龍、國奇軍扼之 及論功,所賜半嗣昌,但增一 秩,復先所降一 先是,尚書傅宗 秩而 己。 是役也, 興安。

寒溪寺、鹽井,先後斬 獻 忠 既敗,竄柯家坪,蜀將 省千 五百級。 張令追之,被圍。 其黨順天王、一條龍、一 崇儉遺兵擊走賊,人龍、 隻龍皆降。 崇儉軍五日三捷 國奇等復追敗之

列

傅

第

百四四

十八八

類崇

餃

威 名甚振。以年衰乞骸骨,不許,令率總兵鄭家棟還關中,留人龍、國奇討賊

也,逮下獄,責以縱兵擅還,失悞軍律。不俟秋後,以五月棄市。 代理,而疑崇儉託疾,令按臣核實。明年春,獻忠陷襄陽,嗣昌死,帝益恨崇儉不掎角平賊 昌因言崇儉撤兵太早,致賊猖獗。 殲。 崇儉旣去,未幾,人龍軍亦自開縣譟而西歸,楚師遂敗績於土地嶺,蜀中由是大亂。 當 是時,獻忠竄伏興、歸山中。秦、楚師俱集於變,諸將協心窮搜深籌,千餘殘寇可盡 帝初以崇儉不能馭軍,不悅,及是命削籍,以啓睿赴軍前 嗣

儉冤始白。 |儉未失一城,喪一旅,因他人巧卸,遂服上刑。羣臣微知其冤,無敢訟言者,臣甚痛之。」|崇 帝憤寇日熾,用法益峻,功罪不假貸,而疆事寖壞,卒至於亡。福王時,給事中李淸言:「崇 帝自卽位以來,誅總督七人,崇儉及袁崇煥、劉策、楊一鵬、熊文燦、范志完、趙光抃也。

李萬 言主撫之誤,不聽,而陰厲士馬備戰守。 慶、馬光玉、羅汝才於承天,八戰八捷。時文燦納獻忠降,處之穀城。 崇禎元年,起故官。憂歸。 方孔炤,字潛夫,桐城人。萬曆四十四年進士。天啓初,爲職方員外郎。忤崔呈秀,削籍。 定桐城民變,還朝。十一年以右僉都御史巡撫湖廣, 已而賊果叛,如孔炤言。 賊故畏孔炤, 不敢東, 文 孔炤條上 一八議, 撃賊

德、黄、守承天,護獻陵,而江、漢以南責鰲永。 棄家 嗣 言:「孔炤遏獻忠,有來家河、神通堡之捷,射中賊魁馬光玉,陵寢得無虞。 燦 督大名、廣平二監司禦賊。 減 下部、未奏、而部將楊世恩、羅安邦奉調、會川、沅兵剿竹山寇。 昌 乃檄孔炤防荆門、當陽,鰲永防江陵、遠安,秦、蜀各嚴兵。 爲僧,號無可者也,伏闕訟父冤,膝行沙塸者兩年。 戍紹興。 旣以孔炤撫議異己也,又忮其言中,遂因事獨劾孔炤,逮下詔獄。 **外之**,用薦復官,以右僉都御史屯田 命甫下而京師陷,孔炤南奔。 會嗣昌代文燦,令孔炤仍駐當 山東、河北。 帝爲心動,下議,孔炤 馬、阮亂政、歸隱十餘年而 **崇儉主合擊**,孔炤乃請 馳至濟南,復 兩將深入,至香油坪而敗 子檢討以智,國變後 請增秩久任。」章 陽。 護 命 陵 兼 惠王常 寢功多, 理軍務, 專斷

潤

六年 萬二千六百五十,戮中都留守朱國相、指揮使程 陵太監 以兵部左侍郎拜戶部尙書兼右僉都御史,總督漕運,巡撫江北四府。 先是,有以陵寢失守獲重譴者,爲楊一鵬。 楊澤貪虐,引賊來寇。 、八年正月,賊遂攻陷鳳陽,焚皇陵,燒龍興寺,燔 永寧等四十有一員,殺軍民數萬 一鵬,臨湘人。 歷官大理寺丞,削籍。 鳳陽 軍 公私邸舍二 民素疾守 崇禎

鵬 在淮安,遠不 先是, 賊漸逼 及救。 江 北, 帝聞 兵部 變大驚,素服避殿,親祭告太廟, 尚書張 鳳翼請敕 一鵬移鎭鳳陽,溫 逐速一 體仁 鵬及巡按 格其議。 御史吳振纓 **賊驟至,一** 

守陵官澤。澤先自殺,一鵬棄市,振纓戍邊。

邵 捷 春,字肇復,侯官人。 萬曆四十七年進士。 累官稽勳郎 中

維 悉 計 過 贼 章 天 衆 抵 坐貶。 崇禎 星 罷 城 北 下, |等。[IE]捷春進右參政,仍監 ,傅宗龍 拒 ,城中惟 二年出 久之,起四川 捷 春 代,命捷 與御 爲四 屯 田 史陳廷謨擒 ]]] 軍及蜀府護衛 副 右 春監軍,偕總兵羅 使,以十年秋 **参政**,分守川南, 繁奉鐕,而募市 軍 軍 抵 人情恒 成都。 尙文擊賊。 撫定 惺。 天全六番高 時秦賊已入蜀, 人、起廢將固守。 捷春啓門納 明年,尚文及安綿副 楊 三氏。 巡撫 鄉民避賊者。 **贼去,蜀王** 王 遷浙江按察使。 一維章 使吳麟徵 疏 中 總 兵侯 其 尉 奉鐕 大破財 功。 良 勾 柱 會 大

秦。 蜀 衍 亟 敗 安 [精銳萬餘爲已用,圖中卒自是益罷弱不足支矣。 秦兵扼 連破 + 難制 二年五 贼 驅 之興安, 贼遂還入秦、楚。 月,宗龍 使入蜀,蜀險阻,賊不 乃犯興山 入掌 中樞,即 及蜀太平,遂窺大寧。 十月朔, 擢捷春右僉都御史代之。 得逞,蹙之可全勝。 楊 嗣 誓師 捷春憤曰:「今甲失一城,巡撫坐。 捷春遣副將 襄陽, 又慮蜀重 機蜀 時張獻忠、羅汝才已叛,謀入 軍受節度。 王之綸、方國安分道扼之。 兵扼險, 賊將還毒 嗣昌 以楚地 楚, 令 廣 調

獻忠 以蜀 委賊,是督師殺我也。」爭之,不能得。於是汝才、惠登相遂自興山、遠安犯大寧、大昌, 亦西至太平。 明年二月,左良玉大破獻忠瑪瑙山,他將張應元、張令等復數敗之。獻

忠乃逃興、歸山中。 久之復振,由汝才入寧昌故道走而西

河,陷 昌欲 乃遣 人龍 率去。 惟汝才逸去。 西,遂與合。 茂選及覃思岱等出關分守。二將不相得,思岱譖殺茂選,三直捷春令兼統 厚集兵力專守夔,棄寧、昌噉賊,官軍環攻之。 初,汝才在寧昌阻江,爲諸將劉貴、秦良玉、秦翼明、楊茂選等所拒,不得渡。 及李國奇又西追之。 開縣,為 賊入隘,守者潰。 嗣昌乃上夷陵,而檄捷春扼夔門。 貴等戰皆却,賊乃渡江,營萬頃山、苦桃灣,其別部營紅茨崖、青平砦,歸、巫間 嗣昌見楚地無賊,以八月終率師 鄭嘉棟、賀人龍所破。 賊夜斬變關,將士大驚潰,新寧、大竹皆陷。 汝才等遁還興山 汝才乃與小秦王、混世王東奔。 蜀大寧、大昌界楚竹溪、房縣,有三十二隘 屢挫。 入蜀,於是羣賊盡萃蜀 。捷春曰:「棄隘口不守,是延賊 會嗣昌下招降令,小秦王、混世王皆降, 中。 而汝才、登相 而登相 獨 其衆,其 過 入戶 開 會獻忠 越 縣 巴霧 心 、衆相 门,嗣 西。

張 水 應元 寨觀音巖為 當 是時, 等敗績於夔州之土地嶺。 捷春提弱卒二萬守重慶,所倚惟秦良玉、張令軍。 第 险,以部 將邵仲光守之,而夜叉巖、三黃嶺、磨子巖、魚河洞、 於是捷春以大昌上、中、下馬渡水淺 無何, 地平,難 秦 師 課 加 與 四 持 下涌諸處 久,乃扼 | 楚 將

列

月 馬 各 隘 [][ 達 捷 扼 渡。 春 州 偵 ,獻忠突淨壁,遂陷 分兵三 至,遂以軍事 八二忠張載福陷 乃復走巴西。 收 候 兵 捷春 不 元吉 扼扼 明 四 梁山。 急機 ,防軍或遠離戍所,賊乘隙而 退保綿州 百 人 付代者廖大亨而 以守。 諸 陣死,涪江 應元 將 時登相已歸正,而汝才復 大昌,屯開縣。 分邀之,復令張奏凱 , 扼涪江。 諸軍邀之梓潼,戰小利,旣而 萬元吉以兵分力弱爲憂, 師遂 潰, 去。 賊疾 贼屠 良玉 走,陷劍 過無人之境。 綿州 屯 令兩軍皆覆。 淨壁 與獻忠合,以梁山 州 捷春歸成都, 。口心捷春遣二將羅 捷春 逐趨 衄 ,蜀將曹志耀等力戰 不聽。 嗣 廣元。 昌遂收斬仲光,上疏劾捷春失事 賊行 九月, 賊逼成都。 則哨 將 河深不能 由 探,止則息馬 間 洪政 獻忠突敗仲光軍 道 入 渡, 沈沈 却之。 漢中, 十一月逮 乃自 應龍 抄糧。 降將張 開 爲 爲 速春使 秦兵 縣 助。 一,破 西走 所 上 關

時,復官, 不 捷 春爲 敕巡 贈兵部右侍郎。 安 人清謹,治蜀有 御史遣官送京師,下獄論死。 惠政。 士民哭送者載道,舟不得行, 捷春知不可脫,明年八月仰藥死獄中。 競逐散官旗。 蜀王為疏救, 福王

|余應柱,字二磯,都昌人。 萬曆四十七年進士。 歷知武康、龍巖、海澄三縣

輔 周 崇禎 延 儒 姻 四 年 也 徵 授御 劾 延 史。 儒 納 劾 孫 戶 元 部 化 尙 參 書畢 、貂,受 ·自嚴 楊 鶴 朋 比 重 賂 0 殿試 o 帝 讀 方 眷 卷, 延 取 儒 陳 責 于 應桂 泰 第 0 未 于 幾 泰 賊 著,首 陷 登

州 元化 被 執 應 桂 再 疏 劾 延 儒 帝 怒, 貶三秩 視 事 , 應 桂 引 疾 歸

帝 聞 尹 以 而 是 嘉 七 艺。 年還 知 巡 期滿 撫 朝 王 出 夢 按 命再巡 尹 湖 詐, 廣 而 居守 年。 益 信 承天 貽 應 贖 桂 鍰 捐 萬 期滿 贖 五千 鍰十 助 命 餘萬 盧象昇軍 再 巡一 募壯 年。 土 ·需,而 一,繕城 + 年 奏報屬 卽 治器,賊 擢 應桂 城 失 不 右愈都 敢 事 ·, 具 逼 獻 御 以 陵。 史,代 實 帝

|桂 從。 於 玉 西 奏 應 乃 走 捷 潼關 陳 桂 當 贼 不不 龍 復 撫 所 是 、未至 能 時 剿 東 分 大 始 走 地,文燦逐 創 諸 光 一,而 末, 江 玉 監 也 北 白 遣 司 為 賀 2將擊順 袁繼 己 帝 効其 左 命熊 無罪,而 龍 良 咸 後 文燦 包包 玉 天 李萬 期 所 王等於黃 詆 鳳 悞 爲 遏 慶、 文燦 起、高 ), 折 總 軍 順 理 而 福店 薨 斗 兵 走廣 文燦 部 樞董 王、 ,贼逐走黄安。 尙 濟 九 主 已削 書楊 蘄 條 撫。 莆 平湖 水 嗣 衆 明 十 年 以 文燦檄諸 南 餘萬 應桂 降 羣 會文 其渠 贼,而江北 苯 會刻 燦至麻 麻 劉 道 城 國 其 兵 能 父鶴 合擊賊 黄安 城 贼 張 勢 也 應 獻 H 桂 於茶山,賊 應桂 忠 熾, 請 協 諭 馬 諸 撃 降 將 淮 逸 光 忠 應 雖

正 月 初 議 撫劉 國 能 其黨李萬慶等諸大賊盡走必陽、棗陽。 時文燦、良玉 一並在

之後, 撫。 安。 道,未見其 小 臣 李萬慶 遮飾 勝 以 之不武, 文燦 爲 上聞,妄報 Ŧ. 試也 兵勢方盛 部收餘燼,勢復 一,宜 斬 不 聽。 乘此 級。 振。 其自 自 追剿,而 此 一特所長惟 而豫 機 文燦調良玉諸軍盡赴信陽 失,賊走西,而文燦東,致張獻忠攻陷 楚之患,遂自文燦之愎諫貽之矣。 火廠火攻, 經過州縣用夫至八百, 剿馬 進忠。 迨賊 臣 穀 死亡載 城 · 謂 進忠 以 四 要

是剿 道。 十三家之賊蹂 竟不 麻 日「借辨 之焚掠,未見 城 敢治一兵。 ,文燦壻家 法 且文燦辨賊之策曰「先撫後剿」。 遣使招 乎 」,致城市 瑚 賀 賊 也, 蘄水,文燦家園也, 南陽 歸順 空虛,孑遺盡絕 龍,而 戚 汝 里如是,餘可 也。 寧,如履 使者被 天下有 殺,一 無人之境。 如是撫法乎 知矣。 三月至麻城,民不堪淫掠,欲焚其署,始踉 郷里 遣使招李萬慶,而 乃茶山不效,麻城又不效,第見招撫之旗絡繹 如 是,餘 三月在蘄水,其兵殺鄉民報捷。 文燦駐宛、汝已久, , 其一 可 知矣。 切軍 魄鹽椒運 需 是以捷報日張,寇勢愈熾 悉取於所歷之有司, 調度不聞,天下有 魚 肉 與 通市 民家 贼 蹌 環哭, IIII 反 名 因 如 於

非惟 獻 忠 在 不 應,復留解餉之官,求總兵湖廣。 穀 城招納亡命,買馬置器,人人知其叵測。 今已造浮橋跨漢水矣。 文燦顧 欲借之爲前茅, 文燦前旣誇張 遣 而

桂

敍 功,後復掩匿而不報,可不謂之欺君乎!以總理之大柄畀之顚蹶之耄夫。 臣不 ·知其

可也。

帝不納。逮至,下獄。

陽巡撫戴束旻、言「撫軍欲殺我」。 初 ,應桂貽書文燦,言獻忠必反,可先未發圖之。 東曼聞之文燦,文燦再糾應桂。 其書爲獻忠邏者所得,獻忠騰牒鄖 應柱 再疏辨,帝亦 不納。

應桂竟遣戍。無何,獻忠果反,廷臣交章薦應桂。

十六年起應桂兵部右侍郎。 十月,潼關陷,帝召問大臣。 陳演言:「贼入關中, 必戀子

女玉帛、猶虎入陷穽。」應桂叱之曰:「壯士健馬咸出關

西。

賊得之,

必長驅横

行,

大臣安得

面 無餉,入見帝而泣。 謾 」演股栗失色。十一月,督師 帝但遣京軍千人護行,給御用銀萬 孫傳庭戰歿,命應桂兼右僉都御史往代之。 兩、銀花四百、銀牌二百、蟒幣二百、 應桂 以 無兵

雜 幣倍之,爲軍前賞功之用而已。 應桂旣受命,日夜悲疑,將至山西, 則偽官充斥,逡巡不

得前。 帝責 以逗遛,奪職,命新擢陝西巡撫李化熙代之,化熙亦不能進也。 未幾,京師陷,

應桂家居不出。久之,死於難。

高 斗 樞 象先 鄞 人。 崇禎 元年進士。 授刑部主 0 坐議巡撫耿 如 杷 **獄** 與 列 四

人下詔獄。尋復官,進員外郎。

袁州 撫陳睿 至,建 臨 藍、湖 五. 飛樓四 謨 遣 年 遷荆 都 大 湘 征 司 十,大修守具。 間 陳 臨、藍寇、斗樞當 州 土寇螽 上才躡 知府。 起。 其後,賊亦解 久之, 擢 長沙 臨、藍賊艘 南 長沙兵 止老弱 面,大小十餘戰,賊盡 去。 衞卒 備 二百餘,由 尋撃! 副 Ħ. 使。 百, 殺亂賊劉 楚郡之在湖北者,盡罹賊禍 衡、湘 又遣二百戍攸 平。 高 抵 城下。 峰等,撫定餘衆。 韶賚 銀 縣, 相 鸺 拒十餘 城庫 雉 日乃却 詔錄 堞 盡 圮。 ,勢且及 其 去, 功。 湖 轉攻 斗 巡

所併 啓元 榛。 城 善 與張 危 用 獻忠 遣 撫治 其 而 光恩斂 + 復 下 遊 匹 一下亦 擊王光恩及弟光興分扼之,戰 、羅汝才輩爲賊。 王 年六月進按察使, 永 衆,據要害以拒獻忠。 祚 樂爲 以襄陽急,移 之用。 獻忠、汝才降而 斗樞察其誠,招入郡守。 移守 師鎭之。 鄖 陽。 居 久之,乃有 斗樞 鄖被寇 頻捷,賊 復叛,均 至 一甫六日,張獻忠自陝引 且 稍 不 + 稍 州 敢 載,屬邑有六, 當是時,斗樞 犯。 颺去者, 光恩亦去, 已而 五 一營懼 光恩者,均州 見討 自疑。 、啓元善謀,光恩善 居民不 而 降渠小秦 東。 又以獻忠强 ·四千,: 斗樞 復降。 數 主 與 也 百 知 慮 府 光 里 鄖 荆 徐 恩 初

+ 五年冬,李自成陷襄陽、均州,攻鄖陽四日而去。 明年春,復來攻。十餘日不克,乃退

乃令光 屯楊溪。 恩 復 五月, 均州 斗樞召遊擊劉 調元 下光化,躬率 調元入城, 將 士復穀城。 旬日間殺賊三千餘。 將襲襄陽,聞 孫傳庭 自成將來攻, 敗, 旋 師, 卒不克而 均 州 復 去。

賊

有。

不可 達。 存, 亦不能 郭景昌代之,路絕不 而 退。 衆議 往。 至三月始聞太僕之命,卽以軍 達。 當 七年正月,自成遣將路應標等以三萬人攻鄖。 卽 是時,湖南、北十四 任 是年二月,朝議設漢中巡撫,兼督川 斗樞。 能至,中 而 陳演與之有隙,乃擢 朝謂鄖已陷,不復設 郡皆陷,獨鄖在。 事付啓元。 啓元右僉都御史任之, 自十五 七月而北都 北軍務,擢斗樞右 撫治。 年冬,撫治王永祚被逮,連命 斗樞遺人入均州, 十六年夏, 變聞 一,并聞 副 斗樞 加 都 斗 御史以 漢 樞太僕 燒其蓄積, 上請兵 中之命。 往 少卿, 疏 朝 李乾德、 地 始 賊乏食 命亦不 知順 路 阻

後 數 年卒。 福 王 立,移斗樞巡撫湖廣,代何騰蛟。 啓元、光恩亦皆以功名終。 復以道路不通,改用王驥, 斗樞皆不閉也。 國變

張任 學,安岳人。 天啓五年進士。 授太原知縣,以才調楡次。

列

傅

第

百

浙 監 軍討 鹽 崇禎 法,數: 賊 四 條奏利弊。 年 時羣盜縱橫, 舉治行 卓異,入爲御史。 八年,流 而 諸將縮 賊陷鳳陽,詔逮巡按吳振纓,命任 胸不敢擊。 陳獨中私稅、催科、訟獄三大苦,帝爲飭行。 任學慨然曰:「事不辭難,臣職 學往代。 還朝,復按 也。 出 賊勢如 河南 視 兩

此

我輩

可雍容坐鎭耶」

河南 事,爲 創也。 鐫 以 下 及 自强。 秩。 無一官,兵部乃以署鎭許定國兵授之,使參將羅岱爲中軍。 都察院議。 人據塢壁自保者數十,賊悉摧破之,踞息縣、光州,磔人投汝水,水爲赤 十一年二月遂上疏 河南總兵官。 進忠勢衰,佯求撫。 時熊文燦專主撫,劉國能、張獻忠俱降、羅汝才、馬進忠、李萬慶等躪中原如故。 諸臣 以文吏無改武職者,請仍以監軍御史兼總兵事。 河南舊無總兵,左良玉、陳永福並以客兵備援剿,至是大將特設。 極詆諸將。 文燦及巡撫常道立許之,乘問逸去。 請易武階,親執干戈,爲國平賊。 岱,健將, 屢著戰功, 任學倚 事聞,任學與文燦、道立並 帝不從,命授署都督僉 帝壯之,下吏、兵二部 任學不能大 m 飗

里,斬首一千四百有奇,獲黑虎狼、滿天星,賊奔遂平。 七月,任學督岱等赴羅山,合左良玉軍擊汝才、萬慶及紫微星、順義王,大敗之,追奔五 九月,進忠寇開封,至瓦子坡。 岱

列傳第一百四十八 張任學

言官請起廢,任學與焉,未及用而卒。

出 其不 其 八冬,京 意,可立 師戒嚴,任學入衞,道謁文燦,言一獻忠狼子野心,終爲國患,我以勤王爲名, 縛也。」文燦不能用。 抵畿南,有詔 却還。 巡撫道立調良玉兵於陝州 賊乘

盧 破 孔 賊 道 氏 虚 葉 興 縣 一再破 一,遁入內鄉、淅川,爲文燦所劾。 十日日 城陳州 奏八捷。 部將 王應龍、尤之龍等破賊襄城,五戰皆勝。 帝詔所司 核實。 明年除道立名,任學亦鐫一 已,又挫賊裕州。 而是時總兵孫應元、黃得功統 副將岱與應龍、懷智等復 秩。 遊擊宋懷智、 都

京

軍

討

說,屢奏大捷,凱旋錄功,任學亦敍復二秩。

蹶 山,軍乏食。 從。 任 學留汝南。 而復進,乃棄馬步劚。 七月, 尋 與左良玉、陳洪範蹙李萬慶於內鄉。 獻忠合汝才自房縣西走,岱偕良玉追之。 賊伏兵要害,岱與副將劉元捷鼓 川貴總督李若星論文燦主撫之謬,請復任學原官,攝行大將,督察軍事。 久之矢盡,陷於賊, 萬慶方降,獻忠已叛,文燦盡調河南軍援剿,獨 良玉軍亦大敗。 「勇直上,伏四起。岱馬足絓於藤,抽刀斷之, 良玉令岱為前鋒,己隨其後。至羅狹 事聞,任學坐褫職。 十五年,

流賊 之肆毒也, 禍始於楊鶴,成於陳奇瑜,而熾於熊文燦、丁啓睿。 然練國事、鄭

崇儉先罹 其罰,而邵 捷春 、兪應桂 亦或死或戍。 疆場則剿撫乖方,廟堂則賞罰不當,價師玩

寇,賊勢日張,謂非人謀不臧實使之然乎!

#### 校勘記

- 尋出 督 兩 淮 鹽 法 兩淮,明史稿傳一三八楊鶴傳作「兩浙
- 構兵 三十 年 本書卷三一一鳥蒙鳥撒東川鎭雄四軍民府傳作「仇殺者二十年」。
- 殺 八八頁 细 縣 張 五三六五都作「張斗耀」。 耀采 張耀 采,本書卷二二熹宗本紀、 >烹宗實錄卷七七天啓七年三月戊子條、國權卷
- 25 }陵 流 降 賊王 ·寇始終錄卷三都作「黃虎」。 虎 王虎, 崇禎實錄卷三崇禎三年三月條、國権卷九一頁五五四○、綏寇紀略卷一

{懷

- <u> 35.</u> 周任 鳳 明史稿傳一三七陳奇瑜傳、懷陵流寇始終錄卷七作「周仕鳳」。
- . -/< -/-授黄州 推官 黄州、原作「貴州」、據明史稿傳一三七熊文燦傳改
- -: 海 寇鍾 凌秀既降復叛 鍾凌秀,原作「鍾靈秀」, 明史稿傳一三七熊文燦傳作「鍾凌秀」。

文作「凌秀」,據改。

參將夏之本 被宗實錄卷七崇順七年十二月壬寅條、國権卷九三頁五六八三都作「夏之木」。

- [ 1 ] 常德安 明史稿傳一三七熊文燦傳作「常國安」。
- 惟 革 左及馬光玉三部 尙 稽 天誅 馬光 玉, 原作 「馬光裕」, 據本卷鄭崇儉傳附方孔炤傳、 {余 (余 () ()
- 桂傳及明史稿傳一三七熊文燦傳、綏寇紀略卷六改。
- 楊麟 明史稿傳一 三七練國事傳、國権卷九二頁五五九三作「楊麒」。
- 鄕寧人 鄉寧,原作「寧鄉」,據明史稿傳一三七鄭崇儉傳、明進士題名碑錄萬曆丙辰科改。
- 國奇至略陽卒大譟剽瑞王租 略陽,原作「洛陽」,綏寇紀略 卷六、懷陵流寇始終錄 卷 一二都作

略陽」。 按瑞王封國在漢中府、略陽其屬縣,亦李國奇應援入蜀道經之地,據改。

尚文及安綿副使吳麟徵大破賊過天星等

安綿副使,原作「安錦副使」,

據明史稿傳一三七邵

- 吳麟徵,同 捷春傳改。 上明史稿作「吳麟瑞」。 按本書卷七五職官表按察司屬整飭兵備道在四川者有「安綿道」,無「安錦道」。 按本書卷二六六有吳麟徵傳,事蹟與此異。
- 二吾 思岱譖殺茂選 **踏殺、原作「潛殺」、據明史稿一三・己邵捷春傳改。**
- 淨壁 明史稿傅 \_\_\_ 三七邵捷春傳作「淨壁」,國権卷九七頁五八七六、 懷陵流寇始終錄卷一三

作「淨堡」。

列

傳

第

Ħ

四

+

八

校

勘記

降將張一川 **綏寇紀略** 卷七、懷陵流寇始終錄卷一三、明史紀事本末卷七五改。 張一川,原作「張一州」,據明史稿傳一三七邵捷春傳、 國権卷九七頁五八八〇、

## 明史卷二百六十一

## 列傳一百四十九

盧象昇 弟象晉 象觀 從弟象同 劉之綸 丘民仰 丘禾嘉

盧象昇,字建斗,宜興人。祖立志,儀封知縣。象昇白皙而臞,膊獨骨,負殊力。

舉天

啓二年進士,授戶部主事。歷員外郎,稍遷大名知府。 崇順二年,京師戒嚴,募萬人入衞。明年進右參政兼副使,整飭大名、廣平、順德三府

兵備,號「天雄軍」。又明年舉治行卓異,進按察使,治兵如故。

象昇雖文士,善射,嫺將略,

能治軍。

賊。 之武安。 賊走還西山, 圍遊擊董維坤冷水村。 象昇設伏石城南, 大破之。 又破之青龍岡, 又破 六年,山西賊流入畿輔,據臨城之西山。 連斬賊魁十一人,殲其黨,收還男女二萬。三郡之民,安堵者數歲。 象昇擊卻之,與總兵梁甫、參議寇從化連敗 象昇每臨陣,

列

傳第

百四四

十九

盧象

昇

六七五九

僕夫斃馬下,象昇提刀戰益疾。 身先士卒, 賊懼,南渡 與賊 格鬭,刃及鞍勿顧, 贼駴走,相戒曰:「<u>盧廉</u>使遇卽死, 失馬 即步戰。 逐賊危崖, 賊 自巓射中象昇額, 不可犯。」象昇以是有 文一矢

兵名。

河

兵,減稅賦,繕城郭,貸鄰郡倉穀,募商採銅鑄錢,鄖得完輯 山、太平河、竹木砭、箐口諸處,連戰皆捷,斬馘五千六百有奇,漢南 者駐鄖之黃龍 明 年, 贼 入楚,陷鄖陽六縣。 灘。 象昇與總督陳奇瑜分道夾擊,自烏林關、乜家溝、石泉壩、康寧坪、獅子 命象昇以右愈都御史,代蔣允儀撫治 寇幾盡。 鄖陽。 時蜀寇 因請益 順主 返楚

111 口。 衄 迎 營百 四 西 祥、李自成 Щ 諸 以是 里, 、陝西 軍務、兼湖廣 八年五 將 勢甚盛 率畏 得將 軍務,賜尙方劍,便宜行事。 月耀象昇右副都御史,代唐暉巡撫湖廣。八月命總理江北、 走, 城 不 心 陷光 巡撫。 象昇督副將李重鎭、雷 一、戦

「戦

「 敢前。 州, 總督洪承疇辦西北,象昇辦東南。 象昇復 象昇 功。 毎 大破 慷慨灑泣,激以忠義。 之確 汝、洛告警,象昇倍道馳 時聲等擊高 Щ 先是, 迎祥 大帥 軍中嘗絕三日餉,象昇亦水漿不入 於城 曹文詔 尋解巡撫任,進兵部侍郎 入汝。 西,用 、艾萬 强弩 贼部衆三十餘萬,連 年陣亡,尤世成以 河南、山東、湖廣 射 殺 賊干餘 ,加督

九年正月大會諸將於鳳陽。 **像昇乃上言曰:「戝横而後調兵,** 賊多而 後增 兵, 是爲後

士

有

兵屬 以 刨 請之兵皆 局 求全責備。 水 總督 援 兵至 水湖。 一,薊 而 賊黨,所用 後議餉,兵集而後請餉,是爲危形。 、遼、關、寧之兵屬總理」。 不 雖有長材,從何展布。「臣與督臣,有剿法無堵法,有戰法無守法」。 應則吳、越也,分應則何以支」。 之餉皆盜 糧也。」又言「總督、總 又言「各直省撫臣,俱有 況請餉未敷,兵將從賊 又言臺一碗諸臣,不 理宜有 ·專兵· 、專餉。 封疆重任。 問難易,不顧 而爲寇,是八年 請調 毋 咸寧、甘 得一有賊 言皆切 死 生,專 固 來所 中 警

機宜

雷 阻 州,而躬率諸軍蹙賊。 曹、單 昇合寬、大樂、岱兵大破之七頂山 邀擊之,賊乃北向開封。 關山 滁州 漢江 聲由 ,積屍塡溝 ,大戰於城東五里橋,斬賊首搖天動,奪其駿馬。賊連營俱潰,逐北五十里。 於是迎祥圍廬州,不克,分道陷含山、和州, 可 總兵劉澤淸拒河, 南漳 戦殲 穀 委塹,滁水爲不流。賊乃北趨鳳陽, 城入山擊賊。 也。 遣使告湖廣巡撫王夢尹、鄖陽撫治宋祖舜曰:「賊疲矣,東西 兩人竟不能 陳永福敗之朱仙鎭,賊遂走登封,與他战合, 乃掠考城、儀封 寬等騎軍, ,殲自成精騎殆盡。 禦, 賊遂自光化 而 不利阻隘,副將王進忠軍譁、羅岱、劉肇基 西。 其犯亳者,折入歸德。 進圍滁州。 潛渡漢入鄖。 圍壽州,突潁、霍、蕭、陽、靈壁 已, 次南陽, 象昇率總兵祖寬、遊擊羅岱救 象昇遣總兵秦翼 令大樂備汝寧,寬備鄧 分趨裕州、 永寧總兵官祖大樂 朱龍橋 南陽 明、副 邀擊,前 、虹,窺 兵多 至

漳,環 洶 在秦、楚、蜀之交萬山 逃,追之則彎弓內嚮。象昇乃調四川及筸子土兵,搜捕均州賊。 洶 山皆賊。七月,象昇渡淅河 承疇、 象昇議,關中平曠,利騎 中, 象昇自南陽趨襄陽進兵。賊多兵少, 而南。 兵, 九月追賊至鄖西 以寬、重鎭軍入陝。 而 而襄陽、均、宜、穀、上津、南 是時,楚、豫賊及迎祥等俱 河南 大饑,餉乏, 邊兵益

遷兵部左侍郎,總督宣、大、山西軍務。 師戒嚴,有詔 入衛,再賜尙方劍。 大興屯政、穀熟、畝一鍾、積粟二十餘萬。 旣行,賊遂大逞,駸駸乎不可復制矣。 旣解嚴, 天子諭 詔

九邊皆式宣、大。

鏖戰。 嗣昌奪 擊。」哨知三十六營離牆六十里,潛召雲師西來,宣師東來,自督兵直子午,出羊房堡,計 入耳。」 目 明 ·情任· 乞炭聞之遂遁。 年春,聞宣警,即夜馳至天城。矢檄旁午,言二百里外乞炭馬蹄闊踏四十 因機震、晉兵勿動,自率師次右衞, 中樞,亦起陳新甲制中,而令象昇席喪候代。 象昇在陽和,乞炭不敢近邊。 戒邊吏毋輕言戰。持一月,象昇曰:「懈矣, 五月丁外艱,疏十上,乞奔喪。 進兵部尚書。 新甲在遠,未即 牛蘭。 則彼 里。 時楊 乘虚 象昇 至。 召 可 日

宣、大、山西三總兵楊國柱、王樸、虎大威入衞。 九月,大淸兵入牆子嶺、靑口 Щ ,殺總督吳阿衡,毀正關,至營城石匣,駐於 三賜象昇尚方劍,督天下援兵。 象昇麻衣

監中官高起潛亦衰経臨戎,象昇謂所親曰:「吾三人皆不祥之身也。人臣無親,安有君。樞 傷,潰亂五官,非復昔時,兼以草土之身踞三軍上,豈惟觀瞻不聳,尤虞金鼓不靈。」已聞總 輔 草履,誓師及郊。馳疏報曰:「臣非軍旅才。愚心任事,誼不避難。但自臣父奄逝,長途慘 :奪情,亦欲予變禮以分譽耶?處心若此,安可與專君。 他日必面責之。」

請分兵,則議宣、大、山西三帥屬象昇,關、寧諸路屬起潛。象昇名督天下兵,實不及二萬。 次順義。 鐵鞭五百。象昇曰:「果然外廷議也,帝意銳甚矣。」決策議戰,然事多爲嗣昌、起潛撓。疏 毋浪戰,遂別去。師次昌平,帝復遣中官齎帑金三萬犒軍。明日又賜御馬百,太僕馬千,銀 廷議耳,其出與嗣昌、起潛議。」出與議,不合。明日,帝發萬金犒軍,嗣昌送之,屏左右,戒 不幸,寧捐驅斷脰耳。」及都,帝召對,問方略。對曰:「臣主戰。」帝色變,良久曰:「撫乃外 當 是時,嗣昌、起潛主和議。象昇聞之,頓足歎曰:「予受國恩,恨不得死所,有如萬分

曰:「公直以尙方劍加我矣。」象昇曰:「旣不奔喪,又不能戰,齒劍者我也,安能加入。」嗣昌 弱,子不聞城下盟春秋恥之,而日爲媾。長安口舌如鋒,袁崇煥之禍其能免乎。」嗣昌頰赤, 先是,有瞽而賣卜者周元忠,善遼人,時遣之爲媾。會嗣昌至軍,象昇責數之曰:「文 象昇卽言:「元忠講款,往來非一日,事始於薊門督監,受成於本兵,通國聞之,誰可

第一

百四十

九

蒧

昇-

之。當是時,象昇自將馬步軍列營都城之外,衝鋒陷陣,軍律甚整。 諱也。」嗣昌語塞而去。又數日會起潛安定門,兩人各持一議。 新甲亦至昌平,象昇分兵與

關,王樸徑引兵去。 書,侍郎視事。命大學士劉宇亮輔臣督師,巡撫張其平閉闡絕餉。俄又以雲、晉警,趣出 **秉成,宗澤殞恨。** 進據保定,命諸將分道出擊,大戰於慶都。 大清兵南下,三路出師一由淶水攻易,一由新城攻雄,一由定興攻安肅。 國有若人,非封疆福。」嗣昌大怒,改廷麟兵部主事,贊畫行營,奪象昇尚 編修楊廷麟上疏言:「南仲在內,李綱無功;潛善 象昇遂由涿

夕死矣, 角,經數十百戰未嘗衄。 萬,孰與隻臂無援,立而就死哉!]象昇泫然流涕而謂父老曰:「咸父老義。 義師。三郡子弟喜公之來,皆以昔非公死賊,今非公死兵,同心戮力,一呼而裹糧從者可十 歸之心。 明公出萬死不顧一生之計爲天下先。乃奸臣在內,孤忠見嫉。三軍捧出關之檄,將士懷西 象昇提殘卒,次宿三宮野外。 無徒累爾父老爲也。」衆號泣雷動,各攜牀頭斗栗餉軍,或貽棗一升,曰:「公養 棲遲絕野,一飽無時。 今者,分疲卒五千,大敵西衝,援師東隔,事由中制,食盡力窮,旦 脱巾狂噪,雲帥其見告矣。明公誠從愚計,移軍廣順,召集 畿南三郡父老聞之,咸叩軍門請曰:「天下洶洶且十年, 雖然,自予與賊

爲糧。」

半,觱篥聲四起。 廷 麟往乞援,不應。 十二月十一日進師至鉅鹿賈莊。 旦日,騎數萬環之三匝。象昇麾兵疾戰,呼聲動天,自辰迄未,礮盡矢窮。 師至蒿水橋, 遇大清兵。 起潛雅關、寧兵在雞澤,距賈莊五十里而近, 象昇將中軍,大威帥左,國柱帥右,遂戰。 象昇遺 仮

奮 上,背負二十四矢以死。僕顧顯者殉,一軍盡覆。大威、國柱潰圍乃得脫。 身鬭,後騎皆進,手擊殺數十人,身中四矢三刃,遂仆。掌牧楊陸凱懼衆之殘其屍而伏其

追諡 嗣昌故靳之,八十日而後殮。明年,象昇妻王請恤。又明年,其弟象晉、象觀又請,不許。 網巾。一卒遙見,卽號泣曰:「此吾廬公也。」三郡之民聞之,哭失聲。順德知府于穎上狀,曰 久之,嗣昌敗,廷臣多爲言者,乃贈太子少師、兵部尚書,賜祭葬,世廕錦衣千戶。 福王時, 忠烈,建祠奉祀。 起潛聞敗,倉皇遁,不言象昇死狀。嗣昌疑之,有詔驗視。廷麟得其屍戰場,麻衣白

起,立行之。暇卽角射,箭啣花,五十步外,發必中。愛才惜下如不及,三賜劍,未嘗戮一 象昇少有大志,爲學不事章句。 居官勤勞倍下吏,夜刻燭,雞鳴盥櫛,得一機要,披衣

文率募兵至差,巡撫王夢尹以擾驛聞。 高 平知縣侯弘文者,奇士也,僑寓襄陽,散家財,募滇軍隨象昇討賊。 **象昇上疏救,不得,弘文卒遣戍。天下由是情弘文** 象昇移宣、大,弘

列傳

百

四十

九

虚

而多象昇。

象昇好畜駿馬,皆有名字。 嘗逐賊南漳,敗。追兵至沙河,水闊數丈,一躍而過,即所

號五明驥也。

方象昇之戰歿也,嗣昌遣三邏卒察其死狀。其一人愈振龍者,歸言象昇實死。 嗣昌怒,

鞭之三日夜,且死,張目曰:「天道神明,無枉忠臣。」於是天下聞之,莫不欷歔,益恚嗣昌矣。

其後南都亡,象觀赴水死,象晉爲僧,一門先後赴難者百餘人。從弟象同及其部將陳

安死尤烈。

**象觀,崇禎十五年,鄉薦第一,成進士。官中書。** 象晉、象同皆諸生。

象昇死時,年三十九。

學書,銘其座曰「必爲聖人」。 劉之綸,字元誠,宜賓人。 里中由是號之綸劉聖人。 家世務農。 之綸少從父兄力田,問艾薪樵,賣之市中。 天啓初,舉鄉試。 奢崇明反,以策 歸而

干監司扼賊歸路、監司不能用。

崇禎元年第進士,改庶吉士。 與同館金聲及所客申前三人者相與為友,造單輪火車、

偏廂車、獸車、刳木爲西洋大小礮、不費司農錢。

副 尙 書閱夢得協理京營戎政。 帝大悅,授甫京營副總兵,資之金十七萬召募,改聲御史,監其 明 年冬,京 師戒嚴。 聲上書得召見,薦之綸 於是之綸賓賓以新進驟躋 及前。 帝立召之綸、甫。 卿貮 矣。 軍,授之綸兵部右侍郎, 之綸言兵,了了口

乎? 壩上。 鄉,還至盧溝,夜殺甫一軍七千餘人,黎明掩殺大帥滿桂、孫祖壽,生擒黑雲龍、麻登雲以 召募得萬人,遂行。抵通州,時永平已陷,天大雨雪。 之綸 初 今年當 下, 正 二十日薄都城,自北 曰:「元日之言驗矣。」請行,無兵,則請京營兵,不許,則請關外川兵,不許,則議召 月元日有黑氣起東 、喋血京城下,可畏也。」聞者皆笑。及冬十一月三日,大清兵破遵化。 而西。 北亙西方。 都人從城上望之,如雲萬許片馳風,須 甫見之大驚,趨語之綸、聲曰:「天變如 之綸奏軍機、七上、不報。 臾已過。 此,汝知之 十五五 逐克良 H 至

薊。 由 爲後圖。 三屯營, 石 門至白草頂,距遵化八里娘娘山 之編 明 年正月,師次薊。三當是時,大淸兵蒙古諸部號十餘萬,駐永平,諸勤王軍數萬在 驍騎三萬,望見山上軍,縱擊之。之綸發礮,礮炸,軍營自亂。 功 之綸叱曰:「毋多言!吾受國恩,吾死耳!嚴鼓再戰,流矢四集。 與總兵馬世龍、吳自勉約,由薊趨永平,牽之無動,而自率兵八路進攻遵化。 而營,世龍、自勉不赴約。二十二日,大淸兵自永平趨 左右請結陣徐退,以 之綸解所佩印付

以齒嚙之出,以授其家人。

家人,「持此歸報天子」,遂死。 一軍皆哭,拔營野戰,皆死之。尸還,矢飲於顱,不可拔。

耳。乞削臣今官,賜骸骨。」不許。及戰死,天子嘉其忠,從優卹,贈兵部尙書。震孟止之 中,御史董羽宸劾其行留。之綸曰:「小人意忌,有事則委卸,無事則議論,止從一侍郎起見 返柩,請於朝,給驛還。久之,贈尚書。後十五年,聲死難。 曰:「死綏,分也,侍郎非不尊。」遂不予贈,賜一祭半葬,任一子。」之論母老,二子幼,貧不能 抑之。震孟使人諷之,謂宜辭侍郎而易科銜以行,不聽。旣行,逗州守者不納,雨雪宿古廟 初,講官文震孟入都,之綸、聲往見之。震孟敎以持重。之綸旣受命視師,驟貴,廷臣

河齧,歲旱蝗,爲文祭禱。河他徙,蝗亦盡。調繁保定之新城 丘民仰,字長白,渭南人。萬曆中舉於鄉。以教諭遷順天東安知縣,釐宿弊十二事。

余大成、孫元化皆主撫。流賊擾山西,巡撫宋統殷下令,殺賊者抵死。民仰先後疏論其非, 擢 御史,號敢言。時四方多盜,鎭撫率怯懦不敢戰,釀成大亂。 崇禎二年,縣被兵,晨夕登陴守。 四方勤王軍畢出其地,民仰調度有方,民不 吳橋兵變,列城多陷,巡撫 知擾。

後皆 如民仰言。 遭妻喪,告歸。 出爲河間 知府、遷天津 副使,調大同, 監軍汝寧,遷永 平右

參政,移督寧前 兵備 民 仰善理 劇 ,以故所移皆要 地

科等五 州被圍 副都 兵 寧遠、關 承疇降,乃 不至,芻糧竭。 七月,師次乳峰 民 御史,官爲 十三年三月擢 仰轉餉、未發。 將皆潰。 ,塡壕毁塹, 門 勁旅 營葬,錄其一子。 盡喪。 ,去錦州五六里 至明年二月,且半年矣。 大清兵掘松山 右僉都御史,代方一 聲援斷絕。 帝憂之。 事 聞,帝驚悼甚,設壇都城、承疇十六,民仰六,賜祭盡哀 ,斷我 而營。 朝議 有傳其帥祖大壽語者。「逼以車營,毋輕戰。」總督洪承 尋命建祠都城外,與承疇並列, 兩端。 歸路, 旦日 藻巡撫遼東,按行關外八城,駐寧遠。 城破,承疇降,民仰死 ,楊國柱之軍潰。 遂大敗,蹂躪殺溺無算, 命郎 中張若麒就行 踰月, 一若麒 營計 帝將 王樸 議 退保松山 跳從海 親臨祭焉。 若麒 軍亦潰。 上蕩 至, 十四 則 漁 圍 贈 將祭, 未幾, 急,外援 趣 年春,錦 舟 民仰 進 而 疇集 還, 師 聞 馬 右

協擒其 丘 黨 何 貴州新添衛人。 中 蔚。 選祁門教諭 舉萬曆四十一年鄉試,好談兵。 , 以 貴州巡撫蔡復 一請,遷翰 林待詔 天啓時, 参復 安邦彦反, 一軍。 捐 資

止。

崇禎元 年有 薦其 知 兵者,命條 上方略。 帝稱善,卽授兵部職方主事。 三年正月,薊遼

仰

承宗 令 叉 通 總督梁 關 副 |参將 門 將 在 聲 關 廷 何 援 棟 曹文詔 門  $\overline{\Pi}$ 綱、張 入主中 殌 聲 軍 息 等轉戰,抵遵化 洪謨、金國奇、劉 文 阻 樞 開 絕。 新衡 平。 薊 總 理馬 二月,大清 遼 總 督 世 而 光祚 張 返。 龍遠節 鳳 兵來攻,禾嘉 翼 無 等迎戰 未至 何,四 制,命禾嘉監紀其軍。 城皆復 而 抵 變 順 力拒 州 天 巡 守 無方大 甫還 ', 乃引 , 而 去。 任 時 大清兵復 老病 永 已,分 平 四 不 能 城 略古治鄉 攻牛門、水 軍 失 守, , 惟 樞 禾 嘉 輔 議 採

「右屯 海 河 用 將 僉 島 都 主之,於是有大凌築城 而 赴 H 居 六十 兵復 寧遠 救 御 一城已際,修築而 敵 史, 城城 自畢 里,陸運 廣寧、義州、右屯。 難 獲 巡 陸 全。 撫 自 運。 其 肅 難 登萊巡撫孫元化 地, 遇 而 o と害、遂 後可守。 義州 兼 右 (轄山 Ź 屯之後卽海、據此則糧 議 地 廢 廷棟 巡 海 偏,去廣寧遠,必 築之,敵 撫官, 關 慮 諸 議徹島 其難 處。 以 經略 以以 必至,必復大、小凌河, 禾嘉 上兵 咨承宗。 兼之,至是 於 先據右屯,聚兵積粟,乃可 初 可給,兵 關 涖 鎭, 外 承宗 規復 大清 可聚,始得爲發軔地。」 議復設。 上奏曰:「廣寧去 廣寧及金、海、蓋三衛 兵以二萬騎 以接松、杏、錦州。 廷棟力推禾嘉才,超 童 漸 錦州。 海 逼 廣寧。」又言: 百 奏入,廷棟 八十里,去 禾嘉. 禾嘉 錦 層諸 拜右 州 議 繞

改禾嘉他職。 會不 嘉託 祖 匹 年五月命調南京太僕卿,以孫穀代。 大壽,大壽亦 發其贓私。 承宗不欲以武將去文臣,抑使弗奏,密聞 製未至,部機促城甚急。 大壽以兵四 於朝

廷棟罷 千據其地,發班軍萬四千人築之,護以石砫土兵萬人。 去。 廷議大凌荒遠不當城,撤班軍赴薊,責撫鎭矯舉, 禾嘉往視之,條九議以上。 令回奏。 禾嘉懼,盡撤防兵, 工垂成,

留班軍萬人,輸糧萬石濟之。

震駭。 飭 爲大凌聲援。 襄、偉出戰不勝,乃入城。二十四日,監軍張春會襄、偉兵,過小凌河東五里,築壘列 中 留治中。 里莊,亦不勝。 與大淸兵遇,大戰長山、小凌河間,互有傷損。 人俱被執,副將張吉甫、滿庫、王之敬等戰歿。 而 兵出,悉敗還。 E 八月,大清兵抵城下,掘濠築牆,四面合圍,別遣一軍截錦州大道。 孫穀代禾嘉,未至而罷, 及是聞敗,移駐松山, 大清兵扼長山,不得進。禾嘉遣副將張洪謨、祖大壽、靳國臣、孟道等出戰五 夜趨小凌河,至長山 禾嘉聞之, 馳入 圖再舉,言官以推委詆之。帝以禾嘉獨守松山,非卸貴,戒 改命謝璉。 錦州,與總兵官吳襄、宋偉合兵赴救。 接戰、大敗。春及副將洪謨、楊華徵、薛大湖等三十三 璉畏懼,久不至。 大壽不敢出,凌城援自此絕。 九月望,大清兵薄錦州,分五 後兵事亟,召璉駐關 離松山三十餘里, 城外堠臺皆下,城 敗書聞,舉朝 隊 直抵 外、禾嘉 車營, 城 **T** 

壽 殺 大凌 可綱,與副 糧盡食人馬。 將張存仁等三十九人投誓書約降。 大清屢移書招之,大壽許諾,獨副將可綱 是夕出見,以妻子在錦州, 不從。 十月二十七日,大 請設計誘降

列

傳

第

百

四十

九

丘民

仰

請死。 清所有,城亦被毁。十一月六日,大清復攻<br />
杏山 壽入錦州,未得間,而禾嘉知其納款狀, 發 錦 兵往 州 守將 於是言官交刻,嚴旨飭禾嘉。 迎。 加 適大壽僞逃還,遂俱入錦 留諸子於大清。 禾嘉聞 而 州 大凌城礮聲,謂大壽得脫,與襄及中官李明臣、高起 具疏 帝於大壽欲羈縻之,弗罪也。 大凌城 聞於 朝。 人民 明 '商旅三萬有奇,僅存三之一,悉爲 日攻中左 因初奏大壽突圍 所。 城上 田 用礮擊,乃退。 前後不讐,引罪

詆諆。 以愈都御史巡撫山 陳病狀,乃命歸田 標 兵。 新撫璉已至,禾嘉猶在錦州。 旣遭喪敗,廷論益不容,遂堅以疾請。 御史宋賢詆其諂附中 ,未出都卒。 海、永平。 人, 尋論築城召釁罪,貶二秩,巡撫如故。 帝怒, 會廷議 貶賢三秩。 Щ 海別設巡撫、詔罷璉,令方一 五年四月詔許還京,以楊嗣昌代。 禾嘉持論每與承宗異, 禾嘉請為監視中官 藻撫寧遠,禾嘉 不爲所喜,時 令其妻代 有 設 仍

十人"丘民仰、宋一 明 世 舉於鄉 而仕至巡撫者,隆慶朝止海瑞,萬曆朝張守中、艾穆。 鶴、何騰蛟、張亮以忠義著,劉可訓以武功聞,劉應遇、孫元化、徐起元皆 莊烈帝破格求才,得

以勤勞致位,而陳新甲官最顯。

人實爲之,要之亦天意也。。盧象昇在莊烈帝時,豈非不世之才,乃困 贊曰:危亂之世,未嘗乏才,顧往往不盡其用。 用矣,或掣其肘而驅之必死。 抑之以至死,何耶!至 若是者,

忠義激發,危不顧身,若劉之綸、丘民仰之徒,又相與俱盡,則天意可知矣。

#### 校勘記

順德知府于穎上狀 于穎,原作「于潁」,據明史稿傳一三九盧象昇傳、懷宗實錄卷十一崇禎十

一年十二月丁未條、國權卷九六頁五八二七改。

時永平已陷天大雨雪之綸奏軍機七上不報明年正月師次薊 平之陷爲崇禎二年事。按三年正月甲申,永平陷,見本書卷二三莊烈帝紀、懷宗實錄卷三、國 明年,承上文爲崇禎三年, 則

推卷九一頁五五一二,是「明年正月」四字應在永平陷前。

# 明史卷二百六十二

### 列傳第一百五十

傅宗龍 汪喬年 張國欽等 楊文岳 傅汝為等 孫傳庭

傅宗龍,字仲綸,昆明人。 久之,授御史。 萬曆三十八年進士。 除銅梁知縣,調巴縣,行取,入為戶部

千鍾。 生平,非臣敵。 妻及其黨尹二。 廣退怯總兵薛來胤。 **國貴陽,土寇蜂起。** 天啓元年,遼陽破,帝下募兵之令,宗龍請行。 爲霑益、羅平患者,賊婦設科及其黨李賢輩。 臣願 困安南,據關索嶺者,沙國珍及羅應魁輩。 以四川巡按兼貴州監軍,滅此羣醜。」帝大喜,下所司議。 帝多採納之。 請發帑金濟演將士,開建昌,通由蜀入滇之路,別設偏沅巡撫,罷湖 又上疏自請討賊,言三爲武定、尋甸患者,東川土會祿 一月餘,得精卒五千。 攻圍普安,爲滇、黔門戶患者,龍文治 困鳥撒者,安效良。 明年,安邦彦反, 會宗龍以疾 臣皆悉其

列

傳第

百五五

+

傅宗

韬

六七七五

歸,不果行。

逆 存仁、 諸 制 可之。 將 監 順 諸將 將 袁善及 軍 用 四 命, 善, 宗龍 年正 ,文武不 初 土 連破 勇怯。 以名 部 乃條 官普名聲、沙 月, 檄 賊 和 滇 聲等土 貴州 上方略, 汪家沖、蔣義 ,進退牽制 巡撫蔡復一倚信 撫閔洪 巡撫王三善爲降賊陳其愚所給, 兵 七百 叉備 學援點,以不 如 玉等以兵五千送之。 入入 陳黔中艱苦, 寒,直 宗龍反其所爲,令監軍 之,請 貴陽,擒斬其愚。 抵 能 織 過 敕宗龍專 金 盤江 請 大 而 宗龍 發餉金, 理軍務, 設中 止 軍 敗歿。 給芻糧,覈 直 宗龍 良 渡盤江 大快。 亦報 既被 其夏卽 可。 , 軍 宗龍 命 戰 功罪,不 旗 初, E. 洪學 家 鼓 摅 行, 起宗龍巡按 三善 知黔中要害及土 裨將 令參 寇悉 得專進止 一个監 政謝 以下 破。 軍 其 聽賞罰, 存 乃謝 道臣節 仁、參 地, 由 是 遣 兼

復 駐 任 霑益 一新敗, 則不 五 年正 能 黔撫駐陸廣、沅撫駐偏 合滇、蜀兵。 **令解官**, 月, 總理魯欽敗績於陸 卽 以變元代, 請召還朱燮元,以復一兼督 橋 廣河 而 四面 命 尹同 並 宗龍 進, 皐撫蜀 上言:「不合滇、蜀,則黔不能平賊;不 發餉二 四 王瑊撫黔,沅撫閔夢得 百 川,開府遵義,而 萬 金給之。 更設 移蜀 L 監 、 蜀 撫駐 移鎭, 巡撫。」 永寧,滇 專總督 帝 如宗 以 撫

陸 廣敗後,諸苗復蠢動。 復一、宗龍謀,討破烏粟、螺螂、長田諸叛苗,大破平越賊,毀

其砦 百七十,敗黨漸 孤。 宗龍乃條上屯守策,言:

河,奪賊所恃。 則塞以 緩急與相 賊耕耨 蜀 木石, 以屯 時,頻出奇兵,渡河擾之。 助。 爲守,黔則當以守爲 使一粟不入水內, 賊有外藩, 然後撫剿諸 我無邊蔽, 種,隨渡口大小,置大小 一賊不出水外,賊 屯。 賊不敢附河而居,而後我可 黔兵所 以分力愈詘。 無如 ·秦,深溝高壘,置烽墩礮臺。 我何。 臣謂以守爲屯者,先發兵據 以議 又令沿河 屯 龍仲、 也 兵習 蔡苗 1水戰) 諸 雑 小 種, 渡

自實。 小 無田 年 , 如 ,爲官高下,自指揮至總、小旗,畀以應得 屯之策有二:一曰淸衞所原 此而後賊 患無人。 臣所謂以守為屯者如 客兵聚散無常,不能 可 盡滅 也。 此。 田, 然兵當用四萬八千人,餉當歲八十餘萬,時 人駐。 日 割逆賊故壤,而 田為 莫若做祖 世業,而 制 禁其 盡舉 以衞 私賣買。 屯 所之法行之。 田以 授 不待招 有功。 蓋黔不忠 深, 戶 當 因 閱 功

大

口

部 議從之。

黔震動,變元遠在蜀,瑊 年三月大舉渡河入寇。 復 一卒,王瑊代,事悉倚辦。 宗龍擊破邦彥趙官屯,斬老蟲添,威名大著。 擁虛位,非宗龍,黔幾殆。 宗龍乃漸剪水外逆黨,將大興屯田。 韶加太僕少卿。 憂 歸 當是時,大帥新亡,全 邦彦懼,謀沮之。六

三年起 故官 用 孫承宗薦, 擢右僉都御史, 巡撫順天。 未幾,拜兵部右侍郎兼愈

都御史、總督薊、遼、保定軍務。

昌以 不久輒 也?」自 十二年五 卵當 使宗龍 權詭得 用 1整理 是所 遷 小故奪官矣,居久之, 撫蜀, 一月以 去。 兵 主 奏請,多中格 事 知。 楊 八月至京,入見帝。 賊安至是哉 爾 嗣昌 宗龍樸忠,初入 旣退, 薦,召爲兵部尙書,去蜀。 語嗣昌 趣卽 + 年十月流寇大入蜀,陷蜀三十餘州縣,帝拊髀而 家 見, 宗龍爲人伉直任氣, 日 起宗龍。 即言民窮財盡。 「何哉? 宗龍 宗龍善策點, 宗龍 至蜀, 自定點亂後,凡十 不能從諛 帝頗然之,顧豤言不已, 代王維章 而 所言卑卑, 承意。 與總兵羅尚 有 帝憤中 四 皆他 年 輒 人 樞 遂 文 思宗 唾 失 起 佛 禦 餘, 職 用 然 刦 龍 賊。 何 嗣 用

期十二月成 所, 臣請收勢險節 熊 文燦既罷 功。」 因 短之效。 薦 宗龍乃言: 湖廣巡撫方孔炤堪代文燦。 總理 「向者賊流突東西,嗣昌故建分剿之策。 止轄楚、豫,秦督 兼轄四 帝不 ·用,用 Jij ,鳳督兼轄安慶, 嗣 昌 督 師 今則流突者各 各率所轄 撫 止其

效, 怯, 宗 龍 以氣凌廷臣 嗣 目 不卽覆。 既督 師 帝遂發怒,責以抗旨, 上 會薊遼總督洪承疇請 章請兵食,不悉應, 用劉肇 劾 令對狀。 中樞 基為 不 奏上,復以戲視封疆下吏。 任。 團 練總兵官, 宗龍 亦 劾 嗣 中 昌徒耗敝 官高 起潛 國家,不 法司 又揭肇基 擬戍邊, 能

曰:「撲忠,吾以夙負用之,宜盡死力。」遂釋之出獄,以兵部右侍郎兼右僉都御史代丁啓睿, 不許,欲置之死。在獄二年矣,十四年春,嗣昌死,尚書陳新甲薦其才,帝未有以應也,良久

帝命宗龍專辦自成。議盡括關中兵餉以出,然屬郡旱蝗,已不能應。 當是之時,李自成有衆五十萬,自陷河、洛,犯開封,羅汝才復自南陽趨鄧、淅,與合兵。

總督陝西三邊軍務。

騎覘賊,還報曰:「賊向汝矣,結浮橋將渡矣。」宗龍、文岳夜會諸將於龍口,詰朝將戰。 浮橋於上流,將趨汝寧。覘兩督兵至,盡伏精銳於林中,陽驅諸賊自浮橋西渡。人龍使後 虎大威將保兵、共結浮橋、東渡汝、合兵趨項城。五日、兩軍畢渡、走龍口。自成、汝才亦結 九月四日以川、陝兵二萬出關,次新蔡,與保督楊文岳兵會。賀人龍、李國奇將秦兵,

龍、大威奔沈丘,國奇從之,三帥師潰。宗龍、文岳合兵屯火燒店,賊以步兵攻其營。諸軍 伏甲並出搏我兵。人龍有馬千騎不戰,國奇以麾下兵迎擊之,不勝。秦兵、保兵俱潰,人 鳴大礮,震死賊百餘。 乏矣,詰朝而戰,止兵爲營。」諸軍弛馬甲,植戈錞,散行墟落求芻牧。賊覘之,塵起於林中, 分渡其二矣。」宗龍、文岳曰:「驅之。」走三十里,至於孟家莊,日卓午。人龍、大威曰:「馬力 六日,兩軍並進,中道一騎馳而告曰:「賊畢渡矣。」復進,一騎馳而告曰:「賊半渡矣,三 日暮,賊引去。宗龍軍西北,文岳軍東南,畫塹而守。保兵宵潰,保

列

督副將挾文岳 騎 而 馳,夜奔於項城。 宗龍復分秦兵立營於東南,諸將分壁當 賊

麾下 實,卽文岳壁穿塹築壘以拒賊。 曰三宗龍老矣,今日陷賊中,當與諸軍決一死戰,不能效他人捲甲走也。」召裨校李本 九 日,檄人龍、國奇還兵救,二帥 賊亦穿壕二重以圍之。 不應。 宗龍曰:「彼避死,宜不來,吾豈避死哉 门語其

營,殺千餘人,潰圍出。 忠矣。」復官兵部尙書,加太子少保,諡忠壯,廕子錦衣世百戶,予祭葬。 賺城以緩死哉 督也,不幸墮賊手,左右皆賊耳。」 賊 八里,賊追及之,執宗龍,呼於門曰:「秦督圍隨官丁也,請啓門納秦督。」宗龍大呼曰:「我 日,營中火藥、鉛子、矢並盡。 十一日,秦師食盡,宗龍殺馬騾以享軍。 ! 賊抽刀擊宗龍,中其腦而仆,斵其耳鼻死城下。 諸軍星散,宗龍 宗龍簡士卒,夷傷死喪之餘,有衆六千。 唾宗龍。 徒步率諸軍且戰且走。 明日 宗龍罵賊曰:「我 ,營中馬騾盡,殺賊取其屍分噉之。十八 大臣 十九日,日卓午, 事聞,帝曰:「若此,可謂樸 也,殺則殺耳,豈能爲 夜半,潛勒諸軍 未至項 一突賊 秦 贼 城

龍、國奇兵潰歸陝,賊遂屠項城。 分兵屠商水、扶溝,遂攻葉縣。

汪 喬年,字歲星,遂安人。 天啓二年進士。 授刑部主事,歷郎中。母憂歸。

官,攜二僕,不以家自隨。爲靑州,行廊置土銼十餘,訟者自炊候鞫,吏無敢索一錢。自負 官平陽,遷陝西右參政,提督學校。再以卓異,就遷按察使。喬年清苦自勵,惡衣菲食,之 崇禛二年起工部,遷青州知府。 以治行卓異,遷登萊兵備副使,乞終養歸。父喪除,起

才武,休沐輒馳騎,習弓刀擊刺,寢處風露

中。

龍、喬年握手欲歐而 已,又聞詔擢喬年兵部右侍郎,總督三邊軍務,代宗龍。 以持中原 銳盡沒於 不見賊。 十四年擢右僉都御史,巡撫陝西。時李自成已破河南,聲言入關。 項城。 心。」乃收散亡,調邊卒,得馬步三萬人。 賊圍開封,而三邊總督傳宗龍亦至陝,議抽兵括餉,則關中兵食已盡,無以應。宗 喬年曰:「兵疲餉乏,當方張之寇。 別。未幾,宗龍敗歿於項城,喬年流涕歎曰:「傅公死,討賊無人矣。」 我出,如以肉餧虎耳。 部燉踵至,趣 出 喬年疾驅至商、洛, 關。 然不可不一出, 是時,關中精

含郾 曰「□「郾城危在 盡獲賊所擴。 也。」諸將皆曰:「善。」 而 五年正月率總兵賀人龍、鄭嘉棟、牛成虎出潼關。 以精銳攻其必應,賊必還兵救,則郾城解矣。 自成聞之怒,舍開封而攻良玉。 旦夕。 吾趨郾,賊方銳,難與爭鋒。吾聞襄城距郾四舍,賊老砦咸在。 乃留步兵火器於洛陽,簡精騎萬人乘程進。 良玉退保郾城,賊圍之急。 郾城解, 先是,臨潁爲賊守,左良玉 我擊其前, 次郟縣,襄城人張永 良玉 乘其背,賊可 喬年諸將議 破 而 吾 屠

列

傳第

百

Ii.

+

汪喬年

祺等迎喬年。

城 死 賊 吾 勒 也。 人建 死 兵 駐 所 十七七 也。 月二 城 祠 喬 外。 年 而 H H 祀 坐 率 城 纛, 之。 賊果解 步 喬 |卒千餘入城守。[三] 陷 年入襄城,分人龍 雉堞盡碎。 了 三 郾城 巷戰,殺三賊,自剄不殊,爲 而 救 左右環泣請避之, 寒城。 賊穴地實火藥攻城, 嘉棟、 賊至 , 成虎軍三路、駐城東四十 三帥奔, 喬年怒, 賊所執,大罵。 良玉 喬年亦穿阱, 以足蹴其首 救 不至, 軍 賊割 ·里,逼 大潰。 曰:「汝 視 其舌 所 郾城 整 喬 一、磔殺 畏死,我不 年 長矛刺之。 而 数日 軍 · · 而 此 畏 自

從, 正 從喬 盩厔人,黨威 時 年, 張 或 皆死之。 欽 張 神木 貫、黨威 萬慶者, 人。 餘莫考。 、李萬慶及監紀西安同知孫兆祿、材官李可從、襄城 降將 射 黨成 塌 天 也。 則嘗擊賊 叉有 馬 於西維峪 帥某者 ,擒賊首竇阿婆者 逸其名。 北禄 鹽 也 Ш 知縣曹思 可

一萬,降秦 自成 購永祺 兵又數萬,威震河 不得,屠其族, 劓刖諸 雒 生劉 漢臣等百九十人。 自成數月之間 再敗秦 、師、獲

其族 相 「傳,穴,仙人所定,擴中鐵燈檠,鐵燈不滅,李氏興。」如其言發之,螻蟻數石,火光熒熒然。 人為 初 喬年之撫 縣吏者,掠之。 陝西也,奉詔發自成先塚。 言:「去縣二百里日 李氏村, 米脂令邊大受,河間靜海舉人,健令也, 亂山中,十六塚環 而葬,中其始 祖 也。

六七,反而伏。喬年函其顱骨、腊蛇以聞。 斵棺,骨青黑,被體黃毛。 吾必致死於喬年。」旣殺喬年,由西華攻陳州 腦後穴大如錢,赤蛇盤,三四寸,角而飛,高丈許,咋咋吞日光者 焚其餘,雜以穢,棄之。自成聞之,嚙齒大恨曰:

楊文岳,字斗望,南充人。 萬曆四十七年進士。 授行人。 天啓五年擢兵科給事中,

遷禮科都給事中。

史巡撫登、萊。十二年擢兵部右侍郎,總督保定、山東、河北軍務,代孫傳庭。 崇禎二年出爲江西右參政,歷湖廣、廣西按察使,雲南、山西左右布政使,以右副都御

賊遁去。 鄉、淅川,與羅汝才合。文岳趨鄧州,自成還攻之。文岳戰三捷,斬其魁一 遁,追擊於鳴皐。 還,駐兵開封。 疫作,乃頓兵於汝寧,出屯西平、新蔡間。 十四年正月,李自成陷洛陽,犯開封。文岳率總兵虎大威以衆二萬赴救。渡河,賊先 條龍、一 七月,自成走內 一隻龍

夜入於項城 九月會陝西總督傅宗龍於新蔡,與賊遇,大潰於孟家莊,再潰於火燒店。 明 日 奔陳州,宗龍遂覆沒。 事聞,文岳革職,充爲事官,戴罪自贖。 部將挾文岳 乃收集散

列傳

率 所 部 就巡 漁漁高 名衡 防杞。 賊遂破葉縣,拔泌陽,乘勝陷南陽, 殺 唐王 下鄧州等十四

城,再圍開封。

定、山 里 覃 及楊德政 7,持十 郾城。 ,官軍失 明 東 年正月 、方國 河南、湖 晝夜。 亡數 月 文岳馳救開封,論功復官。 萬。 督師 安四總兵之師,次朱仙鎭。諸 總督 北軍務,代文岳。 詔 丁啓睿及 汪 褫官候 喬 年 ·出關 勘 文岳、大威 ,賊引 命 所 司察文岳罪狀。 救 去,再攻開封。 郾 臨潁爲賊守,左良玉破而屠之,退保郾城。 軍盡潰,啓睿、文岳奔汝寧。 城。 賊潰 ,距官軍數 六月詔起 七月朔, 侯恂兵部 里而營。 文岳 啓睿 賊渡河,追奔 右侍 文岳 合良玉、大威 一、啓睿 郞 總總 督保 相掎 自成

馮名 屯城 步騎 寧, 衆攻保兵,漸 老回回、革裏眼、左金王等畢會。 五 聖亦掖文岳、貞會登城 東,文岳 九 百 月,文岳 一、夜縱 不支。 以 保 在汝寧,夜襲賊營有功。 火噪而 兵屯城西。 僉事 奔。 王世琮、 十三日,羣賊並 賊兵進攻,相持一 知府傳汝爲、通判朱國寶,縋將士入城。 文岳 賊旣灌開封,旋敗孫傳庭兵,以閏十一月悉衆薄汝 遣 至, 都司 晝夜。 壓汝寧五 康 世德以輕騎偵賊。 ']][ 兵潰 里 而軍。 ,殺傷數百。 監軍
事孔
貞會以川 世德走還汝,將其 賊奪其馬騾,悉 副將賈悌、參將 兵

明 日,賊四面環攻,戴扉以陣,矢石雲梯堵牆而立。 城頭矢酸擂石雨集, 賊死傷山積

忠 洞 上。 mi 備 胸 攻不 、糜骨 汝 禮斂之。 休。 爲 聞 而 死。 變 鼓百道並登,執文岳及世琮、 ,赴水死。 遂拔營走確山、信陽、泌陽,嚮襄陽 士民屠戮數萬, 賊擁文岳等見自成, 焚公私廨舍殆盡。 國 寶、 大罵。 悌、 ,虜崇王 貞會執去, 贼怒, 名聖於城頭、殺汝陽知縣文師頤於城 由 縛之城 樻 崇世 不 南三 知 所終。 子、 里鋪 諸 王妃 自成 以大礮擊之, 及 以文岳 河南 死 懷

安諸王

一以行。

涖任 全州 甫三日。 人。 汝爲, 皆舉 字于宣,江陵人。 人。 世琮嘗爲汝寧推官 崇禎七年進士。 ,討土寇, 世琮,字仲發, 流矢貫耳不爲動, 達州人。 時號王鐵耳者 國寶 成都人。 也。 師頤, 師頤

勳郎 略。 萬曆四十七年成進士, 中,請告歸。 孫 傳庭, 字百雅,代州振武衞人。 家居久不 出 授永 城 知 縣, 自父以上,四世舉於鄉。 以才調商丘 天啓初, 擢吏部驗封主事, 屢遷稽 傳庭儀表頎碩,沈毅多籌

崇禎 八年秋, 始遷驗封 郎中, 超遷順天府丞。 陝西巡撫甘學濶不能討賊,秦之士大夫

之不 如如 朝 總 督洪承疇,然其才自足辦賊。 用 傳庭,以九年三月受代。 賊首整齊王據商、雒、諸將不敢攻、檄副將 傳庭涖秦,嚴徵 發期會, 從軍 興法 羅 尚文 秦 愛

斬之。

千餘 募健 謀 藍 剔 能等十七部 也。 而 錄功,增秩 越關 養坤 南 田, 田 兩,米麥萬三千五 稍 兒擊餘賊,斬聖世王、瓦背王、一 當 傳庭設 叛卒與之合, 犯河 叛去, 靖 是時,賊亂關中,有名字者以十數,高迎祥最强,拓養坤黨最衆,所謂闖王、蝎子 萬 餘頃、 南 遣 入渭 方略 等。 諭 副將盛略等敗賊大天 還軍擊。 其下 其後田 南 而賊黨自是乃共推李自成爲闖王矣。 親擊迎祥於盩厔之黑 將犯西安。 追之出關 追斬之。 百 歸豪右 ·餘石。 賊走伏 撃賊 ,軍盡虛 帝 遣左光先、曹變蛟追走之渭南, 復 斜谷, :大喜, 合河南兵夾擊之,先後斬首千餘級。 寒登相 王於寶雞。 翅飛,回 籍 復大敗 水峪,擒之,及其偽領哨 增秩,資銀 於涇陽、 傳 庭釐 之, 賊 降鎭 走 降其餘衆。 三原, 鰫 得 天 王 入山谷,傳庭追之鳳 軍萬 明年,養坤及 六 上 山 登相 千有奇,歲收 西走。 西安四 虎。 黃龍、總管劉哲 降其渠 叉 其黨張耀文來降。 衛、舊 河南賊馬進忠、 殲白桿賊 一條龍, 進忠等復擾商 翔 屯課銀十四萬 有屯 他 招還脅從 渠 獻 賊 軍二萬 魁 出 俘闕 楼道, 數 塊 劉 F 五 四 已

會 楊嗣昌入爲本兵,條上方略。 洪承疇以秦督兼剿務, 而用廣撫熊文燦爲總理,分四 列傳第一百五十 孫傳庭

破漢陰、石泉、則坐傳庭失援,削其所加秩。 非臣。」嗣昌無以難,然銜之彌甚。傳庭兩奉詔進秩,當加部銜,嗣昌抑弗奏。十一年春,賊 委。然使賊入商、雒,而臣不能禦,則治臣罪。若臣扼商、雒,而踰期不能滅賊,誤剿事者必 矣。況更有募練馬步軍,數且踰萬,何嘗不遵部議。至百日之期,商、雒之汛守,臣皆不敢 以激帝怒。傳庭奏曰:「使臣如他撫,籍郡縣民兵上之,遂謂及額,則臣先所報屯兵已及額 具,不用部議。會諸撫報募兵及額,傳庭疏獨不至。嗣昌言軍法不行於秦,自請白衣領職, 等處爲汛守。傳庭知其不可用也,乃核帑藏,蠲贖鍰,得銀四萬八千,市馬募兵,自辦滅賊 家。」累數千言。嗣昌大忤。部議,秦撫當一正面,募土著萬人,給餉銀二十三萬,以商、雒 益。且非特此也,部卒屢經潰蹶,民力竭矣,恐不堪命。必欲行之,賊不必盡,而害中於國 正六隅,馬三步七,計兵十二萬,加派至二百八十萬,期百日平賊。傳庭移書爭之,曰三無

淳化間。 三四百里,荒山邃谷,贼入當自斃。乃率標兵中部遏其東,檄變蛟 之,斬首二千餘級。大天王知二子不殺,遂降。賊引而北,犯延安。傳庭策鄜州西、合水東 過天星、混天星等從徽、秦趨鳳翔,逼澄城。傳庭分兵五道擊之楊家嶺、黃龍山,大破 傳庭出扼商、雒。大天王等犯慶陽、寶雞,還軍戰合水,破走之,獲其二子,追擊之延 賊饑,出掠食,則大張旗幟,鳴鼓角以邀之,一日夜馳二百五十里。 賊大驚,西奔, 慶陽拒其西,伏兵三水、

挫 至 而 闖 馬馬 職 王 三敗 年 田 光玉 春 李自成者,爲洪承疇所逐,盡亡其卒,以十八騎潰圍 莊 也 驅宛、洛之衆,箕張 賊 遇 死 伏 捷聞,大喜,先敍澄城之捷,命加傳庭部 者無算,過天星、混天星並 而 敗 復 走寶雞, 而 四。 取棧道,再中伏大敗。 傳庭擊之,賊還走。 降。 叉逐 敗邠 銜。 寧間 又設伏於潼關原,變較逐賊入伏。 折而走隴州 嗣昌 遁。 。 陷 仍格 關 中羣 陣 - , 獲其: 不 關 盜 Щ 悉平,是爲崇禎之 渠。 . 道, 河南 又爲伏兵所 賊馬進

王 東,大 抑 眞 月. 降, 文淸等三戰三敗之,賊奔內鄉、淅川而去。 降。 之不爲奏。 手書,亦云。 左 冶田 吾明 敗賊邊鄉、靈寶山間,貫其營而東,復自 金王等十三部西 理 是 傳庭曰:「爾曹日就熊公言撫,而日攻堡屠寨不已,是偽也。 擊其東,賊不降則滅。 時 日進兵矣。」明 總理熊文燦主撫。 傳庭懇請上其籍於部,嗣昌曰:「需之。」 傳庭怏怏撤兵還。 [窺潼關 日擐甲而出,得文燦檄於途中曰:「毋妬吾撫功。」又進, , 聯營數十里。 湖廣 此賊平,天下無賊矣。 然賊迄不就撫,移瞰商、雒。 賊張獻忠已降,惟河 傳庭旣屢建大功,其將校數奉旨優敍,嗣昌務 東以西。 傳庭計 曰:「天下大寇盡在此矣。 獻忠 賊窘甚,以文燦招降手諭 南城 即狙伏,無能爲也。」 如 文燦悔,期傳庭夾擊。 故。 降即 羅汝才、馬進忠、賀一 解甲來,有說 上,言旦夕 得本兵嗣 我出 乃遂引兵 屬 卽非 [擊其 吏

月,京師戒嚴,召傳庭及承疇入衞,擢兵部右侍郎兼右僉都御史,代總督盧象昇督諸

列傳第一百五十 孫傳庭

民 也。 留秦兵之入援者守薊、遼。 得朝京師。 鎭援軍 使從賊也。 秦軍妻子俱在秦,兵日 易賜 劍。 承疇至,郊勞,且命陛見,傳庭不能無觖望。 安危之機,不可不察也。」嗣昌不聽。 當是時,傳庭提兵抵近郊,與嗣昌不協,又與中官高起潛忤,降旨切責,不 殺 傳庭曰:「秦軍不可留也。 以賊以爲利,久留於邊,非譁則逃,不復爲吾用,必爲賊用,是驅 傳庭爭之不能得,不勝鬱鬱,耳遂聾 留則賊勢張,無益於邊,是代賊撤 無何,嗣昌用承疇以爲薊督,欲盡 兵

在獄 **儁覈眞僞。** 庭總督保定、山東、河南軍務。 唐王,兵散 還之傳庭。 三年,文燦、嗣昌相繼敗。 傳庭初受命,疏言:「年來疆事決裂,由計畫差謬。 而賊益横。 傳庭慍,引疾乞休。 一備奏言:「眞聲、非託疾。」并下一儁獄。 帝思傳庭言,朝士薦者益衆。 而是時,闖王李自成者,已攻破河南矣,犯開封,執宗龍,殺 旣解嚴,疏壽陛見。 嗣昌又劾其託疾,非眞聾。 嗣昌大驚,謂傳庭將傾之,斥來役賷疏 傳庭長繫待決,舉朝知其冤,莫爲言。 事竣、當面請決大計。」 帝逐發怒,斥爲民,下巡撫楊一 明年,帝移 傳

集諸將於關中 之,燕勞賞賚甚渥,命將禁旅援開封。 而 獻 十五年正月起傳庭兵部右侍郎 、曹出柙 也 ,縛援剿總兵賀 叉謂 其 遇敵先潰 人龍,坐之麾下,數而 ,新蔡、襄城連喪二督也。 ,親御文華殿問 開封圍已解,賊 斬之。 剿 殺陝督汪喬年,帝即 賊安民之策,傳庭侃 調其 諸將莫不 開 縣 噪歸 酒然動色者 猛 命 侃言。 傳 帥 以孤 庭 往 帝嗟歎人 代。 軍失利

勷 鳳 也 賊 大 我 贼 秦 以 以 任任 敗。 馬 軍囂 潰 兵 誘 師 九 延 邃 圍 以二千 賊 東 寧 月 傳 光裕、戴友仁 像 殺 之, 反反 走, 抵 庭 傳庭設三 は出 贼 人 之。 潼 旣 兵 奔 斬 馳突不得出, 所謂 關。 固 E 以 乘之,左 入 首千餘。 參將黑尚 誅 動父光先故,貸數。 軍 伏 一覆以 柿 大雨 殺 中, 以下七十 趣 人 遠 勷 待賊 傳 龍 連 成虎 之役」也 追三十 、蕭 庭 仁亦被 旬 , 馬 威 出 愼 還 牛 蹶 自成 曹二 有 關 被執, 別別之師 兵而 成虎將 里, 執不 八 決馬家 邊, 人。賊倍獲其所 傳庭上言:「兵新募,不 及之郟縣 鬭 是役 屈 植 潰,諸 前 日夜治軍為平賊計,而賊 而 高 立不 軍 口 見殺, 也,天大雨,糧 傑、 一,左勷 河 軍皆潰。 撓。 灌 之塚頭 董學禮 覆軍 開封。 將左 以刃臨之, 喪馬。 o ·數千。 ) 鄭嘉 副將孫 突起翼之, 賊棄甲仗 開 不至,士卒採青柿 傳 封 堪用。」 棟將 庭走鞏,由孟 E 材官小將之歿者, 枝 膛 陷 遂已 目 秀 右,高 帝 軍資於 左 魔馬 不 傳 不 勷 · 答。 庭趨 再圍 聽。 以追 傑將中軍 道,秦兵趨利。 鄭嘉棟 入關 南 人 開 以食, 傳庭 湯。 封。 贼,擊殺數十騎 目 執 張 左右横 不得已 0 凍 自成 詔 英座 斬 此 成 御 且 愼 史蘇京 孫副 虎 一餒,故 西 「撃之。 鼎 一、李 出 賊覘 陽 行 北 罰 棲 將 逆

自 屯 衞 田 傳 繕器,積 庭旣 督工苛急,夜以繼日,秦民不能堪。 已敗 栗,三家出壯 公歸陝西 計守潼關 1 ,扼京師上游。 火車載 火廠甲仗者三萬 而關中頻歲饑,駐大軍餉乏,士大夫厭苦傳庭所 且我軍新集,不利 輛,三戰則 速戦, 驅之拒馬,止則 乃益 募勇 二十,開 環 낈

爲 用 法 一嚴,不 樂其在秦。 相與譁於朝曰:「秦督翫寇矣。」 又相 與危語恫 脅之曰:「秦督 出

關,收者至矣。」

氾水 將 自 擒 破 次 北 南 王 此 能 後 贼 成 李菱純 於 偽 北 + 延 再 果 寶 圏郷。 、滎澤 宿 日 餘郡 對 明 、寧兵爲 軍 軍 豐,斬 毅 年五 與 獄 譁 務 (賊持, 將軍 無畏! 降。 吏乎 於 ,伐竹結筏, 自號 月 賜 二 十 一 汝 僞 後 謝 命 養純言財虛實 」頃之,不得已遂再議 劍 州 勁 州 新 久 雨 我 君友,斫賊 兼督河南 牧 一,白廣 順 殺 日,師次陝州 趣 賊 王 陳可新等。 道 王焚陵,罪大 戰益急。 大至 ,設官置成,營襄陽 寧, 人佩三葫蘆 恩統火車營,檄左 四四 糧 一流言 坐纛, :諸賊老營在 車 川軍務, 傳庭 遂擣 不 檄 四起,不得已還軍迎 能前 尾 矣 一將謀 河 頓足歎 了姑決 自成 唐縣 出 南諸 尋進兵部 師 渡河。 幾獲。 定良玉 土 , 破之, 唐縣,偽將 而 死 軍 日 饑 居 總兵牛成 渡 赴汝 之。 攻郟破 戦。 奈何 河進 傳庭分兵防 賊 尙書, 改稱督師,加督 殺家 將由 寧 奔襄城, 不勝, 剿 乎! 吏 虎將 糧 夾 Ź, 口 屯 撃。 內、淅窺商、雒, 吾固 殆盡 寶豐, 九月八日 留陳永福 前鋒,高傑將 則 獲馬 禦。 當 大軍遂進逼 殺 知 ,賊滿營哭。 是時, 我 鸁 自成 八月十日, 往 而 師 噉之立 而 爲後拒 降未 精銳盡聚於 不 Щ 自成 次汝州 西 中軍 返 盡 襄城 晚也 悲。 也。 已據有 傳庭出 湖廣 發荆 轉戰至 ,王定、官撫 爲 前 然 雨 軍 二貴 賊 而 襄 都尉 襄 七 大 洞 懼謀 郟縣. 旣移,後 師 城。 丈 日 大 兵會於 南 州 潼關 四天 夫豈 夜 軍 及江 · 逐 不 串 湖 民 逐

六七九

官軍。 遮擊, 軍亂 關 餘,失亡兵器輜 呼曰:「師敗矣」、脫輓輅而 又次驍騎,老營家口處內。 以內 永福斬之不 中者首兜鍪俱碎。 傳庭與監軍副使喬遷高躍馬大呼而歿於陣,廣恩降賊。 無堅城矣。 重數十萬。 能 止。賊追及之南陽,官軍還戰。 自成空壁躡我。 奔,車傾塞道,馬絓於衡不得前,賊之鐵騎淩而 傳庭單騎渡垣曲,由閿鄉濟。 戰,破其三重。 賊驍騎殊死關, 日夜,官兵狂奔四百里,至於孟津, 賊陣五重,饑民處外,次步卒,次馬軍 賊獲督師坐纛,乘勝 我師陣稍動。 傳庭屍竟不可得。 騰之,步賊 廣恩軍 破 潼 死者 將火車者 關 傳庭死, 手白棓 ,大敗 四 萬

還。 言傳庭未死者,帝疑之,故不予贈廕。 憂我。」及西安破,脹率二女三妾沉於井,揮其八歲兒世 老翁收養之。 道路 初,傅庭之出 見者,知與不知皆泣下。 長子世瑞聞之,重趼入秦,得夫人屍 師也,自分必死,顧語繼妻張夫人曰:「爾若何。」夫人曰:「丈夫報 傳庭死時,年五 傳庭死而明亡矣。 十有一 井中,面 寧亟 矣。 如生。 避賊去之。 傳庭再出師皆以雨敗也。 翁歸其弟世寧,相扶攜 兒踰 牆 墮民舍中, 國耳,毋 或

贊曰 流賊蔓延中原,所恃以禦賊者獨秦兵耳。 傅宗龍、 孫傳庭遠近相望,倚以辦賊。

#### 校勘記

- 喬年諸將議日 「喬年」二字下當脫一「與」字, 應作「喬年與諸將議曰」,下文稱「諸將皆曰
- 卽承 喬 年 與諸 將 的 議論 而言。
- 率步卒干 餘 入 城 宁 千餘,懷宗實錄卷一五崇禎十五年二月壬子條、 國權卷九八頁五九一七、
- 十七日城 ※被寇紀略卷九都作「數百人」、罪惟錄傳一二中汪喬年傳作「五百人」。 陷 八作「丁巳」城陷,二月辛丑朔,丁巳正是十七日。 十七 日,原作「二十七日」,「二」字行,據明史稿傳一三九汪喬年傳删。

按國権卷

九八頁

五

九

月壬申

條

- [Z5] 斬聖世王瓦背王一 翅飛 瓦背王,原作「瓦背」,脫「王」字,據懷陵流寇始終錄卷九崇順九年八
- 二 火車載 火酸甲仗者三萬輛 三萬,本書卷三〇九李自成傳、 罪惟錄傳十二中孫專庭傳都作|二

萬

# 

### 列傳第一百五十一

来 個 沈壽崇 蕭漢 馮師孔 黄炯等门 林日瑞 郭天吉等

蔡懋德 趙建極等 衞景瑗 朱家仕等 朱之馮 朱敏泰等

陳士奇 陳纁等 龍文光 劉佳引 劉鎭藩

宋 一鶴,宛平人。 爲諸生,見天下大亂,即究心兵事。 崇禎三年舉於鄉。 授教諭,以薦

遷丘縣知縣,復以薦加東昌同知,仍知縣事。

巡按御史禹好善以一鶴知兵,薦之,授兵部員外郎, 尋擢天津兵備僉事, 改飭汝南兵

備、駐信陽。

列傳第一百五十一 宋一鶴

直 艦 始 又 時 降 熊 鶴 其 文 毒 死 燦 殺 賊 總 其 順 理 賊 天王 南 干 畿 人。 之 黨 河 左良 劉 南 喜 Щ 玉 才 西 降 o 其 陜 鶴 旭 賊 李萬 先 湖 後 廣 慶 剿 劇 兀 賊 JII 鶴 斬 軍 撫 務, 首 IIII 七 定之數萬 主 百 撫 有 議 奇。 從 文燦 副 鶴 將 降 屢 龍 其 E 盜 在 其 魁 田 功 破 黄 薦 賊

進

副

使

調

鄖

陽

例 邑 諸 坪 玉 、汝 將 等 所 文 寧 斬 逼, 燦 大 間 首 誅 破 三千 賊 楊 氲 於 鶴 嗣 入 餘 瑪瑙 74 移 昌 級 jη 断 代 Щ 蘄 0 嗣 以 州 昌署 鶴 鶴 鶴 焚 以 敍 雲南 舟 能, 功 鶴 增俸 遏 薦 荆 軍 贼 之, 楚 移 渡。 ·o 第 鎭 擢 遣 當陽 右 副 賊 功 愈都 移 將 中 而 正 獻 御 允成 官 北 忠 史, ; ---劉 陷 元 襄 鶴 代方孔 孫 斌 陽 應 叉 以京 斷 元等大破 與 横江 炤 革 軍 巡 푩 移 撫 賊 眼 鎭 賊 湖 不 左 荆 汝 廣 敢 門, 金 才 渡 五 王 相 時 等 湖 大 拾 營 廣 東 角 苾 贼 於 黄 豐 爲 左

世 蹙賊 王 於 左 嗣 昌卒 燈草 金 E 坪、斬 老 1 回 啓 肖 11 睿 等於 Ŧ 代。 八百 潛 啓 級 川 睿 破 懷 + 獻 寧 五. 忠於 Щ 年 中 遣 麻 o 部 城 將陳治 鶴 會 叉 督參 等合江 鶴 及 將 鳳陽 王嘉謨 北 兵,破 總 督朱 等追 贼 大典、安慶 於 破 左 桐 金王 城 公舒 巡 争 城 撫 世 奠 易

引 功 疾 亦往 帝 鶴 疑其偽,下所司 起 往 鄉 蒙 郹 時 詬 不 -嗣 年 一嚴核。 昌父 秉 節 名鶴 鉞, 先以襄陽陷 廷 織投揭 臣 不 能 奪職戴罪,至是許解官候代。 無 自署其名曰「一 忮。 御 史衞 周 鳥 胤 Ŀ 楚人傳笑之。 疏 醜 詆 鶴。 鶴 鶴 連 屢

擾寒、 李振 栅 木 鶴自經, 聲、 為 趨 樊, 城。 救 總 汝 故留 兵官錢中選皆降, 寧,汝寧城已陷。 賊 鶴疏 積 守沈壽崇、鍾 薪 糾之。 焼之, 旣, 烟暑純德山。 良玉 祥 十二月,襄陽、德安、荆州連告陷,一鶴趨承天護 遂 知縣蕭漢俱 自襄走承天, 攻承天。 城穿,一 死, 歲除,明 軍饑 分巡副使張 鼓 而 而 登。 年正 掠, 犯獻陵, 月二日, 乞餉於一鶴,不許。 鳳翥走 入山 毁 有 禋 以 中。 殿。 城 下 先是左良玉 守陵巡 賊 獻 者。 良玉銜之。 陵。 按 城 **陵軍** 御 陷 運 妲

壽崇,宣城 人,都督有容子。 崇禎初武進士。 忤巡按,被劾罷,未行而賊至,遂及於難

贈都督僉事,廕子錦衣百戶。

至是,

鶴謀留良玉兵,良玉走武昌,故及於難。

用 土 呼「鍾祥令在,誰 視之,求死 「男忠女烈,努力 錦 塊畫「鍾祥縣令蕭漢願 衣斂 漢 ,字雲濤,南豐人。 而 不得。 瘞之。 敢驚陵寢者」賊 自盡。」遂出登陴,拒 越三日 賊退,其門人改斂之以時服,曰:「嗚呼,大白其無贖乎!吾師肯服賊服 死此寺」十字於壁。 ,從僧榻得剃刀藏之,取敝 崇禎十年進士。 挾之去,不殺,說降,不聽。 守五 一晝夜。 秩滿將行,賊薄城,卽辭家廟,授帨於妾媵曰: 刨 對壁自剄,血正濺字上,死矣。 元旦,突圍 紙書楊繼盛絕 田, 明日, 趨獻 命詞,紙盡,投筆起,復拾 城陷 凌。 賊騎 送漢吉祥寺,謹 賊嘉其義, 環之,漢 大

列

傅

第

百

Ŧ.

+

乎 」悉易之。 詔 贈 漢 大 理 寺丞

振 聲,米脂 與 自成 同 縣 而 同 姓。 自成 呼之爲兄, 後復殺之。 將發獻陵, Щ

若雷震 虎 嘷,懼,乃 北

馮 師 孔,字景魯,原武 萬曆 四十 四年進士。 授刑部 主事,歷員 外郎 郎 中。 恤 刑陝

西 ,釋疑獄 百八十人。 天啓初 出出 爲 眞 定 知 府 遷井陘 兵 備 副 使, 憂歸

崇禎 一年起臨鞏 兵備,改固 原 ,再 以 憂 歸。 服闋 ,起懷來 兵備 副使, 移密雲。 件鎭守中

官 鄧希韶。 希詔 摭他 事劾之,下吏, 削 籍 歸

蔡官治巡撫陝 師 孔 大怒, 十 Ħ. 年 以其卒抵死。 詔舉邊才,用薦起故官, 西 調 兵食,趣總督 明 年 舉天下賢能 孫傳庭 監通 州 方 關 軍。 面 官, 勤王兵集都下, 鄭三俊 薦 師 孔。 剽 劫公行, 六 月擢 割婦 右 愈都 人首 御 史,代 報功。

出

自 以 河洛 浙 )[[ 當 龍車寨間道入陝西 是之時, 、荆襄四 戰之地,關中其故 賊十三家七十二 營降, 傳 庭 鄉,士 聞 之, 馬甲天下,據之可以霸 師 令師孔 殆 盡, 率四川、 惟李自成、張獻忠存。 甘肅兵駐商、 決策 西 維為持 向。 自成尤强,據襄陽 憚 角, 潼 關 而 天 師 險 孔 將 趣

或咎 師孔 無何,我師敗績於南陽,賊遂乘勝破潼關,大隊長驅, 趣師 致敗 也。 賊至,守將王根子開門入之。十月十一日,城 勢如破竹。 陷, 師孔整衆守西安,人 師孔投井死。 同

死者,按察使黃炯,長安知縣吳從義,秦府長史章尚絅,指揮崔爾達

易 方廬墓山中,子蕣如死於賊,其妹亦被難。 炯,字季侯,光州 尋以右參政分守洮岷,擢陝西按察使。 人。天啓二年進士。 崇禎中,以淮海兵備副使憂歸。 服除,起臨鞏兵備副使,調番兵,大破李自成 自成勸之降,叱曰三蘆關之役,汝, 流賊陷州 我戮餘 炯

也,今日肯降汝耶。」妻王赴井,炯得間亦赴井,皆死。 尙 絅,會稽 人。 聞城陷,投印 井中,冠服趨王府端 禮門雉經。 贈太常卿、諡忠烈。 贈按察司 副 使。

官。 兵荒, 從義 山陰 從義練丁壯三百人殺賊。 兒時夢 一人拊其背曰:「歲寒松柏, 賊破秦,從義曰:「嗟乎,豈非天哉 其在斯乎。」崇禎十三年成進士,之 吾唯昔夢是踐

矣。」遂投井死。 贈按察司 | 僉事

人。

爾達 ,不知何許人,亦投井死之。 自是長安多義 井。

將僭 分兵 僞 四 賊 出 號,而所 遂 攻抄。 執秦王 爲暴虐若此, 存樞,處其宮署,置百官,稱王西安。坐王府中,日執士 有小吏丘從周者,長不及三尺,乘醉罵自成曰:「若 何能久!贼怒,斫殺之。 而布政使平湖陸之祺及里居吏部郎 二小民 大夫拷掠,索 無賴 ,妄踞王府, 金錢,

列

乾州宋企郊、提學僉事眞寧鞏焴皆降賊、得寵用。

之禍乎。賢王忠而熟於計,必知所處矣。」書上,不報。至是賊果破寮,悉爲賊有焉。 王所有餉軍,與其賷盜。GD贼平,益封王各一子如亲王,亦足以明报矣。二王獨不鑒十一宗 王,以剿贼保秦責秦王,以遏贼不入責晉王。王能殺賊,假王以大將軍權;不能殺賊,悉翰 先是, 戶部尚書倪元璐奏曰:「天下諸藩,孰與秦、晉。秦、晉山險, 用武國也。請諭二

故官,分守湖東。屬縣鉛山界閩,〔三妖人聚山中謀不軌,圍鉛山。 林日瑞,字浴元,詔安人。萬曆四十四年進士。崇禎初,以江西右參政憂歸。 日瑞擊敗之,搗其巢。 服闋,起

屡遷陝西左、右布政使。

瑞入城,戰且守。 錦犯蘭州, 城陷,執日瑞。 結西羌,嚴兵以待,而自率副將郭天吉等扼諸河干。 十五年夏,遷右僉都御史,代呂大器巡撫甘肅。 蘭州 誘以官,不從,磔於市。 人開城迎賊。 大雪深丈許,樹盡介,角幹折,手足皸嫁,守者咸怨。 賊遂渡河。 凉州、莊浪二衞降,即進逼甘州。 十二月,賊踏冰過,直抵甘州城下。 明年十一月,李自成屠慶陽。其別將賀 賊乘夜坎雪而登, 日瑞聞賊急,

初,日瑞撫甘肅,廷議以其不任也,遣楊汝經代之。未至,日瑞遂及於難

官,並死之。賊殺居民四萬七千餘人。三邊旣陷,列城望風降,惟西寧衞固守不下。賊無 後顧,乃長驅而東。 天吉及總兵官馬爌,撫標中軍哈維新、姚世儒,監紀同知藍臺,里居總兵官羅俊傑、趙 福王時,贈日瑞兵部尚書,臺太僕寺少卿,皆賜祭葬

士,授杭州推官。天啓間,行取入都。同鄉顧秉謙柄國,懋德不與通。秉謙怒,以故不得 察懋德,字維立,崑山人。少慕王守仁爲人,著管見,宗良知之說。舉萬曆四十七年進 授禮部儀制主事,進祠祭員外郎。尚書率諸司往謁魏忠賢祠,懋德託疾不赴。

異求言,懋德上省過、治平二疏,規切君相,一時咸笑爲迂。 旱,懋德禱,即雨。 瀕湖豪家,把其罪,簡壯士與同發,遂擒阿丑。皆曰:「懋德知兵。」內艱,服除,起井陘兵備 右參政,分守嘉興、湖州。 崇禎初,出爲江西提學副使,好以守仁拔本塞源論教諸生,大抵釋氏之緒論。 他鄉爭迎以禱,又輒雨。 劇盜屠阿丑有衆千餘,出沒太湖。 調寧遠,以守松山及修臺堡功,數敍賚。 懋德曰:「此可計擒也。」悉召 遷浙江

懋德好釋氏,律身如苦行頭陀。 列 傅 第 百 五 + 林 日 瑞 楊嗣昌謂其淸修弱質, 蔡 懋 德 不宜處邊地,改濟南道。

苦催 新 統 年冬,擢 兵 殘 入衞 破 科 賊 右 京 愈都 吏 復 師 以 多 認 先服 缺 御 扼 史,巡撫 人,懋德 不輸 守龍泉、固 租 攝 Щ 相 西。 兩 煽 關 司 誘。 及 召對,賜 關。 三道印。 懋德 李自成 酒饌 飯 檄 遷山東按察使、河 、銀幣。 州 已陷河南 縣停徵, 明 ,懋德禦之河 年春,抵任 上疏 自 南 劾, 右 布 ,討平大盜 詔 上。 政使。 鐫 七 級 田 王冕。 視 荒 事 穀 貴、民 十月 匹

懋德 守 拔 衆, 八日 之。 润 然無兵 連章 津。 十六年冬,自成 懋德去平陽。 尚智奔入泥源 告急,請禁旅及保定、宣府、大同 Щ 印 西 拨。 京師 懋德以疲卒三千,當百 二十月 右背,蒲州 破 山中。 潼關,據 ,賊抵河 二十 西安 北 八日,懋德還太原 抵 津 盡 保德、悉隣賊、依黃河 自船窩 有三秦。十二月, 萬狂 兵疾赴河 寇。 東渡,尚智走還平陽。 干合拒。 時太原洶 爲險。 懋德師次平陽, 中 洶,晉王 朝益積憂山 然窮冬冰合,賊騎 二十二日,賊攻平陽, 手教趣懋德還省。 遣 西 副將陳尚 一言防河者甚 得 長驅 智扼

宗友 遣僞官 明 兵。 日 報 上言 明 渡矣。 年正 一月、餘郡皆失、是誰之過歟」有詔奪官候勘,以郭景昌代之。 歲終至省,臣言宜提一旅,星馳 日 月,自成 隨行 馬步千人,即 稱王於西安。 時倍道 其半。 賊旣 而前,張疑聲討, 西向,召集陳尚 渡 河,轉掠 撫臣 懋德不待春融冰泮,遽 河東,列城皆陷。 智叛卒,移檄各路防兵援剿 尙冀桑 楡 之收,無 於是山 爾 平陽 如 西巡按 不聽 返 斾 何 乃 御 賊 不 史汪 賊 刨 於 發 H

陽和 罷官 中、畢拱辰,太原 兵三千協守東門。 命適至,或請出 一十三日,尚智叛降於賊。 知府孫 城 候代。 剛中 康周 慮其 ,署陽曲 懋德不可, 於是懋德誓師於太原,布政使趙建極, 內應,移之南關之外。 原縣事 曰:「吾已辨一 長史范志泰等官吏軍民咸在。 死矣,景昌卽至, 遣部將張雄分守新南門,召中軍副 監司 吾亦 懋德哭, 毛文炳、 與俱死。」 衆皆哭。 藺剛 調

總兵應時盛入參謀議

懋德等登城

遂偕 耶 擁 懋德上馬,時盛持矛突殺賊數十人。 守者皆散。 雄已縋城 攻城,陽和兵叛 曰:「我當 年,已勘了死生,今日吾致命時也。」卽自剄,麾下持之。時盛請下城巷戰,顧懋德曰「上馬」。 之見自成。 復 至三立 月五 下馬 出降,語其黨曰:「城東南角樓,火器火藥皆在,我下卽焚樓。」夜中 死 據 祠。懋德 、封疆, 賊登城, 日,賊至城下。遣部將牛勇、朱孔訓、王永魁出戰,死之。明日 不屈 降賊。又明 地坐。時盛已出 諸君自去。」衆復擁懋德上馬,至水 ,將斬之。下堦呼萬歲者再,曰一臣失守封疆,死有 就縊未絕,時盛釋甲加 懋德北 日,晝晦 面再拜,出遺表付友人賈士璋問道達京師, 城,殺妻子,還顧 ,懋德草遺表。須臾大風起,拔木揚 至炭市口,賊騎充斥,時盛呼曰「出 其 肩,乃絕。時盛取弓弦 不見,復斫門入,語 西門。 懋德叱曰:「諸君 懋德 自經。建極危坐公堂,賊 餘罪。」自成以爲呼己 砂。調張雄守大 語 ,自成具 曰:「請與公俱死。」 西門」。懋德遽 人曰 ·火起, 欲陷 「吾學道有 鹵簿 風 我 !',督衆 轉烈, 南門, 不忠 下 馬

列傅

第

日

以 之。 缺,姓名不傳,莫得而 事凡四十有六人,贼皆尸之城上。 也, 何睨。」曰:「欲得此斫頭耳。」 懋德不守河爲失策,乃諡 曳還。 欲降剛 文炳 被殺、妻趙、妾李亦投井死、子兆夢甫 建 中 極 ,不從,殺之。 瞋 目 次云。 『我呼大明皇帝, 寧呼賊耶。」立射殺之。時自成 忠襄、賜祭葬 首旣墮,復躍 遂取斬之。 自成恨懋德之不降也,驗其尸,以刃 而不予贈廕,餘賜恤有差。 起丈餘,賊皆辟易。 康周巷戰死,志泰不食死。 數歲,賊掠 去。 賊適得新 士民 以其忠臣 間考四十六人,行事多 /斷頭 執 自懋德 刀,拱辰 晉王 间 子也, 一,據王 去。 而 睨 下 之。 ·,太原死 福王時 贖 宮 云。 而歸 問

調民 ";抑 兵討賊。 文炳 極 廉靜 字字 一,河南永寧人。 夢石 ,宜令官得互糾不公者。」 帝皆納其言。 文炳 鄭州 言:[民兵可守不 人。 賊掠永寧時,建極 以吏科給 可調,不若官軍乘馬便殺賊。」又言:「當大計,主計者喜 事中出 五子皆死,後生三子又天,至是趙氏一 爲 山西兵備副使。 爲給事 時,楊嗣 門竟絕。 督師,議

疏言:「民死而 剛 拱辰,字星伯,掖縣人。 中 字世 丁存,田荒而 生,陵縣人。爲南京給事中,奏保護留 赋在,安得不爲盜!宜清戶 知朝邑、鹽城二縣,數遷數貶。 都六事,又陳漕事救弊之要。 口幷里甲。」皆切時病。遷山 歷淮徐兵備僉事,督漕侍郎史 Щ 西副 東饑 使

可法謂其不任,移之冀寧。

懋德所知,拔隸幕下,至都督僉事。 建極、文炳、剛中、拱辰由進士。 志泰,虞城人。餘莫考。 康周,字晉侯,安丘人,由鄉舉。 時盛,遼陽諸生。 爲

投井殉之。 文,賊誦而殺之。 之。代州參將閻夢夔,鹿邑人,汾州知州侯君昭,皆城亡與亡。 太原知府遷。 亡復其業。遷忻,賊卽至,曰:「此城必不守,我出,爾民可全也。」出城罵賊而死。 州人祠祀 各自盡,遂投井,賊曳出斬之。忻州知州楊家龍,字惕若,曲陽人。爲寧鄕知縣,凡七年,流 心者,則有若安邑知縣房之屏,宛平人,起家鄕舉。城陷,北向拜天子,入署拜其母,命妻子 太原旣破,賊移檄遠近,所至郡縣望風結寨以拒官兵。而其仗義死難,陷胸斷脰而甘 孕懋,霸州人,進士。遇吉自有傳。寧武失,賊破三關,犯大同。 自成旣陷太原,遣使說降,孕懋斬之,與總兵官周遇吉共守,城陷自殺。 其義勇范奇芳,刺殺一僞都尉而自剄。 寧武兵備副使王孕懋,字有懷,由 汾陽知縣劉必達袖出罵賊

衞景瑗,字仲玉,韓城人。 天啓五年進士。 授河南推官。

崇禎四年 徴授 御 史,劾首輔周延儒納賄行私數事,復劾吏部侍郎曾楚卿儉邪。

溫 納 體 巡撫大同。 仁下 出 按 吏 眞 定諸 ,故帝不 歲饑疫,疏乞振濟。 府。 懌, 父 喪,不俟命竟歸。 左遷行 人司 蒐軍實,練火器,戢豪宗,聲績 正。 歷尙寶 服闋,起故官。 、大理丞, 進 疏救給事 少 卿。 甚 十 五. 中傅 著 年 朝佑、李汝璨以論 春,擢 右 | 僉都 御

瓖主 王信之。 也, 納 款 將應 之。 而 還。 七年正 賊矣。」代王疑之,不見景瑗,永慶王射殺景瑗僕。 諸郡 瓖 兄 瑄 景暖 王分門守,瓖 月,李自成將犯山西,宣大總督王繼謨檄大同 ,故昌平總兵 不知其變也,及山 每門遺卒二百人助守。 也,勸瓖降賊。 西陷,景瑗邀瓖歃 瓖慮 其下不從,人犒之銀,言勵守城將士,代 血守。 會景瑗有足疾,不 總兵官姜瓖 寒出 告 人曰:「衞巡撫, 扼之河上, 瓖潛使 時 崽 兵事 秦

臣 盟 日 日 其 二忠臣 "「忠臣。」移其妻子空舍,戒毋犯。 變 而 不可以不死。」母 也, 叛,神其赦汝耶」,賊使景瑗母勸之降。景瑗曰:「母年八十餘矣,當自爲計。 至三 也」,不殺。 自墜馬下。 一月朔 ′′,贼抵 景瑗猝起,以頭觸階石,血淋漓。 賊引 城下。 賊執之見自成, 出、景瑗謂人曰:「我不罵賊者,以全母也。」初六日自縊於僧寺。 · 裏卽射殺永慶王,開門迎賊入。 紿景瑗計事,景瑗乘馬出,始知 殺代 自成欲官之。 王傳嬪及其宗室殆盡。 景瑗據地坐,大呼皇帝而 出,顧見嚷,罵曰:「反賊, 哭。 兒, 賊義之, 與我 敗歎 國

分巡副使朱家仕,盡驅妻妾子女入井,而己從之,死者十有六人。督儲郎中徐有聲、山

陰知縣李倬亦死之。諸生李若蔡自題其壁曰「一門完節」,一家九人自經。 家仕, 河州人。

福王時,贈景瑗兵部尚書,諡忠毅。

賊旣陷大同,以兵徇陽和,長驅向宣府。

朱之馮,字樂三,大興人。 天啓五年進士。 授戶部主事,権稅河西務。 課贏,貯公帑無

所私。以外艱去。

安土豪李中行。 東大猾朱全宇潛通秦賊,之馮至則執殺之,部內以寧。 中 於他所,而自沉於井。 - ,浙江驛傳僉事,青州參議。 崇禎二年起故官,進員外郎。 權貴爲請,不聽。 姑李聞之,爲絕粒而死。 盗劫沂水民, 株連甚衆。 進副使,齎表入都,寄家屬濟南。 坐罣誤, 謫浙江布政司理問, 稍遷行人司副, 柩還, 之馮廬墓側三年。 之馮自妻死不再娶,亦不置妾媵,一 之馮捕得眞盜,大獄盡解。 濟南破,妻馮匿姑及子 起河東副使。 歷刑部郎 擒治樂 河

出撫諭,貸商民貲給散,而密捕誅首惡七人,刻碩抱下吏。 十六年正月擢右僉都御史,巡撫宣府。 司 前主事 張碩抱 軍情帖然。 以剋餉激變,羣縛碩抱。

室蕭然。

列傳第一百五十一 朱之馮

右「爲 喜 之馮 士。 丽 心至 去。 ,結綵焚香以迎。 自 大罵 而 明 此 我發之」默無應者。 俄 人心 年三 而 賊 日 」仰天大哭。 死。 已散, 月 :「勛,爾帝所倚信,特遣爾,以封疆屬 且 至,勛蟒袍鳴騶,郊迎三十里之外,將士皆散。 李自 賊棄屍濠中,濠旁犬日食 監 左右欲擁之馮出走,之馮叱之,乃南向 成陷大同。 視 賊至城下,承胤 中官杜 自起熱火、則礮孔丁塞、或從後掣其肘。 勛 之馮集將吏於城樓,設高皇帝位,歃 且 與總兵王承胤爭先納款矣,見之馮叩頭, 開門入之,訛言賊不殺 人屍, 獨之馮 爾 爾至即 無損 叩頭 也 通贼, 之馮登城太息, 人,且免徭賦 草遺表,勸帝收人心,厲士 何面 血誓死守, 之馮撫膺歎 目 見帝 ,則舉城譁然皆 見大 請以 懸賞格勵將 日,「不 入酸,語: 城 不答,笑 下 賊 意 左

及 里居 同 知縣申以孝。 H 死者,督糧通判朱敏泰、諸生姚 其他婦女死義者又十餘人。 時中、副 將電龍及緊獄 福王時,贈之馮兵部 總兵官董用文、副將劉 尙 書,諡忠壯 九卿

鬼。 守 勛 城 旣 監 降 賊,從攻京師, 王承恩倚女牆 而 射書於城中。 與語,縋勛入見帝,盛稱自成,「上可自爲計」。 城中初聞勛死宣府,帝爲予贈廕立祠,至是以爲 復縋之出,笑語

諸守監曰:「吾輩富貴自在也。

Щ 撫。 崇禎四年考選,授禮部主事,擢廣西提學僉事。 也,曰:「必報國仇。」遂留駐重慶,遣水師參將會英擊賊於忠州,焚其舟;遣趙榮貴 守陽平關,爲吾捍衞,不惜二萬金犒軍。 護瑞王常浩自漢中來奔,士民避難者又數萬,至保寧,蜀人震駭。 在女將秦良玉嘗圖全蜀形勢,請益兵分守十三隘,扼賊奔突。 置不問,蜀以是擾 屯陽平,王以三千騎奔重慶。明年四月,文光受代,士奇將行,京師告變。士奇自以知兵 督學政。母憂闋,起贛州兵備參議,進副使,督四川學政。廷臣交章薦上奇知兵。 人,再督學政,好與諸生談兵,朝士以上奇知兵。及秉節鉞,反以文墨爲事,軍政廢弛。 石 士奇檄副使陳其赤、葛徵奇,參將趙榮貴等進討,屢告捷。而賊狡,迄不能制。 搖、黃賊十三家,縱橫川東北十餘年,殺掠軍民無算,執少壯,文其面爲軍,至數十萬。 獻忠由葫蘆壩左步右騎,翼舟而上,二將敗奔,逐奪佛圖關,陷涪州。 明 十五年秋,擢右僉都御史,代廖大奇巡撫四川。松潘兵變,衆數萬,士奇諭以禍福,成就 (年十二月,朝議以其不任,命龍文光代之。 士奇方候代,而陽平將趙光遠擁兵二萬, 或勸:「公已謝事,宜去。」士奇不可。 士奇,字平人,漳浦人也。好學,有文名,不知兵。 如頓此,需厚餉,吾頭可斷,餉不可得也。」光遠退 贼抵城下,擊以滾礮,贼死無數。 父憂歸。 服闋,起重慶兵備,尋改貴州,復 舉天啓五年進士,授中書舍人。 士奇馳責光遠曰「若退 士奇徵石砫援兵 二十日夜,黑 禦賊於梁 士奇本文

列

傳流

用 大罵,賊縛於敎場,將殺之。 雲四布,賊穴地轟城。 , 斫其臂。 [三] 遂犯成都。 大礮向天叢擊。 俄晴霽, 遂肆僇。 城陷、国王、士奇及副使陳纁、知府王行儉、知縣王錫俱被執。 忽雷雨 晦冥,咫尺不見。 士奇罵不絕口而死,王亦遇害。 獻忠仰而詬曰:「我殺人,何與天事!」 賊集軍民三萬七千餘 士奇

彭長庚之黨,又斬搖、黃賊魁馬超。至是,賊蒙巨板穴城,錫灌以熱油,多死。及被執,大罵。 抉其齒,罵不已。 重 慶,善撫馭,爲賊臠死。 指 揮顧景聞城陷,入瑞王府,以己所乘馬乘王,鞭而走,遇賊呼曰三賊寧殺我,無犯帝 本關南兵備副使,護瑞王入蜀,及於難。行儉,字質行,宜興人。 捶膝使跪,益仡立。舁至教場,縛樹上射之,又臠而烙之。旣死,復燬其骨。 錫,新建人。 崇禎十三年進士。 除巴縣知縣。嘗從士奇殲土寇 崇禎十年進士,守

子。」賊刺殺王,景遂死之。

撫四川。 龍 文光,馬平人。天啓二年進士。崇禎十七年以川北參政擢右僉都御史,代陳士奇巡 聞命,與總兵官劉住引率兵三千,由順慶馳赴之。 部署未定,數日而城陷。 **胈**盡

引卒不屈,賊殺文光於濯錦橋,佳引自投於浣花溪。 驅文武 一將東及軍民男婦於東門之外,將戮之,忽有龍尾下垂。 賊以爲瑞,遂停刑。 文光、佳

者五。 虚伍 株連,萬金立罄,此不便於民生。子弟訐父兄,奴僕訐家主,部民訐官長,東廠皆樂聞,此不 城,外巡按,以及刑部、大理皆不能舉其職,此不便於官守。奸民千里首告,假捏姓名,一 百人而衞一人之身,耗食兼耗兵,可節省者六。」又疏陳東廠三弊,言:「東廠司緝訪,而 織造,澤、潞機杼,以及香蠟、藥材、陶器,無歲不貢,積之內爲廢物,輸之下皆金錢,可節省 奉明旨,朝廷不事興作,而節愼庫額數襲爲常,可節省者二。諸鎭兵馬時敗潰而餉額不減, 馬萬計,草場止五六所。今馬漸少,場反增二倍,可節省者一。水衡工役費,歲幾百萬。近 便於國體。」帝皆納 必多,可節省者三。 劉 之勃,字安侯,鳳翔人。崇禎七年進士。 軍前監紀、監軍、贊畫之官,不可勝紀。平時則以一人而糜千百人之餉,臨敵又以千 其言 光祿宴享賜賚,大抵從簡,而監局廚役多冗濫,可節省者四。三吳 授行人, 擢御史。 上節財六議,言:「先朝 內五 紙

十五 列 年出 傅 第 按 四 百 五 + 十六年秋,類報災異, 龍 文 光 劉 之 勃 請緩賦省刑,亦弭災一 術 時不能用。 明年

子。 圍 及聞矣。 明,火發,北樓陷,木石飛蔽 副 合之,纏以帛,貯 王 正 三至澍 出 使劉 月, 不從, ,赴浣花溪死之。 張獻忠 監國 士 斗等分陴拒守。 **遂大**罵, 一之勃 大 破 藥, 不可, JII 賊攢箭射殺之。 向城 中郡邑。 之勃等被執、賊以之勃 躍 樓。 入 總兵官劉鎭藩出 一天,守陴者皆散,賊遂入城。 池中,議乃寢。 之勃厲衆奮擊, 四月聞都城失守,人心益恟懼。 時福王立於南京,擢之勃右僉都御史,巡撫四川, 戰而敗。 八月,賊逼成都,之勃 同鄉,欲用之。 賊却 二三里, 賊穴城,實以 蜀王率妃妾自沉於菊井。 之勃勸以不殺百姓,輔立蜀世 皆喜,以爲將 舉人楊鏘、劉道貞等謀擁 與巡 火藥,又刳大木長 撫龍文光、建昌 去 也。 初 鎭藩 數 九 文 兵備 日 者 突 黎

死 爲 時封疆諸臣後先爭死,可不謂烈哉!然平陽之旆甫東,船窩之警旋告。 難 贊曰 , 君子不 能無憾於懋德焉已。 若夫一鶴之死顯陵,士奇之死夔州、 渡河而東,勢若燎原。宣、大繼覆,明亡逐決。 劉之勃、龍文光之 死非難,所以處

死成都,不亦得死所者歟

Ì

黄炯等 黄炯, 原作「黄銅」, 據本書卷二四莊烈帝紀、 明進士題名碑録天啓二年壬戌科改。

下同。

不能殺賊悉輸所有餉軍與其賷盗 按此句文義不通順。 國権卷九九頁五九九六作「如不知兵,

宜悉輸所有。與其齎盗,何如享軍。」

分守湖東屬縣鉛山界閩 湖東,原作「湖廣」, 據明史稿傳一四〇林日瑞傳改。

按本書卷七五

ᅋ 二十日夜至穴地轟城城陷 職官志有湖東道,爲江西諸道之一,鉛山縣隸湖東道。 二十日,承上文爲四月二十日。按國権卷一〇二頁六一二二繁城

陷」於六月丁丑(二十一日),明通鑑附編卷一上考異稱「轟城則六月二十日丙子」,「城陷則二

十一日丁丑」,是「二十日」上脱「六月」二字。

万五 賊集軍民三萬七千餘人斫其臂 以徇各縣,謂抗者如之」。與此異。 國権卷一〇二頁六一二二作「又驅丁壯萬餘, 割耳鼻斷一手

# 明史卷二百六十四

### 列傳第一百五十二

賀逢聖 傅冠 尹如翁 南居盆 族父企仲 族弟居業 周士樸

呂維祺 弟維祜 王家禎 焦源灣 兄源清 **李夢辰** 

宋師襄 麻僖 王道純 田時震 朱崇德 崇德子國棟

文。 教諭。萬曆 尚文並奇二生,曰:「熊生,干將、莫邪也,賀生,夏瑚、商璉也。」舉於鄉。 賀逢聖,字克繇,江夏人。 四十四年,殿試第二人,授翰林編修。 與熊廷弼少同里閈,而不相能。 爲諸生,同受知於督學熊尚 家貧,就應城

冤,意逢聖且沮之。 天啓間 ,爲洗馬。 逢聖作色曰:「此乃國家大事,吾安敢小嫌介介,不以明」即具草上之。 當是時,廷弼已再起經略遼東矣。 廣寧之敗,同鄉官將揭白廷弼之

列傳第一百五十二 賀逢聖

湖廣 建 是魏忠賢 生 一同 ,忠賢聞上梁文出逢聖手,大喜,卽日詣逢聖。 逢聖 誤, 借銜陋 習

耳。」忠賢咈然去,翌日削逢聖籍。

莊 烈帝即 位,復官,連進 秩。 九年六月以禮部尚書兼惠閣大學士,入閣輔政,加太子太

保、改文淵閣。 <del>+</del> 年致政。 十四年再入閣。 明 年再致 政

之不 逢聖爲 如延儒。 人廉靜, 束修砥行。 及予告,宴餞便殿,賜金,賜 帝頗事操切, 坐蟒 逢聖終無所匡言。 0 感激大哭,伏地不能起,帝亦汍 其再與周延儒同召,帝待 瀾 動容焉。

有黑 也。 面 壬戌 走三百里, 如 子在 賊 生。 晦 是 來自 時 財財 以冬十一月壬子殮,大夷揮淚而 其 湖廣 陷武昌,執逢聖。 持一 左手,其徵是。」覺而異之,竢於湖,赫然而 夏,去以秋云。 「賊大擾。 僧帽、一袈裟來貽逢聖。 明 年春,張獻忠連陷蘄、黃,逼江夏。 大東望行而祭,有神夢於湖之人,「我守賀相殊苦,汝受 叱曰:「我朝廷大臣, 若曹敢無禮 葬之。 逢聖反其衣曰:「子第去,毋憂我。」如 尸出、驗之果是、蓋沉之百有七十日, 有大冶· **贼**麾使去,遂投墩子湖 人尹如翁,逢 翁 去。 而 聖 丽生, 視之, 五月 死

觐 明 初 , ,城之陷也,逢聖載家人以其朐廳,出墩子,鑿其觝艙,皆溺。 子 婦 曾氏、陳氏、孫三人,次子光明自他所來,凡二十餘人。 福王時,贈少傅,諡文 賀氏死者,妻危氏,子

忠,祭葬廕子如制。

如翁去,歸大冶。大冶城破,其慷慨而死者,如翁也

州,血漬地,久而 冠以爲揭帖,援筆判其上。 授 酒,或劾之,乃致仕。 翰 林編 其後 修。 有傅冠。 崇禎十年秋,由禮部右侍郎拜尚 **猶鮮**。 冠,字元甫 大清下江西,冠走匿門人泰寧汪亨龍家。 旣知悞,惶恐引罪,帝卽 進賢 人。 祖炯,南京 書兼 東閣 放 刑部 歸 大學士 尙 唐王 書。 一時,命以原官督師江 。性簡易,有章奏發自御前, 亨龍執而獻之有司,殺之汀 天啓二年,冠舉進士第二, 西。 喈

南 居益,字思受, 渭南人,尚書企仲族子、師仲從子也。 曾祖從吉與曾伯祖大吉皆進

士。兩人子姓,科第相繼。

其家 少卿,進太僕 如故,餘所司 ,夫婦並 企仲,大吉孫,萬曆 議 行。 卿 殁,企仲呼其子還之。 三十年,帝以疾詔免 吏、刑 八年進士。 二部尚書李戴、蕭大亨遲數日未奏, 吏部尚書孫丕揚 以祖母年高,請終養。 礦 稅, 釋繫囚, 以爲賢, 錄建言貶斥諸臣。 祖母旣歿,授刑部主事。 調 企仲請亟罷二人, 而敕二部 爲己屬, 歷文選郎, 旣 而 悔 Ž, 命礦 擢 客寓貲 太 稅 僕

列

傳

明

乃止。 信 귮 如 明 以 詔 詔 老致仕 0 奉 而 給 行 帝 事 益 怒, 中 帝 師仲 張 大 鳳 悲 並 父 翔 奪 軒 傳輸 迎 其 吏部 俸 帝意,劾企仲 页 停二事,落 且命 郎中 益 嘗著通鑑 重 他事,遂削 前 企 貶謫 仲 綱目前 官 官。 鄒元 籍 給事 編 標等罰, 天啓初 中蕭 師 仲 近高 欲以 起太常卿, 至南京 鉳 御 史李培 禮 言 部 者 累遷南京 尙 書 諸 、余懋衡 閣 臣 吏 . 力 部 亦 爭 尙

雁 門參政 居益 少 歷按察使 属 操行, 、左右布 舉萬曆二十九年 政 使,並 在 進士 Щ 西 一,授刑 部 主 事 o 三遷廣 平知 府 擢 Ш 西 提 學副 使,

舶 不聽。 窮蹙 鬚髮,所謂 人 人 不及己,格其賞。 不能靖。 招旦, 據彭湖 , 攻之, 天啓 泛舟 乃立祠以祀,勒碑於彭湖 說攜大泥、咬唱 會居 叉寇 求市 二年入為太僕 和 去, 闒 念 廣 逐擒 國 巡撫 代 東 給 也, 周 香 文律,海患乃 事 徐 祚 Щ 自昔不 中 吧。 澳, 卿。 學聚令轉販之二 賊 黄承昊復 方犯漳、泉,招 皆敗, 賊 明 通中 前高 年 及 擢 息。 主, 不敢 平遠臺 論 右 文律懼, 居益 由 副 Ŧi. 歸國,復 大泥 國。 都御 年遷 倚 日本、 傍門戶 遣 史、巡 「咬噌吧二 工部 使求款, 國 大泥、 入彭湖 險遠, 右侍 ,躐躋通 )撫福 咬咽 求 郎, 斬 建。 或 市 商 通 之。 加田 總督河道。 顯,遂削籍去。 ,且築城焉。 舍而之呂宋。 閩 紅毛夷者,海外雜 及海寇李 築城 商 鎭 萬 海港、逼 曆 魏忠賢 旦等為 巡 中,奸民 夷 圓 撫 入疑 人 商 種, 銜 贼 助。 計品 周 居 風 呂宋邀 潘 亦 闕訟之、 紺眼,赤 益 居徐 秀引 櫃 拒之, 一般功 其 使 贼

者,留三十萬,紓其急,報可。畿輔戒嚴,居益在通州,爲城守計甚備。會工部尚書張鳳翔 坐軍械不具下吏,四司郎中瘐死者三,遂詔居益代鳳翔。未幾,試礮而炸,兵部尚書梁廷棟 劾郎中王守履失職。守履懼,詆兵部郎中王建侯誣己。廷議不如守履言,遂下獄。 崇禎元年起戶部右侍郎,總督倉場。陝西鎭缺餉至三十餘月,居益請以陝賦當輸關門 居益疏

子禮部主事居業,皆不從。明年正月,賊遣兵擁之去,加炮烙。二人終不屈,絕食七日而死。 十六年,李自成陷渭南,責南氏餉百六十萬。企仲年八十三矣,遇害。誘降居益及企仲 據,帝以爲徇私,削籍歸。廷杖守履六十,斥爲民。專敍城守功,復居益**冠帶**。

樸性 出行 中。 .剛果,不能委蛇隨俗,尤好與中官相搘柱,深爲魏忠賢所惡。 山海外,勢洶洶。織造李實訐周起元。羣璫索冬衣,辱尚書鍾羽正。 中官王添鹤選淨身男子,索賄激變。守陵劉尚忠鼓陵軍挾賞。 周 士樸,字丹其,商丘人。萬曆四十一年進士。 除曲沃知縣。 泰昌元年徵授禮科給事 會當耀京卿,忠賢持不 劉朝等假齎送軍器名, 士樸皆疏爭。士

下,士樸遂謝病歸

<u></u> 崇禎元年起太常少卿,歷戶部左、右侍郎,拜工部尚書。 帝命中官張彝憲監戶、工二部 列 傳 第 百 五. 十 周 士: 樸

元 出 納 以遂平長公主整價 士樸恥之,數與 刨 一大樸 齒。 不引瑞安大長 彝憲訐 於帝,士樸疏對辭直, 公主例,而壽寧大長公主薨,則引瑞安例 帝 無以難 o 未幾, 駙馬都尉 。 上 立硫醜 齊贊

沈同 日縊 十五年, 死。 廷臣交薦,不召。 其年八月,李自成陷商丘,與妻曹、妾張、子舉人業熙、子婦

詆之,遂削其

籍。

啓初,歷考功、文選員外郎, 皇長子未踐阼,內侍導幸 饑,兩旌孝義。 忠賢毁天下書院,維 呂維 祺, 字介儒,新安人。 維祺 棋立芝泉講會 舉 萬曆 小 四十一 南 進驗 城。 祖母牛氏以守節被旌。 封郎 一,
祀伊 年進士、授兗州推官、擢吏部 維 祺 中, 謁 洛七賢。 見慈慶宮,言梓宮在殯,乘輿不 告歸。 開封建魏忠賢生祠,遺 父孔學, 主事 事母孝, 捐粟千二百石振 , 更 · 得輕 歷 書士大夫戒勿預。 四 動 司。 乃止。 光宗崩,

榷 其冬,奏防微八事,言:「陛下初勤批答, ·,及擬旨一不當,改擬徑行,豈無當執奏,當防二。 崇禎 完 年起尚寶卿,遷太常少卿,督 四夷館。 今或留 中, 明年四月,廷議軍餉, 留 初無疑厭,疑厭諸臣自取, 中 多則疑慮 起,當: 維祺 防 陳奏十五事 0 今且共、夔 初 虚懷商

當防七。 愼 並 刑 進,當防三。 獄,今有下 初樂讜言,今或譴 詔 初日御講筵,今始傳発,當防四。 獄 者。 且登聞頻擊,恐長嚚訟 訶 時及,當防八。」帝優旨報之。 風,當防六。 初寡嗜慾,慎宴游,今或偶涉,當 初重廷推,今間用陪,非常典, 防 Ħ.

初

比較以完積案,設本科以重題覆,時會計以覈支收,定差序以杜營私,禁差假以修職業。 稱善,卽行之。 百 萬 ;大者彈奏,小者捕治。 三年,擢南京戶部右侍郎,總督糧儲。 立法嚴 督 市 課, 設會計簿,鈎考隱沒侵欺,及積逋 倉庾 漸充。 條上六議,曰稽出入 不輸, 以杜侵漁,增 各數十 帝

省。 陽 立 亦 伊洛會,及門二百餘人。 旋告陷。 八年正 六年拜南京兵部尚書,參贊機務。 月,賊犯江北,遺參將薛邦臣 大計拾遺,言官復刻 著孝經本義成,上之。 他事,遂除名。 清冒伍八千餘名。 防 全椒 ,趙世臣戍浦口。 時維祺父孔學避賊洛陽,維 請申飭江防。 世臣潰走, 鳳陵單外為憂, 南京 祺 乃歸留洛 震動, 鳳

洛陽 贼 局 浴有 振 濟。 識 北 十二年,洛陽 維 城。 祺 事聞,復官。 者 夜半,總兵王紹 日 子子 大饑。 非振 然饑民 維 饑呂尙 禹之軍 祺 勸 多從賊 福王常洵散財餉士,以振人心,王不省。 書乎? 有騎 者,河南賊復 而馳者, 我能活爾,爾可以間 周呼於城 大熾。 Ĩ; 無何,李自成大舉來攻 去。」 城外亦 維 祺 呼 而 弗 應,財 應之,於是城 乃盡出 擁維祺 維 私廩,設 祺 分守 陷。

列

|安者 十四四 等死 時 福 年之正 耳, ,十六年城陷,家亦 王 常 阴 洵 屈 匿民· 月某日 膝 於賊 含中 也。 」王瞠 ·,賊跡 破。 維 祺 不 而 年五. 語。 執之,遇維祺於道。 于 見賊渠 有五 , 贈太子少保, 於 周 公廟 維祺 按 其 祭葬, 反接,望見王,呼曰:「王,綱常 項使跪,不屈,延頸 **廕子如** 制 而 維祺 就 刃 之家 而 死。 至 在新 重 時

福王 立南京, 弟維 加 字泰孺, 贈維祺 太傅,諡 由選貢生爲樂平知縣者也。 忠節 至是解職 歸, 亦抗節 死。 贈按察僉事

轉左。 削 長銀定、歹成 **心順籍。** 王家禛,長垣人。 崇禎元年攝部事, 已,敍甘肅功,復其冠 擾西鄙 二十餘年。 萬曆三十五年進士。 邊餉 不 家 以 帶 禎 時 至,三犯三却之,先後斬 發。 秋, 天啓間,歷官左僉都御史, 遼東兵鼓躁, 巡撫 省五 畢自 百 四 肅自 + 巡 撫甘肅。 縊 擢 死。 戶 部 右侍 帝 松 大 Щ 郎, 部

陝西 、四川、江北軍務,代盧象昇討賊。 九年七月,京師被兵,起兵部左侍郎,尋以本官兼右僉都御史,總 會 河南巡撫陳必謙罷,即命兼之。 理 河 督將 南、 湖廣 士會剿賊馬 山西

海、侯 歸 進忠等於南陽,復遣兵救襄陽,大戰牌樓閣。 慰慰 馭 諭 犒賞, 民等降於必謙, 計 旦, 發往南陽討土寇楊 至是復叛, 故家禎 四 有是遣。 以 去。 其冬, 楊 其後 四 家丁 者 南陽 舞陽 ,鼓躁, 同 劇盜 燒開 知萬年策與監 也。 封 西門。 初, 四 紀推 與其 家前 官湯開 黨 夜 郭三 自 外

遠,諸將左良

玉、牟文綬等連破

四。

四焚死,其黨亦

爲諸

將

所擒

誅

云

之,李自成陷京師 '玉 以 援安慶, 家 丁之變心 當是時, 家順 流 輕之。 不遣。 賊 ,遣兵據長垣 悲 趨江北, 明年四月乃以總理授熊文燦,令家禎 秋, 劉 國能 留都震驚。 ,設僞官。 犯 開封,裨將李春貴等戰歿。 言者謂家 家頑與其子元炌並自經 順奉 命討安慶賊,未嘗一 專撫 河南。 議罪, 死。 文燦未至, 詔遣左良 家順落職 出中州。 閒住。 帝亦

也,爲元子者爲 者非忠。 不 熹宗 知 焦源 嗣 溥,字涵一,三原人。 孝元 張差持梃, 位,移宮議起,刑部尚書黃克續請寬盜寶諸奄。 、孝和,光宗后也,爲二后者爲忠,則爲李選侍者非忠。 忠,則爲福藩 危在 呼吸,尚忍言哉!況當先帝御極之初,忽傳皇祖封后之命。 者非忠。 萬曆四十一年進士。 孝端、孝靖、神宗后也,爲二后者爲忠,則 歷知沙河、濬二縣,考最,召爲御史。 源溥折之曰:「光宗,神宗元子 貴妃三十年心事,人 為鄭貴妃

誰

列

傳

第

百

五

+

王

家

醎

焦 源

溥

痛哉 也。 比,如聖諭阻陛下於煖閣,挾陛下以垂簾,及凌虐聖母狀,有臣子所不忍言者。今卽爲選侍 督不可不奪也,崔文昇不可不磔也。若竟置弗問,不幾於忘父乎!李選侍一宮人,更非貴妃 不得,治容進矣。張差之梃不中,則投以女優之惑,崔文昇之藥不速,則促以李可灼之丸。 乞憐,第可求曲宥前辜,量從優典,而移宮始末不可得而抹撥也,盜寶諸奄不可得而寬宥 !先帝欲諱言進御之事,遂甘蒙不白之冤。今卽厚待貴妃,始終恩禮,而鄭養性之都 若竟置諸奄弗問,不幾於忘母乎」疏上,舉朝寒懼。

欲甘心源溥,遂移疾歸。 天啓二年憂歸。 服闋還朝,出按眞定諸府,例轉鳳陽兵備副使。 時崔文昇出鎭兩淮,

被執,勒令輸金。 振增餉,當事不能應。 **僉都御史,巡撫大同。時邊事日棘,兵缺伍,餉又久乏。** 崇禛二年起故官,分巡河東道,遷寧武參政,有平寇功,就遷山西按察使。 源溥瞋目大罵,賊拔其舌,支解之。 踰年,自劾求去,遂罷歸。 十六年冬,李自成陷關中,與從兄源清同 歲洊饑,民淘馬糞以食。 源溥請蠲 七年擢右

年七十。至是抗節,不食七日死。 源淸,字湛一,由進士歷官宣府巡撫。 七年秋坐萬全左衞失守,奪官謫戍。 久之釋還,

遠始 澤劫 維華,门福 鄉兵, 宗祿 兵望賊 犯 命。 言:「中外交訌,秦、晉、齊、魯多亂,兩河居中尤要地。 東 兵部議,賊已從澠池潛渡。 ,請敕河南諸道監司急防渡口 曹、 庫 西 累遷本科左給事 併徵,南陽 兩 李夢辰,字元居,睢州人。 濮間 向。 治甲冑,尤以 殺 而 [日] 人,偃師 奔,尤世威、徐來朝之兵離汛 標兵、磁兵,新舊不滿七千,一 驕抗 建巡按應喜臣薦周維京,冀並翻逆案。 之盜,道梗三百餘 加 如 列營對壘。 派,河決歲歉,郵傳催科之患百出,民室 此,安可不重治。」 收拾人心爲本。」帝命所司嚴飭。 中。 復言:「將驕軍悍,鄧玘、張外嘉之兵弑主而叛,曹文詔、艾萬年之 且全昌等會剿豫賊,隨處逗遛,及中途兵變,全昌竟東行,光 自是中州郡縣無日不告警矣 里,河北 崇禎元年進士。 0 而 巡撫移 帝頗採其言。 · 而遁, 有 有警,防禦何資。 回賊。 駐衛輝, 今者,張全昌、趙光遠之兵且倒戈為 授庶吉士,改兵科給事中。 夢辰 夢辰疏駁之,世濟、喜臣皆下更謫戍。 進吏科都給事 與 歷陳其狀, 六年冬, 鉅盜盡萃河北。 山西、保定二撫臣掎角急擊。 鉛硝久市 如如 今日之務急防河,繕城,備器,練 懸罄,生計日不支,急難誰肯用 請敕將吏急防。 直未償,漕米歲輸累無已, 中。 都御史唐世濟萬霍 時盜起陝西,山 夢辰慮其南 觚矣。 五年上疏

帝方

列

10

第

某 賄 大學 尋 擢 士, 太 常 求爲 少 卿 副 ,累遷至 都御 史者。 通 政使。 邏卒廉得之, 坐代人削章奏,貶秩 詞連夢辰。 調任。 帝令夢辰 未幾, 自 [奏,事 有持 得 金 屬中 白。 然夢辰 書 含人

竟

坐是

削

籍

才 城 去 主 守。 遣其客說降, 五 無何 年春, 賊攻開封,不克,遂去,陷 賊 從他門 且進之酒。 入, 擁夢辰 夢辰覆杯於地,太息起,扼吭而卒。 見羅汝才。 西華、屠陳州、逼 汝才問所欲, 睢州。 日 時州缺正官 妻王氏, 我大臣, 方病,聞之,不 但欲 ,夢辰歸,即 死 爾。 汝 乘

食死。

宋師襄、耀州人。萬曆四十四年進士。歷官御史。

然朝 護, 籍 朝以內 **豈非握** 夫 平 雖去,而三千虎旅 天啓三年五月請罷 П 燥為淮內援。 卵翼 兵據要,轉相恐喝,以至是乎。」帝以內操祖宗故事,不納。 、朝者, 安歸? 黄克纘也, 內操, 宮府內外,知有朝而不 世未 言: 亡何以戎政內宣。 自劉朝營脫死, 有蓄怨藏怒之人,潛布左右而 知天子。 與沈淮謀爲固龍計。 抄參朝者,毛士 天牖 **聖** 聰, 不爲 龍也, 患者, 又陳足財之策,請減 旦 發露,屏之南京。 淮 今惟有散之而 未幾以構 以募兵爲朝外 陷 削

宋晉、 文、工部侍郎周應秋、登萊巡撫袁可立當去不去, 上供,汰冗官,覈營造,省賚賞。 魏進忠等十二人俱世襲錦 衣。 皆宦官所不便,格不行。 進忠者, 魏忠賢也。 光祿卿須之彦、太常卿呂純如不當來而 奉聖夫人客氏子及中官王體乾、 師襄力諫。 又言左都御史熊尚

帝皆不聽。

秩調任, 師襄遂歸 在數百年休養之赤子也。」明年復命薦部內人才,首及尚書盛以弘。 怒已甚,災害並至,民不聊生。 擬爲責,票擬一定,卽爲明綸,旨之行否,置弗問矣。 行否,置弗問矣。 治,計民生,弭盜賊,而漫無實效。 四年巡按河南。 六曹以題覆爲責,題覆一上,即云畢事,事之行否,置弗問矣。 陛辭,言:「今之言者,皆曰治平要務,乃終日籌邊事,商國計, 相聚思亂,十而八九。 所以然者、臺諫以進言爲責、條奏一入,卽云盡職、 上謾下欺,釀成大患。 臣恐今日之患,不在遼左、黔、蜀,而 魏忠賢責以徇私,貶一 今人怨已極,天 內閣 言之 飭吏 以票

事覺,師襄被逮,繫獄者二年。 崇禎元年召復官,擢太僕少卿,累遷至太常卿,致仕。 至徐石麒爲刑部,始得雪。 十六年冬,賊陷耀州,師襄死之。 奸人宋夢郊假師襄手書營兵部。

年進士,授庶吉士,改兵科給事中。代王長子鼎渭訐父廢長立幼,僖劾代王無君,鼎渭無父。 麻僖,慶陽 人。父永吉,由庶吉士爲御史,終湖廣按察使,以清操聞。僖舉萬曆三十五

{傳。 引去。已,與同官孫振基等劾熊廷弼殺人媚人。又言湯賓尹取韓敬, 言,改用張承廕。「三承廕未至而鎭遠堡、曹莊相繼失事,鎬皆不以實閒。 比試,清納級,汰家丁,恤班操,急邊餉,時亦不能用。遼東巡撫楊鎬請用舊將李如梅,以僖 尋乞假歸。 四十年疏陳納諫諍、舉枚卜、補大僚、登遺佚、速考選數事,不報。已,復請重武科,復 四十五年京察,賓尹黨用事,以僖倚附東林,謫山西按察知 關節顯然,語具振基 僖兩疏劾之, 鎬旋 事

之,遂落職。 天啓二年起兵部主事,歷尚寶丞、少卿,改太常。 崇禎初,復官,致仕家居。 十六年冬,李自成陷慶陽,僖死之。 五年六月,魏忠賢黨御史陳世埈劾

參政張爾基。 勢重,卒不能返。 格之說,言銓除、舉劾、考選,甲乙科太低昂,宜變通,則賢才 王道純,字懷鞠,蒲城人。天啓五年進士。授中書舍人。 四年劾吏部尚書王永光當去者三,不可留者四,不納。 流賊躪關中, 道純請急振饑民,毋使從賊, 報可。 日廣。 崇禎三年擢御史。 帝命所司 E, **刻罷光祿卿蘇晉** 卽 行,而甲科 疏陳破資

巡按 Щ 東。 其時李九成、 扎 有德叛於吳橋, 南 下。 道純移書巡撫余大 成, 令討 ,捕, 大

代 及 成 大 賊 不 成 陷 信。 登州 謝璉 再促之, 代元化,並 元化被繁, 遂托疾請告 入 大成 來州, **獪主招** 與登萊巡 爲 賊 撫。 困。 撫 道純實、 在外 孫元 調 化 行抗 度, 遣 使招 疏 止 力爭。 道 撫。 純 一 人。 帝卽 道 純 命 以 賊 道純 爲 遣 非,請 人僞乞撫, 監軍。 敕 二撫速 及徐從治 道 純 剿。 焚

萊州 被圍。 我 軍 屢挫,安能 複戰? 乞速發大軍 ,拯此危土

書

斬

使,

馬也

疏言:「贼

日

以撫愚我,

撫

而

六城

《陷,再:

撫

而

登州

亡,三撫

而

黄縣

失,今

四

撫而

純 叉 道 頓 賊 純 逐 劾明遇、 兵 中 一并劾延儒。 還京 招 不 時 连, 諭 周 而 延 國臣 日議 儒 賊 明遇亦罷去。 **佯許之**,攻圍 、熊明遇主撫議, 撫,尋棄軍奔。 交通悞國十罪,語侵延 帝皆不問。 宇烈下 如 已而 故。 道純復請速討,不納。 道 贼平,道純竟坐監軍溺職,斥爲民 純反被責讓。 吏,引道純 及總督劉字烈 儒 疏未下, 分過。 明 至, 遇 延儒洩之國臣, 進兵沙河,道純 道純疏駁其所奏十 遣 迨巡撫謝 職方主事張國臣贊畫軍事, 璉被執,帝震怒,逮宇烈,召 |國 與之俱。 餘事,命 亦劾道純十罪,道 宇烈 所 司 中 或 并按。 情怯, 巨人

五 年以廷臣薦,將起用,未果。 及李自成陷蒲城 道純抗節死。 福王時,贈卹如制。

將 不 白徐大化、 劾劉 力援之。 部 等。 乘 尙 間 書范 鴻 田 抵 未幾, 訓 時 隙,害不 時震言:「弘勛 濟 納 震 霍維 世 田 富 又刻永光 仰金, 一順 華 平 天 人。 可勝言。」 諸人之奸 巡撫單明詡 屬吏部尚書王永光用 及溫 天啓二年進士。 因閣 而斥去之,安得借此爲翻案之端 體仁,忤旨 因薦故光祿少卿史記事,蕭然 臣劉 、御史卓邁黨逆罪, 鴻 訓 賄 ·切責。 歷知光山、 敗,輒肆瀆辯。 為四川 御史袁弘勛者,永光 巡撫, 靈寶。 而請 不知 仰 **免故** 崇禎 **迄罷** 四壁, 耶? 鴻訓之差快人意者,正 御史夏之令誣坐贓, 二年入爲御史, 去。 弘勛 講學著書, 心腹也,被劾罷 時震以發鴻訓 計 行, 亟宜 大化、 疏劾南京戶 召用,帝 職 私 並從之。 維 以 永 進 華輩 能 秩 别

流 賊 陷富 時震旣屢忤永光,遂以年例出爲江西右參議,調山西,就遷左參政,罷歸。 平,授以僞職,不屈死。 十六年冬,

**欺**罔 即 張 五 捷薦逆案呂純如,國棟上疏 同 罪,帝切責文燦。 邑朱崇德,字淳菴,侍郎國棟父也。 而 國棟累遷巡撫山東右僉都御史,督治昌平。 力詆。 已,又劾兩廣總督熊文燦,招撫海盜劉香,奏詞掩飾 國棟中天啓二年進士,歷戶科給事中。 十五年卒。 吏部侍

國棟卒之明年,富平陷於賊。 賊驅崇德往長安, 中道稱病。 賊見其老,以爲果病也,聽

之歸。 關中諸死節者甫議卹,而國變至。 崇德曰:「始吾所以隱忍者,爲九族計也,今得死所矣。」乃北面再拜, 福王立,始贈崇德右副都御史。 自縊死。 是時

欺, 釀成大息」,末季之習,痛哉其言之也。 逢聖與南居益、周士樸公方清正,日維祺邃學純修,固中朝賢士大夫。 垢而終以自戕者,亦不少矣。 贊曰:流賊荼毒中原,所至糜爛。 賀逢聖諸人從容就義,臨患難而不易其節, 士大夫遘難者,不死則辱。 然當其時, 宋師襄所謂「上謾下 一死顧不重哉! 徘徊隱忍蒙

#### 校勘記

都御史唐世濟薦霍維華 唐世濟,原作「唐濟世」,據下文及明史稿傳一四六李夢辰傳改。

改用張承廕 張承廕, 原作「張承蔭」, 據本書卷二三九及明史稿傳一一六張臣傳附子承廕傳

改。下同。

# 明史卷二百六十五

# 列傳第一百五十三

范景文 倪元璐 李邦華 王家彦 孟兆祥 子章明

### 施邦曜 凌義渠

**做二十人名上。命所在有司各給地七十畝,建祠致祭,且于美諡焉。** 渠、吳麟徵、周鳳翔、馬世奇、劉理順、汪偉、吳甘來、王章、陳良謨、申佳胤、許直、成德、金 皇帝表章前代忠臣,所司以范景文、倪元璐、李邦華、王家彦、孟兆祥、子章明、施邦曜、凌義 東閣大學士范景文而下,凡二十有一人。福王立南京,並予贈諡。皇淸順治九年,世祖章 崇禎十有七年三月,流賊李自成犯京師。十九日丁未,莊烈帝殉社稷。文臣死國者,

擢 授 東昌 吏部 范 景 稽 推 文 勳 主 字夢章、 事 以 名節 ,歷文選員 自 吳橋 勵,苞苴 人。 (外郎 父永年, 無敢及 ,署選事。 其 南寧知府。 門。 泰昌時,羣賢 歲大 、饑,盡 景文幼負器識,登 、登進,景文力爲多, 心 振 救、闔郡 賴之。 萬 曆 葬 四 乞假 + 用 治 年 去 行 高等, 進士,

附 東 林、孤立 世 天 啓五 是 非 公 年二月起文選郎中。 行 論 意而已。 ,當與天下萬 嘗言:「天地 世共 魏忠 一之。」時以爲 人才,當爲天地惜 賢暨魏廣微中外用事 名言。 視 之。 事 未 ,景文同 朝廷名器, 彌 月 ( )謝病 鄉, 當 去。 不 爲 朝 計 廷守之。天 其門,亦不

平 一,遠近 有法 崇禎 帝令永著 勤 軍 侍 王, 初 特 以 精。 無恐。 餉皆自 用 爲例。居二年,以父喪去官 薦 嘗請有 召 明年三月擢兵部 齎。 爲太常 司實行 抵涿 少卿。 州 條 四方援兵多剽掠, 二年七 添注 鞭法、徭役 左侍郎,練兵通州。 月擢 右僉都御史, 歸之官、民稍 獨 河南 軍無所犯。 巡 :助其費,供應平買,不立官價 通鎭初設,兵皆召募,景文綜 撫 河 南。 移駐都 京師 戒嚴,率所部 門, 再移昌

已,敍援剿 景文倡同列合詞論教。 扼除 七 年 陽, 冬,起南京 功,復故秩。 有警輒發,節 大右都御 十一年冬, 制 史。未幾,就拜兵部尚書,參贊機務。屢遺兵戍池河、浦口 帝不悅,詰首謀,則自引罪,且以衆論僉同爲言。 精明。 京師戒嚴,遺兵入衞。 嘗 與南京 戶部尚書錢春以軍食相訐奏,坐鐫 楊嗣 昌 奪情輔政,廷臣力爭多被 帝益怒,削籍 秩 視

爲民

景文謝。十七年二月命以本官無東閣大學士,入參機務。未幾,李自成破宣府,烽火偪京 所拜辭闕墓,赴雙塔寺旁古井死。景文死時,猶謂帝南幸也。贈太傅,諡文貞。本朝賜諡 都城陷, 趨至宮門。宮人曰:「駕出矣。」復趨朝房, 賊已塞道。從者請易服還邸, 景文曰: 「駕出安歸。」就道旁廟草遺疏,復大書曰:「身爲大臣,不能滅賊雪恥,死有餘恨。」遂至演象 有請帝南幸者,命集議閣中。景文曰:「固結人心,堅守待援而已,此外非臣所知。」及 十五年秋,用薦召拜刑部尚書,未上,改工部。入對,帝迎勞曰:「不見卿久,何癯也?」

倪元璐,字玉汝,上虞人。父凍,歷知撫州、淮安、荆州、瓊州四府,有當官稱

暨復命,則莊烈帝踐阼,魏忠賢已伏誅矣。 天啓二年,元璐成進士,改庶吉士,授編修。 楊維垣者,逆奄遺孽也,至是上疏並詆東林、崔、 册封德府、移疾歸。還朝、出典江 西 鄉 試 。

%。 元璐不能平,崇禎元年正月上疏曰:

臣頃閱章奏,見攻崔、魏者必與東林並稱邪黨。 夫以東林爲邪黨,將以何者名催、

列

魏? 存、屢奉明綸,俾之酌用,而當事者猶以道學封疆,持爲鐵案,毋亦深防其報復乎。然 者以忠厚之心曲原此輩,而獨持已甚之論苛責吾徒,所謂舛也。今大獄之後,湯火僅 攻去之,其人已喬嶽矣,雖百東林烏能報復哉。 臣以爲過矣。年來借東林媚崔、魏者,其人自敗,何待東林報復。若不附崔、魏,又能 不可失名義;士人行己,寧矯激,必不可忘廉隅。 曰「無可奈何,不得不然耳」。充此無可奈何、不得不然之心,又將何所不至哉!乃議 公然背畔名義,決裂廉隅。 頌德不已,必將勸進,建祠不已,必且呼嵩。 而 懒,繩人過刻,持論太深,謂之非中行則可,謂之非狂狷不可。 一、魏旣 邪黨矣,擊忠賢、呈秀者又邪黨乎哉!東林,天下才藪也,而或樹高明之 自以假借矯激爲大咎,於是彪虎之徒 且天下議論,寧假借,必 人猶 且寬之

豈平論哉。 奸璫,則又不可謂後之人能殺廷弼,而爌獨不能殺之也。又如詞臣文震孟正學勁骨, 擬熊廷弼一事耳。廷弼固當誅,爌不爲無說,封疆失事,纍纍有徒,乃欲獨殺一 然。夫孫愼行,君子也,爌且不附,況他人乎!而今推轂不及,點灼橫加,則徒以其票 可爲大怪。 臣叉伏讀聖旨,有「韓爌淸忠有執,股所鑒知」之諭。而近聞廷臣之議,殊有異同, 此 **爌相業光偉,他不具論,即如紅丸議起,舉國沸然, 爌獨侃侃條揭,明其不 爌所以閣筆也。** 然廷弼究不死於封疆而死於局面,不死於法吏而死於 廷弼,

列傳第一百五十三 倪元璐

有古大臣之品,三月居官,昌言獲罪,人以方之羅倫、舒芬。 |譚不已,將毋門戶二字不可重提耶。用更端以相遮抑耶。書院、生祠,相勝負者也, 而今起用之旨再下,謬悠

生祠毁,書院豈不當修復!

時 · 柄國者悉忠賢遺黨, 疏入, 以論奏不當責之。於是維垣復疏駁元璐。元璐再疏曰:

下爲公」。 臣 前疏原爲維垣發也。陛下明旨曰「分別門戶,已非治徵」,曰「化異爲同」,曰「天 而維垣則倡爲孫黨、趙黨、熊黨、鄒黨之說。是陛下於方隅無不化,而維垣

實未化,陛下於正氣無不伸,而維垣不肯伸。

辱。 正,又何誅乎廷弼。 愛錢」,「廠臣知爲國爲民」,而何責乎三才。 之楊漣,首劾崔呈秀之高攀龍乎!忠賢窮凶極惡,維垣猶奪稱之曰「廠臣公」,「廠臣不 有之事,已爲失平。 天下誰不知,維垣猶守是說乎?維垣又怪臣盛稱文震孟。 自 蟒玉馳驛語,何 維垣怪臣盛稱東林,以東林嘗推李三才而護熊廷弼也。 此義不明,畏破帽策蹇者,相率而頌德建祠,希蟒玉馳驛者呼父、呼九千歲而不 至廷弼行賄之說,乃忠賢借以誣陷淸流,爲楊、左諸人追贓地耳, 可非。 維垣又怪臣盛稱韓爌。 維垣試觀數年來破帽策蹇之輩,較超階躐級之儔,孰爲榮 夫舍爌昭然忤璫之大節,而加以罔利莫須 五彪五虎之罪,刑官僅擬削奪,維垣不駁 夫震孟忤璫削奪,其破帽策 抑知東林有力擊魏忠賢

標以偽學見驅,而 則 作,可勝歎哉 在,豈遂至此。 不 म् 當 日 !維垣又怪臣盛稱鄒元標。 忠賢驅逐諸人,毁廢書院者,正欲箝學士大夫之口,恣行不 逆璫遂以眞儒自命。 學宮之內,儼然揖先聖爲平交。 夫謂都門聚講爲非則可,謂元標講學有他腸 義耳。 使元標諸人 自元

非計 維 崔、魏所借,而勁節不阿,或遠或逐者,亦正人也。以崔、魏定邪正,猶以明鏡別妍媸。 假令呈秀一人舞蹈稱臣於逆璫,諸臣亦以爲無可奈何而從之乎? 借 爲崖、魏所恨其牴觸,畏其才望而必欲殺之逐之者,此正人也。有攻東林之人,雖爲 崔 臣使從叛逆,諸臣亦靡然從之,以爲無可奈何而然乎。惟垣又言「今日之忠直,不當以 貫滿久矣,不遇聖明,誰攻去之。 垣 「魏爲對案」,臣謂正當以崔、魏爲對案也。夫人品試之崔、魏而定矣,故有東林之人, 矯 不 也。 激,而不頌不建,豈不猶賴是人哉!維垣以爲眞小人,待其貫滿可攻去之,臣以爲 維垣又駁臣假借矯激。夫當崔、魏之世,人皆任眞率性,頌德建祠。 取證於此,而安取證哉 必待其貫滿,其敗壞天下事已不可勝言,雖攻去之,不已晚乎!卽如崔、魏, 維垣終以無可奈何爲頌德建祠者解,臣以爲非訓也。 又令逆璫以兵劫諸 使有一人假

總之東林之取憎於逆璫獨深,其得禍獨酷。 在今日當曲原其被抑之苦,不當毛舉

其尺寸之瑕。乃歸逆璫以首功,代逆璫而分謗,斯亦不善立論者矣。

疏入,柄國者以互相詆訾兩解之。當是時,元兇雖殛,其徒黨猶盛,無敢頌言東林者。自元 璐疏出,清議漸明,而善類亦稍登進矣。

詞 今爲金石不刊之論者,誠未深思。 臣謂翻郎紛囂,改亦多事,惟有燬之而已。」 帝命禮部會 不害塤篪,此一局也。旣而楊漣二十四罪之疏發,魏廣微此輩門戶之說興,於是逆璫殺人 局也。 創立私編,標題要典,以之批根今日,則衆正之黨碑,以之殆死他年,卽上公之鐵券。又一 頌德稱功於義父。又一局也。網已密而猶疑有遺鱗,勢已重而或憂其翻局。崔、魏諸奸始 則借三案、羣小求富貴則借三案。經此二借,而三案全非矣。故凡推慈歸孝於先皇,正其 於幾先,爭移宮者持平於事後。數者各有其是,不可偏非。總在逆璫未用之先,雖甚水火, 者力護東宮,爭挺擊者計安神祖。主紅丸者仗義之言,爭紅丸者原情之論。主移宮者弭變 三朝要典一書,成於逆豎。其議可兼行,其書必當速燬。蓋當事起議興,盈廷互訟。主梃擊 元璐尋進侍講。其年四月請燬三朝要典,言:「梃擊、紅丸、移宮三議,鬨於淸流。而 由此而觀,三案者,天下之公議,要典者,魏氏之私書。三案自三案,要典自要典也。 議上,遂焚其板。侍講孫之獬,忠賢黨也,聞之,詣閣大哭,天下笑之。

元璐歷遷南京司業,右中允。 四年進右論德,充日講官,進右庶子。上制實八策,日間

貌。其端政本,悉規切溫體仁。其伸公議,則詆張捷薦呂純如謀翻逆案事。 虛八策:日端政本,日伸公議,日宣義問,日一條教,日慮久遠,日昭激勸,曰勵名節,曰假體 插部,日繕京邑,日優守兵,日靖隆人,日益寇餉,日儲邊才,日奠輦穀,日嚴敎育。 力攻,元璐疏辨,帝俱不問。八年遷國子祭酒。 捷大怒,上疏 又上制

江償之。 云三登科錄二氏並列,罪跡顯然,何待行勘。」遂落職閒住。 從兄御史元珙,咸言陳氏以過被出,繼娶王非妾,體仁意沮。 歷進,體仁益恐。 王冒繼配復封,敗禮亂法。 元璐雅負時望,位漸通顯。 帝意嚮之,深爲體仁所忌。 一日,帝手書其名下閣,令以履 會誠意伯劉孔昭謀掌戎政,體仁餌孔昭使攻元聯,言其妻陳尚存, 韶下吏部核奏,其同里尚書姜逢元,侍郎王業浩、劉宗周及其 孔昭京營不可得,逐以南京操 會部議行撫按勘奏, 即擬旨 而 妾

事 璐甚,五日三賜對。因奏:「陛下誠用臣,臣請得參兵部謀。」帝曰:「已諭 當是時,馮元 拜戶部尙書兼翰林院學士,仍充日講官。 益不可爲,左支右詘,旣已無可奈何。 十五 年九月詔起兵部右侍郎兼侍讀學士。 | 飇爲兵部,與元路同志,鈎考兵食,中外想望治平。 故事, 祖制,浙 諸邊餉司悉中差,元略請改爲大差,兼兵部 明年春抵都,陳制敵機宜,帝喜。 人不得官戶部。元璐辭,不許。 惟帝亦以用 樞臣,令與卿協 兩 人 晚, 帝眷元 五月超 計。 而

列 第 耳 五 + Ξ 李 邦 華

爲奸。 罪例,且令到官滿歲者,得輸貲給封誥。帝亦從之。 令督撫自催,毋煩朝使。 益,罷之,而專責撫按。戶部侍郎莊祖誨督剿寇餉,憂爲盜劫,遠避之長沙、衡州。 令清核軍伍,不稱職者卽遣人代之。先是,屢遣科臣出督四方租賦,元璐以爲擾民無 元 路請合爲一。帝皆報可。時國用益詘,而災傷蠲免又多。 元 路計無所出,請開贖 自軍興以來,正供之外,有邊餉,有新餉,有練餉,款目多, 元璐 請

餘,廷揚見元璐。元璐鷲曰:「我已奏聞上,謂公去矣,何在此。」廷揚曰:「已去復來矣,運已 至。」元璐又驚喜聞上。上亦喜,命酌議。乃議歲糧艘,漕與海各相半行焉。十月命兼攝吏 十七年二月命以原官專直日講。踰月,李自成陷京師,元璐整衣冠拜闕,大書几上曰: 先是,有崇明人沈廷揚者,獻海運策,元璐奏聞。 陳演忌元璐,風魏藻德言於帝曰:「元璐書生,不習錢穀。」元璐亦數請解職 命試行,乃以廟灣船六艘聽運進。月 贈

少保,吏部尙書,諡文正。本朝賜諡文正 「南都尙可爲。死吾分也,勿以衣衾斂。 暴我屍,聊志吾痛。」遂南向坐,取帛自縊 一而死。

李邦華,字孟閣,吉水人。 受業同里鄒元標,與父廷諫同舉萬曆三十一年鄉試。

諸差 科都 縣 法 値黨 自 不當 祖 相 給 不當專用舉貢 論初起,朝士多詆顧憲成。 用 鏃礪,布衣徒步赴公車。 盡 事中不 人十事:日 用鄉貢。 當內 內閣不當專用 疏 任 . 外間阻,日御史陞遷不當槪論考滿, 日東部乞假不當積至正 子, 上,不報 曰 調簡推知不當驟遷京秩,日進士改敎不當概從內轉,日邊方州 明年,邦華成進士,授涇縣知縣,有異政。行取, 詞臣,日詞臣不當專守館局,日 邦華與相拄,遂指目邦華東林。 詞臣不當敎習內書堂,日六 以是,越二年而 郎, 擬授 後拜 曰 命。陳 御史。 關 倉

弊十 奉,名爲孝順。 疏不由通政,不下內閣,以中旨行之。 錄成遺貲。 則期將復更,然無敢抗言爭之者。 事。 四 十一年,福王之藩已有期,忽傳旨莊田務足四萬頃。 中貴不便,格不行。巡按浙江 貴嗾奸民紀光詭稱機戶、詣闕保留貴代成督造。 疏中刺及之,並劾左右大奄之黨貴者,於是期滿,久不得代。 邦華首疏諫,廷臣 邦華三疏爭,皆不報。 ,織造中官劉成死,命歸 乃相繼 爭,期得 廷臣相 邦華極論 是時神宗好貨, 其 事於 顧愕胎 二人交關作奸罪。光 有司,別遣中官呂貴 ,計田數 巡視 中官有所 銀 必 庫

性好 年以年例出爲山東參議。 別黑 四 十四年引 白。 或勸 疾 其 歸。 委蛇,邦華曰:「寧爲偏枯之學問,不作反覆之小人。」 時羣小力排東林,指鄒元標爲黨魁。 其父廷諫時爲南京刑部郎中,亦罷歸。 邦華與元標 邦華乃辭疾不赴。 同 聞者 里, 益嫉之。 相 師 友, 明 叉

代畢自嚴巡撫天津。軍府新立,庶務草創,邦華至,極力振飭,津門軍遂爲諸鎭冠。進兵部 惡,邦華實召之。乃立勒承宗還鎮,邦華引疾去。明年秋,奄黨劾削其官。 右侍郎,復還家省父。四年夏抵京,奄黨大譁,謂樞輔孫承宗以萬壽節入覲,將淸君側之 天啓元年起故官, 飭易州兵備。明年遷光祿少卿, 卽還家省父。四月擢右僉都御史,

精火藥、專器械、責典守、節金錢、酌兌馬、練大礮九事。 倪。 督勳臣缺,邦華兼攝其事。 試,事竣入營。故事,冬至郊,列隊扈蹕,用軍八萬五千人,至是增至十萬有奇。時方郊,總 明年春幸學,亦如之。命加兵部尚書。時戎政大壞,邦華先陳更操法、愼揀選、改戰車、 崇禎元年四月起工部右侍郎,總督河道。尋改兵部,協理戎政。還朝,召見,旋知武會 所設雲輦、龍旌、寶纛、金鼓、旗幟、甲冑、劍戟,煥然一新,帝

邦華 矢火礮,月一解送,補選鋒壯丁之缺,自是人人思奮。三大營領六副將,又分三十六營,官 核還占役萬,清虛冒千。三大營軍十餘萬,半老弱。故事,軍缺聽告補,率由賄得。 親校,非年壯力强者不錄,自是軍鮮冒濫。三營選鋒萬,壯丁七千,餉倍他軍,而疲弱不異。 包操諸弊。虛冒者,無其人,諸將及勛戚、奄寺、豪强以蒼頭冒選鋒壯丁,月支厚餉。 下令,每把總兵五百,月自簡五人,年必二十五以下,力必二百五十斤以上,技必兼弓 京營故有占役、虛冒之弊。占役者,其人爲諸將所役,一小營至四五百人,且有賣閒、 邦華必 邦華

列傳

爲戢 以三百六十七人計,所用掾史皆積猾。 邦華按罪十餘人,又行一歲二考察之令,自是諸奸

馬,不肖且折橐入錢,營馬大耗。 營馬額二萬六千,至是止萬五千。他官公事得借騎,總督、協理及巡視科道,例有坐班 邦華首減己班馬三之一,他官借馬,非公事不得騎, 自是

無度,歲用不敷。 京營歲領太僕銀萬六千兩,屯田籽粒銀千六十兩,犒軍製器胥徒工食取給焉。各官取 邦華建議,先協理歲取千四百,總督巡視遞節減,自是營帑遂裕

濫

借爲希。

軍,而不習技擊,益爲豪家隱冒。邦華核去四千餘人,又汰老弱千,疏請歸併三大營不另設, 營各置簿,月上事狀於協理,以定殿最。舊制,三大營外復設三備兵營,營三千人,餉視正 由 是戎政大釐。 營將三百六十,聽用者稱是。 一官缺,請託紛至。邦華悉杜絕,行計日省成法。 每小

帝亦報可,著爲令。 餘 石,宜減省。」,邦華因上議軍以十二萬爲額,餉以百四十四萬石爲額,歲省二十二萬有奇。 倉場總督南居益言:「京營歲支米百六十六萬四千餘石,視萬曆四十六年增五萬七千 帝知邦華忠,奏無不從,邦華亦感帝知,不顧後患。諸失利者銜次骨,

mi

怨謗紛然矣。

事張道澤遂劾邦華,言官交章論列,逐罷邦華閒住。 陳情,歸命於帝。 之徒,乃搆蜚語入大內。襄城伯李守錡督京營,亦銜邦華扼已,乘間詆諆。 言。 有命邦華軍撤還守陴,於是偵者不敢遠出,聲息逐斷,則請防寇賊,緝間諜,散奸宄,禁譌 邦華自聞警,衣不解帶,捐貲造廠車及諸火器。又以外城單薄,自請出守。 其年十月,畿輔被兵,簡精卒三千守通州,二千援薊州,自督諸軍營城外,軍容甚壯。俄 會滿桂兵拒大清兵德勝門外,城上發大礮助桂,悞傷桂兵多。 自是代者以爲戒,率因循姑息,戎政不 邦華自危,上疏 都察院都 而諸不逞

請宿 北,防下流不若防 開府采石之山,置哨太平之港,大墾當塗閒田數萬頃資軍 於滌設戍卒,於池河建城垣,於滁、椒咽喉則築堡於藕塘。 重兵,設總督,片檄徵調,奠陵京萬全之勢。 十二年四月起南京兵部尚書,定營制,汰不急之將,幷分設之營。 上流。 乃由浦口 歷滁、全椒、和、相形勢、繪圖以獻。 皆下所司,未及行,以父憂去 儲。 和遭屠戮,請以隸之太平。 徐州,南北要害,水陸交會, 於浦口置沿江敵臺, 謂守江南不若守江 叉請

可問

矣。

邦華前後罷觅家居二十年。父廷諫無恙

艨 南 凝 腫 蔽 江 一接兵 五 入 東下 年冬,起故官,掌南京都察院事,俄代劉宗周 衛,力疾 ۰. 留都 上道。 士民一夕數徙,文武大東相顧愕胎。 明年三月抵 九江。 左良玉漬 兵數十萬,聲言餉乏,欲寄帑 爲左都御 邦華歎曰:「中原安靜土,東南 史。 都城被 兵,即 日 於南京 請 督東

列

傳

第

百

邦華 語如 角耳。 沮 下皆感激,誓殺 追追 · 答書語 謂 家 黜御史無顯過 身 回 人,中官屏息遠伏。 爲 道 頗 大臣 而 恭。 後黜,害政 賊 報 邦華用 忍 國,一 而 些 先 視 已多。 任 便宜發九江 決裂,袖手局外而去乎」乃停舟草檄告良 軍遂安。 推官著貪聲者一人。 其後召對百官,帝輒目注 論罷 帝聞之,大喜,陛見嘉勞。 庫銀 巡按、 干 巡鹽 五 萬 一御史各一人。 臺中 前之, 「邦華 始畏法 而 芸。 身入 舊 邦華跪 、其軍, 奉命考試 例, 玉,責 御史出巡, 開誠 奏移時, 御史, 慰 以 大義。 勞。 數 黜冒濫者 記記 回 良 道考覈。 起立,溫 良玉 玉 及 其 氣

而 外 帝日 且 居 絕。 城 歎 數 藻德漫 爲詩 陷 十七七 日未得命,又請定、永二王分封太平、寧國二府,拱護 ,將行其言。 國 贈太保、吏部尙書,諡忠文。 走宿文信國 君 應 曰:「堂堂丈夫兮聖賢為徒,忠孝大節兮誓死靡渝,臨危授命兮吾無愧吾。」遂投繯 年二月,李 日:「姑待之。」邦華太息 死 社稷,正也,朕志定矣。」 會帝召對羣臣,中允李明睿疏言南遷便,給事 自 祠。 1成陷 明日, Щ 西。 內城亦陷,乃三揖信國曰「邦華死國 邦華密疏請帝固守京師,做永樂朝故事,太子 本朝賜諡忠肅。 而 出。 逐罷 已, 邦華策不 率諸御史登城,羣奄拒之不得上。 議。 未幾, 兩京。 中 賊逼 帝得 光時亭以倡言 都 疏意動 難,請從先 城, 巫詣 ,繞殿 內 洩 監 生於九京 十八日 閣 密 行,且讀 國 A 斜 之。 南都。 言 事。

王家彦,字開美,莆 田 天啓二年進士。 授開化知縣,調蘭 谿。 擢刑科給事 中,彈

權貴無所避。

多 設召募兵,猶驅市 窮港 於官 久 議 淹。 一戈船 行 ,無別兵 崇 閩 禎 海盗 四年請釋大學 相望。 亦無別將,統於各衞之指揮。 劉香擾郡 人而 臣愚以今日策防海,莫若復舊制 一戰之,糜餉擾民無益,敗終不能盡。」時 邑,撫鎭追剿多失利,朝議召募,將大 士錢龍錫於獄,龍錫得減 寨設號船,聯絡 死。 一勤訓 請推行按月 練 o 呼 以爲 練則 應, 舉。 名言。 又添設遊擊等官, 衞 奏報例於四方,獄 家彦言:「舊制 所軍 皆勁卒,不 奉命巡 衞 青,所條 練 雖 人 所 得 雌 支 軍 洋 奏 餼 無 添

納馬 陳 入 不可, 減 冏 折 其半, 寺而 至 又不足用,議馬徵銀 先是,隆慶間太僕種馬額存十二萬五千, 七 且請 萬 馬 而馬政始變。 政 免 至是止二萬有奇, 日 其工役,盡歸行 弛。 家彦 十兩,加草料銀二兩,歲可得銀百 萬曆 極 陳其弊,請改國 九年議盡行改折, 更有 伍。 建議 帝皆褒納其言。 盡 徴 初 邊馬至二十六萬。 行糧 種 馬 南 及西番茶馬之制。 寺歲徵 、月糧、発其 遵化鐵冶 銀 四十四萬 二十二萬, **久廢**,奸 香 言者以民間最苦養馬,所 上者。 兩。 又班軍 北寺五十 民請開之,家彦言 家彦 中 樞 楊博 時巡京營,力 舊額十六萬, 持不 萬 可, 銀

列

僔

第

百

Ħ.

十

 $\equiv$ 

王

家

彦

有害無利。 復有請開開化雲霧山以興屯者,亦以家彦言而止。

者,率百十家成一戶,非富民,不可以朘削。」軍食不足,畿輔、山東、河南、江北召買米豆輸 天津,至九十餘萬石,吏胥侵耗率數十萬。 寇之地, 士大夫家賦銀兩者, 加二錢, 民間五兩以上者, 兩加一錢。 逐戶 科 都給事中。 軍興餉詘,總督盧象昇有因糧加餉之議,戶部尚書侯恂請於未被 家彥請嚴治,帝並採納焉。憂歸。 家彦言:「民賦五兩上

稍寬文網,壹令撫綏,盜之聚者可散,散者可不復聚。又舊制捕蝗令,吏部歲九月頒勘合於 家彥上疏曰「臣見秦、晉之間,饑民相煽,千百爲羣。其始率自一鄉一邑,守令早爲之所, 上考,督責嚴者號循良,不肖而墨者以束濕濟其饕餮,一二賢明吏束於文法,展布莫由。惟 取周官荒政十二而行之,民何至接踵爲盜,盜何至潰裂以極。論者謂功令使然,催科急者書 司,請實意舉行。」帝皆納之。擢大理丞,進本寺少卿。 十二年起東科都給事中。流寇日熾,緣墨吏朘民,民益走爲盜。 盜日多,民生日蹙。

故 恤 一民,復增三十七萬,致舊額反逋,不可不釐正。」帝手其疏,語執政曰:「家彥奏皆善。」敕議 ,請行官牧及金牌差發遺制。 十五年遷太僕卿。家彥向言馬政,帝下兵部檄陝西督撫,未能行。 且言:「課馬改折,舊增至二十四萬兩,已重困。 至是四疏言馬耗之 楊嗣昌不

行。

然軍與方面、不能盡舉也。

攜 燈,步巡 頃之,擢戶部右侍郎。 /城堞 ,人無知 者。 都城被兵,命協理戎政。 翊 日 校 勤惰,將 士皆服, 刨 爭自 日登陴, 勵。 閱視內外城十六門。 初, 分守阜成門,後移安定 雪夜,

門,寢處城樓者半歲。解嚴,賜宴午門,增秩一等。

端。 城察視、家彥從。中官猶固拒、示之手敕、問爋安在、曰:「去矣。」秦、晉二王欲上城、 進止由中官, 返 城下,不死 城,見賊輒降。 二王降賊,即賊 頑督京營, 本朝賜 十七年二月,廷推戶部尙書。 一,自縊 諡忠毅。 又命中官王德化盡督內外軍。 沮諸臣毋得登城, 降卒反攻城,城上人皆其儕,益無固志。 也,賊安得上!」頓足哭。 於民舍。 遭賊焚,殘其一 又縋叛監杜勳上,與密約而去。 帝曰:「戎政非家彦不可。」特留任。 臂,僕收其餘體焉。 偕縉彥詣宮門請見,不得入。 國禎 發三大營軍 廷臣分門守,家彦守安定門。 城外, 贈太子太保、兵部尚書, 帝手敕兵部尚書張縉彦 守 降益少。 賊逼京 黎明,城陷,家彦投 師,襄城伯 諸 家彦日 軍 諡忠 旣 號 令 登 出 李

孟 兆 祥,字允吉,山 西澤州 人也。 世籍交河,舉於鄉,九赴會試。 天啓二年始擢第,除

犬理左評事。

列

退。 |崇i 進稽勳郎中,歷考功。 初 ,遷吏部稽勳主事 件權 ,歷文選員外郎。 要,貶行人司副,稍遷光祿丞,進少卿,歷左通 門生謁選請善地,兆祥正色拒之,其人悚然 政、太僕卿,

賊 薄都城,兆祥 分守正陽門。 襄城伯李國旗統京營軍,稽月餉不予,士無固志。 城陷,

旋

進通

政使,拜

刑

部右侍郎

|光祥曰:「社稷已覆,吾將安之!」自經於門下。 我二人獨不能死乎」皆自縊。 父死,我何生為 長子章明,字綱宜,甫成進士,光祥揮之曰:「我死,汝可去。」對曰:「君父大節也,君亡 」乃投繯於父之側。 光祥贈刑部尚書, 諡忠貞, 章明河南道御史, 諡節愍。 兆祥妻呂,章明妻王相向哭,旣而曰:「彼父子死忠矣,

賜兆祥諡忠靖,章明貞孝。

之,使拆北堂,期五日。 工部營繕主事,進員外郞。 施 邦曜,字爾韜,餘姚人。萬曆四十一年進士。 適大風 拔屋,免譙責。 魏忠賢興三殿工,諸曹郎奔走其門,邦曜不往。 又使作獸吻,做嘉靖間製,莫考。 不樂爲吏,改順天武學教授,歷國子博 夢神告之, 忠賢欲困

發地得吻,嘉靖舊物也,忠賢不能難。

魁奇横海 遷屯 上,邦曜繁香母誘之,香就擒。 田郎中,稍遷漳州知府,盡知屬縣奸盜主名,每發輒得,闔郡驚爲神。 魁奇援鄭芝龍事,請撫,邦曜言於巡撫鄒維璉討平 盜劉香、李

遷福建副使、左參政、四川按察使、福建左布政使,並有聲。

許物力矣。」其潔己愛民如此。 示之以可欲之門矣。」性好山水。或勸之遊峨眉,曰:「上官遊覽,動煩屬吏支應,傷小民幾 或餽之朱墨竹者,姊子在旁請受之。曰:「不可。我受之,即彼得以乘閒而嘗 我, 我則

邦曜 帝見其署語,怒,下仲吉獄,而奪邦曜官。 推刑部右侍郎。帝曰:「邦曜淸執,可左副都御史。」時崇禎十六年十二月也。 兵、財賦 不爲封進,而大署其副封曰:「書不必上,論不可不存。」仲吉劾邦曜, 兩京光祿寺卿,改通政使。 四事,帝改容納焉。出都三日, 黄道周旣謫官,復遠下詔獄。國子生涂仲吉上書訟之, 命中使召還,曰「南京 踰年起南京通政使。 無事,留此爲朕效力。」東部 入都陛見,陳學術、東治、用 邦曜以副封上,

恨曰 燒酒,卽途中服之,血迸裂 城陷,趨長安門,聞帝崩,慟哭曰:「君殉社 『是兒誤我 明年,賊薄近郊。 」,賊滿衢巷,不得還邸舍,望門求縊,輒爲居民所麾。 邦曜語兵部尚書張縉彥檄天下兵勤王,縉彥慢弗省,邦曜 而 卒。 ·稷矣,臣子可偸生哉!」即解帶自經 乃命家人市信石雜 太息 僕救之蘇, 而去。

篲 同 凝 年生 ,擇士人歸之。 視 邦 也,官 而 曜 泣。 少好王守仁之學,以理學、文章、經濟三分其書而 庶吉士,歿京 怪 問之,曰:「此先人御史宅也。 其篤於內行如此。 師。 邦曜 手治含斂,以女妻其子。 贈太子少保、左都御史、諡忠介。 時墮環茲地, 讀之,慕義無窮。 嘗買 不覺悽愴耳。」 一婢, 本朝賜諡忠愍。 命灑 邦 掃,至東隅,捧 魯時生者,里 曜卽分嫁女

言。 奏,里閭 恐天下 所以治,恃上下之分。 渠言: 魏 変 議 義 间 小 羽 朝 知 · 渠,字駿甫,鳥程人。 天啓五年進士。除行人。 崇禎三年授禮科給事中,知無不 故 林 縣劉夢煒失餉銀三千,責償急,自縊死,有司責其家。 廷重金,意不在盜也。」帝特原之。 叫 軍焚領軍張彝第,高歡以爲天下事可知。 閣聲冤,僕豎侮家長,下吏箝上官,市儈持縉紳,此春秋所謂六逆也。 防維決裂,即九重安所藉以提挈萬靈哉!」 宜興、溧陽及遂安、壽昌民亂,焚掠巨室。義 日者告密漸啓,藩國悍宗入京越 義渠言:「以金錢 殞命吏,

·諫官不得規執政失,而委申飭權於部院,反得制言路。 大臣以攬權爲奉旨,小臣以結舌爲 職,將貽國家無窮憂。」兵部尚書張鳳翼敍廢將陳壯猷功,爲給事中劉昌所駁,昌反被斥。 義渠 與溫體仁同里,無所附麗。給事中劉含輝劾體仁擬旨失當,被貶二秩。 義渠言:

摘其細,已足爲言者羞。 義渠言:「今上下盡相蒙,疆場欺蔽爲甚。 辨疏一入,調用隨之。 官方盡濫徇、武弁倖功爲甚。 自今奸弊叢生,功罪倒置, 中樞不職,捨其大, 言者將杜口。」

不納。

陰剿,同惡必相戕。」及命新帥出海,義渠言:「殲渠散黨宜速,速則可圖 後其語皆驗 向仰給朝鮮。 遷兵科都給事中。 今路阻絕不得食,內潰可慮。」居無何,衆果潰,挾帥求撫。 東江自毛文龍後,叛者接踵。 義渠言:「東島孤懸海外,轉餉艱, 功, 遲則更生他釁。」 義渠言:「請陽無

察使,轉山東右布政使,所至有清操。 義渠居諫垣九年,建白多。 吏科給事中劉安行惡之,以年例出義渠福建參政。 召拜南京光祿寺卿,署應天尹事 尋遷按

朝賜 道義 旦日 城陷,還。 具緋 相勖 諡忠介。 十六年入爲大理卿。 衣拜闕,作書辭父。 ,何姑息爲!揮使去。 已,得帝崩問, 負牆哀號, 首觸柱, 血被 明年三月, 已,自繫,奮身絕吭而死,年五十二。 據几端坐, 賊犯都城,有旨召對。 取生平所好 面。 門生勸 書籍盡焚之,曰:「無使賊 趨赴長安門,旦不 無死, 贈刑部尚書,諡忠清。本 義渠 厲聲曰:「 ·啓扉。 手污也。」 爾當 俄傳 以

顏屈節 贊曰:范景文、倪元璐等皆莊烈帝腹心大臣、所共圖社稷者,國亡與亡,正也。當時靦 **僥倖以偸生者,多被刑掠以死,身名俱裂,貽詬無窮。** 而景文等樹義烈於千秋,荷

褒揚於興代,名與日月爭光。以彼潔此,其相去得失何如也。

# 明史卷二百八十八

## 列傳第一百五十四

馬世奇 吳麟徵 周鳳翔 劉 理順 汪偉

吳甘來 王章 陳良謨 陳純德 申佳胤

## 成德 許直 金鉉

府,所至却饋遺。還,進左諭德。父憂歸。 四 年進士,改庶吉士,授編修。 馬世奇,字君常,無錫人。祖濂,進士,桂林知府。 十一年,帝遣詞臣分諭諸藩。 世奇幼穎異,嗜學,有文名。登崇禎 世奇使山東、湖廣、江西諸王

人 心畏獻而附闖,非附闖也,苦兵也。 **久之還朝,進左庶子。** 例 傳 第 百 五 + 四 帝數召廷臣問禦寇策。世奇言:「闖、獻二賊,除獻易,除闖難。 馬 世 奇 今欲收人心,惟敕督撫鎭將嚴束部伍,使兵不虐民, 六八五五

世奇歸邸,輒太息泣下,曰:「事不可爲矣。」 民不苦兵,則亂可弭。」帝善其言,爲下詔申飭。 時寇警日亟,每召對,諸大臣無能畫一

部右侍郎、諡文忠。 官倪長圩以贖鍰三千助喪。 嫌,除服不 H。吾人見危授命,吾不爲其難,誰爲其難者!與君攜手黃泉,預訂斯盟,無忘息壤矣。」 對曰:「聞主人盡節,我二人來從死耳。」世奇曰:「有是哉」」二妾並自經。世奇端坐,引帛自 或言崩,或又言東宮二王被執。世奇曰:「嗟乎,吾不死安之!」其僕曰:「如太夫人何?」世奇 力縊乃死。先是,兵部主事成德將死,貽書世奇,以慷慨從容二義質焉。世奇曰:「勉哉元 曰:「正恐辱太夫人耳。」將自經,二妾朱、李盛飾前。世奇訝曰:「若以我死,將辭我去耶。」 世奇修頤廣顙,揚眉大耳,砥名行,居館閣有聲,好推獎後進。爲人廉,父死,蘇州推 十七年三月,城陷。世奇方早食,投筯起,問帝安在,東宮二王安在。或言帝已出城, · 赴都。 及還朝,延儒已賜死,親暱者率避去,世奇經紀其喪。其好義如此。 本朝賜諡文肅 世奇辭曰:「蘇饑,留此可用振。」座主周延儒再相,世奇同郡遠 贈禮

吳麟徵,字聖生,海鹽人。 天啓二年進士。除建昌府推官,擒豪猾,捕劇盜,治聲日聞。

父憂歸。補興化府,廉公有威,僚屬莫敢以私進。

往 在 令 臣, 而 君 反 諫 禮 不敢貪。 **猶**父之於子,未 子宜 其言 崇祯 垣,直 遣之,重 盡 而 五. 聲甚著。 用之。 化沾沾 郡守慈, 年 一以璽 擢 吏科給 書,假 奸人 之意,毋落 有信僕從, 縣令不敢 尋上疏乞假葬 便宜 窺見此旨, 事 中 ٠, 人任。 其彀中,使清流 虐。 請 舍其子, 罷 明告君父, 父。 郡守精 內 民生疾苦,更治 遺,言:「古用 求家之理者。」 旣去, 明,縣。 之禍再見明 目 貽 爲 言路 令不 內臣以致亂, 臧 朋 黨 敢 又言三安民之本在守令。 否,使得自達天子。」時不能 公揭,謂:「自言官積 叢 時。 自稱 脞。 孤 宜倣宣宗 今用內臣以求 立,下背公論 用況鍾 輕, 治。 廟堂之上往 ,上竊主 故 郡 行。 守 事 君之於 廉,縣 精 麟徵

舍此 闋 起吏科都給事 一帝深 無以待 居 久之, 還朝。 然之。 中才。 中。 今遷轉如流,不循資格,巧者速化,拙者積薪,開奔競之門,無益軍國之 刻吏部尚書田唯嘉贓汚, 時貨路 公行,銓曹資格 唯嘉 盡 一廢。 罷 麟徵 去。 上言:「限年平配,固銓政之弊,然 再遷刑科給事中, 丁繼 母憂。 服

益 兵求入。中官欲納之,麟徵 急,麟徵趨 十七年春,推太常少卿。 入朝、欲見帝 白事。 不 可。 未幾,賊薄京師。麟徵奉命守西直 至午門,魏藻德引麟徵手曰:「國家如天之福,必無他虞。 以土 石堅塞其門,募死士縋城襲擊之,多所 門。 門當賊衝,賊詐爲勤王 斬獲。 賊攻

Ш 麟徵善者也。 家 朝 殃,而身居諫垣,無所匡救,法當褫服。 道旁祠,作書訣家 旦夕兵餉集 賜 河碎矣,不死何爲」」酌酒與淵別,遂自經,淵爲視含殮而去。 人救之甦,環泣請曰:「待祝孝廉至,一 諡 貞 ,公何悤遽爲。」引之出,遂還西直 明日, 人曰:「祖宗二百七十餘年宗社,一旦至此,雖上有亢龍之悔,下有魚爛之 淵至。 麟徵慷慨曰:「憶登第時夢隱士劉宗周吟文信國零丁洋詩, 訣可乎』許之。 殮用角巾青衫,覆以單衾,以志吾哀。」解帶· 門。 明日城陷。 祝孝廉名淵,嘗救劉宗周 贈兵部右侍郎,諡忠節。 欲還邸,已爲賊 所據。 下 獄 自經。 乃入 與與

里。 及烽烟徹 里,臣不敢任其咎。」 至五月七日,集民夫發掘乃開。 **師警,旦夕可援。天子下其議,麟徵深然之。** 十六日入關,二十日 方賊之陷 大內, Ш 帝始悔不用麟徵言,旨下永吉。 西也,薊遼總督王永吉請撤寧遠吳三桂兵守關門,選士卒西行遏寇,即 引漢棄涼州 抵豐潤,而京師已陷矣。 爲證。 麟徵復爲議數百言,六科不署名,獨疏昌言,弗省 輔臣陳演、魏藻德不可,謂:「無故棄地 永吉馳出關, 徙寧遠五十萬衆, 城破,八門齊啓,惟西直門堅塞不能通 日行數十 三百

周 鳳翔,字儀伯,浙江山陰人。 崇禎元年進士。 改庶吉士,授編修。 遷南京國子司

論 靈璧侯奴辱諸生,鳳翔執付法司。 慷 慨 帝 爲悚聽。 軍需急,議稅間架錢。 歷中允、渝德,為東宮講官。 鳳翔曰:「事至此,急宜收人心,尚可括民財搖國 嘗召對平臺,陳滅寇策。 言

勢耶

德、陳演、侯恂、宋企郊等羣入,而財李自成據御坐受朝賀。 哭忠魂。」天下悲之,去帝崩纔兩日也。 趣出,賊亦不問。 亡何,京師陷,莊烈帝殉社稷。有譌傳駕南幸者。 歸至邸,作書辭二親,題詩壁間自經。詩曰:「碧血九原依聖主,白 後贈禮部右侍郎、諡文節。 鳳翔不知帝所在,趨入朝。 鳳翔 至殿前大哭,急從 本朝賜諡文忠。 見魏藻 頭 左掖門 二老

親擢第一,還宮喜曰:「朕今日得一耆碩矣。」拜修撰。 劉 理順,字復禮,杞縣人。萬曆中舉於鄉。十赴會試,至崇禎七年始中式。 益勤學,非其人不與交。 及廷對,帝

南京司業、左中允、右諭德,入侍經筵兼東宮講官。 奪其講官。 十二年春,畿輔告警,疏陳作士氣、矜窮民、簡良吏、定師期、信賞罰、招脅從六事。 開封 垂陷,理順建議河北設重臣,練敢死士爲後圖,疏格不行。 楊嗣昌奪情入閣, 理順昌言於朝,嗣昌 嗣昌、薛國觀、 歷

列

傳

周 延儒迭用事,理順一無所附麗。出溫體仁門,言論不少徇。

死。」羅拜號泣而去。後贈詹事,諡文正。本朝賜諡文烈。 六十三。僕四人皆從死。羣盜多中州人,入唁曰「此吾鄉杞縣劉狀元也,居鄉厚德,何遽 請先死。旣絕,理順大書曰:「成仁取義,孔、孟所傳。」文信踐之,吾何不然!書畢投繯,年 息歸,捐家貲犒守城卒。僚友問進止,正色曰:「存亡視國,尙須商酌耶」」城破,妻萬、妾李 敗犯京師急,守卒缺餉,陰雨饑凍。理順詣朝房語諸執政,急請帑,衆唯唯。 理順太

偉擢檢討。 家多故,朝臣詞苑起家,儒緩不習吏事,無以理紛禦變,改舊例,擇知推治行卓絕者入翰林。 汪偉,字叔度,休寧人,寄籍上元。崇禎元年進士。十一年,由慈谿知縣行取。 給假歸。還朝,充東宮講官。 帝以國

江爲要。 重臣鎭之。 十里,雖十萬衆不能守。議者謂無守城法,有防江法。 十六年,賊陷承天、荆、襄。偉以留都根本之地,上江防綢繆疏,言一金陵城週圍百二 禦潍所以禦江,守九江所以守金陵也。 自是而上之至於武昌,下之至於太平、采石、浦口,命南京兵部大臣建牙分閩, 。淮有史可法,屹然保障。 賊自北來,淮安為要,自上游來,九 九江一郡,宜設

乃設九江總督。又言:「兵額旣虧,宜以衞所官舍餘丁補伍操練,修治兵船,以資防禦。額 以接聲援,而金陵之門戶固矣。南京兵部有重兵而無用,操江欲用兵而無人,宜使緩急相 而府尹、府丞之官,重其權,久其任,聯百萬士民心,以分兵部操江之責。」帝嘉納之,

餉不足,暫借鹽課、漕米給之。」所條奏皆切時務。

如聖主何!平時誤國之人,終日言門戶而不顧朝廷,今當何處伸狂喙耶!」 此乎!作書寄友人曰:「賊據眞定,奸人滿都城,外郡上供絲粟不至,諸臣無一可支危亡者, 之師。」魏藻德笑曰:「大僚守畿輔,誰肯者。」偉曰:「此何等時,猶較尊卑、計安危耶。請以 自公侯伯以下,各率子弟畫地守。 劇郡見委。」藻德哂其早計。未幾,眞定遊擊謝加福殺巡撫徐標迎賊。[1] 偉泣曰:「事至 **賊薄都城,守兵乏餉,不得食,偉市餅餌以饋。** 明年三月,賊兵東犯。偉語閣臣「事急矣」亟遣大僚守畿郡。 庶民統以紳士,家自爲守。 已而 城陷,偉歸寓,語繼室耿善撫幼子。 而京軍分番巡徼,以待勤王 都中城守,文自內閣 武

詹事,諡文烈。本朝賜諡文毅。 絕,時年二十三。偉欣然曰:「是成吾志。」移其屍於堂,貽子觀書,勉以忠孝,乃自經。贈少 |耿泣曰: 「我獨不能從公死乎!」因以幼子屬其弟,衣新衣,上下縫,引刀自剄不殊,復投繯遂

改元,甘來成進士,授中書舍人。後三年,泰來亦成進士,授南京太常博士。 吳甘來,字和受,江西新昌人。父之才,西安府同知。甘來與兄泰來同舉鄉試。

暴,止於戴罪。偏裨不能令士卒,將帥不能令偏裨,督撫不能令將帥,將聽賊自來自去,誰 爲陛下翦凶逆者。〕憂歸。服闋,起吏科,進兵科右給事中,乞假歸。 俘、黔、蜀爭功,昌黎死守,功猶待勘,急則用其死綏,緩則東以文法。 總兵張應昌等半殺難民以冒功,中州諸郡畏曹變蛟兵甚於賊。陛下生之而不能,武臣殺之 而不顧,臣實痛之。」又言:「賞罰者,將將大機權也。陛下加意邊陲,賞無延格。 二,內與外二,士卒與將帥二。受命建牙,或逮或逐,以封疆罪罪之。 五年,甘來擢刑科給事中。 七年,西北大旱,秦、晉人相食,疏請發粟以振,而言:「山西 且封疆之罰,武與文 而跋扈將帥,罪狀已 乃紅夷獻

甘來曰:「若爾、則是棄地方而逃也。 功罪不明,賞罰不著,莫此爲甚!」疏入,帝大嘉歎。 功。掩其失地之罪。是維城爲可留可去之人,名都爲可守可棄之土,撫道爲可有可無之官 使屛藩帝室,故曰『宗子維城』。 十五年起歷戶科都給事中。 乃烽火纔傳,一朝委去以爲民望,而諸臣猶曉曉以 中外多故、荆、襄數郡、賊未至而撫道諸臣率稱護藩以去。 城社人民, 誰與守者。」乃上疏曰: 「天子衆建親親, 將 一日,帝詰戶部尚書倪元璐餉額,甘來 擁衛自

日 "「臣科與戶曹表裏,餉可按籍稽。 臣所慮者, 兵聞賊而逃,民見賊而喜,恐非無餉之患,

而無民之患。宜急輕賦稅,收入心。」帝額之。

無益豪末。」 泰來官禮 主上 甘 明决,必不 來 部 遄 疾 盡取焚之,毋釣後世名,遂投繯死。 員 外郎矣,甘來屬兄歸事 ,連請告。 輕出。」乃疾走皇城,不得入。 會帝 命編 修 陳名夏掌戶科,甘來喜得代。 母,而自誓必死。 返檢几上疏草曰:「當賊寇縱橫,徒持 贈太常卿、諡忠節。 明日,城陷,有言駕南 不數日,戝薄都城。 本朝賜諡 幸者, 莊 甘來曰: 議

治諸 歸 少暮,母訶 暨 有 章,字漢臣,武進人。 聲。 跪予 甫半 杖,曰:「朝廷以百里授酒人乎!」章伏地不敢仰視。 歲, 以才調鄞縣。 崇禎元年進士。 諸暨民與鄞民爭挽章, 授諸暨知縣。 少孤,母訓之嚴。 至 一相譁。 親友爲力解, 治鄭益有 及爲令,祖帳 乃已。

吏部 住; 給事中孫晉、御史李右讜等三人降調, 十 上訪册,罪廷臣濫徇者。 一年行取入都。 時有考選翰林之命,行取者爭奔競,給事中陳啓新論之。 尚書姜逢元、王業浩,給事中傅元初,御史禹好善等六人 給事中劉含輝、御史劉 興秀等十一人貶二秩視 帝怒,命 別

列

傅

涂 章 御 怒,與章等大 史。 必 泓 吏 章 部 李 上 尙 嗣 一疏請 書 詬 京 田 欲 罷 維嘉等乃 疏 而 內操,寬江南 帝知維嘉 辨 ,憚爲首獲罪。 請先推部 有 逋 私 認認 賦 曹,凡推二十二人,章與焉, 許 李 與考。 士淳者耄矣,四 又以爲首者必良士也,擢士淳 人不告而 授 首其 I 部 名。 主 事 o 淳 編 修 章 知 ,章等皆 及任濬 之,懼且

史,毋 耳 劉 弁 有 馬 奇。 鎬 金, 入其 貪惰。 明 未馳 償以 虐民。 帳 喜曰:「兵至十萬, 年 出 財首 輒 衆羅 叉所 按 喳。 神血食茲土,不能請 计肅 武 拜 部十道 而 , 乞降, (弁以冒功,坐是數召邊釁。 司 持風 " 農缺餉,半歲不發。 監 猶可 乃稍給之食。 紀, 司,劾 爲也。」及閱 飭邊防。 龍 上帝 以其四。 蘇一 兩河 西部寇莊浪,巡撫急徵兵。 視,半死 母 方,當奏天子易爾位。」檄焚,雨 章屢疏請帑 憂 早 章檄 章著 歸。 者。 服 一个,非 城隍 闋,還朝,巡視京營,按籍額 不不 餘冒伍 神 大舉毋得以零級冒 報 「御史受錢 **憊甚**,矢折 章曰:「貧寇索食耳。」策 或 大注。 般 刀缺, 功 害 人, 聞 邊卒貸 軍 劾 礟 + 罷 神 聲掩 巡 殛 萬 武 撫 御

亨 守阜成 新 章走, 衣 踰 門。 月 冠 ,賊陷眞定,京師 章厲聲曰:「事至此,猶惜死耶!」時享曰:「死此與士卒何別。 城 入 內 外堞 大駭, 凡十五 章不 大震。 應。 萬四千有 賊傅城下, 章手發二礮, 賊 襄城伯 奇 李國楨 ,三堞一卒。 發營卒五萬營城外。[三]章與給 = 月初 少却。 登陴, 関十日 頃之, 入朝訪上所在,不 各門礮聲絕。 始一 事中光 還 邸,櫛 時亭 沐 時

獲則 鞭不 勃 死,爾滅不旋 如 叶 死,死未晚也。」章從之,與時亨並馬行。 顧 · 賊 狀。 叱曰 踵矣。」 賊怒,攢槊刺殺章 一吾視 妻姜在籍, 軍御史也 聞之, 一,誰 敢犯 慟而 一而去。 \_! 絕。 賊 刺章股, 贈大理寺卿、諡忠烈。 抵暮,家人覓屍,循 俄賊突至, 呼下馬。 墮。 章罵 曰:「逆賊 手據 本朝賜諡節愍。 時亨倉皇下馬跪。 地 ! 勤 坐,張口 王兵 且至。 怒目,勃 次子之 章持 我

爲職方主事,亦死

陳良謨,字士亮,鄞人。 崇禎四年進士。授大理推官。 初名天工。 莊烈帝虔事上帝,

詔羣臣名「天」者悉改之,乃改良謨。 十二年出按四川。 期滿當代,再留任。 在職六年,兩注上考。 時流寇大入蜀,詔良謨專護蜀王,巡撫邵捷春 行取陛見,擢 御 史。

專辦 敗擾**濁**,下 賊。 良謨飭守具,堅壁清野。 詔責良謨,已聞其善守禦,乃優旨賜銀幣。 賊犯成都,遣將據要害爲掎角。 及還朝,賊勢益迫,所規畫率不行,而 再戰,賊潰奔。 帝聞

京師陷矣。

及是城陷, 良謨嘗夢拜文文山於堂下。 良謨 方移疾臥邸中,一慟幾絕,自是水漿不入口。 文山揖之上:「公與予先後一揆, 或勸 何下拜爲。」覺而異之。 良謨無死,不答。 謂邑

天葆 天葆 子 樞爲之後。 年十八。 李天葆 以巾 未 進。 幾,聞帝崩煤山,大慟日 曰:「吾爲國 良謨踰五十無子, 未幾,久樞亦卒,良謨竟無後。 良謨著巾, 死,義不顧家。 藍便服,起入戶。 以禮納之,侍良謨百三日耳。 :「主上不冕服,臣子敢具冠帶乎 惟是母老,先君莫葬,繼嗣未定,須一 贈太僕卿、諡恭愍。 妾時氏隨之,遂與妾俱自 良謨既卒,其族人以其兄之子人 本朝賜諡恭潔 ! 吾巾 l縊死。 褻,安所 言耳。」 時氏 得明 因賦詩付 ,京師人, 市。

洲 渚 陳 純 比 德,字靜生,零陵人。爲諸生,以學行稱。 曉,坐蘆葦 中,去泊舟數十丈。 嘗夜泊洞庭,爲盜窘,躍出墮水,再躍入

故居, 史 凡 用 無人,安望其練;餉糜則愈缺,安望其充。 此今日行間大弊也。」帝不能用 油抽 藉以營求遷秩,皆是物 巡按 崇禎十三年成進士, 年已六十矣。 去者又以遠調而不樂爲用。伍虛 無父母妻子之依,田園丘壠之戀,思歸則逃,逢敵則潰。 山西。 七月,部內嚴霜,民凍餒。純德上疏請恤,因陳抽練之弊。言:「兵抽 也。 精神不 以束伍,而以侵餉,厚餉不以養士,而以求官。 而 莊烈帝召諸進士,咨以時事。 : 餉仍在,不歸主帥,則歸偏裨,樂其逃而 抽餘者旣以餉薄而安於無 純德奏稱旨,立擢御 利其餉, 伍虚則 則 人失

哭,遂自經。 還朝,督畿輔學政。 京山 人秦嘉系買地葬之永定門外,立石表墓焉。 將出按部,都城陷。 賊下令百官以某日入見,衆攝純德入,還邸慟 贈太僕卿、諡恭節。

大吏惴恐,集議曰:「留之,不聽。 率萬人來攻,城土垣多圮。 無 所容。 申佳胤、字孔嘉、永年人。崇禎四年進士。 **霪雨河** 決,艤舟怒濤中, 佳胤募死士擊走賊,因甓其城。 行,守土者且得罪。」佳胤曰:「惟周王可留之。」衆稱善,用 塞其口。 捕大猾置之法。 授儀封知縣。 唐王聿鍵動王,將抵 以才調杞縣。 縣故多盜,佳胤嚴保甲法,盜 八年,賊掃 開封。 地 諸

少詹事文安之。安之,佳胤座主也,事連佳胤,左遷南京國子博士。 治行卓異、擢吏部文選主事,上備邊五策。進考功員外郎,佐京察。 大學士薛國觀傾

數日 刑戮,於房幃,於鬭戰,均死也。死數者不死君父,蓋亦不善用死矣。 父有難,焉逃死。」馳入都, 遍謁大臣爲畫戰守策, 皆不省。 **久之,遷大理評事,進太僕丞。** 義不可背也,命不可違也。 関馬近畿。 天下事莫不壞於貪生而畏死。 聞李自成破居庸, 歎曰:「京師不守矣! 君 貽子涵光書曰:「行己曰義,順 死於疾,死於利,死於 今日之事,君父之事,

死義也,猶命也,我則行之。」

年。 **遂死,年四十二。贈太僕少卿,諡節愍。** |畦巨井,急躍入。 僕號呼,欲出之。 國事至此,敢愛死乎!」兩僕環守不去,紿之曰:「吾不死也,我將擇善地焉。」下馬,旁 京 師 陷 ,冠帶辭母,策馬至王恭廠,從者請易服以避賊。佳胤曰:「吾起微賤,食祿十三 佳胤亦呼曰:「告太安人,有子作忠臣,勿過傷也。」 本朝賜諡端愍。

外,成邊,坐贓六千有奇。而給體仁校尉五十人護出入。 虐,遂入京。滋陽民詣闕訟冤。震孟在閣,亦爲之稱枉。德道中具疏極論體仁罪,而震孟 輿大罵,拾瓦磔擲之。 已被體仁擠而去之。好善再劾德,言其疏出震孟手,帝不之究。德母張伺體仁長安街,繞 增餉額,德固爭,又嘗捕治其牙爪吏。知府怒,讒於御史禹好善。好善,體仁客也,誣德貪 絕俗,疾惡若讐。文震孟入都,德郊迎,執弟子禮,語刺溫體仁,體仁聞而恨之。兗州 成德,字元升,霍州人,依舅氏占籍懷柔。崇禛四年進士。除滋陽知縣。性剛介,清操 體仁志,疏聞於朝。 詔五城御史驅逐,移德鎭撫獄掠治,杖六十午門 知府

德居戍所七年,用御史詹兆恒薦,起如皐知縣。 尋擢武庫主事。 以母老辭,不允,乃就

列傳第一百五十四 成德 許直

功員外郎。

道。 義之寥寥也!宋臣張栻有言:『仗節死義之臣,當於犯顏諫諍中求之。』夫犯顏 朝廷養之而已。 至則上言:「年來中外多故,居官者爵祿迷心,廉恥道喪。 表厥宅里, 所以伸忠臣孝子於生前, 殊厥 《井疆,所以 陛下御極十七年,何仗 誅 亂臣賊子於未死。 諫 諍 何難,在 節 死

苟死敵者無功,則媚敵者且無罪,死賊者褒揚不亟,則從賊者恬而不知畏也。」

щ̈ 至是,又闔門死難,惟幼子先寄友人家獲存。 亦投繯死。 曰:「兄死,妹請前。」德稱善,哭而視其縊。 以頭觸縉彦 賊露刃脅之,不爲動。 未幾,城破,不知帝所在,旁皇廳事。 先是,懷柔城破,德父文桂遇害, 胸,且詈之。 俄聞帝崩,痛哭。 奠畢歸家,有妹年二十餘未嫁,德顧之曰:「我死,汝何依。」妹 入別其母,哭盡哀,出而自縊。 已,趨至午門,見兵部尚書張縉彥自賊所出。 持雞酒奔東華門,奠梓宮於茶棚之下, 家屬盡沒。 贈德光祿卿,諡忠毅。 妻劉在京,以徵德贓 本朝賜諡 母見子女皆死, 介愍。 急,憂悸死。 觸地流 德

母憂歸,哀毀骨立,終喪蔬食,寢柩旁。 許直,字若魯,如皐人。 崇禎七年成進士。 補廣東惠來縣。 出文震孟之門,以名節自砥,除義鳥知縣。 用清望,徵授吏部文選主事, 進考

生。」賦絕命詩六章,闔戶自經。越旦視之,神氣如生。贈太僕卿,諡忠節。本朝賜諡忠愍。 匡,君危無濟,我何生爲!」已,知帝崩,一慟幾絕。客以七十老父爲解,直曰:「不死,辱及所 奪。」有傳帝南狩者,直將往從。見賊騎塞道,出門輒返,曰:「四方兵戈,駕焉往。國亂不 **贼薄都城,約同官出貲饗士,爲死守計。城陷,賊令百官報名。直曰:「身可殺,志不可** 

食必以崇禎錢一枚置几上,祭而後食,食已復哭。又刺其兩臂曰:「生爲明臣,死爲明鬼。」 直有族子德溥者,在南。聞莊烈帝崩,大哭數日。 揚州陷,又哭數日。 每獨坐輒慟哭,

府教授,日訓諸生闡濂、洛正學。燕居言動,俱有規格,諸生嚴憚之。歷國子博士、工部主事。 少有大志,以聖賢自期許。年十八舉鄉試第一。明年,崇禛改元,成進士。不習爲吏,改揚州 戶、工二部,建專署,檄諸曹謁見,禮視堂官。。該恥之,再疏爭,不納。 金鉉,字伯玉,武進人,占籍順天之大興。祖汝升,南京戶部郎中。父顯名,汀州知府。鉉 方銳意綜核,疑廷臣朋黨營私。度支告匱,四方亟用兵,餉不敷,遣中官張彝憲總理 乃約兩部諸僚,私謁

者衆唾其面, 彝憲慍甚。 **鉉當権稅杭州,辭疾請假。鄰憲摭火器不中程,劾鉉落職。** 鉉杜

門謝客,躬爨以養父母。

忠懇,可屬大事。」不報。未幾,勛以宣府下賊,賊殺之馮,烽火偪京師。 鉉奔告母:「母可且 府危。宣府危,大事去矣。請急撤回監宣中官杜勛,專任巡撫朱之馮。勛二心偾事,之馮 井,是我死所也。」鼓哭而去。 逃匿。兒受國恩,義當死。」」鼓母章時年八十餘矣,呵曰:「爾受國恩,我不受國恩乎! 廡下 十七年春,始起兵部主事,巡視皇城。聞大同陷,疏曰:「宣、大,京師北門。大同陷則宣

節。 其屍,驗網巾環,得該首歸,合以木身,如禮而殮。事竣,歸自經。 之,鉉怒,口嚙其臂,得脱,遂躍入水。水淺,濡首泥中乃絕。 賊踞大內,踰月始去。 本朝賜諡忠潔。 城破,趨入朝,宮人紛紛出。知帝已崩,解牙牌拜授家人,卽投金水河。家人爭前挽 金水河冠袍泛泛見水上,內官羣指之曰:「此金兵部也。」弟錝辨 母聞卽投井,妾王隨之,皆 後贈鉉太僕少卿、諡忠

右范景文至鉉二十有一人, 第 百 Ŧ. + 四 金 鉉 皆自引決。 其他率委蛇見賊。 賊以大僚多誤國, 六八七一 概囚繁

焉。曰正祀文臣,祀景文以下二十人,及大同巡撫衞景瑗、宣府巡撫朱之馮、布衣湯文瓊、 輩,特爲賊拷死,諸侯伯亦大半以兵死。 恩一人。曰正祀婦人,祀烈婦成德母張氏,金鉉母章氏,汪偉妻耿氏,劉理順妻萬氏、妾李 者十三。福王時,以六等罪治諸從逆者。而文武臣殉難並予贈廕祭葬,且建旌忠祠於都城 于騰雲、兵馬指揮姚成、知州馬象乾皆以不屈死,顧未邀贈恤 翔、王之心、高時明、褚憲章、方正化、張國元六人。 通、安鄉伯張光燦、右都督方履泰、錦衣衞千戶李國祿十五人。日附祀內臣,祀太監李鳳 西寧侯宋裕德、懷寧侯孫維藩、彰武伯楊崇猷、宣城伯衞時春、清平伯吳遵周、新建伯王先 成 郎中徐有聲,給事中顧鋐、彭琯,御史兪志虞,總督徐標,副使朱廷煥七人。 氏,馬世奇妾朱氏、李氏,陳良謨妾時氏,吳襄妻祖氏九人。曰附祀文臣,祀進士孟章明及 永固、左都督劉文耀、山西總兵官周遇吉、遼東總兵官吳襄七人。日正祀內臣,祀太監王承 諸生許琰四人。 國公朱純臣、鎭遠侯顧肇迹、定遠侯鄧文明、武定侯郭培民、陽武侯薛濂、永康侯徐錫登、 庶官則或用或否,用者下吏政府銓除,不用者諸偽將搒掠取其貲,大氐降者十七,刑 日正祀武臣,祀新樂侯劉文炳、惠安伯張慶臻、襄城伯李國楨、駙馬都尉鞏 而郎中周之茂、員外郎甯承烈、中書宋天顯、署丞 有司 春秋致祭。 也 然顧鋐、彭琯、兪志虞 日附祀武臣、祀

徐有聲,字閒復,金壇人。

登鄉薦,崇禎十三年特擢戶部主事,歷員外郎、郎中。

督餉

大同。城陷,被執不屈死。福王時,贈太僕少卿。

遏賊。 以城降。 標執茂華下之獄。 李自成陷山西,警日逼,加標兵部侍郎,總督畿南、山東、河北軍務,仍兼巡撫,移駐眞定以 右僉都御史,巡撫保定。陛見,請重邊防,擇守令,用車戰禦敵,招流民墾荒。 徐標,字準明, 無何, 福王時,贈標兵部尙書 賊遣使諭降, 標毀檄戮其使。 中軍謝加福伺標登城畫守禦策,鼓衆殺之,出茂華於獄。 濟寧人。天啓五年進士。崇禎時,歷官淮徐道參議。 賊別將掠畿輔,眞定知府丘茂華移妻孥出城, 十六年二月超擢 數日而賊至, 帝深嘉之。

民皆走,城遂陷。 巡大名。十七年,賊逼畿輔,廷煥嚴守備。 朱廷煥,單縣人。崇禎七年進士。 被執不屈死。 福王時,贈右副都御史。 除工部主事,歷知廬州、大名二府,即以兵備副使分 賊傳檄入城,怒而碎之。 三月四日,賊來攻,軍

周之茂,字松如,黃麻人。 崇禎七年進士。 歷官工部郎中。 服闋,需次都下。 賊搜得

之,迫使跪。不屈,折其臂而死。

甯承烈,字養純,大興人。 舉於鄉,歷魏縣教諭,戶部司務, 進本部員外郎,筦太倉銀

庫。 城陷,自經於官廨 宋天顯,松江 華亭人。 由國子生官內閣中書舍人。

列

僔

第

百

Ŧī.

十四四

金

銊

六八七三

爲賊所獲,自經。

于騰雲,順天人。爲光祿署丞。 賊至,語其妻曰:「我朝臣,汝亦命婦,可汚賊耶」夫婦

並服命服,從容投繯死。

姚成,字孝威,餘姚人。 由禮部儒士爲北城兵馬司副指揮。 城陷,自縊死。

馬象乾,京師人。 舉於鄉,官濮州知州。方里居,賊入,率妻及子女五人並自縊

令縊死。 至若御史馮垣登、兵部員外郎鄭逢蘭、行人謝于宣皆拷死,郎中李逢申,拷掠久之,逼 與鋐、琯、志虞皆獲贈太僕少卿,而垣登、于宣至諡忠節。 行取知縣鄒逢吉拷死,

贈太僕寺丞。 時南北阻絕,皆未能核實也。 湯文瓊、許琰事載忠義傳。

能從容蹈義,如出一轍,可謂得其所安者矣。 哉!分誼所在,確然有以自持而不亂也。馬世奇等皆負貞亮之操,勵志植節,不欺其素,故 贊曰:傳云「君子居其位,則思死其官」。夫忠貞之士,臨危授命,豈矯厲一時,邀名身後

## 校勘記

**真定遊擊謝加福殺巡撫徐標迎賊** 謝加福,明史稿傳一四八汪偉傳,小興紀年卷三及所附考引

保定城守紀略、甲中上谷紀事都作「謝嘉福」。

宗實錄卷一七崇禎十七年二月丙戌、國権卷一〇〇頁六〇三一改。

(ニ) 襄城伯李國楨發營卒五萬營城外 李國楨,原作「李國禎」,據下文及本書卷一〇六班臣表、懷

## 明史卷二百六十七

## 列傳第一百五十五

馬從聘 耿蔭樓 張伯鯨 宋玫 族叔 應亨 陳 顯際

趙士驥

等

范淑泰 高名衡 王漢 徐汧 楊廷樞 鹿善繼 薛一 赐

引疾歸,加兵部右侍郎。 亦不報。以久次擢太僕少卿,拜右僉都御史,巡撫延綏,失事奪俸。 魯保督之。 里餘, 平秀吉逃歸,從聘言其父言恭不當復督戎政,不從。 馬從聘, 由開 礦斷地脈所致,當速罷。 從聘極陳欺罔狀,不從。 字起幸,靈壽人。 家居 凡二十餘年,終熹宗世不出。 萬曆十七年進士。 不報。 還朝,改按浙江,又按蘇、松、請発增蘇、松、常鎮稅課, 奸人田應壁請掣賣沒官餘鹽助大工,帝遣中官 授青州推官、擢御史。 出理兩淮鹽課,言近 旣而 日泰山崩離,坼者 有擣巢功,未敍, 勛衛李宗城册封

列傳第一百五十五 馬從聘

「吾大臣,義不可生,汝曹生無害也。」三子不從。從聘縊,三子皆縊。贈兵部尚書,諡介敏, <u></u>崇禎十一年冬,大淸破靈壽。從聘年八十有二矣,謂其三子曰:「吾得死所矣。」又曰:

官其一子。

偕子廖並死之。贈光祿少卿。 雨立澍。攝壽光,禱雨如臨淄。 耿蔭樓,從聘同邑人也,字旋極。天啓中,任臨淄知縣。久旱,囚服暴烈日中,哭於壇, 崇順中,入爲兵部主事,調吏部,歷員外郎,乞假歸。城破,

計,調補盧氏。 張伯鯨,字繩海,江都人。萬曆四十四年進士。歷知會稽、歸安、鄞三縣。 天啓中,大

伯鯨兵備僉事、轄楡林中路。 狀 穀,芻粟資內地。 爲通商惠工,轉菽麥。 崇禎二年稍遷戶部主事,出督延、寧二鎭軍儲。自黃甫川西抵寧夏千二百里,不產五 賀蘭山沿黃河漢、唐二渠,東抵花馬池,素沃野,亦荒蕪甚。伯鯨疏陳其 又倣邊商中鹽意,立官市法以招之,軍民稱便。 擊破賀思賢,斬一座城、金翅鵬,敗套寇於長樂堡。 大盜起延綏,擢 巡撫陳奇

瑜上其功,韶進三階,爲右參政,仍視兵備事。

及套寇於雙山 1 车 春,奇瑜遷總督,逐擢 、魚河二堡,斬首三百。 伯鯨右僉都御 明年, 以拾遺論罷。 史代之。 督總兵王承恩等分道擊破插漢 尋論 延綏 5功,韶. 起用 ,廕子錦衣 部 長

千戶。

訓憂 文燦之被逮也,言剿餉不至者六十餘萬,伯鯨 去,即家起伯鯨代之,如淑訓官。 十年秋,楊嗣昌議大舉討賊,遣戶部一侍郎駐池州,專理 叉明 年,熊文燦無 坐貶秩 事 敗 兵食。 ,嗣昌自出 帝命傳淑訓。 督師、 移伯鯨 明年,淑 襄陽。

被 官扶出,遂乞休。 圍 ,與當事分城守。 十五年召爲 兵部左侍郎。 叉明 年,京城陷,微服 城破,自經 明年,尚書馮元飊在告,伯鯨攝部事。 死。 遁還。 福王立於南京 伯鯨家居不 召對萬歲 出 山,疾作,中 **外之**, 揚州

計 謫官。 朱玫,字文玉,萊陽人。 玫 卽 以是年偕族叔應亨同舉 父繼登,萬曆三十二年進士。 進士。 玫授虞城 知縣 ,應亨得淸豐。 歷官陝西右參議。 天啓五年大

元 年,玫兄琮亦舉 進士,知 祥符,而 政以才調繁杞縣。 三人壤地 相接,並有治聲。

列傳

第

百

五十

五.

張

江巡撫熊奮渭營內召,果擢南京戶部侍郎,繼登父子信之。 理 行於天下。 應亨已改 應亨遷禮部主事,改亦擢吏科給事中。嘗疏論用人,謂:「陛下求治之心愈急,則浮薄喜事 之人皆飾 卿、工部右侍郎。政父繼登已久廢,至是爲浙江右參政。 詭 吏部,累遷稽勳郎中,落職歸。 又言獄囚稽滯瘐死,與刑死幾相半,宜有矜釋。 而釣奇。 陛下破格之意愈殷,則巧言孔壬之徒皆乘機而鬭捷。」衆韙其言。時 政方除母喪,起故官,歷刑科都給事中。 帝採納之。遷太常少卿,歷大 大學士周延儒客盛順者,爲浙 請熱審概

私。 等遣戍,玫除名,順乃驚竄 比入對,改冀得帝意,侃侃敷奏。帝發怒,叱退之,與吏部尚書李日宣等並下獄。 十五五 一年夏,廷推閣臣,順爲玫營推甚力。會詔令再推,玫與焉。帝已中流言,疑諸臣有 日宣

家進士。玫、應亨有文名。 明年二月復至,城遂破,改、應亨、顯際、土驥並死之。顯際,眞定人,士驥官中書舍人,並起 而 畢。政及邑人趙士驥亦出貲治守具。 閏十一月,臨淸破,應亨與知縣陳顯際謀城守。應亨以城北庫薄,出千金建甕城,浹旬 無何,大清兵薄城,城上火礮矢石並發,圍乃解。

沈迅,亦萊陽人也。崇順四年舉進士,歷知新城、蠡二縣,與膠州張若麒同年友善。〔〕〕

結楊 叉請以天下僧人配尼姑,編入里甲,三丁抽 十一年行取入都。 嗣 昌, 得改兵部。 帝以吏部考選行私,親策諸臣。 其年冬, 畿輔被兵。 迅請於廣平、河間、定州、 , 可得兵數十萬。 迅、若麒並得刑部主事。 他條奏甚多。 蠡縣各設 兩 兵備 章下兵部, 人大恚恨, 人。

嗣昌

盛稱迅言可用

,乃命爲兵科給事

中。

翼貪。 象, 非論功議罪法。」帝是其言。 非,廷辨良久。 敕廷臣五日內陳方略。 督撫,小者兵備。 勢 迅欲自結於帝,數言事,皆中旨。 益張,與若麒盡把持山東事。 迅上疏頌二人廉能, 又言:「楊嗣昌死有餘戮,借久案以邀功, 當事任,罪累立至。 帝卽從其言。 迅本由嗣昌進,隨衆詆毀,時論訾薄之。 澳下吏削籍。 會順天府丞戴澳誣劾平遠知縣王凝命、嘉興推官 迅考選時爲掌河南道御史王萬象所抑, 當是時,軍興方棘,廷臣言兵者卽以爲知兵,大者推 於是上下諱言兵,章奏無敢及者。 迅累遷禮科都給事中。 陳新甲負罪不遑,移邊勞而錄廕, 陳新甲主款, 迅極言其弊,乞 因事劾罷萬 迅面 文德 斥其

至,破砦,迅闔門死之。 弟迓設砦自衞。 發罪,吏部上迅名。 尋以保舉高斗光爲鳳陽總督不當,謫國子博士,乞假歸。 迓短小精悍,馬上舞百斤鐵椎。 帝曰:「迅御前駁議,朕猶識之,可復故官。」未赴而 兄弟率里中壯士,捕剿土寇略盡。 及新甲誅, 京師陷。 命追論兵科不糾 迅家居,與 大清兵

列

海 逃還、論死緊獄 若麒劾黃道周以媚嗣昌。 0 李自成陷都城、出降。 歷職方郎中,新甲遣赴寧、錦督戰,覆洪承疇等十餘萬軍,獨

掠狀。 助陵工,淑泰又劾其召寇庇奸。帝責以挾私求勝,終不納 主故,力庇之。 欺。」帝責捷自陳。 用 奏。 獄 其私 繁多,乞敕刑官疏理,帝褒納之。流賊犯河南,追論先任巡撫樊尚璟罪,劾總兵鄧玘 淑泰 吏部張捷薦逆黨呂純如,淑泰極論其謬,幷論大學士王應熊朋比行私,刻捷徇應熊 范 ·人王維章撫蜀。言:「維章官西寧,坐加徵激變,落職閒住。 時中官張彝憲言天下逋賦至一千七百餘萬, 淑 言民貧盜起,逋賦難以督追,不從。給事 泰,字通也,滋陽人。崇禎元年進士。授行人。五年冬,擢工科給事中。 淑泰發其停匿章奏狀, 帝亦不究。 捷詆淑泰黨同伐異,帝不問。 時皇陵被毀,巡撫楊一鵬得罪。 中莊鼈獻、章正宸建言下吏、抗疏救之。 淑泰乃摭應熊納賄數事上之,應熊捐 請遣科道官督徵。帝大怒, 捷朦朧啓事 責撫按 上疏 應熊以座 明肆奸 陳刑 回

不 規其可久,徒倉皇於補救之術,非所以爲忠也。 十一年冬,上疏言: 「今以措餉故,至搜括借助。 陛下方以清節風天下,而乃條敍百官金 即行之而得,再有 兵事 一,能復 行 乎! 治

强,赴敵則弱 大賈大半旋歸。 錢於多寡之間,是教之貪也。 ;殺良冒功則强,除暴救民則弱。 內不安,何以攘外! 乞立寢其說。」又言:「强兵莫如 至借貸之說,尤不可行。 請明示法令,諸將能用命殺賊者,立擢爲大 京師根本重地,邇者物力困竭,富商 行法。 今之兵,索 餉則

破,死之。 十五年遷吏科, 詔贈太僕少卿,官一子。 典浙江鄉試, 事竣還家。 十二月,大清兵圍兗州, 淑泰竭力固守。

城

毋以降級戴罪,徒爲不切身之痛癢。」帝是其言。

將,否則死無赦。

年出按河南。 高名衡,字仲平,沂州人。 明年期滿,留再巡一年。 崇禎四年進士。 除如阜知縣,以才調興化,徵授御史。

副將 互許 王恭枵發庫 奏。 陳 十四年正 永 帝 福 以陷 背城 金百萬 万, 以 福蕃罪詔逮仙風,以襄陽兵備副使張克儉代。 而戰,斬首二千。 李自成陷洛陽,乘勝遂圍開封。 永 兩,募死 福 充總兵官都督威事,鎮守河南。 士殺賊。 遊擊高謙夾擊,斬首七百。 烝米屑麥, 執爨以餉軍, 巡撫李仙風時在河北,名衡集衆守。 賊解去。 克儉已前死難,即擢名衡右 凡七晝夜。 仙 風旣還,與名衡 仙風 馳還開封。 周

再圍 燦爛,自成大驚。會楊文岳援兵亦至,乃解圍去。西華、郾、襄、睢、陳、太康、商丘、寧陵、 帝南遷所重築也,厚數丈,內堅緻而疏外。 物 考城俱陷 之盛甲他藩,士大夫更富,蓄積充牣。自成攻之不能克,然欲得而甘心焉。十二月杪,賊 開封 是時,賊連陷南陽、鄧、汝十餘州縣,唐、徽二王遇害,名衡不能救。開封周邸圖書文 永福射自成,中其左目,礮殪上天龍等。自成大怒,急攻之。 賊用火藥放迸,火發卽外擊,翫瓳飛鳴,賊騎皆 開封故宋汴都,金

援開 逮定 諸軍,次於朱仙鎭。良玉走還襄陽,諸軍皆潰,啓睿、文岳奔汝寧。 黃澍等守 監陽、懷東晉軍,刻期渡河。 詔蘇京監延、寧、甘、固軍,越孫傳庭出關,王漢監平賊鎭標楚、蜀軍,同侯恂等急擊,王燮 保定、山東、河北、湖北諸軍務,並轄平賊等鎭援剿官兵。拔知縣蘇京、王漢、王燮爲御史。 封 國。 我以兵五千南渡,依河而營,引水環之。 十五年四月復至開封,三圍而不攻,欲坐困之。六月, 益 城 七月,河上之兵潰。督師丁啓睿、保督楊文岳合左良玉、虎大威、楊德政、方國安 堅。 中食盡,名衡、永福偕監 澤清以兵來援,諸軍並集河北朱家寨不敢進。 總兵許定國以晉軍次沁水,一夕潰去,寧武兵亦潰於懷慶,詔 司 梁炳、蘇壯、吳士講,同知蘇茂灼,通判彭 以次結八營,直達大堤。 帝詔釋故尚書侯恂於獄,命督 澤清曰:「朱家寨去開 韶山東總兵官劉 築甬道輸河北之粟, 士奇,

以餉 城 中。 贼兵已老,可一戰走也。」諸軍皆曰:「善。」乃以兵三千人先渡立營。 **賊攻之,**戰

三晝夜,諸軍無繼者,甬道不就,澤淸拔營歸。 日夜望傳庭出關,不至。

梁佳麗 衡兵部右侍郎, 兵破沂州,名衡 起,並溺死。 樓,坐雨絕食者七日。 南門以出,流入於渦水。 蒙京者,請決河以灌賊。 城中子女貨寶,猶豫不決。 旬,黃流驟漲,聲聞百里。丁夫荷鍤者,隨堤漂沒十數萬,賊亦沉萬人。 巨筏以待,而驅掠民夫數萬反決馬家口 如高岸。 賊圖 甲中州,羣盜心豔之,至是盡沒於水。 賊營直傅大堤,河決賊可盡,城中無虞。我方鑿朱家寨口,賊知,移營高阜, 「開封者三,士馬損傷多,積憤,誓必拔之。 賊浮艦入城,遺民俱盡,拔營而西。 夫婦殉難。 名衡辭以疾。 王燮以舟迎王,王從城上泛舟出,名衡等皆出。 雲京語名衡、澍,名衡、澍以爲然。 名衡、永福乘小舟至城頭,周王率其宮眷及寧鄉諸郡王避水棲城 聞秦師已東,恐諸鎭兵夾擊,欲變計。 即擢王漢右愈都御史,代名衡巡撫河南。 以灌城。 帝聞,痛悼。 城初圍 九月癸未望,夜半,二口並決。 圍半年, [時百萬戶,後饑疫死者十二三。 猶念諸臣拒守勞,命敍功。 周王恭枵募民築羊馬牆, 師老糧匱,欲決黃河灌之。 會有獻計於巡按御史嚴 茂灼、士奇 河入自北門, 名衡歸未幾,大清 天大 人餓不! 艨艟 堅厚 貫東 加 酮 能 以 連

又乘雪夜破妖僧智善。夜半渡河,破賊楊六郎。李自成圍開封,漢然火金龍口柳林爲疑兵, 字子房,掖縣人。崇禎十年進士。 除高平知縣。調河內, 擒巨寇天壇山劉二。

遣死士入賊中,聲言「諸鎭兵來援,各數十萬至矣」。 賊聞則驚走。

下拜。一 者輓以布。漢持刀直上,人服其勇。時賊氛日熾,帝每臨朝而歎漢前後破賊功,降旨優敍。 十五年春,以滅俸行取入都,與蘇京、王燮同召對,稱旨。命三臣皆以試御史監軍。漢 漢爲人負氣愛士。人有一長,嗟歎之不容口。僚屬紳士陳民疾苦,或言己過,則瞿然 用兵士卒同甘苦,人樂爲之死。好用間,賊中虛實莫不知。攻天壇山賊,山陡絕,登

岸,檄卜從善等夾攻之,斬首九十餘級,遂入汴。 弟,合千人。八月朔夜半,襲賊范家灘,斬一紅甲賊目。 鄂、鉅鹿壯士三百人,又取故治河內所練義兵及修武、濟源素從征剿者五百人,及親故子 **濱散,兵部空名使之。漢乃請自立標營兵千人,騎二百,報可。乃簡保營兵百餘人,募**郎 捷。巡撫高名衡謝病,即擢漢右僉都御史代之。漢乃廣間諜,收土豪,議屯田,謀所以圖賊。 兵救汴。至潼關,有詔漢巡按河南。 監平賊鎮標楚、蜀軍,與督臣侯恂南援汴。 時兵部奏援剿兵十萬,十之四以屬京、變,屬漢以其六。漢所監凡五萬九千,然大半已 時賊灌開封,漢聞,趣諸將自柳園夜半渡河,伏兵西 大張旗鼓為疑兵,追賊至朱仙鎮, 檄諸將合剿。 自走襄陽,督左良玉 連戰皆

語 爲 子皆戰 洩,超得 河 南總兵。 無 死。 何,劉超反永城。 爲備。 遊擊馬魁負漢屍以出,面如生。 以 私怨殺其鄉官 明年正月,漢 超、永城人、跛而狡、為貴州總兵、坐罪免。 御史魏景琦 入永城, 聲言招撫,爲賊所殺。 詔贈兵部尙書, 廕錦衣世百戶, 家三十餘 人, 懼罪, 參將陳治邦 逐據 上疏言兵計,陳新甲用 城 反。 、遊擊 建祠 漢 上疏 致祭。 連光耀父 請討,

而

超伏誅,傳首九邊。

樞 復社諸 速,緹騎橫索錢,汧 徐汧,字九一,長洲人。 生所稱維斗先生者也。 與廷樞斂財經理之。 生未期而孤。稍長砥行,有時名,與同里楊廷樞相友善。 天啓五 年,魏大中被逮過 當是時,浙、廷樞名聞天下 蘇州 济貸金資其行。 周順 廷 昌

之意 自 以 高 救 希注 錢龍錫貶官。 崇禎 罷 爲憂方大。」帝不 黜, 一外廷,防察之權輒逮閣寺,默窺聖意,疑貳漸萌。 元年,汧成進士,改庶吉士,授檢討。三年,廷樞 帝詰責汧。 倪元璐,道周同年生,請以己代謫,帝不允。 聽。 浙曰:「推賢讓能,蓋臣所務;難進易退,儒者之風。 汧尋乞假歸。 還朝,遷右庶子,充日講官。 萬一 舉 應天鄉試第一。 土 汧上 風 疏頌道周、元璐賢,且 日賤,宸嚮日移,明盛 間 者陛下委任 中允黃道周

警、去偏黨爲言。而安遠侯柳祚昌疏 往 社楊廷樞、顧杲諸奸狼狽相倚。 浒移疾歸 社之喪亡,由朋黨相傾,移書當事,勸以力破異同之見。旣就 復 何語? 尤契。 四 乞置汧於理,除廷樞、杲名,其餘徒黨,容臣次第糾彈。」時國事方棘,事亦竟寢。 年 奉 居久之,京師陷。 使 益王府,便道還家。 福王召汧爲少詹事 陛下定鼎金陵,彼爲討金陵檄,所云『中原逐鹿,南國指馬』 當是時,復社諸生氣甚盛,汧與延樞、顧杲、華允誠等 攻汧,謂:「朝服謁潞王於京口,自恃 浒以國破君亡,臣子不當叨位。 一職,陳時政七事,惓惓以化恩 東林巨魁,與復 且痛宗

赴 災者數千人。時又有一人儒冠藍衫而來,躍虎丘劍池中,土人憐而葬之,卒不知何 事 者執廷樞,好言慰之。 明年,南京失守,蘇、常相繼下。 於是廷樞聞變,走避之鄧尉山中。 廷樞嫚罵不已,殺之蘆墟泗洲寺。 汧慨然太息, 作書戒二子, 投虎丘新塘橋下死。 郡人 久之,四方弄兵者羣起,廷樞負重名,咸指目廷樞 首已墮, 聲從項中出, 益厲。 人也。

門人迮紹原購其屍葬焉。

游子枋,字昭法,舉十五年鄉試。 防依隱,有高行云。

遷滎澤知縣,未任 壌 鹿善繼,字伯順,定興人。祖久徵,萬曆中進士,授息縣知縣。時詔天下度田,各署上 息獨 以下田報,日一度田以紓民,乃病民乎一調襄垣,擢御史,以言事謫澤州判官, 一而卒。 父正,苦節自礪。縣令某欲見之,方**糞田**,投锸而往。 急人之難,

三其家不惜,遠近稱鹿太公。

改元,復原官,典新餉。連疏請帑百萬,不報。 進。善繼持不可,以死爭。乃奪汝華俸二月,降善繼一級,調外。 書李汝華曰:「與其請不發之帑,何如留未進之金。」汝華然之。 帝怒,奪善繼俸一年,趣補 數請發帑,不報。 善繼端方謹慤。 由萬曆四十一年進士,授戶部主事。內艱除,起故官。 會廣東進金花銀,善繼稽舊制,金花貯庫,備各邊應用。 汝華懼,卒補銀進。 遼左餉中絕, 乃奏記尚 泰昌

繼亦告歸。 視關門,以善繼從。出督師,復表爲贊畫。布衣贏馬,出入亭障間,延見將卒相勞苦,拓地 百里,收復城堡數十,承宗倚之若左右手。在關四年,累進員外郎、郎中。 天啓元年,遼陽陷,以才改兵部職方主事。大學士孫承宗理兵部事,推心任之。 承宗謝事,善 及関

士容城舉人孫奇逢謀,持書走關門,告其難於承宗。承宗、善繼謀借巡視薊門,請入 先是,楊、左之獄起,魏大中子學洢、左光斗弟光明,先後投鹿太公家。太公客之,與所

募得 請 觐。 太公曰:「吾不懼也。」崇禎元年,逆璫旣誅,善繼起尚寶卿,遷太常少卿,管光祿丞事,再 年生,善繼又爲募得數百金,金入 歸。 數百金輸之, 奄黨 大譁,謂閣部將提兵淸君側,嚴旨阻之。 而 兩 人者則皆已斃矣。 八而順昌 又斃。 至是善繼歸,而 奄黨居近善繼家,難家子弟僕從相 **獄益急,五日一** 周 順昌之獄 追贓,搒掠 叉起。 甚 順昌, 酷。 望於道。 善繼 太公急 同

第 膵 **今**果死,吾復 ,伏闕訟父忠。 鶚等共守。 九 年七月,大淸兵攻定興。 何 慽 守六日而 」事聞,贈善繼大理 踰年亦卒。 城破,善繼死。家人奔告太公,太公曰:「嗟乎,吾兒素以身許國 善繼家在江村,白太公請入扞城,太公許之,與里居知州 卿,諡忠節,敕有司建嗣。 子化麟,舉天啓元年鄉試

衞 妮 命,欲 卒所據,而民出賦三十年,一鶚核除其害。 薛 竟其獄,卒直之。 鶚,字百當,由貢生爲黃州通判。 遷闖州 知州。 州北有田沒於番,吏派 荆王姬誣他姬耽世子,一鶚白其誣。 至是佐善繼城守,遂同死。 其 賦 於他戶,後田 奄人傳太 復 扇,爲

列傳第一百五十五 校勘記

軀,冒白刃而不悔,湛宗覆族,君子哀之。 豈非名義所在,有重於生者乎!氣節凜然, 要於 贊曰: 士大夫致政里居,無封疆民社之責,可遜迹自全,非以必死爲勇也。 然而忼既捐

自遂其志。其英風義烈,固不可泯没於宇宙間矣。

## 校勘記

〇一〕與膠州張若麒同年友善 張若麒、原作「張若騏」。本傳下文「若麒」、「若騏」錯出。本書卷二五

二楊嗣昌傳、明史稿傳一四六宋致傳、明進士題名碑録崇禎辛未科都作「若麒」,據改。下同。

ヘニン十五年四月復至開封 原脱「十五年」,據本書卷二四莊烈帝紀、懷宗實録卷一五崇禎十五年

四月丙午條、國權卷九八頁五九二三補。

